



BIBLIOTECA NAZ.
Vittorio Emanuele III

XVIII

G


35


NAPOLI

XVIII

G

35





EPITOME MANUALIS

MISSIONARIORUM ORIENTALIUM
AB ADMODUM R. P.

F. CAROLO FRANCISCO
A B R E N O

*Strict. Observantiae S. P. Francisci Theol.,
Fideique Controversiarum pra-Lectore
Generali olim Compositi;*

Nunc verò in compendium redacti,
& in Quatuor Partes divisi:

In quarum duabus prioribus Hæreses omnes
Orientalem Ecclesiam turpiter fædantes bre-
vi, sed clarâ methodo confutantur: In reli-
quis verò Casus omnes morales Missionarios
ipso Apostolicos respicientes continentur.

O P U S

*Studiosis omnibus valde utile: At ipsi-
met Missionariis prorsus necessarium.*

PARS SECUNDA

CONTINENS TRACTATUS


De Sacramentis in Genere.

De Sacramentis in Specie.

De Variis Orientalium erroribus.



ROMÆ, Typis Antonii de Rubeis. MDCCLXVI.
SUPERIORUM PERMISSO.



IMPRIMATUR,


Si videbitur Reverendissimo P. Mag.
S. Palat. Apost.

N. Episc. Bojanen. Vicesg.

IMPRIMATUR.

Fr. Joannes Benedictus Zuanelli Ord.
Prædicat. Sac. Palat. Apostolici
Magister.

*ft. Simplicis Vol. I. Lect:
Hyacinthi à Fruct. Majori.
Pertinet ad Centulsi
Archym.*



5
EPITOME MANUALIS
MISSIONARIORUM
ORIENTALIU

PARS SECUNDA.



TRACTATUS VI.

De Sacramentis in genere.

1.



E Sacramentorum natura, quæ Christi gratiam nobis veluti fontes amplissimi subministrant, varii apud Orientalem Ecclesiam errores inveniuntur, de quibus in præsentibus ut excindantur, agendum est, prius in communi, deinde in particulari.

CAPUT PRIMUM

An Legalium Observantia sit permittenda?

2. **A**Rmeni, & Abyssini, ac Jacobitæ apud Dominicum à Trinit. Biblioth. lib. 4. sec. 5. cap. 1. Legalia adhuc retinent, vel ex errore ab Ebione, & Cherinto deducto, aut ratione prave consuetudinis. Indagandum nunc est, utrum rectè operentur, & in suo more relinqui possint?

A 3.

SE.

S E C T I O P R I M A

Quaedam prænотantur.

3. **A**Dvertendum est I. Ex Doct. Subtil. 4. Dist. 3. Quæst. 4. §. *Ad argumenta principalia. Ad primum.* Legalia in triplici fuisse differentia, nempe moralia, Judicialia, & Cæremonialia. Moralia sunt, quæ ex sui institutione ad mōres componendos erant ordinata, ut sunt præcepta Decalogi duabus tabulis lapideis inclusa, & eorum, quæ ad Deum pertinebant, in priori; eorum verò, quæ ad Proximum, in posteriori contenta, Deique digito impressa, Deuter. 4. 13. Judicialia illa erant, quæ Justitiæ administrationem, & externam Politiam respiciebant, quorum aliqua ob sui æquitatem, non præcisè quæ talia, etiam in Dei Ecclesia retenta sunt. Cæremonialia denique ad Cultum Dei ordinabantur, in Sacrificiis, Oblationibus, Sacramentis, & rebus Deo dicatis, & observantiis Legalibus consistentia.

4. Notandum II. Ex eodem Subtil. loc. cit. §. *Sed quantum ad Circumcisionem.* Legalia quatrupliciter spectari posse. I. Quatenus utilia, & necessaria; ut Circumcisio ante Baptismi institutionem. II. Quatenus utilia quidem, non tamen necessaria, ut Circumcisio usque ad solemnem Evangelii promulgationem. III. Quatenus inutilia, non tamen vetita, quo pacto se habuisse Legalia, putant nonnulli Doctores, usque ad perfectam Ecclesiæ diffusionem. IV. Quatenus nedum inutilia, sed mortifera censentur, quo pacto se habuerunt post obitum saltem Apostolorum.

5. No-

1. Notandum III. Ex Seraph. Dor. 4. Dist. 3. Quæst. 3. Legalia tripliciter posse observari. I. Propter salutis necessitatem, ita ut censeatur, citra peccatum omitti non posse. II. Propter honestatem, quando scilicet retinentur, non quia spes ulla salutis in ipsis collocetur, sed ob alium finem honestum, ut V. G. ad denotandum, Legem Moyſis à bono, non à malo Deo prodisse, vel ad servandum ritum antiquissima familiæ, cujus insignia ex illo penderent. III. Ob Proximi infirmitatem, ne scilicet parvuli in Fide à Fide alienentur, existimantes Legem Mosaicam non servari, quia mala sit in se, & à malo Deo profecta. Quo pacto se gessit Apostolus Act. 16. 3.

S E C T I O S E C U N D A

Dicendum I. Legalia, ut talia sunt, cessasse; ita ut nullam ad salutem aternam consequendam utilitatem afferrant, & obligationem ad sui observantiam inducant.

6. **E** Vincitur I. Ex Scripturis: Nam Apostolus ad Gal. 3. 2. Cum D. Petrum objurgasset, quod Gentiles exemplo judaizare compelleret, inquit, rationem reddens: *Non justificatur Homo ex operibus Legis, nisi per Fidem Jesu Christi, & nos in Christo Jesu. v. 24. Credimus, ut justificemur ex Fide Christi, & non ex operibus Legis, propter quod ex operibus Legis non justificabitur omnis caro.* Cum opera Legis Mosaycæ damnasset, ut minimè justificantia, subdit. *Itaque: Lex Pedagogus noster fuit in Christo, ut ex Fide justificemur. At ubi venit Fides, jam non sumus sub Pedagogo. Omnes enim Filii Dei estis per*

Fidem, quæ est in Christo Jesu. Quicumque in Christo baptizati estis, Christum induistis. Et cap. 5. ejusdem epist. v. 2. Ecce ego Paulus dico vobis: quoniam si circumcidamini, Christus vobis non proderit. Et v. 6. quasi rationem reddens, subdit: Nam in Christo Jesu, neque circumcisio aliquid valet, neque præputium, sed Fides, quæ per Charitatem operatur; ergo Legalia non justificant: si servantur, Christus non prodest, adeoque omnino inutilia sunt ad salutem æternam consequendam; ergo cessarunt quoad obligationem.

7. Hinc Christus monet Apostolos, omnes cibos sibi oblatos indiscriminatim comedere, Lucæ 10. 7. 8. & Paulus confirmat ad Rom. 14. & 1. Corinth. 10. dummodo pusillorum absit scandalum.

SECTIO TERTIA

Idipsum ex Ecclesiæ Decretis evincitur.

8. **C**oncilium Jerosolymitanum Act. 15. ob controversias inter Christianos ex Gentilitate, ac Judaismo conversos de Legalium observantia exortas, collectum, sententiam decisivam tulit: Petrus quidem, ut supremus Apostolorum vertex ante illa verba: *Viri fratres &c. Nunc ergo quid tentatis Deum imponere jugum super cervices Discipulorum, quod nec Patres nostri, nec nos portare potuimus: sed per gratiam Domini nostri Jesu Christi credimus salvari quemadmodum, & illi &c.* Apostoli verò simul sumpti Decretum edentes, & promulgantes: *Visum est Spiritui Sancto, & Nobis, nihil ultra imponere vobis oneris, quam hæc necessaria, ut abstineatis vos ab*
inmo-

immolatis simulacrorum, & sanguine, & suffocato, & fornicatione, & quibus custodientes vos benè agetis.

9. Idcirco autem Idolothyta, Sanguis, & Suffocatum, ac Fornicatio vetita fuerunt, non quia censerent Apostoli cultum ullum, aut vim aliquam in hujusmodi abstinencia, aut in quocumque alio ritu Judaico existere; sed quia pro conciliandis Judæis cum Gentilibus, id fieri oportebat, ex August. lib. 31. Cont. Faust. Cap. 13. Hinc Idolothyta vetita sunt aut ratione scandali, aut quia professio erat falsæ Religionis, vel ad ipsam inductio: sanguis, & suffocatum ablata sunt, quia ab ipso Judæi magnopere aborrebant, ususque eorum à Deo ante Legem Mosaycam, Genes. 9. 4. 5. erat interdictus: Gentiles verò cenfebant, suffocatum esse Dæmonum cibum, ex Orig. Cont. Cels. Cap. 8. Fornicatio autem vetita fuit; tum quia non ad Cæremonialia, sed ad moralia pertinet, ex D. Thom. 2. 2. Quæst. 554. art. 2. bonis enim Matrimonii repugnat; tum quia Gentiles ab hoc scelere debuerant removeri, fornicationem non esse malam, utpote à jure civili minimè punitam, arbitantes. Quare sicuti nunc, deposita credulitate obligationis, aut utilitatis cæremoniarum, possent licitè illis uti, aut ab ipsis abstinere ob alios fines; ita tunc fecerunt Apostoli: cessante postea illo fine, præceptum illud Apostolicum de sanguine, & suffocato paulatim desit.

10. Concilium Antiochenum sub D. Petro An. Christi 57. celebratum, cujus meminit Innoc. I. epist. 18., & Synod. Nicen. II. Act. 1. in quo Christifideles primò Christianos appellari debere statutum est Can. 1., præ-

scribit Can. 2. nō quis baptizatus morē judaico circumcidatur; ergō omnia Legalia fuere vetita, cum omnium sit eadem ratio.

11. Florentinum in Decret. pro Jacobitis: *Sacrosancta*, inquit, *Romana Ecclesia* &c. *Illam Mosayca legis ciborum mundorum, & immundorum differentiam ad ceremonialia, asserit pertinere, quæ surgente Evangelio, transferunt, & efficacia esse deferunt.* Hinc in professione Armeno-latina, jussu Urbani VIII. edita, ab Armenis, aliisque Orientalibus emittenda, continetur: *Profitetur, quæ in Florentina Synodo definita sunt, videlicet, Legalia veteris Testamenti, seu Mosayca Legis Ceremonias, Sacra, Sacrificia, & Sacramenta, Domino Nostro Jesu Christo adveniente, cessasse, & post promulgatum Evangelium sine peccato observari non posse. Ejusdem etiam, Legis veteris ciborum mundorum, & immundorum differentiam ad ceremonialia pertinere, quæ, surgente Evangelio, transferunt.* Hanc Synodi Florentinæ decisionem sensus universalis Ecclesiæ confirmat, quæ numquam censuit se teneri ad Legalium observationem.

12. Idipsum antiquissimi Patres tenuerunt, ut Justin. Mart. in Dial. cum Triph. Epiphan. Hæres. 8. Athan. Orat. in illud; *Omnia mihi tradita sunt à Patre meo.* Chrysost. Homil. 39. in Genes. Basil. lib. de Spir. Sanct. Cap. 14. Cyril. Alexand. lib. 10. in Julian. Qui omnes Legalia, post Christi mortem, & solemnem Evangelii promulgationem, omnino cessasse, ac pro inde ad salutem esse superflua testantur; ergō non obligant.

S E C T I O Q U A R T A .

Adducuntur nonnullæ rationes.

13. I. **U**Mbra , & veritas, figura , & figuratum , perfectum , & imperfectum sunt incompatibilia : Legalia autem umbra erant , & figura Christi venturi , ipsiusque mysteriorum Religionis , I. Corinth. 10. 6. 11. Lex erat imbecillis , nec ad perfectum ducens , Ad Gal. 2. 10. , ad Hæbr. 7. 19. Lex autem Evangelica veritatem continet , Joan. 1. 17. , ad perfectum adducit , & perfectissimè salvat , ad Titum 3. 5. 6. ergò Lex Mosayca cessavit .

14. II. Lex particularis cedere debet universali pro salute Populorum omnium promulgata : Lex autem Mosayca pro natione tantum Hæbraica fuit lata , Evangelica verò pro omni natione , quæ sub Cælo est , nullâ exclusâ , Act. 1. 8. & Marci ult. 15. 16. ergò Lex Judaica omnino cessavit , & consequenter etiam Legalia omnia .

15. III. Cessante fine , media quoque cessant , cum ordinentur ad finem : Finis autem Mosaycæ Legis fuit Christus in carne positus , ad Rom. 10. 4. Legalia verò dispositiva ad Christum , quem præfigurabant . Hinc ad Gal. 3. 24. *Lex pedagogus noster fuit in Christo* ; ergò Lex Mosayca desinit obstringere , & omnino cessavit : optimè enim Hieronymus super hunc locum : *Priusquam Christi in toto Orbe Evangelium coruscaret , habuerunt suum fulgorem præcepta Legalia : postquam vero majus Evangelicæ gratiæ lumen effulsit , stellarum lumen absconditum est , & eorum radii*

caligaverunt ; ergò Legalia jam defuerunt, nec ad sui observantiam obligationem inducunt .

SECTIO QUINTA

Dicendum est II. Legalia nedum mortua , sed mortifera esse ; ita ut observare illa cum opinione , quod sint significativa , vel obligationem inducant , peccatum sit lethale .

16. **O** Stenditur breviter , Observantia hujusmodi esset falsæ Religionis protestativa , ex D. Thoma 2. 2. Quæst. 122. Art. 4. denotaretur enim , Christum non adhuc venisse , nec redemisse Genus humanum : Legalia enim præfigurant Christum venturum , non verò pro nobis jam mortuum , atque à mortuis suscitatum ; ergò est peccaminosa lethalter hujusmodi observantia . Secundò , quia observantia ista cum opinione obligationis Fidem , & Spem in Christum Dominum evertit : Spes enim in Legalibus poneretur , & virtus aliqua in iis censeretur in esse , quæ non poneretur in Christo , & consequenter medium tolleret simpliciter ad salutem necessarium , cum tamen Act. 4. de Christo Domino dicatur 29. 30. *Non est in alio aliquo salus : nec enim aliud est sub Cælo datum Homini bus , in quo oporteat nos salvos fieri ; ergò illa observantia esset graviter peccaminosa .*

17. Tertiò ; mortiferum piaculum est efficere , ac reddere Christum infructuosum , qui Joan. 10. 10. venit , ut oves suæ vitam habeant , & abundantius habeant : Observantia verò Legalium reddit Christum inutilem , & infructuosum , ex D. Paulo ad Gal. 3. 2. *Ecce Ego Paulus dico vobis , quod si circum-*
cida-

cidamini, Christus vobis nihil pröderit; ergo
læthaliter delinquant, qui cum opinione
salutis, & obligationis Legalia observant.

18. Tandem accedit, Ecclesiam sub ma-
joris Excommunicationis pœna veteri Chri-
stifidelibus. Rituum Judaicorum quemcum-
que usum, ex Elibert. Cap. 49. ex Leodicens.
Cap. 39. ex Melden. Cap. 37. & in Jure Ca-
non. Cap. *Omnes* 28. Quæst. 1.; ergo signum
est peccare læthaliter eos, qui talia obser-
vant, ut talia sunt: Excommunicatio enim
major numquam infligitur, nisi ob mortale
peccatum.

SECTIONE SEXTA

Solvuntur Objectiones contra primam Partem.

19. **O** Bji. I. Lex Mosayca erat in æternum
duratura, Gen. 17. 26. 27. & alibi
passim, & loquitur universaliter de tota Le-
ge: tum quia nulla datur oppositio inter Mo-
saycam, & Evangelicam, cum utraque sit à
Deo: tum quia Legis Mosaycæ non legitur in
Evangelio expressa revocatio; ergo adhuc
durat.

20. Resp. ne. ant., ad cujus probatio-
nem nego Conseq. Loca enim allata, vel
adducenda non de vera æternitate, sed de
tempore diuturno debent intelligi; quia ni-
mirum ad Christum disponebat, cujus my-
steriorum erat typus, & figura. Umbrae au-
tem, & figuræ cessant, adveniente veritate.
Hinc æternitas pœnarum infernalium, & gau-
diorum Paradisi, quæ dicuntur in æternum
duratura, intelligi nequit de pœna temporali
diuturna, ut Origenes censebat, eo quia cum
non sint figuræ, sed figuratæ, absolutè sunt
inter-

interpretanda, cum etiam in Evangelio confirmetur. Nec verum est non dari oppositionem inter Legem Evangelicam, & Mosaycam, datur quippè maxima, nempe signi, & significati, figuræ, & figurati, servitutis, & libertatis, viæ, ac termini. Nec est novum; unum bonum alteri ratione status opponitur. Matrimonium enim bonum, & sanctum est, & tamen opponitur Virginitati. Bona erat Lex Mosayca pro tempore suo: at Evangelio, ad quod ordinabatur, adveniente, desinit esse bona; & ad hoc quidem non opus erat expressa derogatione: noluit enim Deus ex semetipso solvere immediate Legem, quam ipse pro tempore determinato condiderat. Prodiit tamen pro Gentilibus, Deo inspirante, Decretum derogatorium Apostolorum, Act. 15. quod satis erat ad ejusdem Legis extinctionem: pro Judæis autem, etsi expresse non legatur, supponitur tamen, eoquía sequentibus temporibus, Hæretici existimati sunt, qui Legalia servassent, ut optime Subtilis Doct. Quæst. cit. 6. Respondeo, & ad tertium inter Principalia.

21. Obji. II. Christus Dominus & factis; & dictis docuit, non cessatura Legalia; ergò minimè cessarunt. Conseq. patet; Doctrina enim Christi in credendo, actio verò in operando nostra regula est. Prob. ant., nam de facto se circumcidi permisit, & alia multa Legalia observavit, ut comedendo Agnum Paschalem, Sabatha servando &c. dictis etiam docuit, nam Matth. 5. 17. *Nolite, inquit, putare quoniam veni solvere Legem, aut Prophetas: non veni solvere, sed adimplere;* ergò Christus non censuit Legem abrogandam; ergò Legalia non cessarunt.

22. Conf., quia enim Christus baptizari voluit, arguitur, nos quoque baptizari oportere; ergo quia Christus observavit Legalia, nos quoque servare eadem tenemur &c.

23. Resp. ne. ant., ad cuius probat. neg. Conseq. Idcirco enim se circumcidi permisit, non quia vellet, circumcisionem à nobis servari; sed ob alias rationes adductas à D. Thom. Part. 3. Quæst. 37. Art. 1. Seraph. Bona. 4. Dist. 3. Art. 3. Quæst. 1. Ut nimirum ostenderet, veram in se carnem habere, non ex materia cœlesti compactam: eam ex muliere habuisse, non de Cœlo datam: Ut se probaret de genere Abraham exortum, cuius signum in se habere voluit: Ut obedientiæ virtutem exemplo commendaret, quæ omnia impiissimi Hæresiarchæ erant negaturi. Dicitur autem venire, non solvere, sed adimplere Legem, quia, ut optimè August. Homil. de circumcis. Christus Legem implendo in radice abstulit, illa quippe posuit, quæ in Lege erant prædicata, & ideo ablata, quia impleta; uti de Sacramentis veteris Legis in adventu Christi impletis, & ideo ablatis, idem disserit August. lib. 19. Cont. Faust. Cap. 9.: ideo non destruxit Legem, quia bona erat, sed implevit, & implendo cessare fecit, post mortem ipsius mysteriis Redemptionis omnino completis.

24. Ad Confirmat. falsum est ant. non enim præcisè baptizamur, quia Christus fuit baptizatus; ipse enim multa fecit, non ut imitemur, sed ut erudiamur: Christus itaque baptizatus est, teste D. Maximo Taurinen. Episcop. Hom. in Epiph. ut suo Baptismo Jordanis fluentia sacraret, suumque purificaret Baptistam, ut, vel facto suo Baptismo

num instituerit, juxta D. Thom. 3. Par. Quæst. 66. Art. 2. vel instituendum designaverit, uti docet Subtilis 4. Dist. 3. Quæst. 4. & ob alias rationes.

25. Obji. III. Ex hoc, quod Legalibus Evangelium successerit, non arguitur Legalia fuisse abrogata; ergò non cessarunt. Prob. ant. Ex hoc, quod Lex scripta Legi Naturali supervenerit, non arguitur Legem Naturalem cessasse: verè enim permansit cum suis Sacrificiis, Ritibus, & Sacramentis; ergò similiter. Prob. Conseq. Nam sicuti Lex Evangelica, utpote perfectior, nata est Mosaycæ succedere, ita Mosayca Naturali; ergò sicuti Mosayca stabat cum Naturali, ita Evangelica cum Mosayca stare poterit.

26. Deindè Legalia præter Christum, ejusque mysteria jam verificata, præfigurabant alia jam de Ecclesia Militante, & triumphante nondum posita, sed ponenda, ut V. G. Circumcisio, quæ Spiritus à sensualitate divisionem significat, & innuit Paulus ad Collos. 2. 11., ergò cum adhuc rationem, figuræ, & typi retineant, robur suum habent, & servari possunt.

27. Resp. ne. ant., & Conseq. probat. non enim præcisè ob imperfectionem Mosaycæ Lex cessavit, Evangelica adveniente; sed quia ista supponit Christum venisse: illa autem venturum tantummodo prænunciabat; illa servitutis, hæc libertatis est; & propterea, Evangelio coruscante, debuit extingui. Lex autem Naturæ, & Scripta non ita: sed tantummodò ratione majoris, vel minoris perfectionis in eodem genere præfigurative, opponebantur, additis solummodo ceremoniis, Ritibus, & Sacrificiis, Cultuque Dei
magis

magis explicito, & utraq̃ ad Christum venturum tendebat, nec erat typus, figura, umbraque Mosaycæ, sed ipsi tantummodo præsupponebatur, velut fundamentum, & propterea etiam Gentilibus communis, qui istam servantes Deo placuerunt, ut Job, Cornelius, Centurio, & alii.

28. Ad Conf. neg. Conseq. Legalia enim utique multa præfigurabant non adhuc in actu posita, sed futura, non tamen præcisè ut Legalia, sed qua signa tantum futuri: quatenus enim ut purè Legalia sunt, ad Christum tantum, ejusque mysteria præfiguranda dirigebantur: quæ cum reipsa evenerint, vim figuræ amiserunt, & propterea cessarunt.

SECTIO SEPTIMA

Solvuntur Objecta contra secundam Partem.

29. **O** Bji. I. Qui nunc Legalia non observat, malè agit, ex Apost. ad Gal. 5. 3. dicente; *Testificor autem rursus circumcidenti se, quoniam debitor est universæ Legis faciendæ; & ad Rom. 2. 25. Circumcisio quidem prodest, si Legem observes: Si autem prævaricator Legis sis, Circumcisio tua præputium facta est; ergo qui non observant Legem Mosaycam peccant, & malè agunt, sicut benè agunt eam observantes, cum eos juvet; ergo Lex Mosayca non est mortifera eam observantibus.*

30. Resp. neg. ant., ad cujus probat. nō conseq. Apostolus enim eo loco tantum vult, eos, qui putant ex conscientia erronea, Legem Mosaycam vigere, & circumcisionis onus

onus adhuc esse sub præcepto, teneri ad universam Legem servandam, eo pacto, quo, qui suscipit Baptisma, ad observantiam totius Legis Evangelicæ se obstringit; Paulus ergo solummodo reprehendit eos, qui, tametsi circumcisionem, ut obligantem susceperant, asseriebant non teneri ad cæterorum præceptorum observantiam, quod utique est falsum: eadem enim conscientia erronea ad utrumque tenebantur, quam quidem sub peccato obstringere, docent Theologi, cum D. Thomas 1. 2. Quæst. 19. art. 5. & 6. non verò Legem Moysaycam omnes obstringere, quod quidem toto illo capite, alibique Paulus condemnat, veluti eversum salutis, quam in Christo consequimur. Eodem pacto est intelligendus Paulus ad Rom. 2. ubi vult, tantummodò Judæos circumcissione gloriantes, qui puram Legis literam servassent, absque mandatorum observantia, Dei intuitu, non Hominum, custodita, nihil juvasse, traditque regulam universalem, nempe observantiam Legis purè externam sine recta intentione, & solummodo intuitu Hominum nihil prodesse, ut optimè Maximus Turinen., vel quisquis alius apud Hieronym. tom. 4. At hoc nihil ad rem facit, cum nos loquamur de Legalibus post solemnem Evangelii promulgationem, & quidem quoad Christianos Legi Evangelicæ obstrictos.

31. Obji. II. Petrus, & Paulus etiam post solemnem Evangelii die Pentecostes promulgationem Legalia servarunt, & servari à Christianis fidelibus permiserunt, ut patet Act. 21. 3, & ad Gal. 2. ergò Legalia non sunt mortifera, sicuti mortifera erat Fornicatio, & Idololatria, quam Apostoli numquam permiserunt.

32. Resp.

32. Resp. Cum Doct. Subtili. 4. Dist., & Quæst. Superius cit. §. *De singulis* conc. ant., & neg. conseq., nam post solemnem die Pentecostes Evangelii promulgationem, etsi Legalia quoad utilitatem, & obligationem essent evacuata, minimè tamen erat Judæis illa servare interdictum, dummodo nullam in his spem collocassent, & uti necessarium Religionis ritum non existimassent. Hæc autem prohibitio absoluta usque ad vicina tempora dilata est, ne Synagoga à Deo ipso profecta statim, & cum verecundia cessaret, sed paulatim, & cum honore, ut inquit Augustinus, in sepulchro conderetur: & proinde, sicuti tunc non peccarunt Judæi servando, ita nec Apostoli permittendo, cum id facerent animo Fratres lucrandi, non intuitu Religionis. Cum verò Evangelium ubique diffusum est, & Ecclesia crevit in Virum perfectum, tunc, Synagoga Sepulchro condita, Legalia, ex Ecclesiæ Decretis, ipsiusque sensu communi, ceperunt esse mortifera. Petrus autem fuit à Paulo reprehensus, non quia præcisè Legalia servaret, vel eo tempore id Judæis permetteret; sed quia exemplo suo videbatur, Gentiles cogere ad Judaizandum, vel quia nimium Judæos timebat, quos corrigere debuisset, nec simulare decebat Supremum Pastorem, sed agere apertè.

33. Quæres I. An Orientales Sectarii, qui cuperent ad Christum converti, & egre Legalia relinquerent, possent permitti in eis permanere?

34. Resp. Quoties ipsi nullam spem salutis in iis ponerent, nec ritum facerent Religionis, sed ob alios fines intenderent. politicos citra scandalum, posse permitti; secus verò si cul.

si cultum Religiosum in illis ritibus ponerent, vel spem aliquam collocarent in ordine ad vitam æternam. Melius tamen ageretur, Sedem Apostolicam, si facultas suppeteret, consulendo.

35. Quæres II. An Catholici comedentes sanguinem, & suffocatum læthaliter delinquant?

36. Resp. negativè: quidquid in oppositum Græci Schismatici adversus Latinos astruant, eos Legis Apostolicæ Act. 16. editæ violatores, & propterea Ecclesiæ refractarios æverbè conclamantes. Ratio autem est apertissima: quia nimirum, cessante fine Legis in universali, cessat Lex, cap. *Cum cessante* de Appellat. & firmant communiter DD., eo quia finis est Anima Legis, ut optimè Jason. in *L. Petens* de Pac. cessavit autem finis, ob quem Lex illa de abstinendo à sanguine, & suffocato ab Apostolis fuit condita; ut nimirum Gentiles, & Judæi ad Christum conversi, facilius inter se cum tranquillitate viverent, Lex Judaica de abstinencia à sanguine, & suffocato ab ipsismet Gentilibus servaretur, & Fornicatio vetaretur, quæ apud ipsos censebatur licita, quod quidem magnum Judæis scandalum ingerebat. Antiqua quippè Synagoga paulatim desit, cum honore sepulta; Ecclesia verò ex Gentilibus confecta ad culmen dignitatis, & amplitudinis emerfit.

37. Lex positiva humana abrogatur per contrariam consuetudinem legitime introductam: Consuetudo enim habet vim Legis, Cap. *Consuetudo* Dist. 1., Cap. *in His* Dist. 11. Sicut per unam Legem abrogatur altera, si per legitimum feratur Legislatorem: at introducta est legitima consuetudo comedendi
san-

sanguinem , & suffocatum in Ecclesia Latina , cum id factum fuerit , scientibus , & videntibus , nedum inferioribus , sed Supremis Ecclesiæ Prælatiſ , nempè Romanis Pontificibus , qui res alias , eſſi minimas curarunt . iſta verò comestio ſecundum ſe mala non eſt , ſed indifferens ; ergò Lex illa de ſanguine , & ſuffocato fuit abrogata .

38. Nec deſuit juſta Cauſa , ne ſcilicet anſa præberetur Manichæis Eccleſiam Latinam reprehendendi , quaſi ſanguinem , & ſuffocatum uti res ex natura ſua malas rejiceret . Eccleſia quidem Orientalis hæc diſteria contemnendo benè egit : at nec ſe malè geſſit Occidentalis illis occurrendo , & ora Hæreticorum obſtruendo , ne loquerentur iniqua .

39. Canones in oppoſitum à Græcis producti nihil evincunt , cum per legitimam conſuetudinem fuerint antiquari : Eccleſia enim moderna eadem eſt , quæ antiqua , eademque pollens authoritate ; adeoque , ſicut antiqua edere , ità moderna poteſt abrogare Leges , cum ſoli Hæretici reſpuant modernam , antiquam ſolam venerantes Eccleſiam . Lex verò Divina Gen. 9. 4. , & Levit. 17. 14. cum ſit cæremonialis , poſt Evangelii ſolemnnem promulgationem , minimè obſtringit . Sicuti ergò Græci benè agunt Legem illam ſervantes , ita Latini minimè ſunt reprehendendi , quā juſtis moti rationibus minimè illam ducunt cuſtodiendam : Circa enim agibilia , temporum , locorum , & circumſtantiarum varietatem , prudenter Eccleſia perpendit ,

CAPUT II.

*Virum Sacramenta Novæ Legis sint gratiæ
effectiva, & quidem ex opere
operato?*

40. **S**acramenta fuisse à Christo Domino instituta, nemo etiam ex Hæreticis in controversiam advocat, eaque Hominibus esse salutaria, ipsemet Isaias in Symbolo prævidit: nam cap. 12. 3. Legis novæ Fidelibus gratulans: *Haurietis*, inquit, *aquas in gaudio de fontibus Salvatoris*, & *dicetis in illa die: confitemini Domino, & invocate nomen ejus*. Activitatem solummodo, & numerum, si de ipsis in genere sermo sit, Sectarii nonnulli Orientales in controversiam vocant, de quibus præsentī capite disputabitur.

SECTIO PRIMA

Nonnulla prænotantur.

41. **N**otandum est I. Sacramenta posse dupliciter Gratiā causare, nempe per modum Causæ principalis, & instrumentalis. Primò modo contigeret, si hujusmodi virtutem Deus Sacramentis communicasset, itaut ipse in eorum effectus nullum alium influxum haberet, quam Causæ universalis, & primæ, uti concurrit cum omnibus causis naturalibus ad earum effectus producendos, eisdem non minus, quam Deo adscriptos. Secundo autem modo contigeret, quoties Deus revera ut causa præcipua effectus Sacramentorum produceret; at in eorum productione uteretur

retur signis sensibilibus, veluti instrumentis, eo pacto, quo etiam in naturalibus animadvertimus, ab igne calorem ad comburendum, ab artificibus fabrilia sua ad artefacta efficienda adhiberi, quibus quoque in suo genere opus artefactum verè adscribitur.

42. Notandum II. Aliud esse Sacramenta effectus suos producere ex opere operato, aliud ex opere operantis. Primum contingit, quando effectus producitur virtute signi ipsius, non verò ex merito, aut precibus operantis vel recipientis, dummodo obex non inveniat. Secundum verò accidit, quando effectus ponitur non virtute signi, sed ob merita, & preces operantis, vel suscipientis, uti erant Christi, ac Sanctorum miracula, & Sacramenta Veteris Legis in ordine ad sanctificationem. Armeni, alique Etherodoxi Orientales, ut eis adscribit Guido Carmelita in suo Hæret. Cathal., putant in Sacramentis nullam esse vim sanctificandi, nisi ex merito suscipientium, ipsaque nihil aliud esse, quam puras notas Fideles ab Infidelibus distinguentes, ita edocti à veteribus Sectariis, quorum meminit Epiphan. Hæret. 57. Theodoret. lib. 4. de Hæret. Fabul. cap. 10. Damascen. lib. de Hæref. Quas pravas opiniones quoad aliqua saltem Sacramenta Sectarii Occidentales imprudentes sequuntur.



S E C T I O S E C U N D A

*Dicendum est Sacramenta Nova Legis
Gratiam producere ex opere
operato .*

43. **O** Stenditur ex Scripturis : Nam Marci ult. 16. ubi Baptismi fit mentio , dicitur : *Qui crediderit , & baptizatus fuerit , salvus erit .* Joannes 3. 5. *Nisi quis renatus fuerit ex aqua , & Spiritu Sancto , non potest introire in Regnum Dei .* Act. 2. 38. *Pœnitentiam agite & baptizetur Unusquisque vestrum in nomine Jesu Christi , in remissionem peccatorum vestrorum , & accipietis donum Spiritus Sancti .* De Pœnitentiæ Sacramento habetur Joan. 20. 23. *Accipite Spiritum Sanctum , quorum remiseritis peccata , remittuntur eis : & quorum retinueritis , retenta sunt : Scimus autem , numquam deleri peccata sine infusione gratiæ ; igitur si Baptismus , & Pœnitentia , quatenus Symbola sunt , & signa , peccatum remittunt ; ergo signa sunt gratiæ causativa , cum effectum suum fortiri dicantur secundum se , prout contradistinguuntur à dispositione subjecti .* Sic de Eucharistia Joan. 6. 16. *Caro mea verè est Cibus , & Sanguis meus verè est potus , qui manducat meam Carnem , & bibit meum Sanguinem in me manet , & ego in eo .* Ut autem figura à figurato distingueret , ibidem ait ; v. 59. *Hic est panis , qui de Cælo descendit . Non sicut manducaverunt Patres vestri Manna , & mortui sunt : Qui manducat hunc panem , vivet in æternum .* Ante verò mortis minas comedere renuentibus præmiserat v. 54. *Nisi manducaveritis Carnem Filii*
Homini-

Hominis, & biberitis ejus Sanguinem non habebitis vitam in vobis: Deinde cibi istius confirmans efficaciam, v. 55. Qui manducat meam Carnem, & bibit meum Sanguinem, habet vitam æternam, & ego resuscitabo eum in novissimo die. Quæ promissiones, neque de Symbolis Veteris Testamenti, neque de pura dispositione requisita ad Symbola Novi possunt intelligi: sed ipsismet Symbolis contradistinctis, à præviis dispositionibus, & secundum se spectatis, & quatenus à subjecto præparato distinguuntur, convenire dignoscuntur; ergo ex Divinis Scripturis Sacramenta Novæ Legis secundum se conferunt Gratiā, adeoque ex opere operato.

SECTIO TERTIA

Idipsum ex Ecclesiæ Decretis, & Patrum authoritate ostenditur.

44. **N**icænum primum Oecumenicum apud Gelas. Cizicen. lib. 3. cap. 4. uti refert Bail. tom. 1. Par. 3. Concil. Nicæn: ubi nonnulli Canones ejusdem recensentur, quod *Doctrina de Baptismo*, inscribitur, hæc habet: *Baptisma nostrum non oculis corporeis considerandum est, sed mentis oculis: Aquam vides, considera virtutem Dei in aquis absconditam: & infra: Descendit quidem is, qui baptizatur, peccatis obnoxius, servitutis corruptione detentus: ascendit autem ab ea servitute, & peccatis liber hæres, & cohæres Christi. Quid clarius dici potest?*

45. Synodus Constantinopolitana I. sub Damaso, & Theodosio Seniore Augusto adversus Macedonii blasphemias celebrata, in
Pars II. B Sym.

Symbolo ait : *Credimus unum Baptisma in remissionem peccatorum .*

46. Florentinum pariter Oecumenicum , cui Armeni quoque assensum præbuerunt , in Instru. Armen. §. Quintò , postquam definiisset , septem esse Sacramenta , quæ ibi enumerat , subdit : *Quæ multum à Sacramentis differunt Antiquæ Legis : illa enim non causabant Gratiâ , sed eam solum per Passionem Christi dandam esse figurabant : Hæc vero nostra & continent Gratiâ , & ipsam dignè suscipientibus conferunt ;* Si igitur Sacramenta nostra continent Gratiâ , quam non continebant antiqua , quam solummodo præfigurabant ; ergò eam causant instrumentaliter . Cum verò dicitur : *dignè suscipientibus* , satis innuitur , causalitatem Sacramentorum in dispositione suscipientis minimè consistere , sed eam solummodo præsupponere ; quo pacto multa Adversariorum argumenta evanescunt : nam Scripturæ , & Concilia requirunt quidem ex parte suscipientis Fidem , & alias dispositiones : at asserunt , non sufficere ista , sed requiri ipsamet Sacramenta , ut justificationis gratiam consequamur ; ergò causalitas ipsorum non oritur à dispositione , sed ab ipsismet signis Sacramentalibus .

47. Patres in idipsum conspirant . Clemens Alexand. Lib. 1. Pedag. Cap. 6. de Baptismo ita loquitur : *Multis modis vocatur hoc opus Gratiâ , Illuminatio , Perfectum , & Lavacrum , Lavacrum quidem , per quod peccata abstergimus : Gratiâ autem , qua remittuntur pœnæ , quæ peccatis debentur : Illuminatio autem , per quam sanctam illam , & salutarem lucem speculamur , hoc est per quam ; quod est Divinum , perspiciamus : Perfectum autem dicimus ,*

cimus, cui nihil deest, quid enim ei desit, qui Deum novit? Gregor. Nissen. lib. de Baptis. Baptisma, inquit, peccatorum expiatio est, remissio delictorum, renovationis, & regenerationis Causa. Cyril. Jerosol. Cathec. 3. in Præfat. Magnum est sanè propositum hoc Baptisma captivitatis liberatio, peccatorum remissio, Animæ regeneratio, currus ad Cælum. Cyril. Alexand. lib. 2. in Joan. Cap. 42. Quemadmodum viribus ignis intensius aqua, calefacta non aliter urit, quam ipse ignis: Sic Spiritus Sancti operatione, qua baptizati corpus aspergitur, reformatur ad Divinam virtutem, & potentiam: Et propterea in Apol. ad Theodos. scitè ait: *Justificamur per Sanctum Baptisma, mortem Christi annuntiantes.* Epiphan. in Ancor. *Aqua non in uno Hominis membro fiunt, sed totum Hominis Corpus purificant, & circumcidunt, & ab omnibus malis liberant.* Qui lustrare cupit plures alias Patrum autoritates ex Græcis, Latinisque haustas, Jodocum Coccium adeat in Thef. Cathol. tom. 2. lib. 5. ex quibus habetur, Baptismum, & consequenter alia Sacramenta, non ratione dispositionum antecedentium, quas in Adultis requirunt, & præsupponunt, sed ipsiusmet Sacramenti Animas renovare, sanctificare, regenerare, in adoptionem vocare Filiorum Dei, Hæredes facere vitæ æternæ; ergò conferunt gratiam ex opere operato.



SECTIO QUARTA

*Adducuntur quoque nonnullæ rationes
ad ipsum comprobandum.*

48. I. **N**onnulla Sacramenta, ut Baptismi, & Pœnitentiæ applicantur in mortis discrimine constitutis, ne in æternum pereant, & quidem à quocumque Ministro conferantur administrationis capaci, ex Florent. in Instruct. Armen., Carthag. IV. Can. 100., & Triden. sess. 14. Cap. 7. Si autem nihil prorsus agerent, hoc esset ineptissimum; ergo &c.

49. II. Omnia Sacramenta proprium Ministrum habent, ut illicitè ab aliis conferantur, nisi in extrema necessitate, sicut in Baptismate contingit: in aliquibus verò determinatæ Personæ, talique ritu consecratæ ita exiguntur, ut, si opus Sacramentale ab aliis fiat, irritum penitus, & inane censeatur; quo pacto Eucharistia, & Pœnitentia à Solis Sacerdotibus: Ordinatio verò, & Confirmatio à solis Episcopis conficiuntur: hoc verò ridiculum esset, nisi Sacramenta ex Divina institutione virtutem aliquam haberent, Gratiâ, & Dona Cœlestia conferendi: operari enim merito Agentis non est proprium Sacramentorum privilegium, cum interdum Laici Sacerdotibus sint sanctiores, & Deo acceptiores; ergo Sacramenta aliquid agunt, & quidem ex opere operato.

50. III. Sacramentorum Ministri non agunt nomine proprio, sed Dei, cujus vices gerunt; & propterea, licet mali sint, & improbi, adhuc validè operantur, si necessaria, ex institutione requisita adhibeant, ut optimè

Au-

August. Trac. 6. in Joān. ante med. Si autem Sacramenta nullum in Gratiam influxum haberent, vel solummodo ex opere operantis, nullatenus referret, an alieno nomine operarentur; ergo cum effectus ipsis adscribatur ministerialis, ex Apost. 1. Corinth. 4. 1. 2. *Sic nos existimet Homo, ut Ministros Christi, & Dispensatores mysteriorum Dei: Hic jam queritur inter Dispensatores, ut fidelis quis inveniatur?* Profectò influxum habent erga effectus Sacramentales ex ipsamet natura signi, stante Divina Institutione, provenientes; ergo Sacramenta agunt ex opere operato.

§ 1. IV. Materia, & Forma, idest res, & verba, quibus, ex Florentino in Instruct. Armen., Sacramenta conficiuntur, ita sunt inter se distincta, ut quod uni Sacramento deservit, alteri sit omninò inutile, ac vacuum; & ita ad Sacramenta conficienda requiruntur, ut nisi res illæ, verbaque determinata adhibeantur, Sacramenta minimè conficiantur, nec Gratia conferatur. Hinc Nicænum I. jubet, rebaptizari ac reordinari Can. 18. Paulianistas Hæreticos, in forma Ecclesiæ minimè initiatos; quod de aliis Hæreticis minimè permiserat ad Ecclesiam revertentibus, legitimè baptizatis, atque ordinatis, Can. 8. Hoc autem esset stultissimum, nisi Sacramenta Gratiam verè, ut signa sunt practica, efficerent, cum Deus nullis alligetur ex se rebus corporeis ad sua opera efficienda; ergo Sacramenta Gratiam producant ex opere operato.



S E C T I O Q U I N T A

Solvuntur Argumenta in Oppositum.

52. **O** Bji. I. Divinæ Scripturæ totam vim justificandi Fidei tribuunt actuali ex Mar. ult. 16. *Qui crediderit, & baptizatus fuerit salvus erit; qui vero non crediderit condemnabitur*, Et innumeris aliis locis, in quibus inculcatur Fidei necessitas, cui omnia adscribuntur; hinc videmus, Cathecumenos salvari etiam citra Baptismum, ut de Valentiniano II. Augusto scribit Ambrosius; ergo Sacramenta non sunt Gratiæ signa ex opere operato, sed solummodo ex opere operantis.

53. Resp. ne. ant., ut patet ex parvulis, qui citra Fidem cum Baptismate salvantur, & de Adultis, qui cum Fide absque Baptismo, vel ejus votō, si culpabiliter careant, damnantur: Scripturæ igitur requirunt quidem Fidem, ut præviam dispositionem, & propterea eā destituti minimè justificantur: at præter ipsam Baptismum quoque exigunt ut causam veram justificationis: *Nisi enim quis renatus fuerit ex aqua, & Spiritu Sancto, non intrabit in Regnum Cælorum*, uti dicitur Joan. 3. 5. Idcirco autem Marci ult. post verba *non crediderit*, minimè additur, *nec baptizatus fuerit*, quia erant superflua, cum ex negatione dispositionis, arguitur etiam negatio effectus in Sacramento, non defectu virtutis in ipso, sed dispositionis ex parte subiecti. Valentinianus autem Augustus juxta Ambrosium fuit salvatus, quia Baptismum in re suscipere vetitus, morte interveniente, illum in voto suscepit cum debitis dispositionibus.

54. Obji.

54. Obji. II. Ex eo quia Scripturæ afferant, per Baptisma, cæteraque Sacramenta, nos renasci, renovari, regenerari, non arguitur in ipsis ulla in Gratiâ Causa, nisi per Fidem, & ex opere operantis; ergo ex Scripturis pro Catholicis nihil colligitur. Prob. ant., ex 1. Corinth. 4. 15. ubi dicitur: *In Christo Jesu per Evangelium ego vos genui*; & ad Gal. 4. 19. *Filioli mei, quos iterum parturio, donec formetur Christus in vobis*: Et tamen ex hoc loquendi modo Scripturarum, non arguitur in sermone, & prædicatione Pauli, nisi Causa, qua Fides excitatur, non verò Gratia immediatè causatur; ergo etiam nihil aliud colligitur ex aliis locis Scripturæ, quibus Homines dicuntur regenerari, & renasci per Sacramenta, nisi excitatio Fidei per signa illa, quæ exhibentur; quæ quidem sunt nata Fidem excitare, sicut verba, cum habeant similitudinem, quamdam cum rebus, quas significant, & propterea inter se maximè distinguuntur, & quod uni deservit, alteri Sacramento penitus est inutile.

55. Resp. ne. ant., & conseq. probat. & disparitas est apertissima: Evangelium enim ex se natum est solummodo Fidem excitare, utpote sermo Divinus; & propterea illa parturitio Fidelium, quam sibi adscribit Paulus, non potest intelligi, nisi de illa, quæ fit, Christum Evangelizando, ipsiusque Fidem excitando, non verò immediatè justificando: dicuntur tamen parturiri, quia, cum Fides sit Justificationis radix, & fundamentum, habitâ Fide, cætera quoque dona induci possunt, non solum initiativè, dispositivè, ac radicaliter, quod fit per Fidem, sed pro-

prie, verè, formaliter per Gratiā sanctificantem, quam Sacramenta producant. Neque alio pacto intelligi potest Fides purificare, sanctificare, mundare; alioquin Charitas superveniens esset omnino superflua, cum tamen illa sit, quæ nos Dei Filios, ac Templum efficit, juxta Apostolum ad Rom. 5. 5. *Charitas Dei diffusa est in cordibus nostris per Spiritum Sanctum, qui datus est nobis.* Signa autem Sacramentalia non sunt ex se nata Fidem excitare, nisi valde remotè, & quidem scientibus mysteria, quæ ab ipsis indicantur, ac pro inde, cum Fidem excitare non possint, nisi remotissimè, & respectu tantum eorum, qui signa intelligunt, propterea ex ipsis non valet illatio: hinc Sacramenta infantibus, rudibus, stultis, linguæ ignavis, & fræneticis interdum conferuntur, qui hujusmodi mysteria intelligere nequaquam possunt, & tamen profunt illis per virtutem Christi: unde admirans Augustinus Tract. 80. *Unde, inquit, tanta virtus aquæ, ut corpus tangat, & cor abluat?*

56. Obji. III. Patres totam Justificationem soli Deo adscribunt, non signis Sacramentalibus; ergo Gratiæ non sunt causativa ex opere operato. Conseq. patet. Prob. ant. nam Nissenus Orat. de Baptis. cum ejusdem effectus commendasset, subdit: *Hoc autem Beneficium non aqua largitur; esset enim omni creatura sublimior, sed Dei præceptum, & Spiritus, qui mysticè ad nostram libertatem venit accessus; aqua verò subservit ad ostendendam purgationem.* Basil. de Spirit. Sanct. Cap. 15. *Itaque si est Gratia in aqua, non est ex ipsius aquæ natura, sed ex Spiritus præsentia.* Nazianz. Orat. 40. *Duabus rebus constat*

stat Baptismus, aqua scilicet, & spiritu: illa visibili, & corporeo modo accepta, hoc vero incorporeo, & invisibili concurrente; illa typica, hoc vero & intimos Anima sinus purgante. Ambros. lib. 1. de Spir. Sanc. *In Baptismo invocatur Trinitas, ut invisibiliter operetur per se, sicut visibiliter per ministrum.* Hierony. in Cap. 4. Isaïæ: *Homo aquam præbet: Deus autem Spiritum Sanctum.* August. lib. 19. Cont. Faust. cap. 16. *Quid sunt quæque Corporalia Sacramenta, nisi quadam verba visibilia?* Ergò ex Patribus Sacramenta Novæ Legis nullam habent causalitatem, sed mera sunt signa indicativa, non practica.

57. Resp. ne. ant., ad cujus probat. neg. Conseq. Illæ enim Patrum loquutiones nihil aliud indicant, quam Sacramenta non esse Gratix causas principales. Nissenus ergò dicit optimè, Beneficia in Baptismo collata ab aqua, nequaquam tribui ex natura sua, sic enim esset omni Creaturâ sublimior, sed solummodo ex Dei voluntate, & institutione. Bassil. Mag. nihil aliud intendit, quam res, & verba non habere ex se virtutem Gratix producendæ, quod nos fatemur; sed quatenus à Deo veluti principali agente per ministrorum actionem adhibentur, & moventur, adeoque instrumentaliter: alioquin quomodo Baptismus ab eodem eximiis adeò laudibus commendaretur? Nazianz. solummodo vult, visibile signum, ut præcisè tale, esse Typicum, quatenus significat exterius, quod principaliter à Deo fit interiùs: attamen quatenus Spiritum continet vivificantem Dei institutione inductum, asserit de ipso, mirabilia ab eo recensita operari, quod idem est, ac producere Gratiâ per modum Causæ in-

instrumentalis : ante enim dixerat : *Hæc Baptis-*
mi Gratia , & facultas &c. Uniuscujusque
Hominis peccatum purgans , easque obstructio-
nes , & maculas , quæ vitio contrahuntur , prorsus
abstergens . Ambros. hoc solummodo vult ,
 quod nos quoque dicimus , nempe Trinitatem
 invisibiliter , & per se , veluti causam
 principalem in Gratia productionem , visibi-
 liter per Ministrum , veluti per causam in-
 strumentalem influere , Symbolo applicato ;
 si enim nihil prorsus ageret , dici nequaquam
 posset , Trinitatem per Ministrum operari :
 & hoc pacto salvatur , Gratiam sola divina
 virtute fieri , & nihilominus per modum in-
 strumentum signum visibile aliquid agere ; alio-
 quin quomodo Ambrosius de iis , qui initian-
 tur mysteriis dicere potuisset : *Aqua est , qua*
Caro mergitur , ut omne abluatur peccatum ,
sepelitur illic omne vitium ; & super Lucam
 Cap. 22. Baptismum commendat ? Idipsum
 docet Hieronymus loco in object. cit. verè
 enim Minister aquam visibiliter præbet , ve-
 luti instrumentum Justificationis , Spiritus
 Sanctus datur à Deo , ut causa principali .
 Quoniam verò non dat Deus Spiritum San-
 ctum , nisi per aquam , optimè arguitur aliquis
 influxus instrumentalis aquæ in Gratiam , cum
 ly per causalitatem indicet , non meram præ-
 suppositionem , ut ipsismet Divinis Scriptu-
 ris instrumur . Augustinus nobiscum sentit ,
 dum asserit , Hominem præbere visibile Sa-
 cramentum , Deum invisibilem Gratiam ; cum
 his verbis significetur , Deum minimè Gra-
 tiam largiri , nisi per hoc visibile signum ;
 adeoque signum hoc aliquam causalitatem
 erga Gratiam exercere : alioquin si pura præ-
 sentia signi sufficeret , non magis unum , quam
 alte-

alterum Sacramentum ad quoscumque effectus producendos requireretur, quod aperte falsum est.

58. *Obji. IV. ratione:* Deus in Mundi Creatione nullo usus est instrumento; ergo etiam in ipsius renovatione per Sacramenta; cum in utroque se prodat Omnipotentem.

59. *II. Effectus Sacramentales sunt Ordinis supernaturalis,* Mundi Creatio in ordine naturali; ergo si in secundo casu nullo usus est instrumento, neque utitur in primo.

60. *III. Gratia, & cætera Dona in Sacramentis collata, sunt nedum spiritualia, sed supernaturalia;* ergo à Sacramentis attingi non possunt, quæ sunt res purè naturales, cum inter causam, & effectum debeat esse proportio, alioquin ex quolibet fieri quodlibet posset.

61. *IV. Causa, ut agat etiam instrumentaliter, debet, dum agit, existere, ut per se notum est:* Sacramenta verò non existunt, dum causare deberent, eo quia cum præcipuè in verbis consistant, quæ sunt successiva, existere, dum fit effectus, nequeunt; imò interdum causant etiam in longissima distantia, ut patet in Matrimonio per Procuratores Contracto; ergo Sacramenta nullam penitus causalitatem erga Gratiā exercent.

62. *Resp. Ad Primum, neg. Conseq. tum* quia hoc ab Omnipotentis Dei pendebat voluntate: tum quia in prima productione nullum supponebatur instrumentum, cum nihil adhuc fuisset productum: tum quia in secunda Mundi productione, nempe reparatione per Gratiā res agebatur moralis, non pure physica, nempe Hominum Justificatio ab eorumdem quoque pendens voluntate: Homi-

nes autem, cum sint corporei, signis etiam corporeis sunt salvandi, & iisdem quoque, non puris spiritualibus, Deus ab iisdem colendus.

63. Ad secundum ne. Conseq. ob easdem rationes: Cum enim Homines salvandi sint corporei, non autem puri spiritus, instrumenta quoque salutis esse debent corporea, tametsi dona, mediantibus ipsis collata, sint purè spiritualia.

64. Ad Tertium ne. Conseq. quamvis enim Sacramenta sint Symbola corporea, dona verò per eadem collata metè spiritualia, adest tamen proportio, & præcontinentia; principalis in Deo Gratiam producente; instrumentalis in Symbolo maximè respectu Dei Omnipotentis, cui omnia subduntur. Nec sequitur, ex quolibet fieri quodlibet, cum illud verificetur in Causa principalis non instrumentali, quæ ad quodlibet inservire non potest.

65. Ad Quartum dicendum est, Causam ante effectum existere debere aut physicè, aut moraliter, eo modo, quo effectus producitur: Cum autem Sacramenta moraliter effectum suum producant, utique eodem pacto causam suam existentem supponunt, ut patet ex exemplis in objectione productis. Quo pacto huic difficultati respondet cum Discipulis suis Doct. Subtil. 4. Dist. 1. Quæst. 5. Seraph. Doct. 4. Dist. 1. art. 1. n. 36. quem multi Neoterici sequuntur: sic etiam contactus quoque Signorum Sacramentalium explicatur, qui non semper physicus requiritur, sed moralis sufficit, ut patet de Matrimonio inter absentes per Procuratorem celebrato.

66. Cæterum modus explicandi D. Thom. & aliorum.

& aliorum Scholasticorum physicam causalitatem Sacramentis adscribentium suam habet probabilitatem, & nodos istos sufficienter abscindit, nec ab Adversariis hucusque ullò pacto fuit everfus.

67. Si tamen omnes istæ, vel aliæ rem hanc difficilem explicandi rationes plenè intellectui nequaquam satisfacerent, Sectariis tricas hujusmodi objicientibus eo pacto os obstrueretur, quo Cyrillus Alexand. Judæes modum, quo Christus in Sacramento Altaris manducetur, quærentes, complessit, inquit enim: *Quomodo ex Ægypto exivisti? Quomodo in Serpentem Mosayca virga conversa est? Quomodo in naturam Sanguinis aquæ transferunt? Quomodo Patres tui per media Maria, ut per aridam transferunt? Quomodo amaritudo aquæ per lignum in dulcedinem versa est? Quomodo à lapide fontes aquarum fluebant?* Sic eodem modo quærendum est ab Adversariis, quo pacto cum unitate Naturæ in Divinis stet Trinitas Personarum? Quomodo ex nihilo Mundus sit conditus? Quomodo Verbum Divinum absque sui mutatione Caro factum sit? Sicuti ergò omnia ista credunt Adversarii, etsi modum minimè percipiant; ita credere debent Causalitatem in Sacramentis, etsi modum, quo fit, nequaquam intelligant.

68. *Obji. Ult. Admissâ Sacramentorum activitate ex opere operato, Christifideles essent alligati Symbolis corporeis, sine quibus salutem æternam consequi nequaquam possent: hoc autem videtur repugnare statui libertatis, in qua nos Christus sua morte, ac Passione collocavit; essemus quippè servi, & parvuli sub Elementis Mundi famulantes, quod Paulus condemnat ad Gal. 4. 3. ergò*

Sacramenta nullam ex opere operato activitatem habent.

69. Resp. Conc. maj. & ne. mi. Sacramenta enim Novæ Legis Gratiam dandam, in alio Testamento minimè præfigurant, sed reipsa eam præbent: nec ad alium Salvatorem disponunt, sed ipsummet præsentem exhibent, & in se ipsis pauca, levia, nec omnibus necessaria sunt, nec pœnam temporalem ullam ipsa minimè suscipientibus universaliter præscribunt; adeoque servitutem nullam inducunt, aut statum parvuli præferunt, sed perfectissimam libertatem, qua Christifideles assumpti sunt in libertatem, & adoptionem Filiorum, hæredes quidem Dei, cohæredes autem Christi per veram sanctitatem, non legalem, & externam, ut in veteri Testamento, sed internam, & intrinsecam, qua Christo copulamur, ejusque munera cœlestia percipimus: adeoque non sequitur, Christianos servire Symbolis corporeis, sicut Judæos: illi enim sub umbra, & figuris veluti pedagogo famulabantur: isti verò in spiritu, & veritate Deum adorant, Sacramentis non tamquam Symbolis futuræ sanctitatis, sed tamquam instrumentis præsentis sanctificationis, ac tesseris futuræ hæreditatis utentes.

C A P U T III.

Utrum septem sint Ecclesie Sacramenta, nec plura, nec pauciora?

70. **Q**uemadmodum in cæteris, sic etiam de numero Sacramentorum cespitant Orientales, eum plus justo augentes, vel minuentes. Videndum est, quo fundamento
nitantur

nitantur? At quia de singulis Sacramentis, in sequenti Tractatu septimo erit sermo; hic breviter, & in communi tantum; quæ necessaria sunt exhibebimus, maximè quia fundamenta eorum levis videntur momenti.

SECTIO PRIMA

Dicendum est Ecclesiæ Sacramenta esse septem, nec plura, aut pauciora.

71. **P**Atet hoc ex Doctrina Ecclesiæ in Florentino collectæ, cui & ipsi assensum præbuerunt; nam in Instruct. Armen. §. Quinto, sequentibus verbis Dogma hoc stabilivit: *Nova Legis septem sunt Sacramenta, videlicet Baptismus, Confirmatio, Eucharistia, Pœnitentia, Extrema Unctio, Ordo, & Matrimonium*, quod quidem etiam in Tridentino confirmatum est adversus Occidentales Sectarios expressè Sess. 3. Can. de Sacram. in gen. *Si quis dixerit Sacramenta Nova Legis non fuisse omnia à Jesu Christo Domino Nostro instituta, aut esse plura, vel pauciora, quam septem, videlicet Baptismum, Confirmationem, Eucharistiam, Pœnitentiam, Extremam Unctionem, Ordinem, & Matrimonium, aut etiam aliquod horum septem non esse verè, & propriè Sacramentum, anathema sit.* Cætera verò Concilia sive Oecumenica, sive Provincialia idipsum supponunt, & docent, cum de eorum ministerio dignè præstando, ac de dispositionibus ad effectus eorum obtinendos requisitis disserunt, ac decernunt. Patres verò, etsi non omnes explicitè numerum septenarium affirmant; implicitè tamen faciunt, cum nemo ex ipsis asserat, plura esse Sacramen-

menta, nèquē aliquod ex ipsis in cōtrover-
fiam adducat, etfi qui sint, ab Adversariis
sunt adducendi, quod hucusque minimē præ-
stiterunt.

72. Nec de sunt congruentiæ, quarum
duas tantum adduco ex Scholarum Principi-
bus haustas. Primam quidem ex D. Thom. 4.
Con. Gen. cap. 58. accipio: Quia nimirum
in Vita Corporali ex parte singulorum Homi-
num quædam consideranda sunt; quædam ve-
rò ex parte Reipublicæ. Ex parte singulorum
Hominum generatio, augmentatio, & nu-
tritio spectandæ sunt necessariò requisitæ; per
accidens verò remedia contra morbos, si con-
tingant evenire, & reliquias morbi, si ægro-
tus perfectè convalescat. Ex parte Reipublicæ
requiruntur Parentes, ut sobolem procreent:
Magistratus verò, & Principes, ut prolem
exortam ad normam Honesti dirigant. Hæc
omnia in Vita Spirituali quoque exiguntur.
Nativitas Spiritualis fit in Baptismo, Aug-
mentatio in Confirmatione, Nutritio per Eu-
charistiam: Contra morbos Animæ militat
Pœnitentia: Contra Reliquias morbi Extre-
ma Unctio: Ordo ut Populus Sanctè gubernetur;
Matrimonium pro Dei Cultorum propa-
gatione.

73. Secundam subministrat Doct. Subtil.
4. Dist. 2. Quæst. 1. 6. *Ad Secundum* quia ni-
mirum in Vita Corporali si Personæ singulæ
spectentur, requiritur generatio, roboratio,
nutritio, & sanitatis deperditæ reparatio: in
ordine ad Communitatem multiplicatio car-
nalis, constitutio in gradu sublimiori pro
exercendo actu necessario Reipublicæ. Ita in
Vita Spirituali differendum est: Pro singulis
Personis requiritur Baptismus, quo renasci-
mur

mur ad Christum: Confirmatio, qua roboramur ad pugnam: Eucharistia, qua nutrimur ad vitam: Pœnitentia, qua post lapsum reparamur: Extrema Unctio, qua tolluntur impedimenta ad Deum liberè migrandi. Quo ad verò Communitatem datur Matrimonium, ut multiplicatio fiat carnalis Populi Deum verà Religione colentis: Ordo verò ut fiat Ministrorum multiplicatio in esse Gratiæ pro perfecta Ecclesiæ administratione. Alias congruentias adducit Seraph. Bonavent. 4. Dist. 2. Quæst. 3. quæ ad easdem reducuntur; ergò Sacramenta Novæ Legis sunt septem nec plura, nec pauciora.

SECTIONE SECUNDA

Solvuntur Objectiones.

74. **O** Bji. I. Contra primam partem, quod nimirum sint septem, nec pauciora, pluribus argumentis coacervatis: I. Quia nulla urget necessitas plurium Sacramentorum, cum sufficiant Baptismus, & Eucharistia ad Hominum salutem: hinc ex latere Christi mortui Sanguis, & Aqua manarunt, Joan. 20. 34. & propterea colligunt Patres Sacramenta Ecclesiæ fluxisse; nempe Baptismum, & Eucharistiam, ut Chrysostomus Cyrillus Alexand., Augustinus in hunc locum; ergò duo tantummodo Sacramenta manarunt; ergò &c. II. Vetera Concilia septenarii numeri nullam mentionem faciunt. III. Eucharistia continet Christum, qui est Gratiæ plenitudo, Baptismus verò per Gratiā, quam præbet, non solum maculas præteritas abstergit, sed etiam ad futura certamina vires submini-

ministrat ex Milevit. 2. Cap. 3. IV. Vulnerum nostrorum non sunt septem genera, sed duo tantum, scilicet poena, & culpa; ergo non sunt septem Sacramenta: nam si species spectarentur, plura, quam septem admitti oporteret.

75. Obji. II. Contra Secundam partem; quod nimirum Sacramenta sunt septem tantum, non plura: Nam Sacramenta Legis Scriptæ sunt plura, quam septem: ergo etiam illa Legis Novæ sunt plura, quam septem. Prob. conseq. Nam Sacramenta Legis Novæ adduntur Legi Scriptæ, sicuti Sacramenta Legis Scriptæ Sacramentis Legis non Scriptæ: Sacramenta autem Legis Scriptæ sunt plura illis Legis non Scriptæ; ergo etiam Sacramenta Legis Novæ sunt plura Sacramentis Legis Scriptæ: sed illa plura sunt, quam septem; ergo multò fortius ista, cum in Lege Nova, quæ Lex est Gratiæ, plura debeant esse remedia peccati, quam in Lege Scripta, quæ Lex erat servitutis, & timoris.

76. Resp. Breviter ad argumenta contra primam partem. Ad I. Conc. nullam esse omnium septem Sacramentorum absolutam necessitatem: at, quia Deus Misericordia Divus, & secundum suam Misericordiam salvos nos fecit, plures voluit esse Gratiæ fontes, & instrumenta, ut faciliùs æternam Beatitudinem consequamur. Ex latere autem Christi non Baptismus tantum, & Eucharistia per Aquam, & Sanguinem designata, sed omnia prorsus Sacramenta Novæ Legis fluxerunt tamquam instrumenta, ex Sanguine Christi effuso vim habentia, ex August. trac. 20. in Joan., licet id præcipuè Baptismo, & Eucharistiæ adscribatur, quæ per Aquam, & Sangu-

guinem magis exprimuntur: & propterea cum timore, & tremore ad illa accedere debemus, ut monet Chrysost. in cap. 12. Joan. veluti ab ipso Christi Latere bibitori.


77. Ad II. Etsi Vetera Concilia, & Patres expressa Septenarii numeri Sacramentorum nequaquam mentionem faciant, minimè tamen excludunt, & singula Sacramenta divisim commemorant.

78. Ad III. Neg. consequ. Si enim de absoluta necessitate sermo sit, nulla est neque Pœnitentiæ, neque Baptismi, cum Deus minimè sit Sacramentis alligatus: Si verò de necessitate Institutionis; utique cætera extra Baptismum, & Pœnitentiam Sacramenta non adeo sunt necessaria: attamen Christus Dominus, qui juxta Paulum ad Tit. 3. 5. *Non ex operibus iustitiæ, quæ fecimus nos, sed secundum suam Misericordiam salvos nos fecit: Ecclesiæ suæ dilectæ remedia non tantum necessaria, sed etiam utilia, & ad melius esse reliquit, ut Homines vitam habeant, & abundantius habeant*, Joan. 10. 10.

79. Ad IV. ant. est verum in prima sui divisione, non verò si membra ista ulterius dividantur, ex quorum partitione septem, vulnerum genera dimanant: nec tamen sequitur, Sacramenta plusquam septem esse oportere: pharmaca enim non multiplicantur ad individualem, aut specificam vulnerum distinctionem, sed penes solummodò suprema genera, quorum inferiora univocationem aliquam habent, ut V. G. Baptismus contra Originale, Pœnitentia contra Actuale: Sacramenta igitur septem sunt genera pharmacorum singulis morborum generibus applicabilia, adeoque non sequitur, ipsa debere esse plus-

plusquam septem, nec ipsa esse septem pauciora.

So. Ad Argumentum contra secundam partem neg. conseq. Ad probat. nego maj. diversimodè enim Sacramenta Legis Novæ superadduntur Sacramentis Mosaycæ, ac Sacramenta Mosaycæ Legis Naturæ Sacramentis superadderentur: illa enim utpotè imperfecta, & solummodò inter se secundum magis, & minus diversa, semper in eodem statu typi, & umbræ Christi venturi permanebant; & ideo posteriora prioribus optimè poterant superaddi: Non sic Sacramenta novæ Legis, quæ cum Gratiâ ipsam, & munera Cœlestia in veteribus promissa reipsa exhibeant, instituta sunt, *virtute majora, numero pauciora, utilitate meliora*, juxta August. lib. 19. Cont. Faust. cap. 13. nam juxta eundem in Psal. 73. *Sacramenta novi Testamenti dant salutem: Sacramenta Veteris Testamenti præmittunt Salvatorem.*



TRACTATUS VII.

De Sacramentis in specie.

1. **N**Edum de Sacramentis in genere; sed etiam in specie, plurimum errant Sectarii Orientales; propterea de ipsorum in particulari in presenti breviter tractandum est.

CAPUT PRIMUM

De Sacramento Baptismi.

2. **P**rimum omnium Sacramentorum, & eorum fundamentum est Baptisma, cuius rectam doctrinam Orientales Heterodoxi pessimè corrumpunt. De hoc igitur in presenti agendum est.

SECTIO PRIMA

*An parvuli absque Baptismo decedentes
per Eucharistiam à Matribus sumptam
salvi fiant?*

3. **A**Byssini, & Ethiopes, Blasio III. in sua Syr. Sac. de Patriarchatu Alexand., & Dominic. à Trinitat. Bibliot. Theol. sect. 9. Cap. 1. referentibus, in eo versantur errore, ut putent, parvulos Originali peccato, quod ab Ethiopibus in controversiam minimè vocatur, infectos, absque Baptismi lavacro decedentes, per Eucharistiam à Matribus sumptam adhuc æternam consequi salu-

lutem. Videndum est an hujusmodi Dogma sustineri queat? Ut autem *Quæstio* clariùs tractetur, eam in varios articulos dividemus.

ARTICULUS PRIMUS

Parvuli absque Baptismo decedentes minimè possunt salvari.

4. **O** Stenditur ex Scripturis: Nam ad Ephes. 5. 26. habetur: *Christus dilexit Ecclesiam, & seipsum tradidit pro ea, ut illam sanctificaret, mundans lavacro aquæ in verbo vitæ.* Et ad Titum 3. 5. de Christo loquens, cujus benignitatem commendabat, ait: *Salvos nos fecit per lavacrum regenerationis, & renovationis Spiritus Sancti, quem effudit in nos abundè per Jesum Christum Salvatorem nostrum.* His verbis innuitur à Paulo Baptisma: dicit autem nos sanctificari, mundari, regenerari, & salvari Spiritu Sancto; ergò censet ad salutem esse omnino necessarium etiam parvulis, qui utique cum Originali nascuntur.

5. Fortiùs adhuc idipsum dicitur 1. Pet. 3. 2. in qua Baptismus Noe arcæ comparatur. *In qua pauci, idest octo Animæ salvæ factæ sunt per aquam.* Quod & vos nunc similis formæ salvos facit Baptisma; sicuti igitur nemo diluvii aquis salvatus est, nisi qui erat in Arca Noe sive adultus, sive parvulus; ita nemo extra Baptismum salvari potest sive adultus, sive parvulus sit.

6. At Clarius adhuc habetur Joan. 3. 5. ubi Christus Dominus loquitur apertissimè de Baptismo sermonem instituens: *Nisi quis renatus fuerit ex aqua, & Spiritu Sancto, non potest*

est introire in Regnum Dei; ergò nemo salvatur, nisi regeneretur ex aqua, & Spiritu Sancto, quod fit in Baptismate; sicuti nemo vitam acquirit carnalem, nisi ex Matre, secundum carnem nascatur; ergò Baptismus etiam parvulis est necessarius ad salutem, ad quam necessarium est nasci ex Spiritu; qui enim purè ex carne nascuntur, minimè salvantur: *Caro enim, & Sanguis Regnum Dei possidere non possunt. 1. Cor. 15. 50.*

ARTICULUS SECUNDUS.

Idipsum Ecclesia auctoritate firmatur.

7. **M**ilevitanum II. Concilium antiquissimum, anno quippe Christi 416. sub Innoc. I. Rom. Pontif. ac Theodosio Juniore Imperante celebratum Can. 2. Cum, adversus negantes in parvulis recenter natis Originale peccatum, & necessitatem Baptismi Anathema dixisset, subdit: *Propter hanc enim Regulam Fidei, etiam parvuli, qui nihil peccatorum in semetipsis adhuc committere potuerunt, ideo in remissionem peccatorum veraciter baptizantur, ut in eis regeneratione mundetur, quod generatione traxerunt; ergò salus æterna parvuli absque Baptismo haberi non potest.*

8. Idipsum censuerunt Braccar. 2. Anno 572. sub interregno Joan. III. Papæ celebratum Can. 17. Matiscon. II. an. Christi 588. sub Pelagio II. Cap. 3. Tolet. IV. sub Honorio I. an. 633. Cap. 5.

9. At firmius adhuc, & ineluctabilius Constantinopolitanum I. Oecumenicum sub Damaso I. Papa, & Theodosio Seniore Augusto

gusto an. Christi 381. celebratum in Symbolo Nicæno scribit: *Credimus in unum Baptisma in remissionem peccatorum*: Cum ergo parvuli recenter nati peccatum habeant Originale, indigent remissione: hæc autem datur in Baptismo; ergo etiam parvulis ad salutem est necessarius.

10. Florentinum pariter Oecumenicum, cui Ethiopes, missis Legatis, assensum præbuerunt, ex Horatio Justiniano Par. 3. Act. Floren. & Spondano ad an. Christi 1442. in Instruc. Armen. habet: *Primum omnium Sacramentorum locum tenet Sanctum Baptisma, quod vite spiritualis janua est: per ipsum enim membra Christi, ac de corpore efficimur Ecclesia. Et cum per primum Hominem mors intraverit in universos, nisi ex aqua, & Spiritu Sancto renascimur, non possumus, ut inquit Veritas, in Regnum Cælorum introire. Quam Doctrinam etiam tradidere Lateranense IV. sub Innoc. III. Vienen. in Clemen. Cap. 1. Trident. sess. 5. Cap. 3. sess. 6. Cap. 4. & 7. ergo ex Doctrina Ecclesiæ Baptismus ad salutem etiam parvulis recenter natis est necessarius.*

11. Hanc eandem doctrinam Patres antiquissimi primitivæ Ecclesiæ tenuerunt. Clemens Romanus, cui Æthiopes adeo deferunt, ut ipsius Constitutiones veluti Dei Verbum teneant, Epist. IV. cum necessitatem omnimodam Baptismi asseruisset longo sermone, subdit: *Confugite ergo ad aquas istas, solæ enim sunt, quæ possunt vim futuri ignis extinguere. Origines Hom. 14. in Lucam. Quia per Baptismi Sacramentum Nativitatis sordes deponuntur, propterea baptizantur, & parvuli. Nisi quis renatus fuerit ex aqua, & Spiritu Sancto non potest introire in Regnum Dei.* Cyril,

ril. Jerofolimit. Cathec. 3. cum plura de Baptifmo dixiffet encomia, fubdit: *Et fi quis non baptizatur, salutem non habet, præter foles martyres, qui vel fine aqua Regno Cœlefti potiuntur.* Chryfoft. Hom. ad Neophit. Cum laudes plures Baptifmi expoſuiſſet, ait: *Hac de Cauſa etiam Infantulos baptizamus, ut non ſint coinquinati peccato, ut iis addatur ſanctitas, juſtitia, adoptio, hæreditas, fraternitas Chriſti, ut ejus membra ſint omnes &c.* Similia tradunt Juſtin. Mar. quæſt. 36. Niſſen. Orat. in Sanc. Baptif. & alii plures, quos brevitatis gratiâ omittimus; ergo ex deciſione Eccleſiæ etiam primitivæ, ac doctrinâ Patrum Baptiſmus parvulis quoque neceſſarius eſt ad ſalutem.

ARTICULUS TERTIUS

Idiſſum ratione aliqua evincitur.

12. I. **E**Xtra veram Dei Eccleſiam non datur ſalus æterna, ut etiam ipſimet Ethiopeſ, imo Hæretici omnes conſentunt, qui propterea ſolum Cætum ſuum putant eſſe veram Dei Eccleſiam: Hanc vero nemo ingreditur, niſi per Baptiſmum, qui Janua Sacramentorum eſt, quibus ſolummodo ſalus ex Chriſti inſtitutione aquiritur; ergo parvuli non ſalvantur, non ſumpto Baptiſmate, per quod Eccleſiam ingrediuntur.

13. II. Baptiſmus in Lege Evangelica ſucceſſit Circumciſioni Veteris Teſtamenti, juxta Gregor. Mag. lib. 4. Moral. Cap. 2. : at in Veteri Teſtamento nullus parvulus ſalvari poterat abſque Circumciſione, vel remedio Legis Naturæ ipſi æquivalente, ex Auguſt. lib. 4. de Baptif. Cap. 24. & Innoc. III. Cap. *Majores de*
Pars II. C Ba-

Baptif. ; ergò etiam absque Baptismo nemo salvatur in Lege Nova.

14. III. Ii solummodo salvantur, qui resurrecturi sunt cum Christo in resurrectionem, Vitæ 1. Thessalon. 4. 15. 16. nec resurgere possunt, nisi cum Christo moriantur, ad Rom. 6. 8. at in Baptismo hujusmodi mors contingit, ad Colof. 2. 12., & ad Rom. 6. 4. ergò cum extra Baptismum non detur hujusmodi mors, neque dabitur resurrectio ad vitam, & salutem æternam.

15. IV. Sicut Adam est Caput nostrum, carnale per propagationem, ita Christus Jesus Caput spirituale per Redemptionem: at nemo potest vitam corporalem acquirere, ut Filius Adæ, nisi generatione carnali; ergò nemo acquirere potest vitam spiritualem, nisi generatione spirituali, quæ fit per Baptismum, in quo Redemptio Christi applicatur: parvuli autem non baptizati minimè renāscuntur ut filii Christi, generatione spirituali; ergò vitam spiritualem acquirere non possunt; ergò neque salvari: deest quippe vita spiritualis. Inde orta est Ecclesiæ sollicitudo ministrandi Baptismum, ne scilicet parvuli pereant in æternum, & ideo ejusdem ministerium ex Divina institutione Laicis quoque, cogente necessitate, competit, apud Floren. in Instruc. Armen.; ergò nullus parvulus salvatur absque Baptismo, & propterea ipsis absolutè necessarius est.



ARTICULUS QUARTUS

*Dicendum secundò , Eucharistiam non habere
hanc virtutem ante Baptismum
parvulos justificandi .*

16. **P** Ars ista secunda, præter rationes superius allatas, evincitur I. Quia Eucharistia supponit, cum datur, Hominem justificatum, & vitam spiritualem habentem: dicit enim rationem cibi, & potus, Joan. 6. 16. *Caro mea verè est cibus, & sanguis meus verè est potus*, qui non dantur, nisi viventibus; ergò Eucharistia non dat vitam spiritualem non habentibus, sed solummodo eam conservat habitam: hinc subditur ibidem V. 52. *Si quis manducaverit hunc panem, vivet in æternum*; ergò supponitur ab Eucharistia Vita, ut maneat, non verò tribuitur; certè enim cibus non datur, nisi viventibus.

17. II. Eucharistia, ut effectum suum fortietur, peccatum læthale non debet invenire, ex Paulo ad Corinth. 1. cap. 11. 27. 28. *Quicumque manducaverit panem, vel biberit Calicem Domini indignè, reus erit Corporis, & Sanguinis Domini: Probet autem seipsum homo, & sic de pane illo edat, & de Calice bibat*: Si autem Eucharistia tolleretur peccatum, uti facit Baptisma, & Pœnitentia, deberet illud præsupponere, ut tolleretur, neque, an revera ibi adsit, priusquam suscipiatur, probari oporteret; ergò cum hoc absurdum sit, & à Scripturis alienissimum, Eucharistia non est nata tollere peccatum, adeoque supponit vitam spiritualem, non præbet.

18. III. Ecclesia semper consuevit à Sacra

Synaxi Arcere peccatores nondum absolutos ,
 ex Ancyran. I. Cap. 4. 5. 6. & 7. Elibert. pluribus
 in Canon. & Nicæn. Can. 11. nec umquam
 censuit , Eucharistiam vices supplere Baptismi :
 nullus enim Canon assignari potest , qui hoc
 præscribat , imo potius oppositum , quoniam
 Cathecumenis in extremo mortis agone positis
 numquam Eucharistiam dari præcepit , bene
 verò Baptismum , si ipsum postulassent , ex Eli-
 bert. Cap. 38. , & 39. Agat. Cap. 34. Cartag. III.
 Cap. 34. ; ergò Ecclesia numquam censuit , Eu-
 charistiam vices Baptismi supplere posse , ac tol-
 lere Originale .

ARTICULUS QUINTUS

*Dicendum tertio , etiamsi Eucharistia vices
 Baptismi supplere posset , adhuc tamen à
 Matribus perceptam minimè infantes
 juvare in earum uteris inclusos .*

19. **P** Atet assertio ex Joan. 6. 54. nam de
 ratione Sacræ Eucharistiæ est perso-
 naliter manducari , cum sit per modum cibi ,
 & potus instituta ; ait enim Christus : *Nisi man-
 ducaveritis carnem Filii Hominis , & biberitis
 ejus Sanguinem , non habebitis vitam in vobis :*
 parvuli autem in uteris matrum inclusi carnem
 Christi comedere non possunt ; ergò nequit ip-
 sos juvare .

20. Nec sufficit manducatio mediata ; quan-
 doquidem Christus Gratix author nequaquam
 est in stomacho infantis , sed Matris : ad nu-
 tritionem autem spirituales requiritur come-
 stio immediata , inquit enim Christus Joan. 6.
 57. : *Qui manducat meam carnem , & bibit meum
 Sanguinem , in me manet , & ego in illo ;* Ergò ,
 cum

cum Christus verè non maneat in parvulo, sed in Matre, non nutrirer parvulum, sed Matrem: hoc autem falsum est: effectus enim debet redundare in parvulum, non in Matrem; ergò illa perceptio Eucharistiæ in Matre parvulo non prodest.

21. Et ratio est manifesta: nam parvulus in utero Matris est persona distincta à Matre; ergò sicuti peccatum originale Matris est distinctum à peccato Originali Filii, tametsi in utero inclusi; ita etiam sanctificatio Filii à sanctificatione Matris debet necessariò distingui; ergò ex eo quia Mater fuerit per Eucharistiæ sanctificata, non sequitur sanctificatio Filii.

22. Urgetur: nam ex eo quia cætera Sacramenta fuerint Parentibus collata, sanctitas eorum in filios minimè redundat in utero inclusos, ut patet de Baptismo, & aliis, quæ collata Parentibus non censentur Filiis collata, etiam juxta ipsorummet Æthiopum sententiam, parvulos baptizantium post quadraginta dies; ergò idipsum de Eucharistia censendum est, cum sit eadem ratio: Sacramenta enim signa sunt sensibilia, quæ immediatè subjectis suis applicari debent, ut effectus suos producant.

ARTICULUS SEXTUS

Solvuntur objecta contra primum Assertum.

23. **O** Bji. I. Ex Scripturis, quas Catholici adducunt ad probandam Baptismi pro parvulis necessitatem, hujusmodi necessitas nequaquam colligitur; ergò &c. Prob. ant. Nam Catholici vim magnam faciunt Joan. 3. 3. 5. ubi dicitur: *Nisi quis renatus fuerit ex aqua, & Spiritu Sancto, non potest introire in Regnum Dei.*

Dei. Hujusmodi autem, & similia loca non videntur evincere, cum ex Joan. 6. 54. etiam dicatur: *Nisi manducaveritis Carnem Filii Hominis, & biberitis ejus Sanguinem, non habebitis vitam in vobis*; & nihilominus nemo dicit, esse necessariam Eucharistiam necessitate salutis; sicuti nemo etiam dicit, Fidem actualem esse etiam parvulis necessariam, etsi ad Hæb. 11. dicatur: *Sine Fide impossibile est placere Deo*. Et Math. ult. 16. *Qui crediderit, & baptizatus fuerit, salvus erit, qui non crediderit condemnabitur*; ergo ex his locis nihil colligitur; ergo &c.

24. Resp. ne. ant., ad cujus probat. nemin. cujus instantiæ ex Joan. 6. deductæ falsa est conseq. Nam Baptismus per modum regenerationis spiritualis est institutus: Eucharistia verò per modum cibi spiritualis: regeneratio autem spiritualis est absolutè necessaria ad vitam spiritualem obtinendam; non autem necessarius cibus spiritualis ad vitam obtinendam, sed solummodo ad ipsam conservandam; sicut ergo impossibile est obtinere vitam carnalem absque nativitate carnali, non autem est omnino impossibile conservare eandem saltem aliquo tempore citra cibum carnalem, ut experientia ipsa testatur; ita impossibile est obtinere vitam spiritualem absque nativitate, & regeneratione spirituali: non autem est impossibile eam saltem aliquo tempore conservare absque alimonia hac spirituali, cum alii cibi non desint spirituales animam reficientes, etsi iste sit principalior, & videmus defacto praxi ipsâ Fidelium, non omnes eodem modo refici, alios quidem frequentius, alios rarius, ex Lateran. IV. Cap. *Utriusque sexus*, & Ecclesia ipsa non cogit eosdem ad cibi-hujus manducationem

tionem, nisi semel in anno: cogit tamen omnes infantes in Baptismate regenerari, quapropter ex locis citatis deducitur quidem Eucharistici cibi necessitas, sed non omnino absoluta, sicuti colligitur illa Baptismi.

25. Nec valet adducta ratio de fide actuali; illius enim sunt capaces adulti, & ideò, nisi ipsa præcesserit, fructuosè non baptizantur, quod de parvulis non verificatur, & ideò isti, non illi, absque fide actuali in Baptismate justificantur, & de illis Scripturæ intelliguntur, fidem actualem ante Baptismum necessariò requirentes.

26. Si verò etiam parvulis ad justificationem Fides requiratur, hæc utique, nempe habitualis, ipsis infunditur in Baptismate, qua, tametsi actu non credant, credunt tamen habitu, & in voto, & salvantur, sicuti salvantur Cathecumeni, non actu, sed in voto tantum baptizati, & hoc pacto parvuli satisfaciunt quoque præcepto percipiendi Corpus Christi, quod quidem accipiunt in voto implicito in Baptismate incluso.

27. Obji. II. Adulti salvari possunt absque Baptismo in re suscepto, ut patet in Cathecumenis; ergò etiam parvuli habent aliquod aliud remedium præter Baptismum in re susceptum, cum non sint deterius conditionis, quam Adulti; eodem quippe pretio Sanguinis Christi sunt redempti.

28. Resp. neg. conseq. ad cujus probat. neg. conseq. parvuli enim deterius conditionis non sunt ex eo quia Baptismus fluminis ipsis desit, cum Baptismus fluminis, vel Sanguinis sufficiat pro omnibus institutus, & pro cujus sollicita collatione Ecclesia providit, imponendo Pastoribus sollicitam curam eundem

conferendi, ex Nicolao I. ad Consul. Bulgari. Gelas. I. Quæst. 9. Gregor. II. Epist. 5. ; & propterea in Casu necessitatis etiam Laici, & Fœminæ illum validè conferunt in forma, & intentione Ecclesiæ, ex Lateran. IV. cap. 1. & Floren. in Decret. Union. Parentes verò urgentur præcepto Charitatis, & Pietatis, eos, ut celeriter baptizentur, curare. Si verò omnibus adhibitis conditionibus, adhuc sine Baptismo decedant, uti etiam inter Catholicos contingit interdum, Dei judicia inscrutabilia adorare oportet, juxta Pauli præceptum ad Rom. 11. 33., & August. monitum Epist. 106., non remedia nova comminiscenda Ecclesiæ incognita. Et eodem pacto de parvulis inter Infideles nascentibus differendum est, quibus Sacramentum pro omnibus institutum minimè deest, sed ejusdem sola applicatio, non ex parte Dei, sed causæ secundæ.

29. Obji. III. In Regionibus, in quibus Evangelium minimè fuit propositum, durat adhuc remedium Legis Naturæ, aut Circumcisio, sicut durabat, Evangelio apud Judæos nondum solemniter promulgato; ergò saltem in illis Regionibus non est necessarium Baptisma, sed sufficit remedium Legis Naturæ, aut Circumcisio. Prob. ant. quia Lex non obligat, nisi sit promulgata, juxta communem Theologorum, & Juristarum sententiam; ergò Lex Evangelica Baptismi in Regionibus illis non obligat; ergò durat adhuc remedium Legis Naturæ; ergò Baptismus ibi non est necessarius ad salutem.

30. Resp. neg. ant. ad cujus probat. neg. conseq. concedo enim, ubi Evangelium non est promulgatum, Legem Baptismi nequaquam obstringere, & Infideles ignorantia invicibili

ex-

excusari ne pereant, Baptismum non recipientes : at nego, eos Legis Naturæ, aut Circumcisionis remedio juvari, quod jam per mortem Christi fuit abrogatum; sicuti autem ante promulgationem Evangelii non peccabant Judæi Baptismum minimè recipiendo, nec tamen post Christi mortem Circumcisionis, aut Legis Naturæ remedio salvabantur, ita illi, qui Evangelium invincibiliter ignorant, utique Baptismum non recipientes minimè delinquant : at, quia Lex antiqua abrogata est, nisi Baptismum suscipiant in re, vel in voto, damnantur, non ob Baptismi omissionem, sed ob alia peccata, quibus damnationem meruerunt.

31. *Obji. Ult.* Parvuli solo Baptismo fluminis Parentum suorum salvari possunt; ergò non est necessarius Baptismus fluminis. *Consequ.* *Prob. ant.* Parentes optare possunt pro Filiis Baptismum, cum in ipsis, veluti in capite suo contineantur; ergò sicuti peccant peccato originis, quia in Adam Capite suo continentur, ita salvari possunt per Votum Baptismi, qui continentur in Parentibus veluti in capite suo.

32. *Resp. neg. ant.* ad cujus probat. neg. *conseq.* In tantum enim parvuli contrahunt Originale peccatum, quia in Adam veluti primo Capite voluntates eorum virtualiter continentur; & propterea verè peccant, non peccato Adæ, sed proprio, quod origine trahunt. Parentes autem non sunt Caput primum, sicuti Adam, sed subordinatum, & ab eo descendens, & propterea voluntates parvulorum in ipsis minimè præcontinentur: quare Baptismus fluminis, quod ipsis adultis prodesset, non prodest iisdem parvulis. Cæterum etiamsi hujusmodi continentia voluntatis parvulorum in voluntate Parentum adesset, hæc per Legem universalem

lem Baptismi fuit à Christo Domino sublata, qui non minùs in ordine Redemptionis est Caput nostrum, sicut Adam in genere carnalis propagationis; quo circa, sicut neminem voluit pro alio baptizari Baptismo fluminis, quacumque continentia non obstante; ita voluit, neminem pro alio baptizari Baptismo fluminis pro salute æterna consequenda.

ARTICULUS SEPTIMUS

Objecta solvuntur adversus secundam Partem.

33. **O** Bji. I. Divinæ Scripturæ vim justificandi Eucharistiæ tribuunt; ergò Eucharistia vices Baptismi supplere potest. Conseq. patet, Prob. ant., ex Joan. 6. 32. cum Judæis dixisset Christus: *Non Moyses dedit vobis panem de Cælo, sed Pater meus dat vobis panem de Cælo verum, subdit: Panis enim Dei est, qui de Cælo descendit, & dat vitam Mundo.* Similia in aliis locis dicuntur; ergò Divinæ Scripturæ vim justificandi tribuunt Eucharistiæ, adeoque & supplendi vices Baptismi.

34. Conf. Quia esus Agni Paschalis Eucharistiæ præfigurativus primam justificationem tribuebat, ex Num. 9. 13. ubi habetur: *Si quis non fecit Phase, idest esum Agni Paschalis, exterminabitur anima illa de Populis suis, sicut Genes. 17. 14. de Circumcisione: masculus, cujus preputii caro circumcisa non fuerit delebitur anima illa de Populo suo;* ergò sicuti esus Agni Paschalis justificationem tribuebat, etiam Eucharistia idipsum faciet, quæ est præfiguratum.

35. Resp. neg. ant., ad loca ex Scripturis addu-

adducta dico, illa intelligi oportere de vivificatione conservativa, non autem excitativa: modus enim vivificandi ibidem expressus fit manducatione, & potu, quæ mortuis nequaquam congruunt, sed vivis, quorum vitam conservant: attamen, etsi concederetur, Eucharistiâ mortuos vitâ Spirituali excitari ad vitam, non inde sequeretur, Eucharistiam vicem Baptismi supplere: Pœnitentiæ quippè Sacramentum mortuos vivificat, nec tamen supplet vices Baptismi habentis vim regenerandi eos, qui numquam Christo nati fuerunt, non autem eos resuscitandi Christo Defunctos, ut facit Pœnitentia.

36. Ad Conf. neg. ant., ad cuius probat. neg. conseq. Ille enim Textus significat pœnam temporalem mortis, non æternæ perditionis: Circumcisionis verò necessitas ex aliis rationibus deducitur, non præcisè ex illo Textu Scripturæ: tum quia Agnus Paschalis Circumcisionem supponebat, adeoque primam ab originali justificationem; comestio enim solis Judæis imperabatur, ut ex Capite illo manifestè apparet. Circumcisio verò parvulos octo tantum dierum afficiebat, qui nullum adhuc remedium pro Originali delendo perceperant, adeoque nec primam justificationem erant consecuti; quo circa argumentum ad rem non facit.

37. Obji. II. Patres, & Ecclesia asserunt, Eucharistiâ mundari homines à quocumque peccato, salvari ab interitu mortis æternæ, scelera ablui, remitti peccata, Vitam æternam tribui, renovari, ac justificari Animas nostras; ergo Eucharistia potest tollere Originale. Conseq. patet, his enim modis loquendi Patres utuntur, ad Baptismi, in quo renascimur, virtutem signifi-

ficandam . Ant. autem evincitur ex Liturgiis Jerofolymorum , Syriæ , & Armeniæ , quarum Jacobus Frater Domini , Basilius Magnus , & alii Sancti Patres Authores fuerunt , ex Mag. Gregor. lib. 4. Dialog. cap. 58. ex August. lib. 1. de Peccat. merit. & remiss. cap. 20. & aliis . Ecclesia verò idipsum sentire videtur in Brachar. III. de Consec. dist. 2. Can. *Cum omne*, & Trident. sess. 22. cap. 2. ; ergò ex Patribus , & Ecclesia Eucharistia prodest etiam parvulis sicut Baptisma .

38. Resp. con. ant. , & neg. conseq. ad probat. dico , Patres , & Ecclesiam de Baptismo loquentes , non solum effectus in objectionem memoratos referre, sed asserere quoque, Baptizatos ex filiis Diaboli filios Dei , ex imundis mundos , ex captivis liberos , ex æternæ damnationis reis , perpetuæ Beatitudinis hæredes , ex inimicis amicos , & fratres Christi , Deoque dilectos effici; novamque Spiritualem vitam in Christo , oppositam carnali , quam ex Adamo traxerant , comparare ; quæ quidem omnia citra veram , & primam justificationem salvari non possunt , ac proindè virtus Baptismi ex illis loquendi formulis optimè deducitur : Dicta verò Patrum , & Conciliorum , etsi Eucharistiam magnopere commendent ; his tamen loquendi formulis minimè utuntur , sed aliis universalioribus , quæ possunt Eucharistiæ optimè aptari , & explicari absque ullo Baptismi præjudicio .

39. Itaque Eucharistia optimè dicitur, homines à quocumque peccato mundare , vel quia dat auxilia non amplius labendi in peccata ; vel quia pœnarum remissionem obtinet , & munera Cœlestia , quibus abluuntur ; vel quia dat vires concupiscentiam refrænandi , & ambul-

landi alacriùs in via Domini , atque pericula peccandi arcet , & miram tribuit fortitudinem , pravis cupiditatibus resistendi , & suavitatem in Legis Dei observantia largitur .

40. *Obji. III.* Baptismus primam tribuit justificationem ; ergò etiam Eucharistia . *Prob. conseq.* Ideo Baptismus eam tribuit , quia speciale signum est mortis , & sepulturæ Christi , cum quo , dum baptizamur , dicimur mori , & sepileri , juxta Apostol. ad Rom. 6. 4. : at hoc habet etiam Eucharistia , ex eodem Apost. 1. Corinth. 11. 24. exprimitur enim incruentè Sacrificium , quod cruentè in Cruce peractum est .

41. Et sanè videtur incredibile , instrumentum Baptismi primam gratiam tribuere , minime verò Authorem ejusdem , qui in persona propria Eucharistiâ recipitur .

42. *Resp. Conc. ant. , & neg. conseq.* ad cujus probationem *neg. causalem* : Non enim Baptismus ideo primam justificationem efficit , quia mortem Christi , ejusque Sepulturam commemorat ; sed quia per modum regenerationis est institutus , qua morimur peccato , ac Deo renascimur , vetusque Adam in aquis sepelitur , numquam in eodem peccato surrecturus . Hæc autem expressio mortis , & sepulturæ Christi in Baptismo fit per modum regenerationis , & natiuitatis Spiritualis : Eucharistia verò eandem quidem Christi passionem exprimit , sed diversimodè , nempe per modum Convivi , quo nobis Christus ipse datur : eibus autem non datur nondum natis , sed ex utero Matris emeris , qui pascuntur cibo proprio , & potu .

43. Id verò quod subditur , levissimum est : non enim appropinquatio Christi purè physica salutem operatur , juxta August. *serm. 14. de temp. cap. 4.* cum Corpus Christi multi moleste præ-

premunt, pauci salubriter ; alioquin etiam indigni fructuosè Christum reciperent , quod contradicit Apost. 1. Cor. 11. 29. dicenti : *Qui enim manducat indignè , iudicium sibi manducat , non dijudicans Corpus Domini* : Sed quæ Fide , ac Charitate antecedente perficitur : cibus autem non datur mortuis , aut nondum natis , sed solis viventibus , qui cibo plerumque utuntur .

44. Obji. IV. Ex hoc quod Eucharistia non sit instituta ad delendum Originale , non sequitur minimè posse ab eo deleri ; ergò Eucharistia potest supplere vices Baptismi. Conseq. patet . Prob. ant. ; ex eo quia Eucharistia non sit instituta ad delendum mortale , non sequitur , non posse ab ea deleri per accidens ; hoc enim docet D. Thom. 3. Part. Quæst. 79. art. 3. Doct. Subtil. 4. Dist. 9. Quæst. unica. Suarez Disp. 63. Sec. 1. , & alii cum ipsis ; ergò etiam licet Eucharistia non sit per se instituta ad delendum Originale , id poterit per accidens in iis , qui obicem non ponunt , quoties non habetur Baptisma , cum parvuli obicem nullum exhibeant : & sicuti Baptismus potest delere actuale peccatum , licet hoc non habeat ex institutione , cur Eucharistia non poterit Originale in parvulis , etiamsi hoc ex sua institutione non habeat ?

45. Resp. neg. ant. : ad cuius probat. admissio antecedenti , quod est valdè controversum , illudque apertè negat Sanc. Bonavent. 4. Dist. 9. art. 2. Quæst. 3. neg. adhuc conseq. Nam Eucharistia delendo per accidens mortale , ex linea institutionis suæ , nequaquam extrahitur , nempe rationis cibi , & potus , quorum natura est pascere , & nutrire benè præparatos , minimè verò non adhuc natos : illi verò , qui , præmissâ debitâ diligentia , cum peccato ignorato

rato , ad Eucharistiam accedunt , quantum est ex se sunt præparati , adeoque prodest ipsis Cibus ille cœlestis , non quidem per se , sed per accidens : at parvuli non adhuc baptizati , minimè adhuc natī sunt vita spiritali ; ergò neque per accidens cibo spiritali juvari possunt ad Originale tollendum . Ideo autem , Baptismus , etsi admittatur p̄r se primò ad delendum Originale institutus , etiam delet æstuale , quia extra ipsum nullum aliud datur medium in Lege Gratiæ pro delendo quocumque peccato : nam etiam Pœnitentia ipsa , quæ haberetur , votum Baptismi includit , quod sanè de Eucharistia dici nequit , ad hunc finem minimè instituta , & idcirco supponere debet homines nedum spiritaliter natos , sed etiam vivos vitâ Gratiæ , & sufficienter probatos , idèò nec per se , nec per accidens delere potest Originale .

ARTICULUS OCTAVUS .

Solvuntur objecta adversus tertiam partem .

46. **O** Bji. I. Eucharistia instituta est per modum cibi ; ergò prodesse potest Infanti in utero Matris incluso . Ant. patet , Prob. conseq. Cibus corporalis à Matre sumptus Infantulo prodest non fumentī illum in utero Matris ; ergò etiam Eucharistia prodesse potest , etiamsi illam nonumat , cum cibi spiritalis major virtus sit , quam corporalis .

47. Resp. neg. conseq. Eucharistia enim instituta est sub speciebus panis , & vini , quæ non datur parvulis in utero Matris inclusis , etiamsi alio cibo indigeant , nec eos juvat , si mortui sint ; igitur nec ipsos juvat Eucharistia ,
cum

cum ipfos mortuos Christo inveniat, nec sub speciebus illis expressis ab iis sumi potest: etiamsi enim cibus spiritualis melior sit corporali, non extrahitur tamen à ratione cibi, qui non mortuis, sed vivis datur, solosque vivos juvat.

48. Obji. II. Sanctitas unius extremi potest in aliud redundare ab ipso realiter distinctum; ergò Eucharistia sumpta à Matre potest redundare in utilitatem Filii in utero inclusi; ergò supplere quoque vices Baptismi; consequ. patet: Nam Filius in utero inclusus facit unum cum Matre: hinc Legis præsumptione Matris conditiones factum sequuntur utero inclusum C. fin. de ser. non ordin. L. 2. C. *Si mancipium*. L. fin. *Communia* de Matrum; ergò sanctitas Matris ex Eucharistia percepta in Filium redundare potest. Ant. autem prob. nam Humanitas Christi Verbo Divino copulata. Quod est Sanctitas substantialis, ex multorum gravium Theologorum sententia, apud Mastrium nostrum 3. Senzen. Disput. 2. Quæst. I. verè, propriè, ac formaliter sanctificatur; ergò sanctitas unius extremi potest redundare in aliud sibi copulatum; adeoque sanctitas Matris redundare in Filium utero suo inclusum.

49. Conf. Nam ad Rom. II. 16. *Si radix sancta, & vrami*; ergò si per Eucharistiam Mater est sancta, eadem sanctitate erit etiam Filius.

50. Resp. Dist. ant. Si extrema copulata, sint supposita perfecta, & integra, neg. ant. alio modo, permit. ant., & neg. consequ. Filius enim si rationali Anima sit præditus, non facit unum cum Matre, nisi per aggregationem, à qua personaliter distinguitur: hinc negatur paritas adducta; nam admittendo cum ple-
risque Theologis sanctitate substantiali Verbi
Divi-

Divini, cui unitur, Humanitatem Christi sanctificari, quod tamen cum suis & aliis à Doctore Subtili negatur 3. Sent. Dist. 2. Quæst. 1., adhuc falsa est conseq.; Verbum enim, & Humanitas in una Persona subsistunt, ut Abyssini adversus Nestorium confitentur; hinc mirum non est, sanctitatem unius extremi in aliud redundare, quamvis realiter distinguantur. Parvulus autem indigens ab Originali mundari, ac sanctificari, est Persona à Matre distincta, solumque localiter unita, adeoque ex sanctitate unius, non infertur sanctitas alterius. Quod si argumentum hoc valeret, sanctitas quoque Matris baptizatz in Filium redundaret, quod ipsismet Adversariis displicet, Baptismum parvulorum admittentibus à Baptismo Matris distinctum.

§ 1. Ad conf. neg. conseq. Parvulus enim; Anima præditus rationali excisus est à radice, & propterea sanctitas radicis in rami sanctitatem nequaquam influit: ideo autem dicit Apost. *Si radix sancta, & rami*; quia si Judæi, de quibus loquebatur, Fidem Patriarcharum, quorum erant posterii, secuti fuissent, eandem sanctitatem consecuti essent; secus, amississent, uti revera factum est; igitur non erat eadem numero sanctitas ramorum, & radicis.

SECTIONE SECUNDA

An Baptismus possit iterari?

§ 2. **A** Byssini singulis annis die Epiphaniæ, stagno aquæ benedicto, tam Mares, quam Fœminas, trina mersione, præmissâ formâ, baptizant. Videndum est, an licitè hoc faciant, sive Baptisma propriè iterare intendant, sive ablutionem illam tantummodo facere velint
in

in Christi memoriam, quando in Jordane baptizari voluit, ut salvaret nos; cujus mysterium die illa solemner ab Ecclesia recolitur. Quæstio hæc agitur, an Baptismus ritè collatus iterari queat? Vel si ob honorem, & memoriam Christi id fiat, etiamsi desit intentio verè baptizandi, adhuc liceat?

ARTICULUS PRIMUS

*Dicendum est, Baptismum ritè collatum
numquam repeti posse, etiam si id
fiat animo Christum honorandi,
& commemorandi.*

53. **P**Atet ex Scripturis primà pars, ex Joân. 3. ubi aperte asseritur Baptismi necessitas illis verbis: *Nisi quis renatus fuerit ex aqua, & Spiritu Sancto, non potest introire in Regnum Dei*: Ubi fit comparatio inter nativitatem carnalem ex Adam, & spiritualem in Christo; at unica tantum vice nascimur carnaliter ex Adam; ergò unica tantum vice nascimur in Christo per Baptismum: hinc August. trac. 11. in Joân. super hunc locum: *Jam natus sum de Adam, non potest me iterum generare Adam. Jam natus sum de Christo; non potest me iterum generare Christus. Quomodo uterus non potest repeti, sic nec Baptismus.*

54. Item Baptismus est expressio in nobis, & similitudo mortis, & sepulturæ Christi, ex Apost. ad Rom. 6. 3. dicente: *An ignoratis, quia quicumque baptizati sumus in Christo Jesu, in morte ipsius baptizati sumus? Consepulti enim sumus cum illo per Baptismum in mortem, ut quomodo Christus surrexit à mortuis per gloriam Patris, ita & nos in novitate vitæ ambule-*

bulemus. Salvator autem nec denuò mori, ac sepeliri, nec resurgere potest, juxta eundem, Apostolum v. 9. Christus resurgens ex mortuis jam non moritur, mors ultra illi non dominabitur; ergò neque dari potest alius Baptismus, quo præfata repræsententur.

55. Rursus ad Ephes. 4. 5. 6. dicit Apost. *Unus Dominus, una Fides, unum Baptisma, unus Deus, & Pater omnium*; ergò sicuti in unoquoque homine unica tantum debet esse Fides objectiva, sicuti unus Deus, ita unius debet esse Baptismus ejusdem Fidei protestativus; ergò ex Scripturis illicita rebaptizatio est.

ARTICULUS SECUNDUS

Idipsum Ecclesia, ac Patrum auctoritate ostenditur.

56. **E**cclesia ritè baptizatis secundum Baptismum vetat: Nam Carthagin. Primum sub Grato Archiepiscopo an. Christi 349. ex Binio post Sardicense celebratum hæc habet: *Illicitas esse sancimus rebaptizationes, & satis esse alienum à sincera Fide, & Catholica disciplina rebaptizari.* Chartagin. III. cap. 38. *Non licet fieri rebaptizationes, reordinationes &c.* De Consec. Dist. 4. Cap. *Non licet.*

57. Item rebaptizantes Sacerdotes, & Episcopi depositione, rebaptizati inhabilitate ad Clericatum, ex Felic. III. Epist. 3. aliisque pœnis plectuntur.

58. Rursus Baptizati ab Hæreticis, vel à quibuscunque aliis Infidelibus, dummodo in forma Ecclesiæ, minimè possunt rebaptizari, ex Nicæn. I. Can. 9. Arelat. I. Can. 8. Mogunt. IV. cap. 13. Cabilon. III. Can. 27. Tolet. I. cap. 15.

Late-

Lateran. IV. Can. 1. Florent. in Instruc. Armen. quod utique non fieret, si Bápisma licitè posset repeti; ergò &c.

59. Idipsum sentiunt Patres. Clem. Rom. quem Abyssini tanti faciunt, ut ejusdem Constitutiones Verbum Dei appellent, Lib. 6. c. 15. cum capite superiori alia retulisset Apostolorum præcepta Fidelibus imposita, subdit: *Eodem modo contenti uno solo Baptismo, qui in Domini mortem traditur, non ministerio abominandorum Sacerdotum Hæreticorum, sed probatorum Sacerdotum in Nomine Patris, & Filii, Spiritus Sancti.* Epiphan. Hæres. 69. cum dixisset, post primam pœnitentiam, quæ sit in Baptismo, omnem Hominem renovari; subdit: *Non enim duo sunt Baptismata, sed unum; neque bis Crucifixus est Christus, sed semel, neque bis pro nobis mortuus est, & resurrexit. Et hujus gratiæ muniri nos oportet, ut ne lapsæ coronam renovationis perdamus.* S. Basil. de Spiritu Sancto. Cap. 15. *Non Judæorum more in quibusdam inquinamenti ablui mur, sed unum novimus salutiferum Baptisma: quandoquidem una est pro mundo mors, & una ex mortuis resurrectio, quarum figura est Baptismus.* Similia tradunt Gregor. Nazianz. Orat. 40. Justin. Mart. Orat. ad Orthodoxos, Quæst. 97., & loculentissimè Chrysost. Hom. 9. in Cap. 6. Epist. Pauli ad Hæb. ubi post adductas rationes, ob quas repeti nequit Baptismus, infert: *Non est e-go, non est secundum lavacrum: si est autem, est tertium, & quartum: postremò concludit: Quid ergò? Non est Pœnitentia? Est Pœnitentia, sed non est secundum Baptisma.* Et prosequitur ibi Pœnitentiam commendans, quæ sit post Baptisma; ergò ex Patribus ipsis Orientalibus Baptismus repeti non potest.

ARTICULUS TERTIUS

Idipsum rationibus aliquibus suadetur.

60. I. **C**ircumcisio, & remedium Legis Naturæ in Veteri Testamento unica tantum vice conferebantur, nec umquam repetebantur; ergò neque Baptismus iis longè perfectior, & præfiguratus repeti potest.

61. II. Peccatum Originale, quod est Baptismi præcipua materia, circa quam versatur, ex Floren. in Instruc. Armen. & docet August. in Enchir. Cap. 64. numquam redit, sed penitus extinguitur; ergò neque Baptismus redire potest.

62. III. Per Baptismum consecramur Deo, ejus milites efficimur; ergò repeti nequit Baptismus: quæ enim Deo semel sacrata sunt, nova consecratione non indigent, ut in Templis, & Altaribus animadvertimus, & habemus de consec. Dist. 1. Cap. *Solemnitates*, & Dist. 68. Cap. *Sicut semel*, Cap. *Ecclesiis*; & Panis ipse Eucharisticus unica tantum vice consecratur; ergò semel quoque tantummodo confertur Baptisma.

63. IV. Usus perennis, & antiquissimus Ecclesiæ numquam rebaptizandi ritè Baptizatos, sed solummodo reconciliandi eos, qui ab Ecclesia desciverunt; quæ consuetudo in veteribus Conciliis apertè constat, ut Nicæn. I., Arelat., Anciran. & aliis, cui usui numquam est derogatum, satis apertè ostendit, censuisse primitivam Ecclesiam, de mente Christi instituentis fuisse, ut Baptismus numquam renovaretur: hinc ex Socrate lib. 7. cap. 17. cum Judæus quidam ritè baptizatus iterum ad Baptis-

ptismum rediisset, exclamavit Episcopus: *Aus veterator es, aut Baptismum ignoranter accepisti*; ergò Baptismus iterari non potest.

64. V. Admissa iteratione, Baptismo fieret injuria maxima, innueretur quippè, ab ipso Originale nequaquam fuisse deletum, nec pœnas, actualibus Baptismum præcedentibus debitas, plenissimè dimissas, quod omnino absurdum est, supponeretur quippè, merita Christi in Baptismo primo applicata ad omnimodam peccati sive Originalis, sive actualis dimissionem minimè sufficere; igitur Baptismus ritè collatus nullo casu iterari licitè potest.

ARTICULUS QUARTUS

Dicendum secundo, etsi Æthiopes nullam haberent intentionem verè rebaptizandi, adhuc tamen materiam, & formam repetentes, illicitè facere.

65. **P** Rob. breviter I. Quia ponere signum à Deo ad effectus supernaturales practicè, & efficaciter significandos institutum eo animo, ut practicè non significet, est intrinsecè malum; redundat quippè in contemptum Sacramenti ob defectum debitæ intentionis effectu frustrati, & Dei instituentis, quasi signum illud sit ad effectus illos efficaciter producendos inefficax: At mergere Homines aquâ, verbaque recitare, quæ in vero Baptismo proferruntur tamquam forma, est ponere signum à Deo institutum eo animo, ut practicè non significet, cum revera à Christo Domino res illæ, & verba ad finem Gratiæ producendæ fuerint instituta; ergò Abyssini, qui aquâ, & verbis Baptismalibus utuntur alio fine, graviter peccant contra Religionem.

66. II. Vel *Æthiopes* illa ablutione cum verbis Sacramentalibus rem sacram intendunt facere, cum exclusione Sacramenti, vel prophanam: si rem sacram facere intendunt, malum est, & contra Religionem, eo quia facere intendunt diversa intentione ab illa, qua fuit à Christo Authore instituta: si verò actionem prophanam, adhuc graviter delinquant, actioni prophanæ verba sacra, & ex se effectus supernaturalis operatoria miscentes; est quippè irrisio, & notorius contemptus eo modo, quo si vasa sacra in usum prophanum converterentur: pejus autem agerent, si joco facerent; maximam quippè injuriam Deo irrogarent, dum rem sacrosanctam, ac mysteriis plenissimam, jocandi materiam efficerent, ac satis ostenderent, nullo pretio habere.

67. III. Quia cæterorum Sacramentorum formam super debitam materiam proferens absque intentione Sacramentum efficiendi, illicitè agit; illud quippe frustratorium efficit, & decipit Fideles, qui verum putant recipere Sacramentum, & propterea talia agentes in Sanctæ Inquisitionis Tribunali rigidissimè plectuntur; ergò etiam *Abyssini* graviter delinquant absque intentione baptizandi, Homines mergendo aquâ, superque ipsos formam Baptismi etiam proferendo.

68. Si tamen absque formæ prolatione simpliciter Homines in stagno abluerent, in memoriam Christi Baptismo suo aquas sanctificantis, minimè in hoc delinquerent: Sacramentum enim nullum simularent, aut irritum efficerent, sed solummodo sacro illo ritu Baptismi Christi memoriam recolerent, quod pium sanè, ac Religiosum est.

ARTICULUS QUINTUS

Solvuntur objecta contra primam partem.

69. **O** Bji. I. Ex Scripturis non habetur, Baptismum non posse repeti; ergò &c. Prob. ant. Nam loca adducta ex Joan. 3. *Nisi quis renatus fuerit ex aqua &c.* non videntur evincere intentum: Nam etiam per Pœnitentiam Deo renascimur, cui eramus mortui per peccatum lethale, quæ tamen repeti potest. Neque alius ex Ephes. 4. quo dicitur: *Unus Deus, una Fides, unum Baptisma*; si enim aliquid probaret, evinceret quoque, quod sicut datur unicus numero Deus respectu omnium, ita dari deberet unus numero respectu omnium Baptismus, quod tamen absurdum est. Ita etiam si hujusmodi Textus aliquid probarent, ostenderent quoque, unicam numero Eucharistiam dari debere, cum dicatur 1. Cor. 10. 17. *Unus panis, unum Corpus multi sumus*, quod tamen absurdum est; ergò Baptismus iterari licite potest.

70. Resp. ne. ant., ad cujus probat. neg. Conseq. Nam in Pœnitentia renascimur per modum judicii, & remissionis, & propterea laboriosus Baptismus à Patribus appellatur, & secunda post naufragium Tabula: venia quippe, nisi magno fletu, dolorosa Confessione, ac pœnali satisfactione, minimè obtinetur. In Baptismate autem, citra Judicis absolutionem, ac Pœnitentis confessionem, omnes peccatorum maculæ penitus absterguntur, pœnæque condonantur, atque ad infantium innocentiam, Initiati reducuntur: Hinc 1. Pet. 2. 2. regenerati Baptismate, *Quasi modo geniti Infantes* nuncupantur.

71. Infantia quōquē advērsus Textum ad Ephes. 4. 5. *Unus Dominus, una Fides, unum Baptisma*, nihil ad rem facit: illa enim verba convincunt apertissimē unitatem Baptismi modo sibi proportionato, non quod unicus sit Baptismus, sicut unicus est Deus, sed sicuti unicus datur Deus, ita unicus in unoquoque Fideli Deum colente debet esse Baptismus unius veri Dei protestativus, & unica in eum Fides ab unoquoque habenda.

72. Quod verò adducitur ex 1. Cor. 10. 17. ubi dicitur: *Unus Panis, unum Corpus multisumus*, Adversariis nihil favet: loquitur enim Apostolus, non de Eucharistia formaliter accepta, sed de nobis in Christo copulatis, Eucharistia mediante: Cum enim dixisset Apostolus v. 16. *Calix benedictionis, cui benedicimus, nonne communicatio Sanguinis Christi est? Et panis, quem frangimus, nonne participatio Corporis Domini est?* Subdit: *Quoniam unus Panis, unum Corpus, multisumus, qui de uno Pane participamus.* Quibus verbis innuitur, nos Fideles Eucharistiam sumentes ita in Christo, atque inter nos invicem esse conjunctos, quo multa grana tritici in uno pane conjunguntur; sicut igitur ista faciunt unum Panem, ita & nos in Eucharistia Christum sumentes facimus unum Populum.

73. Obji. II. Stat Baptismus absque ulla renovatione, ac nativitate spiritali; ergò saltem in illo casu iterari debet. Ann. est certum in ficto suscipiente Baptisinum, absque fructu ullo ratione nullius, vel pravæ dispositionis, ex Floren. Instruc. Armen. & Trident. sess. 7. Can. 6., definientibus per Sacramenta Gratiam causari, nisi adsit obex. Conseq. patet: Nam illa renovatio à solo Baptismo pro-

venire potest ad Originale , cæteraque præcedentia peccata delenda institutum ; sed à priori Baptismo provenire non potest ; ergò à secundo .

74. Resp. Dist. ant. , ex parte sui , ne. ant. , ex parte suscipientis ; Conc. ant. , & neg. Conseq. Ad probat. Conc. maj. ne. min. Illa enim renovatio , quæ fit in ficto , remota fictione , non provenit à secundo , sed à primo Baptismo , cujus effectus fuit quidem ob fictionem suspensus , sed non omninò sublatus : accedente verò recta dispositione , remotaque fictione , effectus Baptismi , nempe plena justificatio inducitur , & propterea secundus Baptismus minimè est necessarius , ut optimè Doct. Subtil. 4. Dist. 5. §. *Respondeo* . Quamvis autem , recedente fictione , Baptismus physicè non adsit , adest tamen moraliter , & in eo sensu perseverat . Nec per fictionem omnes penitus effectus Baptismi impediuntur , imprimitur quippe Character in Anima Baptizati , qui Ecclesiæ Filius efficitur , sed solummodo illa dona , quæ in perfecta justificatione conferuntur : & propterea secundus Baptismus ob finem hunc nequaquam admittitur .

75. Obji. III. Ex eo quia unica tantum detur nativitas carnalis , non arguitur multiplicem dari non posse spiritualem ; ergò iterabilis est Baptismus . Conseq. patet : hac enim ratione Catholici utuntur ad probandum unicum Baptisma esse oportere . Prob. autem ant. Stat unica tantum mors carnalis , & corporis resurrectio cum multiplici nativitate spirituali , cum plures quotidie à peccatis resipiscant , & spiritualiter renascantur ; ergò stat quoque unica nativitas carnalis , cum multiplici nativitate spirituali , cum nulla possit assignari dispa-

spartitas, adeoque multiplicari quoque Baptismus, in quo spiritualiter renascimur.

76. Resp. ne. ant., ad cuius probat. neg. conseq. Nam vita spiritualis eo modo, quo in Baptismo acquiritur, numquam amitti potest, utpote opposita morti per Adam inductæ, nempe peccato Originali, quod unica vice extinctum numquam reviviscit, adeoque, etiam vita ipsi opposita ex Baptismate acquisita, numquam extinguitur, & propterea, quoniam, numquam in Adamo morituri sumus, neque per Baptismum novo Adæ nempe Christo sumus regenerandi, & resurrecturi; vita verò, quæ acquiritur per Pœnitentiam pluribus modis peccato actuali amitti potest, & ideò etiam pluries recuperari, ac per ipsam resurgere: adeoque argumentum ad rem non facit.

ARTICULUS SEXTUS

Solvuntur objecta contra secundam partem, & quedam Quæsitæ enodantur.

77. **O** Bji. I. Christus, quando fuit baptizatus à Joanne, Joan. 1. 30. Matth. 3. 16. & Lucæ 3. 21. baptizatus fuit absque intentione recipiendi Baptismum; ergò etiam Abyssinis erit licitum recipere Baptismum Christi absque intentione recipiendi. Conseq. patet: nam licitum est imitari Christum, qui est *Via, Veritas, & Vita* Joan. 14. 6. Prob. ant. etiam, quia Christus non indigebat Baptismo ad sui purificationem, cum careret omni peccato; ergò accepit Baptismum absque intentione vera ipsum recipiendi quoad suum esse formale.

78. Resp. ne. ant., verè enim Christus intendit recipere Baptismum Joannis eo modo,

quo ab ipso conferebatur! Cum enim renueret Joannes ipsum baptizare, ait Matth. 3. 15. *Sine modo: sic enim decet, nos implere omnem justitiam*. Cæterum etiamsi non intendisset verè Baptismum illum recipere, adhuc nulla est consequentia: Baptismus enim ille utpote à Joanne institutus, Novæ Legis Sacramentum non erat, ex Triden. sess. 7. de Baptis. Can. 1. sed ipsius tantum præparatio: qui verò ab Abyssinis confertur, est verus Baptismus, cujus materiam, & formam reipsa ministrant: adeoque ex facto Christi nihil pro ipsis colligitur: neque omnia, quæ Christus fecit, nobis sunt regula agendi; ipse quippe ob varia gravissima motiva, quæ Patres commemorant, circumcidi voluit, nec tamen Fidelibus licitum est circumcidi, Paulo dicente ad Gal. 5. 2. *Dica vobis, quoniam si circumcidamini, Christus vobis nihil proderit*; aliaque gessit, quæ nobis imitari omninò interdicitur.

79. Obji. II. Sumendo ablutionem illam cum formæ repetitione, nulla fit Sacramento injuria: nullum quippe fit, nec fieri intenditur Sacramentum, sed mera repetitio actionis Christi Baptismum facto suo instituentis, ex D. Thoma 3. Par. Quæst. 26. art. 1. & insinuat August. serm. 37. de Temp. non verò intenditur fieri verum Sacramentum; ergò licitè fit.

80. Conf. Nam licitum est etiam secundum Latinos repetere ablutionem, quæ est materia Baptismi, eo quia nullum intenditur Sacramentum; ergò etiam ob eandem rationem licet repetere formam, cum etiam illa repetitione nullum intendatur Sacramentum, ad quod conficiendum non minus materia, quam forma requiritur.

81. Resp. ne. ant., & conseq. probationis:

nis: nam hoc ipso, quod non fiat, nec fieri intendatur Sacramentum, ipsi maxima fit injuria, dum ea omnia ponuntur, quæ, præcisâ intentione, Sacramentum conficere nata sunt, cum frustratorium reddatur, & inane, quod à Christo Domino pro salute Hominum institutum est.

82. Ad Conf. neg. Conseq. Nam aqua de se materia est indifferens ad plura significanda, & imperfectior pars signi Sacramentalis, & propterea fieri potest, & repeti ablutio, quin Sacramentum iterationis periculo subjiciatur: videmus enim Ecclesiam aquâ uti, & ablutione in aliis ritibus à Baptismo diversis. Forma verò super ablutionem applicata, quæ est materia proxima, non est amplius indifferens, sed determinata, & completiva Baptismi, qui verbis formæ prolatis perficitur, finemque ultimum imponunt composito Sacramentali: ac proindè irreverentia in secundo, non in primo casu committitur. De tempore verò institutionis Baptismi, quoniam Scholastica controversia est, differere non est opus.

83. Quæres I. Quid agere Minister debeat, dubio existente Baptismate?

84. Resp. Ad dubium tollendum omnem moralem diligentiam adhiberi oportere, Parentes Baptizati, Propinquos probabiliter confcios interrogando, Libros Parochiæ lustrando &c. Eo autem perseverante, is, de quo dubitatur, sub conditione baptizari debet, ex Alexand. III., *Extra*, de Baptismo, & ejus effectu Cap. *De quibus*. Quamvis enim sacrilegii discrimen effugiendum sit, saluti quoque Baptizandi consuli oportet, absque Baptismi lavacro profectò perituri: optimè enim Leo Mag. *Providere debemus, ne, dum speciem quam-*

dam Cautionis tenemus, damnum regenerandarum incidamus Animarum.

85. *Quæres II. Quid faciendum sit in casu, quo licet doceri minimè possit, Baptismum collatum esse, nemo tamen oppositum potest demonstrare?*

86. *Resp. Inter Fideles, qui omni cura fatagunt Infantes baptizari, nec adulti permittuntur diu absque Baptismo persistere, quoniam pro Baptismi existentia militat præsumptio, iterari Baptismum non posse, donec certissimis argumentis oppositum probetur, ex Innoc. III. De Presbytero non baptizato Cap. Veniens. Si verò casus inter Infideles contingat, cum Baptismi præsumptio desit, etsi oppositum probari non possit, utique conferri debet, ne scrupulosa nimium de iteratione Baptismi sollicitudo Animæ infantis non regenerati officiat: In his enim casibus, ut inquit Leo Mag. Epist. 92. Quod non ostenditur gestum, non finit, ut videatur iteratum.*

87. *Quæres III. Quale dubium esse debeat, ut saltem sub conditione Baptismus iteretur?*

88. *Resp. Dubium tale requiri, ut omni adhibita diligentia, vinti non possit: tunc enim absque ullo peccato saltem sub conditione repeti potest. Hinc Innoc. III. Cap. Veniens, inquit: Non intelligitur iteratum, quod ambigitur esse factum, nec malè de Sacramento sentitur, cum illud non Religionis contemptus, sed Articulus necessitatis excludit. Cæterum, urgente necessitate, apposta conditio tollit maculam sacrilegii: ac proinde imminente parvuli morte, non ita de iteratione laborandum est: hæc quippe tollitur, apposta conditione, aliunde vero parvuli æternæ saluti providetur, in tali casu graviter periclitanti.*

S E C T I O T E R T I A

An validus, ac licitus sit Baptismus, in quo sicuti ter mersio, ita, ter quoque forma repeteretur?

89. **S**Uppono hic trinam mersionem in Baptismate non esse absolute necessariam, sicuti neque unam præcisè. Ecclesia quippe variis temporibus, modò unam, modò trinam adhibuit: ut enim optimè Mag. Gregor. ad Sanctum Leandrum Hispalensem Archiepiscopum lib. 1, Reg. epist. 41. *In una Fide nihil officit Sanctæ Ecclesiæ consuetudo diversa*, dummodo substantia servetur, quod quidem sive in una, sive in trina mersione custoditur, cum vera utraque sit ablutio à Christo Domino pro Baptismatis materia proxima instituta.

90. Porro Armeni trinæ mersionis morem retinentes, juxta numerum mersionum, etiam formæ prolationem multiplicant, itaut in singulis mersionibus verba quoque proferant integræ formæ. Videndum est, an hujusmodi consuetudo possit sustineri?

A R T I C U L U S P R I M U S

Dicendum est juxta numerum mersionum formam iterari non posse; adeoque Baptismum ita repetitum esse invalidum.

91. **P**Rob. breviter: Baptismus semel ritè collatus, neque licitè, neque validè iterari potest, uti ex Divinis Scripturis ad Ephes. 4. 5. Ad Hæb. 10. 23. ad Rom. 6. 5., & perenni Ecclesiæ traditione, Patrumque una-

nimi consensu , ac Floren. In Instruc. Armen. & Triden. sess. 7. Cap. 9. instruimur: in Baptismate enim Deo renascimur: sicuti autem duplex non datur nativitas carnalis in Adam, ita nec duplex nativitas spiritualis in Christo. Si autem ter in Baptismo, juxta trinam immersionem forma repeteretur, Baptismus iteraretur; ergò hæc replicatio formæ efficit Baptismum, nedum illicitum, sed invalidum. Prob. min. nam per primam immersionem, & formam prolatam perfectus habetur Baptismus; Sacramentum enim completur ex materia, & forma, ex Floren. hæc autem habetur in prima immersione, verbis à ministro prolatis; ergò in prima immersione habetur perfectus Baptismus; igitur iteratur in secunda, & tertia immersione; ergò illicitè, & invalidè.

92. Neque reponatur deesse Ministri intentionem, quæ non refertur ad primam, sed ad tertiam immersionem, & prolationem verborum. Hoc enim gratis dicitur, cum Minister in omni immersione baptizare intendat, & propterea verba formæ proferat: nec adest ratio, cur intentionem ad tertiam potius referat, quam ad primam ablutionem.

93. Si tamen Minister solummodo in tertia immersione verè baptizare intenderet, utique sola tertia immersio cum verbis formæ Sacramentum esset, dum immersionibus antecedentibus deesset intentio, quam Florentinum ibidem ad Sacramenti validitatem requirit: at peccaret gravissimè Sacerdos, ac Irregularitatem mereretur, de Apost. Cap. *ex Litterarum*, cum instar sacrilegii rebaptizatio semper in Ecclesia fuerit habita, de Consec. Dist. 4.

ARTICULUS SECUNDUS

Solvuntur Objectiones.

94. **O** Bji. I. Non minus ad confectionem Sacramenti materia proxima, quam forma requiritur: est autem licitum trina immersione Baptismum conficere; ergò etiam ter formam proferre.

95. Resp. Falsam esse majorem: Quamvis enim utraque necessariò requiratur, Forma tamen est magis necessaria, utpotè completiva, & ultimo constitutiva compositi moralis Sacramentalis: sicut enim in physicis, ita etiam in moralibus Forma est illa, quæ sicuti dat ultimum esse, ita præbet esse specificum. Composito, illudque à quocumque alio distinguit, utpotè materiæ determinativa ex se ad plura indifferentis: non ergò ex trina ablutione, trina quoque formæ repetitio in Baptismo argui potest.

96. Obji. II. In Extrema Unctione ad multiplicationem unctionum forma quoque repetitur; ex Floren. in Instruc. Armen. §. *Quintum Sacramentum*, & tamen unicum est Sacramentum; ergò etiam idipsum in Baptismate contingit, etiamsi forma repetatur: nec apparet ratio cur ungi possint plura membra, cum formæ repetitione, non possint quoque ablui eadem repetitâ formâ.

97. Resp. Conc. ant., & neg. conseq. nam Extrema Unctio est unum Sacramentum unitatè integritatis, non indivisibilitatis, uti notat eleganter Doct. Subtil. 4. Dist. 23. Quæst. unic. ad secundum: cujus argumentum est, formam verbis diversis proferri in unctione unius mem-

bri, ac in unctione alterius, ex Ritual. Rom. Hoc autem adeo verum est, ut, si contingat, ob membrorum defectum, vel angustiam temporis, non omnia membra ungi, adhuc tamen formas omnes diversas, quæ in cæterorum membrorum unctione recitantur, ut Sacramenti effectus integer habeatur; proferri à Ministro oportere, ex Ponc. nost. Cur. Theol. Disp. 47. Quæst. 2. Hoc quippè Sacramentum fit per modum remedii purgativi, non regenerativi; Baptismus autem Sacramentum est per modum, regenerativi, ac nativitatis spiritualis, & proinde indivisibiliter effectum suum confert; adeoque formâ, & materiâ membro alicui principali applicatâ, perfectum, & integrum fit Sacramentum.

98. Objl. III. Juxta Sanctum Thomam 3. Par. Quæst. 66. art. 8. ad tertium: Ita intentio Ministri ad Baptismi validitatem requiritur, ut ex illa unitas Baptismi desumatur: at ex eo quia in trina merfione Minister unum solummodò Baptisma intendit, unum tantummodò confertur Baptisma; ergò etiam si pluribus vicibus forma repetatur, si unum intendatur Baptisma, unicum erit Baptisma.

99. Resp. Conc. maj., & dist. min. ex eo quia præcisè intenditur, neg. min. ex eo quia ad unitatem Baptismatis indifferens est una, vel trina merfio, conc. min., & neg. conseq. Itaque intentio potest quidem efficere, ut si una tantum merfio fiat, cum forma proportionata, unum fiat Sacramentum: at non potest efficere, quod si fiant tres merfiones, additâ ad singulas formâ, trina fiant Sacramenta, sed unum tantummodo, nempe in prima merfione, cui forma applicatur; cæteræ enim subsequentes cum forma repetita, Sacramenta non sunt, sed sacri-

facrilegia, una enim tantum fit nativitas Spiritualis, non plures, uti una est tantum nativitas carnalis.

SECTIO QUARTA

An forma, qua Latini utuntur in Baptismate conferendo, legitima sit?

100. **L**atini Baptismum Conferentes hac forma utuntur: *Ego te Baptizo in Nomine Patris, & Filii, & Spiritus Sancti*. Orientales autem hac alia: *Baptizetur servus Christi in Nomine &c.* Armeni formam Latino-
rum reprehendunt, ac uti illegitimam prosci-
dunt, eo quia Persona Baptizantis exprimitur
dicendo: *Ego te Baptizo*. Ita Vartan. in monit.
ad Armen. Cap. 2. Gregor. Dittavien. in lib. In-
terrog. Trac. 24. n. 29. Videndum an justè?

ARTICULUS PRIMUS

*Dicendum est, Formam, qua Latini in Baptis-
mate conferendo utuntur, esse legitimam.*

101. **O**stenditur ex Scripturis: nam Matth.
28. 19., ubi Baptismi promulga-
tio habetur, & institutio insinuat, dicitur:
*Docete omnes Gentes, baptizantes eos in No-
mine Patris, & Filii, & Spiritus Sancti*. Hic
denotantur Baptizandi, & Baptizaturi: passio
Baptizandorum, & actio Baptizantium, qua-
rum utraque de necessitate exprimenda est: at
Armeni non putant inutilia illa verba: *Bapti-
zetur servus Christi*, quibus exprimitur passio
Baptizatorum; ergo nec inutilia, aut illegiti-
ma censenda sunt ista alia: *Ego te Baptizo*, deno-

tantia actionem Baptizantis; in neutra enim effectus Ministro adscribitur principaliter, sed Trinitati, cum in utraque forma dicatur: *In Nomine Patris, & Filii, & Spiritus Sancti*; & sicut minimè condemnant Absolutionem Pœnitentialem, in qua dicit Sacerdos: *Ego te absolvo*, cui damnare debent formam Baptismalem, in qua dicitur; *Ego te Baptizo*? Ergò &c.

102. Deinde ad Corinth. 1. cap. 1. 14. 15. 16. asserit Apostolus: *Gratias ago Deo meo, quod neminem vestrum baptizavi, nisi Crispum, & Cajum, ne quis dicat, quod in nomine meo baptizati estis: Baptizavi & Stephanæ Domum: Caterùm nescio, si quem alium baptizaverim.* Si autem in forma Baptismi nomen Baptizantis minimè in prima Persona fuisset expressum, nullam Corinthii causam ob Baptisma à Paulo receptum habuissent, eo quia in tertia Persona collatus fuisset solis Trinitatis Personis expressis; ergò Apostoli nomen primæ Personæ in conferendo Baptismo adhibebant; ergò nec peccant Latini eundem morem servantes ex ipsismet Scripturis.

ARTICULUS SECUNDUS

Idipsum ex Doctrina Ecclesiæ, & ratione suadetur.

103. **C**oncilium Floren. Oecumen. ex Latinis, & Græcis Patribus compactum in Bulla unionis, cui Armeni quoque assensum præbuerunt, utramque formam legitimam pronunciavit, rationem optimam afferens; quia nimirum: *Cum principalis Causa, ex qua Baptismus virtutem habet, sit Trinitas Sancta; instrumentalis autem sit Minister, qui tradit*

dit exterius Sacramentum, si exprimitur actus, qui per ipsum Ministrum exercetur, cum Sanctæ Trinitatis invocatione, perficitur Sacramentum: In forma autem Latina exprimitur melius, & clarius, quam in Armena, & Græca cum ad primam Personam Ministrantis dirigatur. Idipsum ex Later. IV., cui Orientales Patriarchæ mediatè, vel immediatè assensum præbuerunt, & adstiterunt, ex Abb. Uspergenfi, in Cronica ad an. Christi 1215., & Mat. Paris. ad an. 1213. ubi damnantur Græci Latinos rebaptizantes; eo quia in forma exprimeretur prima Persona Ministri baptizantis; ergò sicuti bona est ex istis Conciliis forma Græcorum, & Armenorum, ita æquè bona est forma Latinorum.

104. Et ratio ipsa suffragatur: tumquia forma, qua Latini utuntur, ab ipsismet Apostolis perenni traditione accepta est: hinc D. Thom. 3. Part. Quæst. 66. art. 1. ad Primum putat, Patres Græcos primam Personam Ministri in forma non exprimentes ab usu antiquissimo Ecclesiæ recessisse: tumquia intentio Christi institutoris æquè benè, imò melius servatur in forma Latina, in qua exprimitur actio Ministri, Matth. 28. insinuata, quam in Græca, aut Armena: tumquia forma practica, qualis esse debet Sacramentalis, æquè benè, imò melius exprimitur in forma Latina, ac in Græca, & Armena: tumquia intentio Ministri faciendi, quod facit Ecclesia, & vult Christus, ad validitatem Sacramenti necessario requisita, melius in Latina forma innotescit, in qua Ministri actio in prima Persona exprimitur, quam in Græca, & Armena, implicite tantum eam denotante, cum dicitur: *Baptizetur Servus Christi*; ergò forma Latina nullo pacto ut illegitima reprehendi potest.

ARTICULUS TERTIUS

Solvuntur Objectiones.

105. **O** Bji.I. Ex hoc, quod Christus Dominus Matth. 28. jussit, à Ministris Baptismum perfici, & quidem in Nomine Divinarum Personarum, non arguitur, formam, qua perficitur, esse debere: *Ego te Baptizo in Nomine &c.* ergò male asseritur, in forma exprimi debere actionem Ministri. Conseq. patet, nam Mar. ult. 18. dicitur de Apostolis: *In nomine meo Dæmonia ejicient, linguis loquentur novis, serpentes tollent;* nec tamen in eorum executione dicere oportuit: *Ego Dæmonia ejicio, serpentes tollo;* ergò similiter in Baptismi collatione dici non debet: *Ego te Baptizo.*

106. Resp. Ad futile hoc argumentum, cui Græci quoque, & Armeni satisfacere debent, cum in ejectione Dæmonum, aut Infirmorum sanatione non dicerent Apostoli: *Liberetur Servus Christi à Dæmonibus, vel sanetur ab infirmitate:* conc. ant., & neg. conseq. Nam sanatio Infirmorum, & cætera alia à Marco recensita non erant opus Sacramentale, & ideo verba determinata minimè requirebant: verba autem formæ Baptismalis sunt effectiva Sacramenti ex opere operato; & ideo explicitè, vel saltem implicitè actionem Ministri exprimere debent: quod fit verbis illis Latinæ formæ: *Ego te Baptizo:* implicitè in forma Græca: *Baptizetur Servus Christi.*

107. Obji.II. Verba illa: *Ego te Baptizo;* sunt supervacanea; ergò forma Latina est illegitima. Conseq. patet, nihil enim in collatione

Sacramentorum superfluere debet, sicuti nec deesse. Ant. autem patet: nam Latini concedunt formam Græcam, aut Armenam, in qua omittitur: *Ego te Baptizo*, esse legitimam; ergo verba illa, *Ego te Baptizo* superfluunt.

108. Resp. Admiss. ant., quod falsissimum est, adhuc neg. conseq. nam diminutio tollit substantiam Sacramenti, non verò superfluitas: sicuti ergo, licet superfluat in forma Græca, & Armena ly *Servus Christi*, cum præberi posset in secunda Persona, dicendo: *Baptizare*, vel in tertia, dicendo: *Hic fit Baptizatus*, adhuc permittitur ut legitima; ita reprehendi non debet forma Latina, in qua dicitur: *Ego te Baptizo*. Cæterum assumptio falsa est: etsi enim explicita positio primæ Personæ Ministri in forma non sit omninò necessaria, est tamen congrua, atque ad explicandum baptizantis ministerium opportuna, adeoque reprehendi nequaquam meretur.

109. Obji. III. Fundamentum præcipuum Adversariorum: Apponendo in Forma Baptismi primam Personam Ministrantis, ex vi sermonis datur intelligi, ipsum esse Causam, principalem Baptismi: hoc autem magnum incommodum est; nam datur ansa Baptizatis beneficium regenerationis non in Christum præcipuum Authorem, sed in Ministrum ipsum, refundendi, quod quidem magnum absurdum est, & multarum seditionum origo, uti Paulus insinuat, 1. Cor. 1. 12. ergo malè a Latinis in forma Baptismi ponitur prima Persona Ministri dicentis: *Ego te Baptizo*.

110. Resp. neg. maj. Quandoquidem apponendo verba: *In Nomine Patris, & Filii; & Spiritus Sancti*: satis datur intelligi, regenerationem spiritualem, quæ in Baptismate præ-

præbetur, Deo veluti Causæ principali; Ministro autem veluti tantummodo instrumentali tribui oportere: quare Schisma, vel Seditio non magis ex forma Latina, quam ex Armena, vel Græca oriri potest: nam etiam in ista implicitè ministerium baptizantis exprimitur; proculdubio enim compertum est, neminem à seipso posse baptizari. Quod ergò Patres Græci, ut seditionibus occurrerent, Personam Baptizantis censuerint omitti, quæ virtualiter in tertia Persona passivè exprimebatur, infirmitati Fidelium consulentes benè egerunt: at non sunt Latini reprehendendi, qui Apostolicè inhærentes Traditioni antiquissimam formam retinuerunt, hujusmodi scandala, seditionesque in suis Fidelibus minimè formidantes, qui numquam à Patribus Græcis fuere reprehensi, etsi nomen Baptizantis in prima Persona retinebant.

SECTION QUINTA

An Baptismus à quolibet ministrari queat?

III. **C**ertum est, ordinarium Baptismi Ministrum non esse quemlibet, sed Sacerdotem esse oportere, & quidem Jerarchico Ordine servato, uti optimè Mag. Leo animadvertit Epist. 88. ad Germaniæ, & Galliæ Episcopos; sed difficultas est, an validè à quovis etiam Laico, aut Fœmina ministrari possit? Armenorum Magistri negativam: Catholici affirmativam sententiam tuentur.

ARTICULUS PRIMUS

Dicendum est, Baptismum à quocumque etiam Laico, aut Fœmina collatum, si necessaria ponantur, esse validum.

112. **P** Rob. ex Sacris Scripturis: Nam Circumcisio, quæ in Veteri Testamento Baptismum figurabat, & Originale delet, ex Gregor. Mag. 4. Moral. cap. 2. Innocen. III. Cap. *Majores* de Baptismo, ex August. lib. 4. de Baptismo cap. 24. à Mulieribus quoque fuit ministrata: Nam Exod. 4. 25. Sephora Moyse Uxor Filium suum circumcidit: hoc autem Domino placuisse, patet; per illam enim Moyse à vitæ discrimine fuit ereptus, qui ob ejusdem omissionem occidi à Deo periclitatus est. Item 2. Mach. 6. 10. vigente Antiochi Gentilis adversus Judæos Fideles persecutione, duæ Mulieres delatæ sunt infantes suos circumcidisse, & propterea, iisdem ad ubera suspensis, per mænia præcepitatas; igitur licebat tunc Fœminis circumcidere; ergo multo fortius nunc licet baptizare.

113. Ex novo Testamento habemus, Baptismum non semper à Sacerdotibus collatum: Philippus Diaconus utique Sacerdos non erat, & tamen Act. 8. 12. 18. baptizabat: Paulus Apostolus recenter ad Christum conversus, ab Anania simplici Discipulo, nec Sacris adhuc initiato, salutaribus aquis fuit regeneratus, Act. 9. 18. Vivente quoque Christo, Discipuli ejus Baptismum conferebant; nec sanè ullo Ordine fulgebant, non adhuc instituto; igitur ex Scripturis etiam Laici baptizare validè possunt, urgente necessitate.

AR-

ARTICULUS SECUNDUS

Idipsum ex Ecclesiæ Decretis , ac Patribus ostenditur .

114. **E** Libertina Synodus antiquissima , Nicænum quippè primum præcessit , cap. 38. dicit , Fideles quoque Laicos posse baptizare , cum Ecclesia procul abest , & Cathecumenus est morti proximus . Lateran. IV. Occumen. , cui per se , vel per Legatos adstiterunt quoque Orientales cap. 1. *Sacramentum Baptismi* , ait , *quod ad invocationem individue Trinitatis , videlicet Patris , & Filii & Spiritus Sancti , consecratur in aqua , tam parvulis , quam adultis in forma Ecclesiæ à quocumque ritè collatum proficit ad salutem .* Floren. in Instr. Armen. §. *Primum omnium : Minister hujus Sacramenti est Sacerdos , cui ex officio competit baptizare : In casu autem necessitatis non solum Sacerdos , vel Diaconus , sed etiam Laicus , & Mulier , imò etiam Paganus , & Hæreticus baptizare potest , dummodo formam servet Ecclesiæ , & facere intendat , quod facit Ecclesia .* Huic Doctrinæ concinunt Gelas. Papa ad Episc. Lucan. & Brut. cap. 9. & Urban. II. Epist. ad Vit. quibus Baptismus à Laicis , & Fœminis collatus approbatur .

115. Idem Dogma Patres tradunt , Tertulian. secundi Sæculi Author. lib. de Baptif. cap. 17. cum dixisset , jus baptizandi in Sacerdotibus ratione gradus esse , subdit : *Quo salvo , salva pax est , alioquin etiam Laicis jus est ; quod enim ex aquo accipitur , exequo datur .* Hieron. Dial. adver. Luciferian. idipsum dicit de jure Sacerdotum , & subdit : *Si tamen neces-*

cessitas cogat, scimus, etiam Laicis licere. Idipsum docet August. ad Fortunat. Isidor. Hispal. de Offic. Ecclesiæ. lib. 2. cap. 24., alique quamplures, cum sit communis opinio; ergò ex Decretis Ecclesiæ, & sensu Patrum, etiam Laici validè baptizant.

ARTICULUS TERTIUS

Adducitur quoque Ratio.

116. I. **Q**uia ex D. Thoma 3. Par. Quæst. 67. art. 3. & 4. in corp. Sacramentum Baptismi est omnibus necessarium, & commune, ut omnibus indigentibus subveniatur; ergò etiam Laici baptizare possunt, cum sæpè contingat, Ministros Ecclesiæ procul abesse.

117. II. Ob summam hujus Sacramenti necessitatem, ejus materia est omnibus communis, & obvia, nempe aqua elementaris; ergò etiam Minister in casu necessitatis debet esse communis; ergò extenditur etiam ad Laicos, & Mulieres.

118. III. Ex D. Bonav. 4. Dist. 5. art. 1. Quæst. 1. in corpor. Baptismus est regeneratio spiritualis; ergò à quocumque in casu necessitatis ministrari potest, sicut cuicumque generatio competit activa carnalis. Nec Fœminæ repelli debent: in Christo enim non distinguuntur à Viris, Apostolo dicente ad Gal. 3. 27. 28. 29. *Quicumque enim in Christo baptizati estis, Christum induistis: Non est Judæus, neque Græcus, non est servus, neque liber: non est masculus, neque fœmina: omnes enim unum estis in Christo Jesu.*

ARTICULUS QUARTUS

Solvuntur Objectiones.

119. **O** Bji. I. Sicuti Matth. ult. 19. , dum dicitur; *Docete omnes Gentes baptizantes eos* &c. Baptizare , & docere solis Apostolis præcipitur; ita etiam remittere peccata eisdem reservatur, Joan. 21. 23. dum dicitur: *Quorum remisistis peccata remittuntur eis* , & *quorum retinueritis* , *retenta sunt* : sed remittere peccata ita competit Apostolis , & eorum Successoribus , ut etiam in casu necessitatis , qui Sacerdotes non sunt validè peccata remittere non possunt; ergò etiam qui Sacerdotes non sunt , nequeunt validè baptizare .

120. Resp. majorem esse veram de publico , & solemnì Baptismo , quoties nulla cogit necessitas , cujus collatio ad solos Presbyteros , & de eorum commissione ad cæteros pertinet Sacerdotes , non verò de privato , qui potest à quocumque conferri .

121. Nec valet paritas de Sacramento Pœnitentiæ : illud enim confertur per modum Judicii; propterea , & validè , & licitè solis committitur Sacerdotibus jurisdictione pollentibus: Baptismus autem per modum regenerationis confertur; sicut autem ad Judices temporales minimè restringitur generatio carnalis , etsi leges ferre possint circa modum generationis : ita etiam in generatione Spirituali etsi Sacerdotes , ut publicos Ministros præferri oporteat; attamen alii minimè excluduntur , dum solemniter non fit , & necessitas cogit . Et sicuti Homines simplices magisterium publicum nequaquam exercentes , privatim instruere possunt ,
etsi

et si publicum magisterium Sacerdotibus committatur, cur non etiam privatim baptizare, necessitate compellente?

122. Obji. II. Baptizare est actus jurisdictionis, quo quis Cœtui Christianorum adscribitur; ergo soli Sacerdotes, & Episcopi baptizare validè possunt, cum ipsi soli in Ecclesia jurisdictione gaudeant.

123. Resp. neg. ant., in rigore loquendo: nam sicut in carnalibus generare non est opus jurisdictionis, sed naturæ, ita in spiritualibus regenerare: in tantum verò baptizare solemniter ad solos Prælatos pertinet, quia, cum Baptizati in Ecclesiæ potestatem deveniant, cui subditi fiunt, agnosci ut oves à Pastoribus debent, ac in ovile publicè introduci, etsi aliundè ingredi queant. Cæterum Apostolorum proprium non est baptizare, dicente Apost. 1. Cor. 1. 17. *Non misit me Christus baptizare, sed Evangelizare.* Quare si quis Laicus citra necessitatem baptizat, peccat quidem, quia alterius officio se immiscet, validè tamen facit, ut optimè Mag. August. lib. 2. con. Epist. Parmen. cap. 13.

124. Obji. III. Eucharistia ita necessaria est ad Vitam spiritualem sustentandam, sicut Baptismus ad eam primo producendam; sicut enim Joan. 3. 5. dicitur: *Nisi quis renatus fuerit ex aqua, & Spiritu Sancto, non potest introire in Regnum Dei*: sic etiam Joan. 6. 54. habetur: *Nisi manducaveritis Carnem Filii Hominis, & biberitis ejus Sanguinem, non habebitis vitam in vobis*, & tamen Eucharistia à solis Sacerdotibus confici potest; ergo etiam Baptismus à solis Sacerdotibus, cum in institutione de iisdem solis fiat mentio, sicuti etiam in institutione Eucharistiæ.

125. Conf.

125. *Conf.* Non obstante quacumque necessitate, sola aqua naturalis in Baptismo pro materia adhiberi potest, cum de ea sola in institutione fiat mentio; ergo non obstante quacumque necessitate, soli Apostoli, & eorum Successores baptizare possunt, cum in institutione Baptismi ipsi soli pro ministerio commo-
morentur.

126. *Resp. neg. maj.* Nam ad Vitam inducendam spirituales in nondum regeneratis unice Baptismus est necessarius, ut Fideles Christo nascentur: ad Vitam autem tuendam spirituales, non sola datur Eucharistia, sed etiam alii cibi spirituales, sicuti nec ad vitam corporalem tuendam unice panis est necessarius, etsi præcipuus, & quotidianus cibus sit. Vita quoque spiritualis conservari aliquo tempore potest absque cibo spirituali, sicuti carnalis absque cibo carnali; hinc videmus, ab Ecclesia quotidianam Eucharistiæ sumptionem minimè præscribi, neque etiam in omnibus permitti: Joan. autem 6. cum Eucharistiæ perceptio adultis præcipiatur, satis innuitur, eam requiriri quidem ad salutem, sed necessitate tantum præcepti, non medii.

127. *Ad Conf. neg. conseq.* major enim Ministri necessitas est materiam applicantis, & determinantis, quam aquæ: quia tamen aqua materia est communis, & omnibus obvia, quemadmodum ex ejus universalitate Baptismi extensio ad omnes colligitur, ita deducitur quoque, Ministros esse debere communes, quotiescumque necessitas urgeat: quare loca ad ducta Scripturæ de solemnibus, non autem privato Baptismo intelligenda sunt.

CAPUT II.


De Sacramento Confirmationis.

128. **P**ost Baptismum, sequitur ordine Confirmatio, seu Chrismatio, ut vulgò appellatur, de qua in præsentì sermo instituitur: hìc enim non minus, quam in cæteris, Orientales à veritate aberrant: & propterea de ipsa differendum est.

SECTIO PRIMA

An Chrismatio sit de Baptismi essentia?

129. **C**hrismatis nomine venit I. Quod in consecratione aquæ Baptismalis ter Crucis specie Sabbato Paschæ, & Pentecostes infunditur. II. Oleum benedictum Cathecumenorum, quo baptizandus à Ministro in scapulis, & pectore ungi solet. III. Oleum, quo baptizatus in vertice capitis ungitur. IV. Illud, quo baptizati frons ab Episcopo ungitur. Armeni ex Guido Carmel. de Hæres. V. *Armeni*, & Simeone Thessalon. apud Arcud. lib. 1. de Sacram. cap. 13. Chrismatis unctionem de substantia putant Baptismi. Videndum est an rectè Armeni in hoc sentiant?



ARTICULUS PRIMUS

*Dicendum est Chrismatis unctionem,
ad Baptismi validitatem minimè
esse necessariam.*

130. **P** Atet ex Scripturis: quia nullibi de Unctione, ubi Baptismus, aut ejusdem necessitas commemoratur, ulla fit mentio, sed ablutionis solummodo, & aquæ, ut constat Joan. 3. 5. Ad Ephes. 5. 27. Ad Titum 3. 5. Matth. ult. 19. Marci 16. 16. 1. Petri 3. 21. nec Apostoli, aut eorum Discipuli alia materia usi sunt, Act. 8. 38., & Act. 10. 48.; ergo Chrismatio quæcumque illa sit, nullo pacto ad substantiam, & essentiam pertinet Baptismi; ubi enim Scriptura Unctionem vult adhiberi, eam exprimit, ut de Extrema Unctione constat, cujus unctiones, Jacobi 5. 14. 15. demonstrantur.

131. Idipsum docent Oecumenica Concilia, quæ solam aquam, non autem Chrisma pro materia Baptismi assignant, ut Lateran. IV. Cap. *Firmiter*, & Floren. in Instruc. Armen. §. *Primum*, Unctionem verò Chrismatis pro Confirmationis Sacramento conferendo, & Oleum simplex pro Extrema Unctione; ergo censent ad Baptismatis substantiam nec Chrismate, nec unctione opus esse.

132. Praxis ipsa Ecclesiæ idipsum docet, cui non assentiri, insolentissima est insania, juxta Mag. August. de Baptis. lib. 4. cap. 4. numquam eos, qui purâ aquâ citra ullam unctionem fuere regenerati, denuo baptizantis.

133. Ratio autem est manifesta: nam si Chrisma de necessitate Sacramenti ad Baptismum

num requireretur, Baptismus, & Confirmatio non duo, sed unum essent Sacramentum, cum eadem esset materia, & forma: hoc autem absurdum est, etiam secundum Armenos, qui Baptismum à Confirmatione distinguunt: hinc immediate post ablutionem, & ante omnem unctionem Chrismate confectam Minister Armenus hæc verba profert: *Christi Sanguine redemptus, & à peccati subjectione liberatus es, in Filium Patris Cœlestis adoptatus, & hæres Christi factus, & Templum Spiritus Sancti*; quod profectò falsum esset, si Baptismi essentia in unctione quoque Chrismatis sita esset; ergò Chrismatis Unctio, quæcunque illa sit, nequaquam ad Baptismatis substantiam pertinet, etsi ritus sit antiquissimus ab Ecclesiæ primordiis introductus, cujus meminerunt Basil. de Spirit. Sanc. cap. 27. Cyril. Jerosol. Catec. Mystag. 2. Nazianz. orat. 40. de Sac. Baptis. Chrysost. Hom. 6. in cap. 2. Epist. ad Colos.

ARTICULUS SECUNDUS

Solvuntur Objecta.

134. **O** Bji. I. In eo consistit Baptisma, per quod Baptizatus recipit Spiritum Sanctum, ex Joan. 3. 5. *Nisi quis renatus fuerit ex aqua, & Spiritu Sancto, non potest introire in Regnum Dei*: at recipit Spiritum Sanctum per unctionem Chrismatis, ex Act. 8. 17. ubi de Apostolis confirmantibus dicitur: *Tunc imponebant manus super illos, & accipiebant Spiritum Sanctum*: in impositione autem manuum Unctio chrismatica includitur; ergò in unctione consistit essentia Baptismi.

135. Resp. conc. maj. & dist. min. Spiritus
Pars II. E San-

Sanctus eo modo, quo recipitur in Baptismo conc. min. alio modo, neg. min. & conseq. Itaque Spiritus Sanctus in omnibus Sacramentis recipitur, sed diversimodè: in Baptismo per modum regenerationis spiritualis, in Confirmatione per modum roborativi, in Eucharistia per modum cibi: dicitur autem speciali ratione in Confirmatione Spiritus Sanctus dari, quia in primitiva Ecclesia pro Fidei confirmatione visibilibus signis super Confirmatos apparebat, quo perfusi linguis loquebantur, & prophetabant, & signa faciebant: hinc Simon Magus Spiritum Sanctum ab Apostolis, oblatâ pecuniâ, postulavit, Act. 8. 19. quo sensu Scripturæ adductæ sunt explicandæ.

136. Obji. II. Patres asserunt, Baptismum Confirmatione compleri, ac perfici, ut Ambros. lib. 3. de Sacram. cap. 2. Cyril. Jerosol. Cathec. 3., & 4. Cyprian. lib. 1. Epist. 2. & alii; ergo Baptismus consistit in Unctione confirmativa, quæ fit in Confirmatione: si enim illâ non indigeret, adhuc esset completum, & perfectum.

137. Resp. neg. conseq. Patres enim allati, & alii, quicumque adduci possunt, ideo dicunt, Baptismum unctione confirmativa perfici, & compleri, non quia ad ejusdem essentiam pertineat, cum apertè Baptismus integrum, & perfectum à Confirmatione distinguant, & asserant omnium esse januam Sacramentorum; sed quia Christifideles, cum in Baptismo Christi milites fiant, pro ejusdem confessione pugnaturi, utique robore indigent, ut Fidem, quam professi sunt, publicè confiteri non vereantur: quod robur præcipuum, ac speciale à Baptifmate non tribuitur, à quo tantummodo regenerantur, ut optimè Melchiad.

chiad. Papa ad Hispaniæ Episcopos scribens ,
ait : *Spiritus Sanctus , qui super aquas Bapti-*
smi salutifero descendit lapsu , in Fonte plenitu-
nem tribuit ad innocentiam : in Confirmatione
augmentum præstat ad Gratiâ : in Baptismo
regeneramur ad vitam , post Baptismum confir-
mamur ad pugnam : in Baptismo abluimur ,
post Baptismum roboramur .

138. *Obji. III.* In primitiva Ecclesia con-
firmatio simul cum Baptismo dabatur , ab eaque
videbatur inseparabilis , ut innuit Melchiades
Papa cit. *Epist. ad Episcop. Hispan.* ; ergo Ba-
ptismus in Unctione confirmativa situs est ,
alioquin hujusmodi inseparabilitas intelligi
non potest .

139. *Resp. neg. conseq.* Nam etiam Eu-
charistia in primitiva Ecclesia statim post Ba-
ptisma dabatur , cum tamen ab eo veluti di-
versum Sacramentum omninò distinguatur ;
solummodo enim sequitur hoc , quod cui-
cumque Sacramento, veluti janua, præsupponi-
tur : Confirmatio igitur , & Eucharistia quo-
que cum Baptismo conferebatur in Ecclesia pri-
mitiva , quia , cum urgeret Tyrannorum per-
secutio , Fideles omni remedio , quod ex Con-
firmatione in ratione roboris , ex Eucharistia
in ratione cibi , & potus haberi poterat , mu-
niri oportebat , ut hoc pacto alacrius , & fir-
mius in agone persisterent : at hujusmodi con-
junctio eorum Sacramentorum cum Baptismo
identitatem non evincit , sed meram præsup-
positionem , & hoc tantum vult Melchiades ci-
tatos in *Décret.*

140. *Obji. IV.* Baptizatus fit miles Christi ;
cum Diabolo , & hostibus Christi , & Ecclesiæ
pugnaturus ; ad hanc enim pugnam subeundam
ex ipsamet militia obstringitur ; ergo in Bapti-

imate includitur Unctio confirmativa. Conseq. patet: nam ex quo fit miles, eodem signo visibili, quo Christo nascitur, etiam vires accipere debet ad pugnandum adversus Fidei hostes, sicut in Matrimonio accipiuntur ad ejus onera sustinenda, & in sacra Ordinatione ad Ordines ritè exercendos: istæ autem vires dantur in sacra Unctione confirmativa; ergò hæc in Baptismo includitur veluti pars intrinseca.

141. Resp.I. neg. ant., nam in Baptismo præcisè loquendo non fit miles, sed solummodo Ecclesiæ, ac Christo nascitur Homo, sicuti etiam nemo carnali generatione nascitur miles, sed fit, quando militiæ adscribitur; vel si militiæ Christi adscribatur; communi quadam ratione contingit, quatenus adversus Mundi illecebras, ac Dæmonis tentationes pugnare debet.

142. Resp.II. neg. conseq. ad cujus probat. dico, ad militandum adversus Tyrannos dari quidem in Baptismo vires sufficientes, non tamen uberes, ac superabundantes, quæ in Confirmatione suppeditantur, ut audacter coram Tyrannis Fidem confiteri non timeamus, idcirco Sacramento diverso tribui debuerunt. Vires itaque accipimus in Baptismo, ut cum Fidei inimicis luctemur, sed nativitati spirituali congruentes: ut enim pulcherrimè D.Thom. Par.3. Quæst.72. art. 1. alia est actio Hominis recenter nati, alia ejusdem, cum ad virilem ætatem pervenerit. Vires autem fortiores, quæ viro competunt, in Confirmatione tribuuntur.

143. Quod autem in Ordinatione, & Matrimonio vires congruæ statibus illis accipiantur, hoc evenit, quia statim post Sacramentum, actio-

actiones sibi competentes exerceri debent, quod non convenit baptizato Infanti, qui non illicò, sed data tantum opportunitate, cum inimicis Fidei congressurus est.

SECTIO SECUNDA

In quam actione consistat Confirmatio, in Unctione scilicet, vel in Chrismatis Confectione?

144. **S**acramentum Confirmationis, uti cetera alia, duplicem materiam admittit, remotam scilicet, & proximam. Remota est Oleum Balsamo admixtum, quod Chrisma vocatur, ejusque confectio solis Episcopis reservatur. Proxima verò est Unctio Baptizati in fronte, & apud Orientales in scapulis, & aliis corporis partibus. Oritur nunc difficultas, an Confirmationis essentia in consecratione Chrismatis consistat, vel potius in frontis unctione, veluti proxima materia. Vartanus Armenorum Magister cum suis sequacibus apud Dom. à Trinit. Bibliot. Theol. sec. 10. cap. 8. Gabriel Philadel., Nicolaus Cabas., & Marcus Ephesus apud Archud. lib. 2. de Confirm. cap. 6. tenent, Sacramentum Confirmationis in consecratione Chrismatis consistere, veluti in proxima materia. Catholici econtra in ipsamet Unctione partium situm esse existimant. Videndum est, cuinam ex his sententiis veritas faveat?



ARTICULUS PRIMUS

*Dicendum est, Sacramentum Confirmationis
in sacra Unctione consistere, non verò
in Chrismatis consecratione.*

145. **O** Stenditur breviter : Nam Spiritus Sanctus sub speciali ratione roborativi datur in Unctione, non autem in Chrismatis præparatione, Act. en. 17. & 19. Spiritus Sanctus datus ab Apostolis dicitur advenisse, postquam per manuum impositionem, in qua Unctio includebatur, Confirmationis Sacramentum Baptizatis collatum est, non Chrismatis præparatione; ergò in ea unctione consistit Sacramenti collatio, veluti proxima materia; nam in eo consistit formale Sacramenti, per quod fit signum practicum infusionis Gratiæ Sacramentalis; sic etiam Baptismus in ablutione, non verò in aquæ præparatione, Ordo in unctione, & tactu Instrumentorum, non in eorum præparatione confertur.

146. Idipsum ex Doctrina, & sensu Ecclesiæ habetur, in usu, non in Chrismatis consecratione vim hujus Sacramenti collocantis: Laodicens enim Synodus antiquissima, Anno quippe Christi 320. sub Silvestro Papa, & Nunechio Phrigiæ Metropoli celebrata, cap. 48. ita pro nobis loquitur: *Oportet eos, qui illuminantur, post Baptisma jungi supercaelesti Chrismate, & esse Regni Cælestis participes.* Et Clemens Rom. Papa lib. 7. Constit. Apòst. cap. 21. docens Episcopos hujus Sacramenti administrationem: *Unget, inquit, prius Oleo Sancto, deinde baptizabis aqua, postremò signabis unguento Chrismatis, ut sit Oleum unctionis par-*

participatio Spiritus; aqua sit Symbolum mortis, unguentum Chrismatis sigillum passionum. - Floren. in Instruc. Armenor. §. *Secundum Sacramentum*, asserit, Unctionem impositioni manuum succesisse, non unguenti præparationi, inquit enim: *Loco illius manus impositionis datur in Ecclesia Confirmatio.* Sed ex eodem Spiritus Sanctus post impositionem manuum dabatur, non autem post Chrismatis consecrationem, citat enim c. 8. Act. Apost., ubi manus impositio cum Spiritus Sancti adventu legitur copulata; ergo nunc datur post Unctionem, in qua ex eodem consistit Confirmatio.

147. Nec deest ratio ipsa Theologica: nam alia Sacramenta, præter Eucharistiam, non in materiæ præparatione, sed in ipsamet collatione conficiuntur, ut in Baptismo, & Extrema Unctione animadvertimus; ergo etiam in Confirmatione, cum non sit assignabilis disparitas.

148. II. In eo consistit, & fit Sacramentum, per quod applicatur forma proximæ materiæ, ut in omnibus Sacramentis animadvertimus: at forma Confirmationis non profertur in præparatione Chrismatis, sed in ipsamet Unctione: dum enim illa fit apud Latinos, hæc verba ab Episcopo proferuntur: *Signo te signo Crucis, confirmo te Chrismate salutis.* Apud Armenos verò, ut patet ex ipsorum Rituali, dum frons signatur: *Unguentum suave in Nomine Jesu Christi effusum est super te, signaculum donorum Cœlestium, in Nomine Patris &c.* ergo Sacramentum hoc non in præparatione Chrismatis, sed in Unctione consistit.

149. III. Unctio in fronte fit, dum forma profertur, cum trium Divinarum Personarum invocatione, dicendo: *In Nomine,*

Patris &c. ut ipsamet continet forma Armena, & propterea ab eadem cavetur: *In Unctione tantum primi membri invocandam esse Trinitatem*; igitur supponunt Armeni, ea Unctione Sacramentum perfici, non Chrismatis præparatione, quæ verbis determinatis non fit, neque necessariò Trinitatis invocationem pro validitate postulat.

150. Tandem in aliis Sacramentis præparatio materiæ proximæ non est ipsum Sacramentum: sic Aquæ pro Baptismo conficiendo, Chrismatis pro Episcopis, aut Altaribus consecrandis, solemnis Saceratio, à neminè Sacramenta vera, & formalia Baptismi, & Ordinis existimantur; ergò etiam consecratio, seu confectio Chrismatis pro Confirmatione, conferenda non est ipsummet Sacramentum Confirmationis, sed ejusdem solummodo præambulum; & propterea neque verba determinata pro iisdem consecrationibus adhibentur.

ARTICULUS SECUNDUS

Solvantur Objectiones.

151. **O** Bji. I. In eo consistit essentia Sacramenti ejusdem, actioque Sacramentalis, in quo Ministri, prout à Ministris cæterorum Sacramentorum secernitur, potestas exercetur: at hæc exercetur in consecratione, ac benedictione Chrismatis, non autem in Unctione; cum consecratio Chrismatis à solo Episcopo haberi possit, Unctio autem chrismatica, vel impositio manuum, cui æquipollet, etiam à Presbyteris, vel aliis Ministris fieri queat, ut patet Act. 9. 18. ubi Paulo ad Fidem converso ab Anan.

Anania simplici Discipulo, non Apostolo, Spiritus Sanctus datus, narratur, & ex Arausicano I. Can. 1. & 2.; ergo Confirmatio in sola Chrismatis consecratione consistit: hinc in primitiva Ecclesia statim post Baptisma præbebatur, ex Dyonis. Areop. de Ecclesiastic. Hierarc. Par. 3. cap. 4. Constat autem, Baptismum non à solis Episcopis, sed etiam ab inferioribus Ministris conferri.

152. Resp. conc. maj., & neg. min. Potestas enim Episcopi quatenus Confirmationis Minister est, non in consecratione Chrismatis, sed in Unctione ipsa confirmativa consistit: nam ejus consecratio pertinet quidem ad solum Episcopum; at non est actio Sacramentalis, quandoquidem ad solum Episcopum etiam Ecclesias, Vasa sacra, Sanctimonialia benedicere, & facrare pertineat, quæ tamen actiones Sacramentales à nemine censentur: sola Unctio in fronte actio est Chrismatica ad solum pertinenſ Episcopum, veluti Ordinarium Ministrum, ex Floren. in Instruc. Armen., & Triden. sess. 7. Can. 13.

153. Exemplum Ananiæ ad rem neutiquam facit; illa enim impletio Spiritus Sancti, de qua fit mentio Act. 9. 18., non erat ea, quæ in Confirmationis Sacramento tribuitur; nondum enim Paulus erat baptizatus; sed alia diversa: nempe curativa cæcitatis: vel si erat confirmativa, denotabatur danda tempore suo, cum ibi dicatur: *Ut implearis Spiritu Sancto*, non verò tunc collata.

154. Ad authoritatem Synodi Arausicanæ Primæ dico, Canones illos intelligi vel de Chrismatione in vertice, quæ Baptismalis erat, non confirmativa; vel de reconciliativa, qua tunc temporis Hæretici ad Ecclesiam reduces

admittebantur Chrismate delibuti, ex Arelat. I. cap. 8., non Sacramentali : vel si Sacramentalis erat, hæc à Presbytero fiebat quidem, sed per dispensationem, quod utique licere, docet Floren. in sæpè cit. Instruc. Armen. In primitiva autem Ecclesia Confirmatio statim post Baptismum tribuebatur : at Baptismus sollemnis ab Episcopis conferri consueverat ; ergò, & confirmatio : hoc autem quid pro Armenis concludit ? Baptismus enim privatus etiam sine Confirmatione tribui poterat, uti fit etiam in præfenti.

255. Obji. II. Fabianus Papa Epist. 2. asserit, consecrationem Chrismatis esse novum verissimum Sacramentum, & singulis annis faciendum, à Parochiis petendum ex Carthag. IV. Can. 36., & à Subdiaconis solummodo deferendum ; ergò consecratio Chrismatis est verum Sacramentum Confirmationis ; ea quippe reverentia Chrismati non videtur deberi, nisi ratione Sacramenti.

156. Resp. neg. conseq. Vult enim solummodo sanctus ille Pontifex, consecrationem Chrismatis esse materiam Sacramenti, & ad alias sacras functiones destinatam, & propterea singulis annis renovandam ; & quia sacrum Chrisma talibus usibus est assignatum, magna veneratione, & à solis Ecclesiæ Ministris tractandum ; & propterea post ejus consecrationem ab Episcopo, & Clericis salutatur dicendo : *Ave Sanctum Chrisma*, eo modo, quo Crux à D. Andrea salutabatur, cum diceret, *Salve Crux pretiosa*, & res quoque aliæ inanimæ eodem quoque pacto affectivis verbis afficiuntur.

157. Obji. III. Sacramentum Altaris non consistit in usu, sed in materiæ consecratione,
ut


ut constans est Catholicorum doctrina: nam consecratione Corpus, & Sanguis Christi sub Speciebus panis, & vini introducuntur, non usu existentiam Corporis Christi sub speciebus supponente; ergo etiam Confirmatio in consecratione Chrismatis consistit. Prob. Conseq. nam quemadmodum per verba consecrationis Panis, & Vinum fiunt Corpus, & Sanguis Christi: ita unguentum per verba consecrationis fit Chrisma Christi; ergo sicuti arguitur tunc fieri Sacramentum Eucharistiæ, ita quoque ex eo quia consecratione unguentum fit Chrisma Christi, arguitur tunc fieri Sacramentum Confirmationis.

158. Conf. hoc, ex Cyril. Jerosol. Cathec. mistag. 3. Ubi ait: *Sacrum Unguentum habere post Consecrationem Spiritum Sanctum*, sicut Panis post Consecrationem continet Corpus Christi, & facit comparationem conversionis Panis in Corpus Christi, & Unguenti post consecrationem in Chrisma Christi; sed panis Species post consecrationem verè continent Corpus Christi; ergo sacrum Unguentum post consecrationem continet Spiritum Sanctum; ergo verbis consecrationis in Confirmatione introducitur Spiritus Sanctus, adeoque tunc fit Sacramentum.

159. Resp. ne. Conseq. ad ejus probat. Conc. ant. neg. conseq. nam Panis definit esse in consecratione, atque Corpus Christi efficitur, & propterea distributio ejus non est Sacramentum, cujus effectus primarius est Corporis Christi introductio, atque permanens, donec distribuatur, & fit per modum cibi, & potus: per consecrationem autem Chrismatis non destruitur Unguentum, sed acquirit tantummodo esse morale, ut esse possit Gratiæ in-

strumentum, dum à^u Confirmatio perficitur, adeoque confectio Chrismatis non est ipsummet Sacramentum. Unguentum ergò in consecratione acquirit hoc, ut possit esse Confirmationis proxima materia, & propterea solum Episcopum habet Ministrum, à quo unicè perfici potest.

160. Ad Conf. neg. Conseq. Cyrillus enim tantummodo vult, quod, sicuti consecratione Panis non est amplius Panis, sed Corpus Christi, in quod convertitur; ita Unguentum non est amplius Oleum prophanum, sed sacrum, deserviens ad Confirmationem, quatenus unctione corpus tamquam visibili signo perungitur: *Anima sancto, vivificoque Spiritu sanctificatur*; & propterea: *primum frons illinitur, ut eum abstergat à vobis pudorem, quem primus Homo transgressor perpetuè circumferebat, simulque efficiat, ut possitis vultu non velato Gloriam Domini intueri*: quibus verbis satis innuitur, Spiritum Sanctum dari quidem, sed in unctione, non verò in Chrismatis confectioe; alioquin si argumentum convinceret, posset dici de Oleo: *Hoc est Spiritus Sanctus*, sicuti post consecrationem dicitur de Pane: *Hoc est Corpus meum*; & hoc sensu Patres omnes intelligendi sunt, qui dicunt, Unguentum post consecrationem Spiritum Sanctum continere; id enim verum est effectivè in unctione, non verò formaliter post consecrationem.



S E C T I O T E R T I A

*Quinam sit Confirmationis Sacramenti
Minister ?*

161. **M**inister Sacramentorum in duplici
versatur differentia . Alius quippe
est Ordinarius , qui ex proprio munere , &
institutione Sacramentum debet conficere . Ex-
traordinarius ille est , qui non ex proprio mu-
nere , sed aliena autoritate Sacramentis se-
miscet ministrandis ; vel si propriâ , non id
præstat publicè , & solemniter , sed privatim
tantummodo , & in casu necessitatis . Viden-
dum est nunc , quinam sit Confirmationis in
utroque sensu Minister ? In primo sensu solum-
modò cum Armenis concertationem habemus ,
existimantibus , etiam à Sacerdotibus non Epi-
scopis posse conferri .

A R T I C U L U S P R I M U S

*Dicendum est , Ordinarium Confirmationis
Ministram esse solam Episcopum .*

162. **O**stenditur breviter ex Verbo Dei :
nam in Scripturis non leguntur ,
nisi Apostoli confirmasse , & dedisse Spiritum
Sanctum per manuum impositionem , cum in-
feriores Discipuli frequenter baptizarent , ut pa-
tet Act. 8. 17. & 19. 6. ubi solus Petrus , Joannes
& Paulus leguntur manus imposuisse Baptiza-
tis : Philippus verò , & alii ex Discipulis , Ba-
ptismum ipsum contulisse . Hac ratione utun-
tur Patres , & Pontifices , ut Euseb. Papa ,
epist. 3. ad Episcop. Tus. , & Camp. Leo I.
epist.

epist. 86. Damasus I. epist. 4. cont. Corepisc.
& Alii.

163. Nec Ecclesiæ autoritas deest: nam Innoc. I. ad Decen. cap. 3. *de consignantibus*, inquit: *Infantibus non ab alio, quam ab Episcopo fieri licere: nam Presbyteri, licet sint Sacerdotes, Pontificatus tamen apicem non habent.* Gregor. Mag., quem Orientalis quoque Ecclesia tanti facit, lib. 3. epist. 9. *Presbyteri baptizatos infantes signare in frontibus Chrismate non præsumant, sed Presbyteri Baptizatos ungant in pectore, ut Episcopi postmodum ungant in fronte.* Similia scribunt Leo Mag. epist. 37. Cap. 2. Urban. I. ad univer. Episcop. Joan. III. in Epist. Decret. 3. ad finem hunc edita.

164. Ecclesiæ quoque Decreta suffragantur: nam præter Elibert. Cap. 38. Meldense Cap. 6. Parisien. lib. 1. cap. 33. Hispal. II. cap. 7. Cabilon. II. cap. 27. Florent. Armenis professione venerabile, atque ineluctabile in eorundem instructione, cum formam, & materiam perscripisset, subdit: *Ordinarius Minister est Episcopus: & cum ceteras unctiones simplex Sacerdos valeat exprimere, hanc non nisi Episcopus debet conferre.* Idipsum à Triden. sess. 7. de Confir. Can. 3. decisum est.

165. Eadem scribunt Patres: Diony. Aræopag. de Ecclesiast. Hierarc. Cap. 2. Part. 2. Amphiloc. in Vit. S. Basil. Epiphan. Hæres. 21. Chrysost. ad Cap. 8. Act. Apost. Isidor. Pelusiot. lib. 1. Epist. 450. & alii plures; ergo ex Scripturis, Conciliis, & Patribus solus Episcopus est Confirmationis Ordinarius Minister.

166. Nec deest ratio I. ex Seraph. Doct. 4. Dist. 7. art. 1. quia Ecclesiæ autoritas ad primum membrum fuit derivata, ejusdem ordine
scilicet.

servato : sed soli Apostoli , qui prima erant membra , poterant hoc Sacramentum conferre ; ergò nunc soli Episcopi eorum locum tenentes idem conferre possunt .

167. II. In hoc Sacramento juxta dicta Patrum datur Gratiae plenitudo ; ergò etiam ab habentibus plenitudinem potestatis conferendum est : hi sunt Episcopi in sua respective Diœcesi ; ergò &c.

168. III. In Confirmatione Fideles speciali aliqua ratione sunt Christi milites , arman- tur , & roborantur , ut strenuè pro Christi Confessione dimicare valeant ; hoc autem ro- bur Duces militiæ ministrare instrumentaliter debent , quales sunt Episcopi , qui primi stare debent in acie pro Domo Israel ; ergò &c.

169. IV. Tandem quia Fideles omnes Sa- cramentum aliquod ab Episcopis accipere de- bent , ut eorum dignitatis eminentiam agno- scant : hoc autem non est nisi Confirmatio , qua perfecti , & consummati Christiani constituuntur . Hinc ait Areopag. de Ecclesiâ. Hierarc. Cap. 5. *Episcopatum esse Perficientium , Presby- teratum Illuminantium , & Diaconatum Pur- gantium* : ergò soli Episcopi , qui perficere pos- sunt , uti fit in Confirmatione , Sacramentum illud ut Ministri Ordinarii valent conferre .

ARTICULUS SECUNDUS

Solvuntur Objecta .

170. **O** Bji. I. Ex hoc , quod in Scripturis soli legantur Apostoli Confirmationem ministrasse , minimè arguitur , Episcopos esse hujusmodi Sacramenti solos Ordinarios Ministros ; ergò revera tales non sunt . Con-
seq.

seq. patet; nam in hujusmodi ratione Catholici videntur fundari, ut hucusque visum est. Ant. autem patet: etenim ex hoc, quod soli Apostoli legantur, Eucharistiam, ac Pœnitentiam ministrasse, non arguitur, Episcopos esse solos Pœnitentiæ, & Eucharistiæ Ministros, cum certum sit, inferiores quoque Sacerdotes talia Sacramenta ex officio ministrare; ergo neque arguitur Episcopos esse solos Ordinarios Ministros Confirmationis.

171. Resp. etsi permitteretur ant., adhuc falsam esse consecutionem inde deductam, cum multa ex Verbo tradito sciamus, quæ in scripto minimè continentur: habetur autem vetustissima traditio, cujus initium ignoratur, præter Apostolos, Confirmationis collationem ad solos Episcopos pertinere.

172. Nihilominus ne. ant. certè enim, quando Samariam Apostoli missi sunt, ut hoc Sacramentum ministrarent, inferiores Sacerdotes non deerant, cum Ecclesia jam propagari cœpisset, Christique Discipuli suppetebant, quorum saltem aliquos fuisse post Christi mortem Sacris Ordinibus initiatos, verisimile videtur; sic etiam cum Paulus Act. 19. 6. manus imponebat, baptizandi munere aliis relicto, certè non deerant inferiores Sacerdotes; & proinde optimè arguitur, ex eo quia soli Apostoli Confirmationem ministrarent, aliis inferioribus exclusis, solis ipsis, & ipsorum Successoribus Episcopis hujusmodi auctoritatem reservari. Falsum est quoque ant. probationis, nempe in Scripturis non haberi, alios ab Apostolis Eucharistiam, ac Pœnitentiæ Sacramentum ministrasse; legitur enim Act. 2. 42. Discipulos fuisse in fractione Panis frequentes, & Populos ipsis confessos peccata sua, Act. 19. 18. Ca-

18. Cæterum neg. Conseq. nam in Scripturis nullum datur exemplum, quo ostendatur, Apostolos Sacramenta Eucharistiæ, ac Pœnitentiæ confecisse, ac ministrasse cum exclusione aliorum, uti datur de Confirmatione, quam scimus à Paulo, Petro, & Joanne collatam cum exclusione aliorum, ac propterea Samaritanos missi sunt. Quare optimè colligitur ex hoc, quod soli Apostoli Confirmationem ministrarent, solos Episcopos eorum Successores posse legitime hoc munere fungi, non autem ex hoc, quod soli Apostoli Eucharistiam confecisse legantur, arguitur, inferiores Episcopis non posse conficere, aut ministrare, ut Ordinarios Ministros Sacramenta Eucharistiæ, aut Pœnitentiæ.

173. Obji. II. Ex Can. 55. Nicæni I. ex Arabico translatis, habetur, Corepiscopos debere in Ecclesiarum visitatione Sacramentum Confirmationis tribuere: Corepiscopi autem non erant veri Episcopi, sed Presbyteri seniores, ex Ancyr. Can. 12. Damas. I. Epist. 3. Leo I. Epist. 88.; ergò Confirmationem conferre ad Episcopos non pertinet, ut Ordinarios Ministros.

174. Resp. Quidquid de Can. Nicæn. ex Arabico translatis sit, majorem esse veram de Corepiscopis, qui verè erant Episcopi, etsi Ecclesias sibi concreditas minimè haberent, uti etiam nunc fit in Ecclesiis Cathedralibus, quibus magni Principes præsent, ut in Germania contingit: isti enim verè sunt Episcopi, & propterea Confirmationis quoque, & Sacræ Ordinationis Sacramenta conferre possunt; Episcopis tamen consentientibus: non autem de illis Corepiscopis, qui tantummodo erant Seniores Presbyteri, quibus multa negotia Eccle-

clesiarum committebantur. Quoniam verò multa plus æquo sibi arrogabant, & præ cæteris Confirmationis collationem; propterea Leo Mag. Damas. I. aliique Pontifices jubent, eorum nimiam præsumptionem coerceri, atque ad juris regulas redigi.

175. Dicit quoque potest Corepiscopos, etiam si non essent veri Episcopi, Confirmationem ministrasse, non quidem autoritate Ordinaria, sed Extraordinaria, & ex commissione, ac dispensatione Romani Pontificis, quod quidem fieri posse, tenent Scholasticorum Principes. D. Thom. 3. Part. Quæst. 72. art. 11. ad secund. Doct. Subtil. 4. Dist. 7. Quæst. 1. ad Tertium, cum eorum Discipulis, & Canonistis, in Cap. *Pervenit* Dist. 95. Gregor. Mag. ad Januar. Calar. Episcop. autoritate præcipue nitentes, hujusmodi dispensationem pluries contigisse scribentis, ut de facto asseruit Florent. in Instruc. Armen. Et si autem hujusmodi dispensatio non legatur, supponi tamen debet. Nec est credibile, tot Sanctissimos Præfules, qui eadem usi sunt, fuisse sacrilegos. Innoc. verò III. *Extra* de Consuet. Cap. *Quarto*, eam revocans, de Presbyteris Latinis loquitur privilegio abutentibus, non verò de Orientalibus. Legatur Arcud. lib. 2. de Sacrament. Cap. 15.

176. Obji. III. Episcopus ex institutione Divina non habet ut hujusmodi Sacramenti sit Ordinarius Minister; ergo &c. Conseq. patet. Prob. ant., ex Anastas. dicente in Vit. Sanc. Silvest. Papæ: *Hic constituit, Chrisma ab Episcopo confici, & privilegium Episcopis dedit, ut Baptizatum consignarent propter hæreticam suasionem*: Id ipsum habetur in Concil. Romæ sub eodem Silvestro Can. 5. Hinc Hieronymus de sept. Grad. Eccles. & epist. ad Evagr. *Quid facit*

cit Episcopus, excepta Ordinatione, quod non faciat etiam Presbyter? Ergo Ordinarius confirmationis minister non est solus Episcopus.

177. Resp. ne. ant., & Conseq. probat. Silvester enim verbis citatis, sicuti non vult significare, Chrismatis consecutionem ad solum Episcopum minimè pertinere, juxta ipsam quoque Armen. Senten., qui munus hoc ex Divina Institutione soli Episcopo reservant; ita non vult, ipsammet collationem Confirmationis ex Christi instituto ad alios præter Episcopum, spectare. Idcirco autem dicitur constituisse, ac privilegium dedisse, ut Episcopi solummodo Sacramentum hoc ministrarent; non quia ipse primus contulerit, cum ab aliis Pontificibus, ipso vetustioribus, ut Urban. I. Fabian. Joann. III. Eusebio, & alijs memoratum legatur; sed quia, cum Presbyteri nonnulli idipsi præstare auderent, ad eorum audaciam comprimendam, oportuit novo Decreto sanciri, & privilegium Lege recente reservari.

178. Quantum verò ad Hieronymum spectat, cum constet apertissimè, eum cum Ecclesia sensisse, mentemque suam, quantum ad hoc lucidè aperuisse Dialog. adversus Lucifer., dicendum est, Lib. de sept. Grad. nullius esse authoritatis, cum Hieronymi non sit, sed alterius Authoris, apertamque contineat falsitatem, nempe simplices Presbyteros Chrismatis conficiendi potestatem habere, quod quidem nec ipsimet Armeni opinantur. Cum verò dicit Epist. ad Evagrium, nihil Episcopum, præ simplici Presbytero, excepta Ordinatione, habere, verissima prædicat: in ipsamet quippe Ordinatione potestas confirmandi Baptizatos includitur: & propterea, quia Confirmatio non est necessitatis Sacramentum, sed ad melius
esse,

esse, ob honorém potiùs Sacerdotii solis Episcopis reservatur; alioquin, ut inquit ipse, lugendi essent, qui ob Præfulum inopiam, à solis Presbyteris baptizantur, non item semper obtinent ab Episcopis confirmari.

C A P U T III.

De Augustissimo Eucharistia Sacramento.

179. **U**Ti in cæteris, ita etiam in hoc haud mediocriter à veritate deviant Orientales Heterodoxi, & propterea errores eorum circa adorabile hoc Sacramentum, quantum Deus dederit, perstringendi.

S E C T I O P R I M A

Utrum Eucharistia in Azymo confici debeat; vel fermentato?

180. **S**Uppono unicuique, quid sit Panis azymus, quid fermentatus, innotescere. Constat utique, Panem aliquem, veluti Eucharistia materiam ex Christi Domini institutione necessariò requiri: at controvertitur, utrum hujusmodi Panis azymus esse debeat, aut fermentatus? Latini arbitrantur, fermentatum æquè ac azymum pro Sacramenti validitate sufficere; etsi revera Christus Dominus Sacramentum in azymo instituerit; & propterea Græcis permittunt conficere in fermentato juxta vetustam Ecclesiæ Orientalis consuetudinem, ut patet apertè ex Floren., in quo dogma hoc stabilitur. Græci è contra mordicus sustinent, Azymis in Eucharistia uti pro materia Sacramenti nequaquam licere, Latinosque proin-

proindè in contèptum Azymitàs appellant, eosque veluti Hæreticos, atque à vero alienos Sacrificio proscindunt. Ità ipsos docuit Michael Cæularius Constantinopolitanus Patriarcha, simul cum Leone Acridano Bulgarorum Archiepiscopo, infandi Photiani Schismatis excitator, odio adversus Latinam Ecclesiam percitus acerbissimo, quique Antecessoris Photii in Rom. Pontif. Primat. evertendo fidelissimum se prodit hæredem, ut ex Epist. ad eundem à S. Leone IX. Papa datis, apertissimè constat. Videntum est nunc breviter, quinam ex his veritate nitantur, atque Apostolica fulciantur Traditione?

ARTICULUS PRIMUS

Quadam præmittuntur ad Quæstionis intelligentiam.

181. **N**Otandum I. Solemnitatem Agni Paschalis fuisse diversam ab illa Azymorum. Prima ortum duxit, quando Deus percussit Primogenita Ægypti, certis quibusdam ritibus celebranda: illa verò Azymorum, quando Israelitæ ab Ægyptiorum fuere captivitate educti, quorum utrumque Exod. 12. 26. legitur institutum ad eorum beneficiorum memoriam perpetuò servandam, ritusque ipsis competentes ibidem præscribuntur. Solemnitas in esu Agni ritu determinato, ac die 14. Mensis Martii in Vespera consistebat; Azymorum verò Festum septem diebus durabat, quibus sub pœna mortis, fermentato pane interdicto, solus azymus permittebatur. Incipiebat autem huiusmodi solemnitas à die 14. in Vespera, usque ad vigesimamprimam perdurans, quarum dierum prima nempe 15. & ultima festivæ, ac
fo-

solemnnes erant, itaut ab opere servili Hæbreis abstinendum esset, ex cit. Exod. 12. 42. & Levit. 23. 6.

182. Porro Vespera diei 14. duas cœnas fieri consuevisse docet Chrysost. Hom. 81. in Matth. Legalem, qua Judæi juxta Legem Exod. 12. Agnum Paschalem stantes, & baculos in manibus tenentes comedebant; Vulgarem verò, qua cibus consuetis vescebantur, dempto Fermentato, cujus prohibitio illâ Vesperâ per universum Israellem incipiebat, solo Azymo permissio, qui simul cum Agno Paschali edebatur.

183. Notandum II., Apud Judæos Dies cœremoniales, seu festivas, à Vespera prima incipisse, seu ab occasu solis diei antecedentis Festum, usque ad Vesperam diei Festi, nempe secundam Vesperam, & solis occasum diei subsequenti Levit. 23. 5. 6. & notat August. ad Casul. itaut finis unius Festi posset esse principium alterius, ut etiam inter Christianos accidere videmus. Vespera tamen completè sumpta induas partes dividebatur. Prior post meridiem incipiebat, Sole jam ad Occasum declinante, ab hora nona usque ad Occasum. Posterior autem erat post Occasum Solis usque ad finem crepusculi vespertini. In priori Agnus Paschalis immolabatur, in posteriori comedebatur ex Joseph lib. 7. Belli Judaic. cap. 17. Porro Menses apud Judæos lunares erant, non solares, atque à Novilunio incipiebant, ex Philon. Hæb. de Vit. Moy. quare idem erat dicere Lunâ 14., ac die 14. His præmissis, tria sunt resolvenda. Primum, an Christus Pascha celebra-verit Lunâ 14., vel 15.? Secundò, utrum, in Fermentato, vel Azymo Eucharistiam confecerit? Tertiò, an licitè in Azymis nunc conficiatur?

ARTICULUS SECUNDUS

*Dicendum est, Christum Pascha celebrasse
Luna quartadecima. Est Communis
inter Catholicos.*

184. **P** Rob. breviter : Quod enim Pascha celebraretur à Christo, constat apertissime ex Matth. 26. 18. Marci 14. 15. Lucæ 22. 11. Ubi Discipuli à Christo siscitantur, an vellet, & ubi comedere Pascha? Ipse respondit affirmativè, locumque designavit, & revera cum Apostolis mensæ accubuit: Legem nimirum, servaturus, uti in cæteris omnibus præstitit. Quod verò id acciderit Lunâ 14. in Vespera, patet, nam Christus manducavit, & celebravit Pascha, quando fuit à Discipulis interrogatus, ubi vellet manducare: hoc autem contigit Lunâ 14. in Vespera, dies enim Azymorum Exod. 12. 16. Levit. 13. 5. in Lunam 14. in Vespera incidebat; ergò Lunâ 14. Pascha manducavit in Vespera; nec anticipavit una die, ut Græci prætendunt, Cum Christus legem rigidissime custodierit, quæ jubebat, Pascha celebrari Lunâ 14. in Vespera, ad quam sequitur immediatè Solemnitas Azymorum, nempe Luna 15. hæc autem sequebatur Lunam 14. non 13.; ergò non anticipavit Christus: & ita sentiunt vetustissimi Patres, ut Tertul. lib. cont. Judæ. Cyprian. de Cæn. Dom. Origenes Tract. 35. in Matth. Chrysost. Hom. 85. in Matth. Theodoret. Quæst. 24. in Exod. Theophil. Alexand. apud Bedam lib. de ratione temp.

185. Ulterius: Christus priusquam occideretur celebravit Pascha, ex omnibus Evangelistis seriem rei narrantibus; ipse autem occisus est

est Lunâ 15. nempe die Azymorum prima, quæ erat Festiva, non prophana. Hinc Pilato necem Christi, ut ipsimet præstarent, Judæis offerenti noluerunt aquiescere, quia eis die Festivo neminem licebat occidere; Joan. 18. 32.; ergò dies, qua fuit Christus interfectus, erat Festiva: Præses enim unum ex vinctis dimittere solebat, & de facto Barabbam dimisit: hic autem erat dies Festus ex Matth. 27. 17. Marc. 15. 6. Lucæ 23. 17., nec poterat esse ultimus post dies octo, sed primus quando dimissus est Barabbas; Lunâ ergò 15. fuit Christus occisus; igitur Lunâ 15. non 14., quæ erat prophana; adeoque celebravit Pascha Lunâ 14. non 13. Et sentiunt ita Origen. Hom. 23. in Num. Epiph. Hæres. 70. Cyr. Jeros. Cathec. 13. Aug. Tract. 10. in Joan. Leo Mag. serm. 7. de Pasch. Ansel. in c. 26. Matth. Tandem veritas hæc ostenditur quia Ecclesiæ Asiaticæ eo prorsus, quo Judæi, modo Pascha celebrabant, ex Epiphani. Hæres. 50. Ex Euseb. de Vit. Constantini cap. 17. Et ex Historia ejusdem lib. 5. cap. 23. Ecclesia autem Asiatica Lunâ 14., non 13. Pascha celebrabat; nam idcirco Asiatici Quartadecimani sunt appellati; quia more Judaico Lunâ 14., quacumque die in Hebdomada contigisset, Pascha celebrabant, ex Augustin. lib. de Hæres. cap. 29., non verò Tertiadecimani, eo quod Lunâ 13. Pascha celebrando anticipassent, & propterea à Victore Primo Papa excommunicati, ex Euseb. lib. 5. Histor. cap. 23.; ergò Judæi Lunâ 14., non 13. Pascha celebrabant, quos Asiatici morsus sequebantur, Christum ipsum imitari censentes; ergò Christus non Lunâ 13. sed 14. Pascha celebravit.

ARTICULUS TERTIUS

*Dicendum est, Christum Dominum in Azymo,
non in Fermentato Sacramentum
Eucharistiae instituisse.*

186. **O** Stenditur breviter: nam in eo panē Christus Eucharistiam instituit, quo usus est in Cœna Paschali conficienda, cum nullus alius exhiberi posset: at in ipsa usus est Pane azymo, non fermentato: Azymus enim solus tunc erat in usu in omnibus finibus Israel, & licitus erat, fermentato interdicto, nempe in Vespera Lunæ 14. uti expressè jubetur Exod. 12. 18. Levit. 23. 5., & Num. 28. 16, 17. 18; ergo Christus Azymo tantum usus est, non Fermentato in Sacramenti Eucharistici institutione.

187. Dicere autem cum Græcis, in Cœnâ communi celatum sub floribus fermentatum, fuisse adhibitum, ut Judam lateret, vel divinitus sublatum Azymum, ac substitutum Fermentatum, vel in eum conversum, mera sunt verborum ludibria, cum Christus omnia palam effecerit, nec eum clam operari decebat, ac simulationem in actibus suis ostendere: nec opus erat confugere ad miracula, ut Lex violaretur præcipiens, Lunâ 14. in Vespera Pascha celebrari cum Fermentati exclusionem per totam octavam. Nec debuerat in Cœna legali uti Azymo, in communi verò Fermentato, cum utraque in Vespera Lunæ 14. fieri deberet, qua Fermentatum erat vetitum in omnibus finibus Israel.

188. Adfunt quoque Congruentiæ, ob quas Christus potius in Azymo, quam in Fer-

Pars II. F men-

mentato Sacramentum debuit instituere, quas insinuat Innuoc. III. lib. 4. de Myst. Missæ, & Alii apud Baron. tom. II. Annal. ad calcem. Prima, quia Panis Azymus purius, decentius, & facilius conficitur. II. Quia ab omni corruptione est immunis. III. quia per Azymum, nedum donotatur immaculata Carnis Christi puritas, sed etiam mundities recipientium illibatissima, ut ipsimet Corpori Christi, quibus mundissimus est, assimilentur.

ARTICULUS QUARTUS

Dicendum est III. Usum Azymorum apud Latinos in Sacre Eucharistiæ confectiōe, nedum validum, sed licitum esse, eosque in hoc minimè errare.

189. **P** Rob. breviter: nam validè, & licitè fit, quod à Legislatore praxi in ipsamet institutione præstitum est; Legislatoris enim praxis, & institutio, regula est operandi: hinc 1. Cor. II. 24. dixit Christus: *Hoc facite in meam commemorationem*: Christus autem in Azymis Sacram Eucharistiam instituit, quæ tunc erant usualia, ut superius probatum est: idcirco Paulus, ut innueret, in Azymis Sacrificium nostrum fieri oportere, 1. Cor. 5. 8. ait: *Etenim Pascha nostrum immolatus est Christus: itaque epulemur non in Fermento veteri, neque in Fermento malitiæ, sed in Azymis sinceritatis, & veritatis.*

190. Nec quidquam ad rem facit, Scripturas non asserere institutionem Sacramenti in Cœna legali, sed in communi accidisse, in qua licitum erat fermentatum: quamvis enim id concedatur, nihil efficitur, cum Lunâ 14.
in

in Vesperâ Cœnâ celebrari debuerit, in qua Fermentatum erat illicitum, nec credibile videtur, à Christo Domino cætera legalia omiffa, quorum erat severiffimus Custos, etfi expresse descripta minimè legantur.

191. II. Ostenditur idipsum: nam sive azymus, sive fermentatus sit Panis, substantia materix Sacramenti adhibetur à Christo Domino instituti, nempe Panis triticeus usualis ex farina triticea, aquaque naturali compactus, & concoctus optimè habetur, sicuti habetur substantia Baptismi sive ex aqua pluviali, sive fluminis, sive Maris, quæ substantialiter non differunt; ergò licitè, & validè Panis adhibetur in Sacramento conficiendo, sive azymus, sive fermentatus, qui purè accidentaliter differunt penes majorem, vel minorem coctionem.

192. Et profectò mirum videtur, Vinum, quod pro Calicis consecratione requiritur, à Græcis admitti album, aut rubrum, unius vel alterius speciei, ex quacumque regione proveniat, dummodo ex vite reipsa sit, non arte fabrefactum; respui autem azymum Panem, qui purè accidentaliter, & quidem in eadem specie differt à fermentato.

193. Sicut ergò à Latinis ob eandem rationem minimè Græci arguuntur Fermentato utentes, eoquia quoad substantiam ab Azymo non differt, etfi Christus Dominus in Azymo Eucharistiam confecerit, & instituerit; ita adversus Latinos acerbè adeò irasci Græci non deberent, eoquia Azymo utuntur, quem à Dominica, & Apostolica traditione acceperunt.

194. Imò hujusmodi consuetudinem nedum Occidentales omnes, verum etiam nullæ Orientales Ecclesiæ ab ipsismet incunabulis

bulis retinuerunt, uti de Jerfol. cit. Cardinal. Umbertus narrat de ipsa, ac de Alex. Michael Cerular. conqueritur literis ad Petrum Antiochænum Patriarcham datis. De Maronitis Antiochæno Patriarchæ subjectis idipsum scribit Abraham Echellen in annotatione ad Cathal. lib. Caldaic. De Armenis idipsum testatur Nicetas Choniates lib. 2. cap. 3., in Isacio Angelo, Nicephor. Calist. lib. 8. cap. 53. Demetrius Cizicen. opusc. de erroribus Armen., & Jacobit. aliisque, quos congerit eruditè Christianus lupus Dissert. de actis S. Leonis Papæ Noni.

ARTICULUS QUINTUS

*Solvuntur objecta contra primam Partem,
nempe à Christo Lunâ 14. Pascha
fuisse celebratum.*

195. **O** Bji. I. Dies, qua Christus Pascha manducavit, nequit esse Luna 14. ergò fuit 13. Conseq. patet. Prob. ant. nam de die, qua Christus comedit Agnum Paschalem Lucæ 22. 1. habetur, quod tunc *Appropinquabat dies Festus Azymorum, qui dicitur Pascha*: ille autem nequit esse Luna 14. alioquin appropinquasset sibi; ergò Christus comedit Pascha Lunâ 13., non 14.

196. Eo magis quia Matth. 26. 2. dixit Christus Discipulis suis Pascha celebraturus: *Scitis quia post biduum Pascha fiet, & Filius Hominis tradetur, ut Crucifigatur*; ergò si eadem die celebravit Pascha, dies sibi ipsi appropinquasset, cum biduum non possit eadem die compleri, & verificari.

197. Resp. neg. ant., ad cujus probat. neg.

næg. min. ad cuius probationem dico, non esse absurdum, eundem diem secundum esse naturale appropinquare sibi secundum esse artificiale: certè enim etiam apud nos, Vesperæ artificiales appropinquant Festo, ut est dies naturalis, adeoque dies Azymorum in Vespera artificiali antecedenti Lunâ 14. appropinquare sibi poterat, ut dies naturalis, nempe Luna 15.

198. Eodempacto solvitur instantia, negando quippe consequ. Nam ly *Biduo* non significat duos integros dies, sed partem duarum dierum, nempe Luna 14. in mane usque ad horam nominam Lunæ 15., qua Christus est occisus, eo pacto, quo Christus dicitur in Sepulchro tribus diebus jacuisse, juxta illud Matth. 12. 40. *Sicut fuit Jonas in ventre ceti tribus diebus, & tribus noctibus, ita erit Filius Hominis in corde terræ, tribus diebus, & tribus noctibus.* Quo pacto explicatur optimè, quomodo idem dies possit sibi verissimè appropinquare secundum diversa. Neque ex eo quia cap. 14. Marci dicatur Pascha fuisse paratum, & manducatum, ac dixerit Christus: *Post biduum Pascha fiet*, sequitur eodem die omnia contigisse, cum illa verba non asserantur prolata Lunâ 14.

199. Obji. II. Christus fuit interfectus Lunâ 14. non 15.; ergo celebravit Pascha Lunâ 13. nempe die antecedenti morti suæ. Probant. nam Christus fuit interfectus die prophano, nempe in Parasceve, quæ Pascha antecedit, in eo quippe opera servilia exercita fuerunt, nempe Processus criminalis: Joseph ab Arimathæa sindonem emit pro Christi Corpore involvendo: Mulieres necessaria ad sepulturam paraverunt, & Corpora Crucifixorum fuere à Patibulis deposita, ex Joan. 19. 31.: quæ omnia profectò servilia sunt. Conseq. quoque est

manifesta ! nam Luna 15. erat dies Festivus ; hinc Matth. 26. 5. & Marci 14. 2. in Concilio Pontificum consultum est , ea die nequaquam Christum occidi oportere , *ne fortè tumultus fieret in Populo* ; ergò si die prophana Christus fuit occisus , non fuit occisus Lunâ 15. , sed 14. quæ erat dies prophana ; ergò Lunâ 13. comedit Pascha , non 14.

200. Resp. neg. ant. cum assumpto probat. ; illa enim dies , qua Christus fuit interfectus , non erat dies prophana , sed festiva , ac dicebatur Parasceve , idest præparatio Paschæ , non quia in se Festum non esset , sed quia præparabat ad Sabbatum , quod erat omnium Festorum maximum , ex Mar. 15. 42. *Erat autem Parasceve , quod est ante Sabbatum , cum Luna 15. contigerit in Feriali sextam ; quæ Sabbatum antecedebat , nempe prima die Azymorum , ut dies naturalis est , non artificialis .*

201. Die autem prima Azymorum , etsi festiva , quia non erat Sabbatum , quod erat Festum omnium maximum , servilia aliqua fieri licite poterant , ut præparatio Ciborum , Exod. 12. 16. Processus autem criminalis , depositio Corporis Christi de Cruce , emptio Sindonis , & alia similia , etsi servilia , non erant tamen de illis , quæ verabantur in Sabbato ; hinc Joan. 19. 31. dicitur : *idcirco Crucifixorum Corpora fuisse deposita : Ut non remanerent in Cruce Corpora Sabbato , erat enim magnus dies ille Sabbati .*

202. Obji. Ult. Fundamentum præcipuum Græcorum : Christus debuit mori Lunâ 14. ; ergò comedit Pascha Lunâ 13. Conseq. pater : Prob. ant. Christus debuit mori eo die , quo Agnus paschalis immolabatur , ut Figuratum , typo responderet : Agnus autem Paschalis ty-
pus

pus erat Christi in Cruce immolandi; ergo si Agnus Paschalis immolabatur Lunâ 14. non 15., debuit etiam Christus immolari Lunâ 14. non 15. Tumquia eo die Christus fuit interfectus, qua Pontifices, & Judæi manducabant Pascha, Joan. 18. 28. *Ipsi non introjerunt in Prætorium, ut non contaminarentur, sed ut manducarent Pascha*: Pascha autem manducabant Lunâ 14.; ergo Christus fuit interfectus Lunâ 14.; ergo comedit Pascha Lunâ 13., cum illam comederit ante necem suam. Tumquia Christus comedit Pascha, & Eucharistiam instituit *Ante diem Festum Pasche*. Joan. 13. 1.; Hic enim erat Festum immolationis Agni Paschalis, quando comedebatur festinanter, cum lactucis agrestibus, & baculo in manibus, juxta præscripta Exod. 12. 11. iste autem erat Luna 14. in Vespera; ergo Christus manducavit Pascha Lunâ 13. non 14.

203. Resp. neg. ant., ad cujus probat. negari potest maj. cum sua probatione; non enim figuratum typo, sed typus-figurato debet assimilari: nihilominus conc. maj. dist. min. Agnus Paschalis erat typus Christi immolandi, in cruentè, vel cruentè: conc. min. cruentè tantum; neg. min. & conseq. Itaque immolatio Agni Paschalis erat quidem typus Christi immolandi, sed in cruentè, quantum ad principale significatum: hoc autem factum est Lunâ 14. in Vespera, quando Christus Eucharistiam in ultima Cœna instituit, & seipsum immaculatum obtulit cruentè Lunâ 15. in Cruce offerendum, tamquam parte 14. ut dies artificialis est, ut optimè Epiphan. Hæres 50. adversus Quartadecimanos differens, advertit.

204. Ad primam confirm. dist. maj. die, qua debebant secundum Legem; neg. maj. qua

defacto contigit; conc. maj. & eodem modo dist. min. neg. conseq. Quamvis enim debuissent Pascha comedere Lunâ 14. in Vespera, ut Legi satisfacerent Exod. 12. 18., odio tamen adversus Christum Cœnam usque ad diem sequentem Lunæ 15. in Vespera distulerunt, donec Christum occisum viderent, ut notat Chrysost. Hom. 84. in Joan. Itaque zelus non ingrediendi Prætorium Gentilitate immundum fuit inanis scrupulus excolantium Culicem, Camelum autem intrepidè glutientium, quos optimè Christus Dominus Matth. 23. 24. & Lucæ 11. 42. derisit.

205. Si autem Chrysost. Hom. 82. in Joan. videatur dicere, Christum in Cœna comedenda diem prævenisse, ut sibi reservaret morituro Parasceve, quo mos olim erat Pascha celebrari, debet sic intelligi, ut sibi in Hom. 84. cohæreat; nempe Christum prævenisse quidem Pontifices Legem transgressos in Paschate comedendo, ut iræ indulgerent, non tamen Populum, qui Legem adamussim servavit, Agnum Paschalem Lunâ 14. comedentem.

206. Dici quoque posset *ly Pascha* non significare Agnum Paschalem, sed victimas, Cibosque Paschales, qui per totam Octavam comedebantur, Deuter. 16. 4. & Numer. 28. 19. quos, nisi purificatis, & mundis, comedere minimè licebat: hinc Pontifices mortis Christi Authores Prætorium ingredi non audebant, minimè adhuc purificati, Cibos Paschales comesturi: at hoc quid facit ad propositum, cum de vero Paschate sit sermo?

207. Tertium pluries jam solutum est, nempe Christum dici posse Pascha celebrasse, & ante Festum, & in Festo: ante Festum quidem, ut dies Paschæ naturalis est; in Festo vero,

rò, quatenus artificialis; nam Vespera Lunæ 14. est pars Festi sequentis, ut dies artificialis est, ut contingit etiam apud nos, quando Officium Ecclesiasticum celebramus.

208. Propterea Evangelistæ videntur aliquo pacto variare: nam Matth. qui Hebræis, & hebraicè scribebat, juxta morem Hebræorum, Festa non à die naturali, sed à Vespera antecedente artificialis Festi computabat; ita etiam Marcus egit, Matth. Epitomen conficiens. Joan. verò Græcis scribens, Festa juxta seriem naturalem enumerans, Paschæ manducationem more naturali expressit, dicendo: *Ante diem Festum Paschæ*: quare nulla inter Evangelistas est contradictio. Legatur Chrysof. Hom. 11. in Matth. August. de consen. Evangelis. cap. 2. Baron. ad Annum Christi 41. n. 17.

ARTICULUS SEXTUS

Solvuntur Objecta contra secundam Partem, nempe Christam in Azymo confecisse.

209. **O** Bji. I. Christus pro materia Eucharistiae verum, & proprium Panem assumpsit, 1. Corinth. 11. 23. Azymus autem non est verus Panis, cum non sit elevatus, qualis est Fermentatus; fermentare enim idem significat, ac attollere; nec signum sit lætitiæ cujusmodi Eucharistia esse debet, spem Vitæ æternæ excitans, & incendens; ergo Azymus non est verus Panis.

210. Secundò Panis azymus non dicitur simpliciter Panis, sed cum addito *Azymus*; ergo non est verus Panis, sicuti non verus Homo, Homo pictus.

211. Tertiò, Christus utpote Sacerdos Se:

F 9 cun-

cundum Ordinem Melchisedech Psal. 109. 4. debuit uti Pane, quo in sacrificio Melchisedech usus est, à quo fuit præfiguratus: at Melchisedech in suo sacrificio non est usus Azymo, sed Fermentato; prius quippè vixit, quam Azymi in Lege præciperentur, Exod. 12. 6. & Levit. 23. 15. ergò Christus in institutione Eucharistiæ usus est Fermentato; adeoque &c.

212. Resp. Conc. maj. ne. min. ad cujus probationem neg. Conseq. nam sicut fermentatus Panis habet suas morales significationes elevandi cor ad spiritualem lætitiā, eamque significandi ab Eucharistia collatam; ita Azymus habet suas, nempe significandi Animæ internam munditiā, & elevandi animum ad cœlestia; & sicuti Azymus deprimit ad humum, seu ad inferiora propter soliditatem; ita Fermentatus idipsum facit propter corruptionem, ut optimè Theodoret. Quæst. 55. in Exod. nihil igitur ex hujusmodi ratiunculis adversus Latinos colligi potest.

213. Ad secundum neg. conseq. nam, sicuti licet Pani simpliciter addatur, quod sit *Fermentatus*, non arguitur quin sit simpliciter Panis; ita ex hoc, quod Pani simpliciter addatur *Azymus* non tollitur, quin sit simpliciter Panis, eoquā Fermentatio, & Azymitas conditiones sunt accidentales Panis, non substantiales: restringunt, non alienant, uti facit *l. y Pictus* respectu Hominis, cujus substantiam non restringit, sed distrahit, & omnino alienat; & propterea in Scripturis Panis usualis modò Azymus, modò Fermentatus, modò absque istis restrictionibus nuncupatur, & supponitur vitam alere, sive Azymus sit, sive Fermentatus.

214. Ad Tertium: maj. est vera quoad substantiam

stantiam signi, & figurati: non verò quoad omnia accidentia; alioquin signum esset res signata: adeoque nec Panis, quo usus est Melchisedech necessariò debuit esse Azymus, ut Eucharistiam præfiguraret: min. quoque dubia est; nam constat, tempore Melchisedech fuisse Azyma in usu: Gen. enim legimus 19. 3. de Loth, qui cum Angelos in specie adolescentium Sodomam venientes domum suam adduxisset, *Fecit Convivium, & coxit Azyma*. Quod ergò Moyses induxerit Azyma, hoc ex Azymorum novitate minimè proveniebat; sed quia ex novi Ritus institutione multa futuræ Ecclesiæ mysteria indicabantur.

215. Obji. III. Si Christus in Azymo Eucharistiam instituisset, Ecclesia non posset Græcis permittere, ut conficiant in Fermentato: Ecclesia enim Sacramentorum substantias mutare non potest; hoc autem est falsum, ex Floren. sæpè cit. in Decret. unionis; ergò Christus instituit Eucharistiam in Fermentato. Nec valet reponere, Fermentatum ab Azymo solum accidentaliter differre: nam etiam amygdum, & pasta à Pane usuali non differunt substantialiter, sed penes solum majorem coctionem, & tamen ob Christi institutionem neque validè, neque licitè adhiberi possunt in Sacramento; ergò si Christus instituit in Azymo, nec licitè, nec validè potest confici in Fermentato.

216. Resp. Dist. maj. si instituisset præcisè in Azymo cum exclusione Fermentati, con. maj. si instituisset in Azymo, ut Panis triticeus est, præscindendo ab Azymo, & Fermentato, ne. maj. & eodem modo dist. min. neg. Conseq. Itaque Christus instituit quidem in Azymo, dum Azymo usus est: attamen non uti Azymus, sed ut Panis triticeus erat; non præci-

piendo , sed exemplum præbendo , quatenus externo signo internam Animæ refectionem , significat, tam Azyzo , quam Fermentato æquè expresso ; sicuti Aqua Baptismalis sive frigida sit , sive calida , sive maritima , sive pluvialis , æquè ad Baptismum apta est : quamvis Christus Dominus in ejusdem institutione aqua aliqua determinata usus sit , & sic etiam de vino pro materia Calicis differendum .

217. Nec valet paritas de pasta , amydo , & aceto : nam quamvis physicè à Pane cocto , & Vino fortasse non differant , attamen moraliter , & in esse usuali , & nutritivo differunt . Fermentatus autem , & Azyzus in esse usuali , atque ad nutritionem , & comestionem , aptitudine nequaquam differunt , ut experientia docemur ; igitur paritas nulla est . Idcirco autem Ecclesia vult , à Græcis Fermentatum , à Latinis Azyzum adhiberi , non quia uterque non sit aptus ; sed quia vult ab unaquaque Ecclesia mores suos , & consuetudines respectivè intactas servari .

ARTICULUS SEPTIMUS

*Solvuntur objecta contra tertiam Partem
Asserti , nempe licere Latinis
usum Azyzorum .*

218. **O** Bji. I. Ex hoc quod Christus Azyza in Sacrificio adhibuerit , non arguitur id licere Christianis , sicut ex eo quia Christus circumcissus fuerit , & Legalia servaverit , non arguitur id ipsum Christifidelibus licere ; ergò neque arguitur esse licitum Azyza in sacrificio adhibere .

219. Conf. Pascha nostrum , in quo Christi
sus

flus est immolatus; debet distingui à Paschate Judæorum: non distingueretur autem, si Azymis uti liceret; ergò illicita sunt, ne cum Judæis convenire videamur. Hinc Ebionitis Hæreticis Fermentatum abjicientibus, & Azymum adhibentibus, Ecclesia censuit Azyma repellenda, & amplectendum Fermentatum, ex Decreto Alexand. I.; ergò nunc non licet uti Azymis, cum à Judæis non minus distingui Christiani debeant, quam ab Hæreticis.

220. Resp. ne. ant., & paritatem: idcirco autem colligimus, Azyma Christianis in Eucharistiæ confectione licere, quia, cum ipsa sit Novæ Legis Sacramentum, quoties Azymus Panis adhibetur, non fit more Judaico, sed Christiano; & propterea optimè colligitur, cum in Institutione Eucharistiæ Christus Azyma adhibuerit, etiam Christifidelibus in eodem sacrificio conficiendo licere: at quia Christus morte sua, & Evangelii promulgatione Legem Judaicam abrogavit, ex hoc, quod ipse ante abrogationem fuerit circumcisis, non sequitur idipsum à Christianis fieri posse: hoc enim esset falsæ Religionis protestatio, si more Judaico fieret; secus autem ob alios fines, nec more Judaico: tunc enim res est omnino indifferens.

221. Ad Conf. Dist. maj. ratione rei oblatae, & modi oblationis; conc. maj. absolute; ne. maj. & eodem modo dist. min. neg. conseq. Pascha igitur Christianorum à Judaico, etsi Azyma adhibeantur, longissimè dissidet: tum quia res oblata est Corpus ipsum Christi Domini, quod cruentè in Cruce oblatum est: tum quia ipsamet oblatio diversa est, quia fit ritu Christiano, non Judaico, & cum relatione ad Christum præsentem, non venturum, ut Ju-
dei

Judæi faciunt. Si autem intentio Judæica, ejusque Ritus circumferibantur; sicut Græci multis utuntur, quibus utuntur Judæi, quin ullo pacto judaizare putent, cur id Latinis erit interdictum? Et profectò neque aqua ipsa posset in usum deduci, cum eam Judæi in suis Cætemoniis adhibeant.

222. Quod verò de Ebionitis objicitur, neconseq. nam Ecclesia non ideo Fermentatum permittit, ut ab illis Hæreticis distingueretur apertè judaizantibus: nam utendo Azymis more Christiano, ab ipsis plenissimè distinguebatur: sed quia contendebant, Azyma ita esse necessaria, ut Fermentatum penitus excluderetur; idcirco ad errorem hunc eliminandum, & ostendendum, etiam cum Fermentato Eucharistiæ validitatem stare posse, usum Fermenti permittit, eo pacto, quo pro grassantibus Manichæis dignoscendis, qui Vinum vituperabant tamquam Draconis fel, ex August. de Hæres. cap. 56., & Epiphan. Hæres. 5. Gelasius I. utramque speciem in Eucharistia præscripsit, etiam si optimè sciret, etiam sub una tantum specie verum Sacramentum contineri.

223. Obji. II. Sub gravibus pœnis tam Ecclesiasticis, quam Laicis Sacra Leges apertè interdicunt usum Azymorum, ut Canones Apostolici Can. 70. alias 69. Laodicen Can. 38. Trullen. Can. 11. ergò illicitè Latini Azymis utuntur; in re enim sacra conficienda Judæos sequuntur.

224. Resp. Canones interdicerere quidem Azyma, sicut ceteros alios Judaicos Ritus, non in esse materiali, quatenus res sunt particulares in esse suo naturali spectatæ; alioquin quomodo Græci pullos, columbas, carnes, aquam ipsam naturalem, quæ omnia in Ritibus Judæicis

cis adhibebantur, ad usum proprium frequenter revocant? Sed in esse formali, quatenus Religioni Judaicæ deserviunt, & in ejus cultum cedunt. Imò nec Fermentato uti liceret, cum Levit. 7. 13. interdum Cæremoniis hebraicis miscebatur. Scopus ergò Canonum est solummodo Communionem cum Judæis in Sacris, & quantum fas est, etiam in prophanis, interdicere non verò res ipsas, sive Azyma sint, sive alterius generis, quæ Judæorum usui inserviunt, præciso ritu, ac intentione Religionis, secundum se spectatas repellere.

225. Obji. III. Ecclesia etiam Latina in ipsismet primordiis, & etiam sæculis subsequentibus, Missæ Sacrificio Fermentatum apposuit; ergò Latini moderni malè agunt Azymo adhibendo. Conseq. patet, cum usibus antiquæ Ecclesiæ se opponere videantur. *Ant. autem evincitur ex Vit. Gregor. Mag. à Joan. Diac. scripta ex Can. 6. Tolet. 16. ex Lib. Pontif. Melchiadis Papæ, ex Siricio Papa in Pontif., ex Innoc. I. ad Decent. Eugub. Episcop., ex Alexand. I. lib. Pontif. apud Platinam in Vit. Pontif., ubi nedum fit mentio Fermenti, sed videtur usus supponi, imò præscribi, & quidem in Ecclesia Primitiva, in qua Patres, & Pontifices relati floruerunt; ergò Ecclesia Latina censuit Azyma illicita, & licitum solummodo Fermentatum.

226. Resp. cum eadem sit Ecclesia Latina moderna, cum vetustissima Primitiva, sicuti sanctè tunc uti potuit Fermentato, ita sanctè nunc uti Azymo posse, variatis motivis, & circumstantiis; Christus enim non præcepit Azymorum usum, sed solummodò exemplo suo Panis tunc usualis necessitatem constituit ad Eucharistiæ Sacramentum conficiendum, Nihilominus

227. Resp.

227. Resp. II. nē. ant. neque adducta ex adverso quidquam evincunt : nam authoritas Joan. Diaconi solum ostendit , eo tempore morem fuisse Panem in sacrificio offerendum in Domibus privatis ab ipsismet offerentibus confici ; non verò esse Fermentatum , qui cerrè Azymus fieri poterat , & Sacerdotibus præberi in Altari offerendus , & si decursu temporis inos fuerit introductus Panem Eucharistiæ defervientem à solis Ministris Ecclesiæ sacra veste indutis ferro ex sacratio desumpto confici , ex Umbert. de Syl. Cand. epist. ad Cærul.

228. Toleranum VI. solummodo decernit , morem à nonnullis Sacerdotibus exteris in Ecclesiam Hispanicam introductum conficiendi in Fermentato tolli oportere , veteremque restitui consuetudinem ; quodquidem potius oppositum demonstrat : supponit quippe usum introductum esse abusum , nec omnibus communem .

229. Melchiades , Siricius , & Innocentius Adversariis neutiquam favent : nam si Eulogiæ Christi Corpus minimè continebant , sed merum erat signum Ecclesiasticæ Communionis , ut tenet ex Patribus August. , Paulino , Nazianz. & Aliis Baron. ad ann. Christi 311. tunc argumentum evanescit : si verò cum Christiano Lupo Differtatione de actibus Sanc. Leonis IX. sustineatur , Eulogias fuisse verum Sacramentum , adhuc nihil evincitur , nam Panis ille non erat Fermentatus , sed Azymus : & ideo dicebatur Fermentum , non Fermentatum : hoc autem pacto vocabatur ad denotandam Ecclesiasticam unitatem , quia juxta phrasim Chrysof. Hom. 24. super epist. 1. ad Cor. Quemadmodum Fermentum omnes partes farinae ad se trahit , & in unam massam compaginat ,

nāt , sic , mediante Eucharistia , in qua Fideles Carnem Christi sumentes unum cum eo efficiuntur , inter se quoque arctissima compage junguntur : at hoc quid confert ad probandum usum Fermentati in Primitiva Ecclesia pro Eucharistia conficienda ?

230. Ultimum quod adducitur ex Alexan. I. præterquam vetustissimum in Ecclesia Azymi usum ostendit , sub Adriano quippè Imperatore an. Christi 120. Martyr occubuit , minimè probat , Fermentatum ante in usu fuisse ; illud enim Decretum , vel ad firmandam , & roborandam Apostolica sanctione vetustam Azymorum traditionem , vel ad recidendum abusum aliquem , qui fortasse paulatim in Latinam Ecclesiam irrepserat adhibendi Fermentatum , formari potuit ; eo pacto , quo à Pelagio I. Commemorationem Defunctorum in Ecclesia vetustissimam , & ab ipso met Alexandro aquam lustralem statutam legimus , etiam si hæc in Constitutionibus Clementis lib. 8. cap. 38. multò ante sancita legantur .

231. Nec movere debent verba Platinae : *Sicut ante fiebat* : Illa enim non ad Fermentum , sed ad Azyma sunt referenda . Cum enim aliqui à prisco more à Christo , & Apostolis accepto , de Azymis adhibendis recedere cæpissent , decretum est , Azyma , sicut antea fiebat , retineri . Cæterum eodem motivo Ebionitis resistendi Ecclesia Orientalis Fermentatum introduxit , ne cum ipsis Judaizantibus convenire videretur , ac in eo , quem assumpsit more , constanter perseveravit , salva tamen fraterna cum Occidentali servata usque ad fatale schisma , quo nunc ab ea sejungitur , unitate . Occidentalis verò Azyma tueri censuit , & adhuc servat innocua , ne ob stultorum , & impio-

impiorum Hominum inania dicta, quam à Christo Domino, & Apostolis acceperat, consuetudinem derelinquere culparetur.

ARTICULUS OCTAVUS

Nonnulla Quæstiuncula enodantur.

232. **Q**UÆRES I. An graviter Græci delinquant in usu Azymorum Ecclesiæ Romanæ ritum sequi detrectantes?

233. Resp. cum Græci ex Leone IX., & Florent. permissionem nacti sint Ecclesiæ suæ consuetudinem servandi incolumem, quam quidem Innocentius III. in Lateranensi IV. ratam voluit, nec eam posteriores Pontifices unquam revocaverint, sed potius confirmaverint; utique ex hoc præcisè minimè delinquere. Si tamen obfirmato sint animo morem suum retinendi, Romano licet contradicente Pontifice, tunc graviter ipsos peccare dicendum est ob pertinaciam, qua legitimo Superiori in oppositum præscribenti obtemperare detrectant.

234. QUÆRES II. An Sacerdos Latinus in Fermentato conficiens graviter delinqueret?

235. Resp. Sacerdotem Latinum inter Latinos versantem in Fermentato celebrantem, graviter peccare, cum ab eo nedum vetustissima Ecclesiæ suæ consuetudo, sed etiam Decreta Pontificum id expressè vetantium in re, gravi violentur, nisi magna urgeat necessitas, ob quam Leges omnes humanæ, qualis etiam ista de Azyimo, & Fermentato censenda est, minimè obstringunt. Si autem inter Græcos versetur, adhuc morem Ecclesiæ suæ retinere debet, nisi, ut superius dixi, magna, & inevitabilis urgeat necessitas, qua sola in quocumque loco

loco fit, ut in Fermentato conficere valeat, dispensatur, utsi esset non peregrinus, sed incolà, nec propriam haberet Ecclesiam, in qua liberè posset Ritu suo conficere; ita discurret Cardinalis de Lauræa in 4. Scoti, Disput. 18. art. 2. n. 44.

236. Quæres III., utrum Sacerdos Græcus in Azymo consecrans peccaret?

237. Resp. Negativè. Nam ex Doct. Subtil. 4. Dist. 11. Quæst. 6. Privilegiatus non tenetur uti privilegio, sed observare potest Legem rigide statuentem. Cum ergò Romana Ecclesia jusserit, à Latinis in Azymo confici, Græcos verò Fermentato uti permiserit; sicut non peccarent Græci omnes, si hujusmodi Legi positivæ obtemperarent, Decreto permissivo minimè utentes; ita nec Sacerdos particularis, si scandalum abesset: eo pacto, quo non peccassent Judæi, non repudiando uxorem minus gratam, etiam si hujusmodi permissione, ob eorum duritiem Matth. 19. 8. gauderent. Ita præfatus Cardinalis loco cit. n. 45. & 46. dummodo scandalum absit. Non desunt tamen, qui censeant, Sacerdotem Græcum apud suos existentem peccare, si Azymis uteretur, eo quia ritum Ecclesiæ suæ, in qua actu versatur, & quem jubetur servare, dum inter Græcos degit, omittit.

SECTIO SECUNDA

*An Vinum ex Uvis siccis aqua dilutis expressum
ad Sacri Calicis consecrationem sit
materia sufficiens?*

238. **A** Byssini, & Æthiopes Calicem Sacrum consecrantes, etsi in cæteris nequaquam errent, umorem tamen quemdam ob

ob veri Vini inopiam ex Uvis siccis aqua dilutis expressum adhibent, existimantes, hoc sufficere ad Sacramentum verè conficiendum. Videndum est, an hujusmodi humoris usus, quem veri Vini usualis inopia induxit, valeat sustineri?

ARTICULUS PRIMUS

Quædam prænotantur scitu digna.

239. **N**otandum I. hîc supponi debere, materiam Sacri Calicis Eucharistici Vinum esse verum, proprium, & usuale, non autem cujuscumque alterius generis liquores; ut sacræ nedum Literæ, sed Concilia quoque unanimiter ostendunt; inde ortum est, oblationes pro Sacramentis conficiendis in Primitiva Ecclesia fieri consuetas præter Panem, Vinum, & Aquam fuisse rejectas, de Consec. Dist. 2. Hinc Æthiopes ipsi sensus Ecclesiæ memores humorem illum, quem consecrationi Sacramenti sufficere arbitrantur, ex Uvis tantum, non autem ex aliis fructibus extrahi posse, meritò existimant.

240. Notandum II. Hujusmodi Uvas siccas in duplici statu posse spectari. Primò quatenus, etsi liquorem pristinum, & vividum amiserint, non adeo tamen aruerunt, uti torculari immediatè premantur, verum, & proprium Vinum, quamvis in minori quantitate, ac longè fortius emittant. II. Quatenus Uvæ hujusmodi ob diuturnam concoctionem naturalem, aut violentam, ita siccæ factæ sunt, ut nihil veri, & naturalis liquoris in acinis recludatur, quod consuetis extractum instrumentis, verum, proprium, commune; & usua-

& usuale Vinum dici queat. Nulla est in primo sensu difficultas, sed benè in secundo; maxime quia Uvæ illæ aquâ nedum madefiunt, sed fiunt crassiores,

ARTICULUS SECUNDUS

Dicendum est, Vinum ex Uvis siccis modo explicato expressis, & aqua delibutis, non esse sufficientem materiam ad validam Sacri Calicis consecrationem.

241. **P** Rob. breviter primò: nam verum, Vinum usuale, quod in convivii propinatur, & usu omnium quotidiano adhibetur, atque in Divinis Scripturis pro Vino accipitur, est illud, quod immediatè ex Uvis maturis exprimitur, & per varias decolationes à facibus expurgatum usui omnibus communi deservit: hujusmodi enim Vino, dum Paschale fieret Convivium in ultima Cœna, Sacramentum Eucharistiæ instituens Christus Dominus usus est: at Vinum ex Uvis siccis expressum, & aqua dilutum, non est Vinum usuale, verum, & porabile, eo pacto, quo fit in praxi communi, adhiberi consuetum, ut experienciâ ipsâ, & quidem apud omnes Nationes Vino utentes, perspicuè docemur: neque hoc indiget probatione: igitur Vinum illud ex Uvis siccis aqua dilutis, sicuti verum Vinum non est, ita nec materia pro Sacramento Eucharistiæ conficiendo sufficiens.

242. Neque dicatur, inopiam veri Vini excusare ab hoc præcepto, dummodò substantia ex vite extracta habeatur.

243. Contra enim est; cum quia inopia numquam efficit res aliquas esse aptas, quæ tales

les non sunt ex institutione Sacramenti : tum-
quia, sicut *Æthiopes* inopiâ laborant veri Vi-
ni usualis, ita quoque Panis triticei usua-
lis; & tamen Panem non triticeum minimè pu-
tant sufficere pro Eucharistiæ valida consecra-
tione.

244. Prob. II. Quia aqua naturalis usua-
lis, & communis, non autem humor ex aqua
distillatus, etiam secundum *Æthiopes* est Ba-
ptismi necessaria materia; ergò etiam Vinum
commune, usuale, ex Uvis primò extractum
est materia Consecrationis Calicis, cum de
utroque Scripturæ, Patres, & Concilia eodem
prorsus modo, quoad necessitatem loquantur.

245. Prob. III. Quia humor ex Vino ipso
extractus, vulgo *Aquavita*, nuncupatus, etsi
substantiam ipsam subtiliorem contineat; quia
tamen non est Vinum ipsum usuale, quod à
vite immediatè trahitur, à nemine censetur
materia sufficiens pro Sacramento conficiendo:
ergò multò minùs humor ille ex Uvis siccis edu-
ctus esse poterit materia Sacramenti, cum mo-
dicissimam imò nullam Vini substantiam in se
habeat; alioquin humor ex ipsamet vite per di-
stillationem eductus æquè posset sufficere ad
Calicis consecrationem, quod profectò nemo
dixerit.

246. Prob. IV. Nam mixtio aquæ Uvis sic-
cis aut tollit omnino substantiam Vini, aut
saltem magna ex parte debilitat; ergò humor ille
violenter expressus nequit esse materia, hujus
Sacramenti. Prob. consequ. nam Vinum ipsum
usuale, quod majori ex parte aquam contine-
ret, sicut veram rationem Vini amitteret, ita
nec sufficeret pro Sacramento conficiendo; er-
gò etiam humor ille ex Uvis siccis extractus,
etiamsi sustineretur veræ Calicis consecrationi
suffi-

sufficere, quia tamen major pars aquæ in eo prævalet, eisdem Uvis infusa, non potest sufficere pro valore Sacramenti.

147. Quapropter concludendum est, huiusmodi humorem, aut nullo pacto Sacri Calicis materiam esse sufficientem: aut saltem dubiam, adeoque in praxi minimè ponendam; ne in propositionem primam, ex 65. ab Innoc. XI. proscriptis incidamus, ita sonantem: *Non est illicitum in Sacramentis conferendis sequi opinionem probabilem de valore Sacramenti, relicta tutiore, nisi id vetet Lex, conventio, aut periculum gravis damni incurrendi. Hinc sententia probabili tantum utendum non est in collatione Baptismi, Ordinis Sacerdotalis, aut Episcopalis.*

ARTICULUS TERTIUS

Solvuntur Objectiones.

248. **O** Bji. I. Humor ex Uvis siccis extractus est verum Vinum usuale; ergò sufficit pro sacri Calicis consecratione. Consequatur; Prob. ant. Uvæ recentes non differunt substantialiter à siccis; ergò sicut humor expressus ex Uvis recentibus est verum Vinum usuale, etiam ille, qui à siccis exprimitur, erit Vinum usuale: hinc in nonnullis Regionibus Uvæ meliores exsiccantur, ex quibus elicatur Vinum optimum in conviviiis Magnatum propinari consuetum.

249. Conf. Farina expressa ex tritico veteri non differt specie etiam usualiter à farina expressa ex tritico recenti, cum ex eo fiat Panis usualis; ergò etiam humor ex Uvis siccis expressus est ejusdem speciei etiam usualiter cum illo,

illo, qui extrahitur ex Uvis recentibus, cum utrobique eadem ratio appareat.

250. Resp. neg. ant., ad cuius probat. negari potest ant. Nam Uvæ siccae nullum continent humorem, quem continent recentes, sunt quippe cadavera sicca Uvarum, non autem veræ Uvæ. Nihilominus con. ant. neg. conseq. Nam humores isti, etsi non differant substantialiter physicè, differunt tamen moraliter, & in esse usuali, & communi, eo pacto, quo pasta non differt substantialiter à Pane in clibano cocto, & tamen nemo dicit, pastam esse Panem illum, qui communiter comeditur, & in mensis adhibetur: Christus autem pro materia Sacramenti non humorem, quemcumque Vini speciem habentis instituit, sed Vinum commune, usuale, & quotidianum ex Uvis recentibus extractum, quale profectò non est humor ille, quo Abyssini utuntur.

251. Eo vel maximè, quia humor ille non est purè id, quod extrahitur ex Uvis, sed aqua etiam, qua Uvæ diluuntur, quæ, cum sit potior pars illius humoris extracti, aqua potius humore tincta dicenda est, quam humor ipse. Idcirco autem Vinum ex Uvis siccis apud Europæos elicetur naturale, quia nec aqua miscetur Uvis, nec Uvæ adeò exsiccantur, ut humorem proprium, & naturalem amittant, etsi Vinum non ita abundè præbeant, sicut magis recentes.

252. Ad Conf. neg. conseq. & disparitas patet; nam concoctio tritici non ita medullam ejus exsiccat, ut destruat, cum solida sit, non fluida: concoctio autem uvarum nimia, nedum exsiccat, sed destruit: ipsa quippe liquida est, & spiritibus volatilibus constat, qui facile nimio calore evanescunt, & exhalant,

ut

ut vel nihil, vel minimum liquoris supersit; hinc Æthiopes defectum hunc aquâ supplent.

253. *Obji. II.* Tumquia humor ille habet accidentia Vini, ita ut Vinum appareat: Tumquia humor ille ex vite extrahitur; ergò sufficit pro materia Calicis; quandoquidem Christus numquam in Evangelio, dum Sacramentum Eucharisticum instituit, Vini mentionem facit, benè verò liquoris ex vite extracti: nam Matth. 26. 27. cum, instituto Sacramento, Calicem Apostolis porrexit, dixit solummodo: *Bibite ex eo omnes*: post verba consecrationis v. 29. subditur: *Dico autem vobis, non bibam amodo de hoc genimine vitis* (ubi Arabicus vertit: *De succo hujus vitis*) *usque in diem illum, quo illud bibam vobiscum in Regno Patris mei*. Hic loquitur Christus de liquore contento in Calice Apostolis porrecto, quem dicit esse de genimine vitis, idest à vite extractum: at etiam humor, quo utuntur Æthiopes, est à vite extractus, & de genimine vitis; ergò ex Christi instituto sufficit pro materia Calicis.

254. *Resp.* ad primum Objectionis articulum, humorem illum habere quidem aliqua, sed non omnia, nec præcipua Vini accidentia, cum vigore, sapore, ac suavitate veri Vini careat. Sicut ergò, etsi aquæ artificiales aliquo pacto veris assimilentur, adhuc tamen pro materia Baptismi non sufficiunt; ita nec humor ille ob umbratilem quamdam cum vero Vino conformitatem retinens pro consecratione Calicis ullo pacto sufficiet.

255. Secundus verò facilè solvitur: nam humor ille aquâ mixtus non trahitur ex vite, cum aqua sit potior. Deinde falsa infertur consequ. nam etiam Aquavita extrahitur ex Vino, & ex Vite, cum tamen ad Calicis consecratio-

nem minimè sufficiat. Falsum est quoque, Christum Dominum Vini mentionem non facere; nam accipiendo, & præbendo Apostolis Calicem, Vinum denotabat in Calice inclusum, sine quo convivia nulla fiunt, & multò minùs solemnia Judæorum, in quibus optimum Vinum propinabatur, & à Patrefamilias in solemnitate Paschalis omnibus post se hauriendum, in eodem Calice porrigebatur, apud Cornelium Alapide super cap. 22. Lucæ. Cum verò dixit Christus: *Non bibam amodo de hoc genimine Vitis*, satis per ly *Hoc Vinum Calice inclusum* denotat in Sanguinem Christi conversum, quod sumi ab omnibus jubet, dicendo: *Bibite ex hoc omnes*. Cæterum etiamsi de genimine vitis absolutè Christus intellexisset, adhuc nihil evinceretur; cum de genimine vitis communi, usitato, atque in conviviis, & cœnis, nedum solemnibus, sed etiam privatis ab omnibus adhibito loquatur, quod sanè non est humor ille ex Uvis siccis aquâ dilutis extractus.

SECTIO TERTIA

*Utrum ante Sacri Calicis Consecrationem
Aqua Vino sit miscenda?*

256. **A**quam puram non esse Calicis materiam, exploratum est; oppositum enim in Aquariis Hæreticis, de quibus Epiphan. Hæres. 30., & August. Hæres. 64., & Hidroparastis, quorum meminit Theodor. lib. 1. Hæretic. fabul. Ecclesia damnavit, & statuit ex Scripturis, & Apostolica Traditione, Vinum requiri: ipsâ verò Aquâ Vino permixtâ opus esse, non ex Christi præcepto, sed exemplo, & Ecclesiæ vetutissima consuetudine novimus

vimus. Armeni, etsi antiquitus hunc Ecclesiæ morem exactè custodirent, falsorum tamen Magistrorum persuasione decepti, oppositum tenent, & observant. Videndum est, quantum à sensu Ecclesiæ in hoc Armeni defleant?

ARTICULUS PRIMUS

*Dicendum est, in Calicis consecratione
Aquam Vino misceri oportere, ita ut
omissio ejusdem sit grave peccatum.*

257. **O** Stenditur I. Ex Liturgiis antiquissimis, ut Sancti Petri Apostolorum Principis ita sonantis de Celebrante: *Quando commiscet sanguinem, (idest Vinum), & aquam, dicit: unus militum lancea latus ejus pupugit, & exiit sanguis, & aqua, mundi salutis scaturigo.* Illa Sancti Jacobi: *Deinde accipit Calicem, & dicit, similiter postquam cenavit, accipiens Calicem, & permiscens ex Vino, & Aqua, & aspiciens in Cælum &c.* Illa Sancti Marci: *Similiter & Calicem postquam cenavit accipiens, factaque, Vini, & Aqua commixtione, suspiciens in Cælum gratias egit.* Ex quibus Liturgiis nedum habetur, Aquam misceri Vino oportere, sed hoc ipsum à Christo Domino fuisse factum; ergò ex consuetudine Ecclesiæ, & Christi quoque exemplo, id ipsum faciendum est.

258. II. Favent vetustissimi Romani Præfules veritatis testes, ut Clem. Rom. lib. 8. Constit. Cap. 12. *Similiter & Calicem, postquam miscuit ex Vino, & Aqua, & sanctificavit, dedit Discipulis suis &c.* Alexand. I. Papa epist. 1. Cap. 4. ubi dicit: *In Calice Domini*

non debet aut Vinum solum , aut Aqua sola offerri : sed utrumque permixtum , quia utrumque ex Latere ejus in Passione sua profluxisse legitur . Anicetus ex Burchar. lib. 5. cap. 29. Part. 2. Cap. 32. Diligenter observetur ut Panis, Vinum , & Aqua , sine quibus Missæ nequeunt celebrari , mundissimè , atque studiosè tractentur . Eadem , & luculentius scribunt Julius I. ad Episcop. Egypti relat. de consec. Dist. 2. cap. 7. Innoc. III. lib. 2. de Myst. Missæ cap. 58. Honor. III. Cap. Perniciosus de celebrat. Miss. ergò ex Summis Pontificibus , qui rem hanc mysteriis asserunt refertissimam , Aqua Vino in Sacrificio Altaris miscenda est .

259. III. Ex Conciliis idem patet , Ecclesiæ mentem , & usum antiquissimum exhibentibus . Quantum enim ad Provincialia habemus Carthag. III. cap. 24. Bracar. III. cap. 1. Aurelian. IV. cap. 4. Wormatiens. cap. 4. Triburiens. cap. 19. Antisiodoren. cap. 8. Sifense , & Adanense , in quibus materia hæc exprofecto tractata est , Armenorumque objecta dissoluta , ac sub gravissimis pœnis sancitum , ne quis absque Aquæ mixtione Sacrificium Missæ celebrare præsumeret . Ex Generalibus verò Synodis occurrit primò Trullana; quæ tametsi legitima nequaquam censeatur , magni tamen sit ab Orientalibus , & plura continet sanctissima , & sapientissima Decreta: Can. igitur 32. asserit, morem miscendi Aquam Vino Apostolicum esse à Sanctis Patribus retentum , ab omni semper Ecclesia custoditum , ac novitatis reum esse , qui Aquam Vino miscere respuit , & concludit: *Si quis ergo Episcopus , vel Presbyter non secundum traditum ab Apostolis Ordinem facit , deponatur , ut imperfectè , ac simpliciter mysterium enuncians , & quæ tradita sunt innovans.*

Flo.

Floren. in Instruc. Armen. §. *Tertium est*, nempe Eucharistia, *cujus materia est Panis triticeus, & Vinum de vite, cui ante Consecrationem Aqua modicissima admisceri debet. Aqua enim ided admiscetur, quoniam, juxta Testimonia SS. Patrum, ac Doctorum Ecclesiæ pridem in Disputatione exhibita, creditur, ipsum Dominum in Vino Aqua permixto hoc instituisse Sacramentum*: subdit deinceps, cum dixisset ab omnibus Ecclesiis morem hunc semper servatum, & servari: *Decernimus igitur, ut etiam ipsi Armeni se cum universo Orbe Christiano conforment, eorumque Sacerdotes paululum Aquæ (prout dictum est) admisceant Vino. Quod quidem etiam in Triden. sess. 22. cap. 7. sancitum est; ergo ex Decretis Ecclesiæ Aquæ Vino miscenda est.*

260. Nec defunt Patres etiam Orientales: Basilius in Anaphora, cum Panis consecrationem à Christo habitam retulisset, subdit: *Similiter & Calicem Vini, postquam canaverunt, accepit, miscuitque Aquis, gratias egit, benedixit, sanctificavit, & gustavit, & divisit Discipulis suis, & Apostolis sanctis dicens &c.* Chrysost. in Liturgia: *Et unus militum lancea Latus aperuit, & exiit Sanguis: ad infusionem Vini dicit Sacerdos (& addens aquam dicit) & Aqua. Justin. Martyr Orat. ad Antoninum Pium: Precibus finitis, nos invicem osculis salutamus. Deinde ei, qui Fratribus præest, offertur Panis, & poculum Aquæ, & Vini, quibus ille acceptis, laudem, & gloriam rerum universarum Patri per Nomen Filii, & Spiritus Sancti offert.* Similia proferunt Theodor. Dial. 1. Proclus Constantinop. de Ordin. Div. Litur., German. Constantinop. Præsul Doctrina, sanctitateque celebris in Theoria. Damascen. de

Fid. Orthodox. lib. 4. cap. 14. & Alii, quos cumulat Coccius in Thesaur. Cathol. tom. 2. lib. 6. art. 13. igitur Patres, Concilia, & Ecclesia universa censent, Aquam in Sacrificio Altaris Vino misceri oportere, Christi quoque exemplo præeunte.

261. Suppetunt quoque rationes, non quidem demonstrativæ, sed congruentes I. Quia Calix Eucharisticus in veteri Testamento, nedum per Vinum, quo Hebræi in variis Sacrificiis utebantur, & Melchisedech obtulit, Genes. 14. 18.; verum etiam in Aqua, quæ fluxit de petra, 1. Cor. 10. fuit præfiguratus; ergo etiam ipsemet Calix in veritate Aquam debuit continere, & Vino misceri. Ita discurret Ambrosius de Sacramentis lib. 5. cap. 5.

262. II. Quia sic exprimitur mysterium, quo ex Latere dissecto Christi in Cruce pendentis Sanguis, & Aqua manarunt, Joan. 19. 34.: in Pane enim Corpus ut mortuum, in Calice autem Sanguinem ut effusum repræsentamus. Cum ergo ex Latere Christi Sanguis, & Aqua fluxerit, ad hoc significandum, Aquam, & Vinum pro materia Calicis adhibemus. Hac ratione utitur Alexander Papa in cit. Decreto, & Alii.

263. III. In mysterio Eucharistiæ significatur Ecclesiæ cum Christo conjunctio: id autem fit, Aquam, qua in Scripturis Populi significantur, & Vinum, quo Christus denotatur, inter se commiscendō, etsi vera unio non fiat tunc, sed, Eucharistiā peractā, nec non sumptā. Rationem hanc versant Brachar. Tribur. Floren. Cyprian. & Alii.

264. IV. Eucharistia cibus est, & potus spiritualis Animæ, ac propterea sub speciebus Panis, & Vini propinatur cum analogia ad

cibum, & potum corporalem: potus autem corporalis sumi consuetus non est Vinum simpliciter, sed dilutum, ex Clem. Alexand. lib. 2. Pedagog. Cap. 2.; igitur etiam in consecratione Calicis idipsum faciendum est. Istæ tamen, ut dixi, congruentiæ sunt, non demonstrationes; unica ratio est Ecclesiæ præceptum, & consuetudo.

ARTICULUS SECUNDUS

Solvuntur Objecta.

265. **O** Bji. 1. Ritus hujusmodi Aquam Vino miscendi in Calicis consecratione Hæreticis præbet ansam errandi, atque in errore permanendi; denotatur quippè nedum unio Humanitatis cum Divinitate, sed earumdem permixtio, quod est Eutychianorum error; ergo admitti non debet.

266. Accedit, mixtionem Aquæ cum Vino aliquid impurum significare: hinc Isaïæ 1. 23. de Hebræis dicitur: *Vinum tuum mixtum est Aqua*; ergo in Sacramento puritatis, quale Eucharistia censetur, purum Vinum adhibendum, purum Christi Sanguinem significans.

267. Resp. Sive ponatur Aqua mixta, sive purum Vinum, Eutychis Discipulos non posse ansam sumere erroris unicam naturam in Christo admittendi: itaque ne. conseq.; ansa enim illa irrationabiliter sumitur, cum fundamenta vigeant in oppositum: nam mixtio Divinitatis cum Humanitate est impossibilis, & in Scripturis satis patet, cum unitate Personæ in Christo stare optimè diversitatem Naturarum.

268. Id verò, quod subditur, levissimum est, cum eadem res in Scripturis in bonam, &

in malam partem sumatur ! Sic Leo Christum Dominum significat, Apoc. 5.5. , & Diabolum 1. Petr. 5.8.

269. Obji. II. Aqua est signum Regenerationis baptismalis , ex Innoc. III. de Off. Mifs. ergò Vino non est admiscenda : Sacramenta enim confundi non debent ; ergò nec signa Sacramentorum : at Aqua Regenerationis signum est, Vinum Redemptionis per Sanguinem in Calice fundendum ; ergò ista duo signa confundi non debent ; ergò nec misceri .

270. Resp. neg. conseq. , & conseq. probationis . Nam Aqua , quæ ex Christi Latere fluxit, fuit cum Sanguine impermixta ; & ideò duo Sacramenta per Aquam , & Sanguinem designari potuerunt : Aqua verò , quæ miscetur cum Vino , unum tantum significat Sanguinem. Nec repugnat , Aquam sub diverso statu pluram significare ; quo circa signa Sacramentalia minimè confunduntur ; diversis quippe affecta circumstantiis , diversimodè in significando se habent .

271. Obji. III. Eucharistia est mortis Christi Domini signum representativum , ex 1. Cor. 11. 26. ; ergò in ea nulla Aquæ mixtio fieri debet, sicuti in morte Christi nulla facta fuit Aquæ mixtio cum Sanguine , ex ejus quippe Latere fluxit à Sanguine separata .

272. Conf. Quia non remanent species Aquæ Vino mixtæ , sicut remanent species Panis , & Vini, confecto Sacramento. Aqua enim in Vinum convertitur ; ergò non debet fieri ista mixtio Aquæ cum Vino , alioquin deberent remanere species Aquæ , sicut remanent species Panis , & Vini .

273. Resp. cone. ant. , & neg. conseq. , & paritatem : mixtio enim Aquæ cum Vino mortem

tem Christi minimè repræsentat, sed ejusdem cum sua Ecclesia unionem, benè verò Sanguis in Eucharistia incruentè effusus. Idcirco autem vera Aqua cum Sanguine impermixta è Latere Christi manavit, quia Baptismum præfigurabat ab aliis Sacramentis distinctum; adeoque opus non erat, hoc præfigurari, benè verò unionem Christi cum Ecclesia per Sacramentum indicata.

274. Ad Conf. neg. conseq. nam Aqua, priusquam fiat conversio, in Vinum mutata est ejusdem igitur species non debent remanere; & ideò potest retinere significationem suam distinctam ab illa, quam habet, cum Vino miscetur.

275. Quæres I. An domi Aquam Vino permiscens præcepto Ecclesiæ satisfaceret?

276. Resp. Negativè: Concilia enim, & Patres citati non quamcumque mixtionem præscribunt, sed sacram in Sacrificio conficiendam, quæ talis non esset, si domi fieret, aut in dolio, ac proindè Minister Ecclesiæ ita agens præcepto adversaretur, graviterque delinqueret.

277. Quæres II. An reipsa peccaret, & quo genere peccati, qui hujusmodi mixtionem sciens, & volens omitteret?

278. Resp. Graviter, & læthaliter peccaturum: antiquissimæ enim consuetudini, Ecclesiæ præcepto in re gravi, ac ipsiusmet Christi exemplo contrairer: Patres verò morem hunc tamquam rem magni momenti tradiderunt, ut colligitur ex pœna depositionis violatoribus à Concilio Trullensi imposita Can. 32. quocirca nemini dubium esse debet, quin grave peccatum sit inobedientiæ, quia præcepta Ecclesiæ in re gravi franguntur; & contra Re-

ligionem , quia Ritus omitteretur ad Religio-
nis. decorem ordinatus .

S E C T I O . Q U A R T A .

*Utrum forma in Eucharistiæ confectiōe à Græcis
adhibita. valida sit , & legitima ?*

279. **G**RÆCI in sua Liturgia , postquam ver-
ba consueta in Missæ Sacrificio pro-
tulerunt consecratoria Panis : *Hoc est Corpus
meum: & Calicis : Hic est Calix Sanguinis mei :*
hæc alia : *Fiat hic. Panis Corpus Christi , & hoc
Vinum Sanguis Christi* , cum aliis precibus su-
peraddunt . Orta est difficultas. non modica ,
utrum hujusmodi verba in Liturgia superaddita
necessaria sint necessitate Sacramenti , vel so-
lius Præcepti ? Latini , & Græci Catholici pu-
tant , verba omnia Canonis juxta unius cujus-
que Ecclesiæ morem. citra peccatum. omitti non
posse : attamen , si verba ipsa. Christi. Conse-
cratoria , quæcumque illa sint , quibus trans-
mutatio Panis. in Corpus , & Vini. in Sangui-
nem practicè significatur , . omissis cæteris aliis ,
proferantur , adhuc validè confici Eucharistiam .
Græci autem Heterodoxi , & Discipuli Ni-
colai Cabasilæ in explicat. Liturg. cap. 29. &
Marci Ephesii , magni illius schismatici in Flo-
rentino jam sopiti incendii Excitatoris Lib. de
Verb. Consecrat. , quos Bessarion. Epist. 3. ad
Lascarem Philantropenum de Eucharistia viri-
liter infectatur , aut errore decepti , vel pruri-
gine Latinos carpendi excitati , . arbitrantur ,
ita verba hujusmodi esse necessaria , ut , iis
omissis , Sacramentum sit omnino invalidum .

280. Notandum est , fateri quidem Catho-
cos , verba , quibus fit Consecratio , Christi.
Domi-

Domini esse; non tamen omnia æquè veluti necessaria requiri, sed ea solummodò quæ præcise conversionem Panis in Corpus, & Vini in Sanguinem sufficienter exprimunt; & quidem non ea præcisè, quæ in uno Evangelista, vel in Paulo leguntur; sed vel illa, vel alia ex aliis Evangelistis; collecta vel ex Traditione hausta, dummodo verba Christi sint, cum Evangelistæ in omnibus verbis à Christo in Calicis consecratione adhibitis minimè convenient.

ARTICULUS PRIMUS.

Dicendum est, verba, quæ à Græcis post Consecrationem adduntur, necessitate Sacramenti; ad ejusdem validitatem minimè requiri.

281. **O** Stenditur breviter: nam iis verbis fit Sacramentum, quibus usus est Christus in eo conficiendo, & à nobis adhiberi præcepit: neque enim melius colligi potest, in quonam Sacramenti forma consistat, quam ex ipso exemplo, & præcepto Christi: at ipse in Eucharistiæ confectioe usus est non verbis à Græcis superadditis, sed iis, quibus in Panis consecratione Latini utuntur, nempe: *Hoc est Corpus meum*, & in consecratione Calicis: *Hic est Calix Sanguinis mei*; ergò, positis illis, ponitur Sacramentum integrum, & perfectum; ergò verba subsequentiæ Græcorum, cum nihil efficiant, sed effectum supponant, non sunt simpliciter necessaria ad validitatem Sacramenti: Hinc Paulus, 1. Cor. 11. 24. ait, dixisse statim Dominum, prolatis verbis Consecrationis: *Hoc facite in meam commemorationem*, & hoc per modum mandati, priusquam quidquam adderetur; ergò supponitur, post illa.

verba prolata completum, & integrum Sacramentum.

282. Ulterius, illa sola verba sunt necessaria necessitate Sacramenti, quibus effectus præfens, non futurus enunciatur, cum sint factiva, & practica, quod est omnibus Sacramentis commune: at verba: *Hoc est Corpus meum: Hic est Calix Sanguinis mei* enunciant practicè, non de futuro, ut faciunt preces Græcorum, existentiam Corporis Christi, ejusque Sanguinis sub speciebus Panis, & Vini; ergò verbis illis tantummodo, non aliis posterioribus fit Sacramentum integrum, & perfectum: alioquin verba illa Christi falsa essent, & falsum enunciant, quod absurdum est.

283. Rursus: Sacerdos in conficienda Eucharistia ipsammet Christi Personam repræsentat: Hinc Ambros. Lib. 4. de Sacram. cap. 4. *Cum venit, inquit, ut conficiatur Venerabile Sacramentum, jam non suis sermonibus Sacerdos, sed sermonibus utitur Christi*: Si autem preces subsequentes essent necessariae, ut Græci prætendunt, Sacerdos non ageret Personam Christi, sed propriam; Christi quippe sermonibus non uteretur; ergò validitas Sacramenti in precibus subsequentibus minimè consistit, sed in antecedentibus, quibus Christus usus est, & Latini, Græcique Catholici utuntur, ut Simeon Thessalonicen. Antistes, Cabasilæ non minus erroris, quam sedis successor in enarrat. Miss. , & Cabasilas ipse in Explicat. Liturg. cap. 30. fateri coacti sunt, apud Bessation. Epist. 3. ad Philant. Hæc ex Scripturis.

284. Ostenditur II. Idipsum ex ipsamet Ecclesiæ Traditione, quæ semper tenuit, verbis solummodo, quibus Christus usus est, Eucharistiam confici: hinc ex antiquissima consuetudi-

tudine statim post Consecrationem, & ante preces subsequentes Eucharistia Adstantibus proponitur adoranda nedum à Latinis, sed etiam à Græcis, diverso tamen Ritu: Latini enim, prolatis secretò verbis Formæ, Oblata in altum elevant, & Populo ostendunt se proster- nenti: Græci autem alta voce verba Formæ proferunt, & statim priusquam Sacerdos alia verba subsequantur proferat, Diaconus Oblata Populo ostendit exclamanti: *Amen*: quo verbo veluti confirmando testantur, sub speciebus illis Corpus, & Sanguinem Christi per verba antecedentia introducta venerari.

285. Hujusmodi veritatem Patres quoque vetustissimi Primitivæ Ecclesiæ confirmant. Nissen. Orat. Cathec. apud Eutim. in Panob. Tit. 22. *Panis*, inquit, *statim per verbum mutatur in Corpus*, ut dictum est, verbo: *Hoc est Corpus meum*. Cyril. Jerosoly. Cathec. 9. *Cum igitur Christus sic affirmet de Pane: Hoc est Corpus meum: quis deinceps audet dubitare? Ac eodem quoque confirmante, atque dicente: Hic est Sanguis meus: quis unquam dubitet, & dicat non esse illius Sanguinem?* Chrysost. Hom. 2. in 2. ad Timoth. *Quemadmodum verba, quæ locutus est Christus, eadem sunt, quæ Sacerdotes nunc quoque pronunciant; ita & oblatio eadem est.* Similia scribunt Justin. Mar. Apol. 2. ad Antoninum Pium, Iræneus lib. 5. cap. 2. Cyril. Alexand. Epist. ad Calosyr. Damascen. de Fid. Orthodo. lib. 4. cap. 14. ipse Chrysost. Hom. de Prodit. Judæ, quorum posteriores duo addunt similitudinem, quod sicuti solius Dei Omnipotentis præcepto, dum ait, *Fiat Lux*, facta est lux, & cæteræ Creaturæ; ita nunc, cum per verba Sacerdotis dicat Deus: *Hoc est Corpus meum: Hic est Sanguis meus*, eodem

pado.

facto statim ex Pane, & Vino fit Corpus, & Sanguis Christi, per verba ipsiusmet Christi, Sacerdotum instrumento operantis; ergo Patres isti manifestè afferunt, per verba prolata à Sacerdote fieri illud idem, quod fecit Christus: ipse autem Panem, & Vinum per sola verba: *Hoc est Corpus meum: Hic est Sanguis meus*, in Carnem, & Sanguinem suum convertit, absque ullis subsequētibz verbis; ergo idipsum faciunt Sacerdotes.

286. Eodem pacto loquuntur Patres Latini, quorum immensam segetem congerere liceret: at duos tantum proferam, quos ipsimet Græci jure merito magni faciunt, nempe Sanctum Cyprianum Carthagin. Episcop. & invictissimum Martyrem de Cœn. Dom. hoc pacto differentem: *Hoc est Corpus meum*; ante illa verba cibus ille communis tantum nutriendo corpori commodus erat; sed, ex quo à Domino dictum est: *Hoc facite in meam commemorationem: hæc caro mea, hic est Sanguis meus*; quotiescunque his verbis, & hac fide actum est, Panis iste substantialis, & Calix benedictione solemni, sacratus ad totius mundi vitam, salutemque proficit, simul medicamentum & holocaustum. August. serm. 28., de Verb. Domini ait. *Dixi vobis, quod offertur in Altari, Panis dicitur: Ubi verba Christi deprompta sunt, jam non Panis dicitur, sed corpus appellatur; & Patres utriusque Ecclesiæ Orientalis, & Occidentalis in Synodo Florentina collecti in Instruc. Armen. §. Tertium est Eucharistiæ Sacramentum. Afferunt, quod, Forma hujus Sacramenti sunt verba Salvatoris, quibus hoc conficitur Sacramentum; Sacerdos enim in Persona Christi hoc conficit Sacramentum: nam ipsorum verborum virtute substantia Panis in Corpus Christi, & substantia Vini in*
San-

Sanguinem convertuntur ; ergò Patres omnes Ecclesiæ tenent , non precibus subsequētibz , sed solummodo verbis Christi , quæ à Latinis recitantur , Eucharistiæ confici Sacramentum .

287. Tandem aliqua ratione idipsum ostenditur : Tum quia Eucharistiæ Sacramentum , quod certissimum esse debet , à precibus merè humanis penderet , quod videtur absurdum , cum juxta August. cit. de consecrat. Dist. 2. *Can. Utrum : Non in merito Consecrantis , sed in verbo efficitur Creatoris , & in virtute Spiritus Sancti* . Tum quia Christus suecessivè Panem , & Vinum in Corpus , & Sanguinem , transmutavit , ut patet ex Evangeliiis , & Epistola Pauli 1. ad Cor. 11. Si autem vera esset Græcorum sententia , simul fieri deberet , cum unica sit utriusque conficiendi eorundem forma . Tum quia forma Eucharistiæ ex puris verbis Domini conflata est , Græcorum autem ex aliis extraneis ; ergò illa , non ista est vera forma Eucharistiæ , & vim sola habet convertendi Panem , & Vinum in Corpus , & Sanguinem Christi .

ARTICULUS SECUNDUS

Solvuntur Græcorum Objectiones :

288. **O** Bji. I. In Liturgiis vetustissimis Jacobi , Basilii , Chrysostomi verba deprecatoria , quæ à Græcis necessaria supponuntur , post Consecrationem recitari mos est ; ergò vera Consecratio , & Confectio Sacramenti fit verbis à Græcis adhibitis . Ant. est certum citatas Liturgias inspiciendo . Prob. conseq. Quia si transubstantiatio per verba fieret antecedentia , essent ridicula , & inepta ,
con-

consequentia ; petere enim fieri , quod factum est : hoc autem asserere nimis injuriosum Patribus sanctissimis Ecclesiæ Orientalis videtur ; ergo transubstantiatio fit non tantum verbis enunciativis Christi antecedentibus , sed etiam deprecativis subsequenter Sacerdotis .

289. Conf. Quia Oblata , etiam post prolationem verborum Christi, Panis appellantur in præfatis Liturgiis , & rogatur Spiritus Sanctus , ut illa immutet ; ergo supponitur Panis non adhuc conversus in Corpus Christi , alioquin stultè Panis immutaretur , & invocaretur Spiritus Sanctus , ut illa immutaret .

290. Resp. conc. ant. , & neg. conseq. ad cujus prob. neg. maj. Non enim petunt preces illæ fieri , quod factum est ; sed ut , quod factum est in nostram cedat utilitatem , ut ex ipsismet constat Liturgiis , in quibus per verba illa non innuitur physica Panis in Corpus Christi transmutatio , sed moralis in Animarum sanctificatione , fructuque Sacramenti consistens .

291. Ad Conf. dico , Oblata vocari non simpliciter Panem , sed Panem hunc , Panem Cœlestem , Panem Sanctum , eo pacto , quo Christus ipse illa appellabat Joan. 6. 32. *Pater meus dat vobis Panem de Cœlo verum . Qui manducat hunc Panem vivet in æternum .* Et ipsamet Liturgia nedum ante , sed etiam post verba , quibus Græci utuntur , appellat ; rogatur verò Spiritus Sanctus , ut Panem immutet , non quomodocumque , & physicè , sed moraliter , quatenus fructum Sacramenti suscipientibus impertiat . At hoc nihil pro Adversarij concludit .

292. Obji. II. Ad validitatem Sacramenti non minus preces , & invocatio Sacerdotis , quam .

quam ipsamet verba Christi requiruntur; denotant enim actionem Ministri, quæ Minister est: sed preces, & invocatio sunt post verba Consecrationis in Liturgia Græcorum; ergo preces, & invocatio, quæ recitantur à Græcis validitatem Sacramenti ingrediuntur; hinc Patres passim, ut Cyril. Jerosol. Cathec. 3. Irenæus lib. 4. cap. 57. Cyril. Alexand. lib. 11. in Joan. c. 24. & Alii docent, Sacramentum Altaris fieri mysticis precibus Divina invocatione, gratiarum actione, ac benedictione. Et profectò Christus Dominus omnia hæc habuit in consecratione Eucharistiæ, ut ipsemet Textus Evangelicus apertè ostendit.

293. Resp. neg. maj. universaliter loquendo: quamvis enim in aliis Sacramentis requiratur invocatio Trinitatis, & alia, quibus denotatur actio Ministri, ut omnino ab aliis contradistincta; non tamen in consecratione Sacramenti Eucharistiæ verum est, in qua Minister, non Ministri Personam agit, sed ipsiusmet Christi. Hinc Ambros. lib. 4. de Sacram. cap. 4. *Cum venit, inquit, ut conficiatur venerabile Sacramentum, jam non suis sermonibus Sacerdos, sed sermonibus utitur Christi.* Et propterea precibus, invocatione, gratiarumque actione minimè opus est, sed sufficiunt verba proferentis Sacerdotis in Persona Christi.

294. Idcirco autem Patres asserunt, mysticis precibus, ac Divini Nominis invocatione fieri Sacramentum, non quia omnes illæ preces de necessitate requirantur; sæpè enim dixerunt, per sola Christi verba: *Hoc est Corpus meum: Hic est Sanguis meus*, confici Sacramentum; sed quia ex institutione Ecclesiæ ad dignè, congruè, ac licitè conficiendum necessaria sunt.

295. Neque ex hoc, quod Christus Dominus preces fuderit, gratias egerit, Panem fregerit, omnia ad necessitatem Sacramenti sunt referenda, sed illa sola, quibus ipsum Sacramentum confecit dicendo: *Hæc est Corpus meum: Hæc est Calix Sanguinis mei*, quibus omnipotenti præcepto Corpus, & Sanguinem Christi sub speciebus Panis, & Vini introduxit: non enim omnia, quæ Christus fecit, à nobis fieri oportet; sed ea solum, quæ ipse de necessitate præscribit; alioquin Cabasiliani validè non conficerent, eoquia gratiarum actio, quam habuit Christus, in eorum non legitur Liturgia.

296. Obji. III. Dionysius Areopag. de Eccles. Hierar. docet, Consecrationem fieri post illa verba: *Hoc facite in meam commemorationem*: at hæc verba dicuntur post illa: *Hoc est Corpus meum*: ergò Consecratio non fit verbis Christi; at hæc non sunt nisi preces Græcorum; ergò illis fit vera Consecratio, & consequenter Sacramentum.

297. Conf. Nam Damascen. lib. 4. de Fide. Orthodox. cap. 4. cum sustinere vellet, Panem Eucharisticum non esse solummodo imaginem, & figuram Christi, sed ipsammet veritatem, objicit sibi Basilium appellantem in Liturgia Panem, & Vinum *Antitypa*, idest figuram Corporis, & Sanguinis Christi: hoc autem respondet esse verum ante consecrationem, non autem post illam, quo pacto loquitur quoque Epiphanius Diacon. pro Catholicis adversus Iconoclastas act. 6. Disput.; ergò uterque Panem, & Vinum, dum *Antitypa* sunt, putant non esse Sacrata: sed juxta Basilium, *Antitypa* dicuntur post Consecrationem, & ante preces Græcorum: ergò Damascenus, & Epiphanius ex Basilio censuerunt Consecra-

erationem fieri per verba subsequētia Sacerdotis, non per antecedētia Christi; ergo &c.

298. Resp. Dist. min. Illa verba dicuntur nunc post verba Consecrationis, conc. min. tempore Dionysii neg. min., & conseq. tunc enim verba illa: *Hoc facite in meam commemorationem*, non dicebantur post illa; *Hoc est Corpus meum*, sed ante, ut ex Dionysii Liturgia perspicuum est; & propterea non sequitur Eucharistiam fieri verbis Sacerdotis, sed Christi, uti notat Tharasius Patriarcha Sanctissimus apud Diplovatac. in Synop. juris. Græci Tit. de Sacram. Sec. de Eucharistia.

299. Ad conf. resp. Dist. mi. subsumpti: dicuntur *Antitypa* in sensu reduplicativo quasi tunc sint *Antitypa*, neg. min. specificativo conc. min., & neg. conseq. Itaque Basilii vocat Oblata *Antitypa* post Consecrationem, non quod tunc sint verè, & rigorosè *Antitypa*, seu figuræ Christi non adhuc præsentis, sed quæ erant ante *Antitypa*, nunc continent Corpus, & Sanguinem Christi, quod ex ipsamet Basilii Liturgia elicitur, ubi sic habet: *Propter misericordias, & miserationes tuas, quas affatim in nos effudisti, Sancto Altari appropinquamus, & cum proposuerimus, & obtulerimus Sacri Corporis, & Sanguinis Christi tui &c.* Ex quibus verbis apparet, verba illa: *Cum obtulerimus, & proposuerimus*, denotari Panem, & Vinum, fuisse *Antitypa* dum offerebantur, idest ante Consecrationem, non autem post; & hoc tantummodo voluerunt Damascenus, & Epiphanius, censentes, Oblata posse *Antitypa* ante Consecrationem appellari, non verò post ipsam tunc enim veritatem, nempe Corpus, & Sanguinem Christi continebant.

300. Dici quoque potest cum Bellarm. lib. 2. de

de Euchar. cap. 15., etiamſi Oblata vocentur poſt Conſecrationem *Antitypa*, nihil officere: non enim ſignificatur, Oblata tunc Corpus, & Sanguinem Chriſti minimè continere; ſed Corpus, & Sanguinem Chriſti ſub illo ſigno Symbola eſſe Chriſti pro nobis in Cruce immolati; vel à nobis in Cœleſti Convivio comedendi, & propterea Euchariftia *Antitypon* dici poteſt, quia figura eſt parum à veritate diſtans, ut à figuris Veteris Teſtamenti diſtinguatur, quæ *Typi* dicebantur, non *Antitypa*. Neque abſurdum eſt eandem rem eſſe ſui ipſius imaginem ſub diſverſa ratione.

301. Obji. IV. Ex hoc, quod præces Græcorum non ſint ipſamet verba Chriſti, ſed Sacerdotis, & abſque illis ſenſus ſermonis enuntiativus perfectè habeatur, non arguitur, eas eſſe minimè neceſſarias neceſſitate Sacramenti: nam verba illa: *Qui pridie quam pateretur, accepit Panem in ſanctas, ac venerabiles manus ſuas*, non ſunt proſectò verba Chriſti, & tamen juxta Scotum 4. Diſt. 8. Quæſt. 2. cum Diſcipulis ſuis, ſunt neceſſaria neceſſitate Sacramenti, ſicuti in aliorum Theologorum ſententia, ut D. Thom. 3. Par. Quæſt. 78. art. 3.; & 4. Diſt. 8. Quæſt. 2. art. 1., & Sequacium, verba; quæ Calicis Conſecrationem ſubſequentur, nempe: *Novi Teſtamenti, qui effundetur in remiſſionem peccatorum*, ſub eadem neceſſitate requiruntur; ergò etiam præces Græcorum, etiamſi ſint Conſecrationi poſteriores, adhuc eſſe poſſunt neceſſariæ neceſſitate Sacramenti.

302. Reſp. neg. ant., ad cujus probat. neg. conſeq.: nam quamvis aſſeratur Scotus ita ſenſiſſe, quod tamen non eſt certum, cum dubitativè loquatur, & in oppoſitam in decurſu ſermonis ſententiam declinare videatur; adhuc
tamen

tamen Adversariis nihil prodest: nam verba illa antecedentia non supponunt sermonem Christi, quo Sacramentum celebratum est, sed solummodo deserviunt ad connectenda verba sacri Textus cum sermonibus Christi, ut eisdem denotetur, Sacerdotem tunc incipere loqui sermonibus Christi, non propriis: at verba subsequenter Consecrationem nec sunt Christi sermones, neque deserviunt ad verba Scriptoris sacri connectenda: quandoquidem supponunt Sacramentum jam plenè confectum, clareque apparet, esse mera Sacerdotis deprecantis verba, non ad Christum introducendum, sed introductum directa: verba vero illa, quæ post Consecrationem dicuntur, quæ Objectio recitat, nec sunt purè enuntiativa, nec verba Sacerdotis, sed Christi, & ideo à nonnullis Theologis ad integrum sensum reddendum necessaria censentur, etsi communior Theologorum oppositum probabilius censeat, apud Martium nostrum Theol. Moral. Disput. 18. Quæst. 3. art. 1. Preces autem Græcorum Consecratione perfectæ sunt posteriores, nec Christi sunt verba, neque ad perfectum sensum reddendum conferunt, sed solummodo integritati tanti Mysterii, majori expressioni, ac majestati sacræ actionis deserviunt; & ideo necessitate præcepti recitanda sunt, non Sacramenti.

303. Quæres, Utrum Sacramentum à Græcis A catholicis modo proprio confectum, sit validum?

304. Resp. affirmativè. Etsi enim errent existimantes, verba Liturgiæ suæ formam esse Eucharistiæ, aut saltem ad Sacramenti validitatem requiri: attamen, quia verba quoque Christi proferunt, & totam illam prolixam Liturgiam recitando, & quod facit vera Christi

Eccle-

Ecclesia, efficere intendunt, validè revera faciunt: ponunt enim totum id, quod Christus voluit, & instituit, atque Ecclesia præscribit. Nec officit error eorum privatus, qui universalem totius Ecclesiæ intentionem nequaquam aufert; alioquin Sacramenta ab Hæreticis collata minimè sublisterent, quod apertè falsum est. Si tamen consecrandi non haberent intentionem, nec faciendi, quod facit Ecclesia, nisi cum verba proferunt posteriora cum invocatione, utique non facerent, cum legitimam Formam nequaquam adhiberent, debitaque carerent intentione.

SECTIONO QUINTA

Utrum Christifideles enormibus implicati criminibus, verum, dum communicant, Christi Corpus percipiant?

305. **J**acobitæ, teste Thoma à Jesu de Con-
vers. omn. Gent. lib. 6. cap. 1. existimant, Fideles gravissimorum criminum reos, dum sacram Synaxim percipiunt, non accipere physicè Corpus Christi, quod tamen de Peccatoribus, non adeò enormibus minimè affirmant. Videndum est, an rectè sentiant?

ARTICULUS UNICUS

Dicendum est Peccatores maximos, & enormissimos, etsi absque fructu, recipere tamen physice in Sacramento Eucharistia verum, Christi Corpus.

306. **P**atet ex Scripturis: nam 1. Corinth. 11. 29. habetur: *Qui manducat, & bibit indignè judicium sibi manducat, & bibit non*

non dijudicans Corpus Domini; ergò manducantes, & bibentes indignè verè recipiunt Corpus Domini: alioquin judicium non sibi manducassent, cum Corpus Christi esse desineret; ergò etiam qui recipiunt magis indignè, idem corpus percipiunt, cum magis, & minus speciem non tollant.

307. Et profectò Judas proditor erat iniquissimus, & maximus peccator, qui tamen verè Corpus Christi in ultima Cœna sumpsit, teste August. Epist. 162. *Tolerat, inquit, ipse Dominus Judam, diabolum, furem, & venditorem suum: finit accipere inter innocentes Discipulos, quod Fideles noverunt pretium nostrum.*

308. Idipsum eruitur ex Joan. 6. 56. ubi dicitur à Christo: *Caro mea verè est Cibus, & Sanguis meus verè est potus; igitur Eucharistia cum Cibo, & Potu corporali analogiam habet: at Cibus corporalis esse suum physicum non amittit, etiamsi stomachus eum recepturus sit summè indispositus; imò nec nocumentum affert, nisi revera in stomachum inducatur; ergò etiam Eucharistia, tametsi ab indignissimis sumatur, suum esse minimè amittit, sed verè in stomachum physicè trajicitur, & propterea sacrilegè manducatur.*

309. II. Ex Sacris Canonibus idipsum evincitur ab Eucharistiæ sumptione quædam Personarum genera severè arcentibus. Nam Ravennat. II. cap. 2. Usurarios, Concubinarios, publicosque Blasphemos: Turon. III. existentes in mortali, & Istriones, nisi convertantur: Coloniens. III., & Mogunt. IV. eos, de quibus dubium est, an fuerint confessi, nisi testimonium de absolutione ferant: non jejunos, ebrios, Sacramentum evomentes, aliorumque criminum

num reos omninò à Communionè Eucharistica repellunt Pontifices, & Concilia relata in Jure Canonico de Consecrat. Dist. 2. cap. *Tribus Gradibus*. Cap. *Qui sceleratè*, Cap. *Qui timorem*, Cap. *Qui per ebrietatem*; igitur supponit Ecclesia, Christum sub speciebus Eucharistiæ nequaquam desinere; tametsi à magnis peccatoribus sumatur, alioquin nulla irreverentia, contra Sacramentum committeretur, cum nullo pacto ab ipsis sumeretur; desineret quippe, antequam in stomachum trajiceretur, etsi extrinsecè sumptum appareret.

310. III. Ratione idipsum evincitur. Nam Eucharistia Sacramentum est permanens, habens esse suum integrum, atque perfectum independentè à quacumque sumptione, ex Floren. in Lit. Union. 6. *Quinto Ecclesiasticorum*, ita ut, etiamsi à nemine sumeretur, adhuc integrum suum esse retinet, quousque desinant species; ergò tametsi à magnis peccatoribus sumatur, esse non desinit, cum Symbola ipsius adhuc remaneant, nempe species Panis, & Vini, sub quibus ex vi Formæ Sacrum Christi Corpus fuit introductum. Hinc Sacri Canones jubent, magna munditiæ, atque accurata sedulitate Sacram Eucharistiam custodiri, ita ut, si Animal eam comedat, Minister illius pœnitentiam peragat 40. dierum, ex Arelat. III. cap. 5., in Pixide super Altare servari ex Londin. I. c. 1. Et quidem clausâ, ne tangatur, ex Lateran. IV. cap. 26. & Latriæ cultu adorandam esse, ex Triden. sess. 13. cap. 5.

311. Conf. Nam indignitas quantumvis maxima tangentium, atque tractantium Sacram Eucharistiam non facit desinere Corpus Christi etiam secundum Adversarios; ergò quamvis indignitas sumentium sit maxima, adhuc
tamen

tamen ob receptionem non desinit esse in stomacho Corpus Christi.

312. Quod verò obijciunt, nempe nimiam irreverentiam in Christi Corpus redundare, si physicè in pectus magnorum Peccatorum recipiatur, levissimum est: tumquia etiam indignè suscipientes, licet non indignissimè, adhuc irreverentiam magnam sacrilega Christi manducatione committunt; & tamen ipsi minimè negant, quin physicè in stomacho recipiatur. Tumquia sacrilega illa receptio, etsi magnam Deo injuriam inferat, nullam tamen infert Corpori Christi physicam læsionem; Corpus enim Christi in Eucharistia inclusum, etsi comburatur in speciebus suis, vel in sterquilinum projiciatur, nihil physicum amittit; quare, sicuti à peccatoribus passus est crucifigi, atque à Diabolo super montem, ac pinnaculum Templi transferri, ut optimè Gregor. Mag. Hom. 10. in Evangel., cur mirari debemus, eum pati, ut à magnis Peccatoribus indignè suscipiatur, & gutture sacrilego trajiciatur?

SECTIONE SEXTA

An liceat tam Laicis, quam Sacerdotibus peccati mortiferi consciis Eucharistiam sumere, Exomologesi nequaquam premissa?

313. **J**acobitæ, Nationesque aliæ Orientales, teste Thoma à Jesu de Convers. omn. Gent. lib. 6. cap. 2. sive Laici sint, sive Sacerdotes, etiam si consciis se in lethale crimen incidisse, adhuc absque ulla Exomologesi sacram sumunt Eucharistiam: priores quidem à Sacerdotibus: posteriores verò per se ipsos Sa.
Part II. H crum

crum conficientes. Quæritur itaque, an hujusmodi consuetudo uti licita sustineri valeat?

ARTICULUS PRIMUS.

Dico I. breviter, lethali crimine inquinatos, ut dignè, & absque novo peccato ad Eucharistiam accedant, Pœnitentiam præmittere debere.

314. **P** Atet ex Scriptura, nam ut quis absque noxa, & cum fructu ad Eucharistiam accedere possit, debet esse mundus, ac nulla sorde læthali inquinatus, ex 1. Cor. 11. 29. ubi ait Paulus de indignè cibum illum, cœlestem sumente: *Judicium sibi manducat, & bibit, non dijudicans Corpus Domini; & propterea subdit ibidem: Probet autem se ipsum Homo, & sic de Pane illo edat, & de Calice bibat.* Hinc in Liturgiis Græcorum ante communionem Diaconus clamabat: *Sancta Sanctis;* at nullus immundus absque Pœnitentia fieri mundus potest, ut Divinæ clamant Scripturæ, præsertim Ezechiel. 18. 21., & alibi passim; ergo peccato gravi inquinatus ad Eucharistiam sine Pœnitentia nullo modo accedere potest.

Dico II. ad Eucharistiam dignè suscipiendam non sufficere Pœnitentiam interiorem, sed requiri exteriorem, nempe Pœnitentiæ Sacramentum.

315. Evincitur hoc: nam ut optimè Doct. Subtilis 4. Dist. 9. Quæst. unica 6. *De Secundo* ea status Gratiæ ad Eucharistiam dignè suscipiendam securitas requiritur, quæ ad moriendum more Christiano; id enim postulat tanti digni-

dignitas Sacramenti : ad securè autem moriendum , si Confessarii copia suppetat , non sufficit interior Pœnitentia , quamvis morienti videatur perfecta; sed requiritur etiam exterior, eo quia , cum certus non sit , se esse reipsa perfectè contritum , nolens medium certum à Christo Domino institutum adhibere , æternæ se perditionis periculo exponet; ergo etiam ad securè communicandum non sufficit interior , sed requiritur exterior Pœnitentia , nempè Sacramentalis Confessio : & ita tenent quoque Doctores communiter .

316. Alia quoque ratio accedit , quam idem Subtilis subministrat loco cit. §. *De Tertiò* : quia nimirum Eucharistia Ecclesiasticæ unitatis est Sacramentum , ad quam significandam in Primitiva Ecclesia Eulogiæ , seu Panes sanctificati mittebantur , ex Innoc. I. Epist. 5. ad Decen. Eugub. Episc. : non esset autem tale , nisi ad ejus perceptionem Confessio Sacramentalis in Peccatore requireretur ; per contritionem enim reconciliatur quidem Deo Peccator , sed non Ecclesiæ , quam peccando offendit ; ergo ad hanc unitatem denotandam , & servandam , requiritur Confessio Sacramentalis , qua Dei Ministris subjicimur , à quibus Ecclesiæ unitas derivat . Et ita censent gravissimi Patres , ut Cyprian. lib. 6. de Lapsis . Chrysost. Hom. 83. in Matth. Ambros. lib. 6. in Lucam , & praxis ipsa antiquissima Ecclesiæ satis apertè demonstrat .



Dico III. Nedum Sacerdotes, sed etiam Laicos ante Sacramenti sumptionem, si peccato lethali graventur, ad Confessionem Sacramentalem teneri.

317. Ratio est apertissima: nam non minus Laici, quam Sacerdotes in Ecclesia Christi Corpus suscipiunt; ergo si in peccato jacent, non minus Laici, quam Sacerdotes Sacramentalem Confessionem præmittere debent: ex quo enim idem Corpus Christi recipiant, eadem quoque requiritur dispositio, cujus necessitas ex ipsiusmet Sacramenti altissima dignitate proficiscitur, etsi Sacerdotes ob alium titulum teneantur: quia nimirum ipsummet Sacramentum, & Sacrificium, ut Ministri conficiunt, quod sanè specialem, & præcipuam, etiam præscindendo à receptione, puritatem requirit.

ARTICULUS SECUNDUS

Solvuntur Objectiones.

318. **O** Bji. I. contra primam partem: Eucharistia est instituta ad remissionem peccatorum, dicitur enim Matth. 26. 18. *Hic est enim Sanguis meus novi Testamenti, qui pro multis effundetur in remissionem peccatorum;* Et in Liturgiis varix preces apponuntur, ut nobis peccata dimittantur, asseriturque etiam à Patribus Damasceno, Chrysostomo, & Aliis, & juxta Theologorum sententiam peccata venialia dimittuntur; ergo etiam mortalia ob sanctitatem substantialem, quam Eucharistia continet Corporis Christi Domini Divinitati substantialiter copulati.

319. Re-

319. Respondetur nego antec., si de remissione per se, & primario intelligatur, cum Eucharistia sit Cibus spiritualis in sumente vitam supponens. Itaque illa remissio, de qua fit mentio in Scripturis, & Patribus, intelligitur de remissione pœnæ, non culpæ, quæ supponitur dimissa; vel de dimissione culpæ per accidens, quando quis cum peccato invincibiliter ignorans accedit, juxta sententiam *Thomæ* subtilis loco cit. *De Secundo*. Nec sanctitas substantialis Christi suffragatur: sumitur enim Christus per modum Cibi, de cujus ratione est vitam supponere, non dare.

320. Obji. II. cont. secundam partem, etiamsi non fiat Confessio Sacramentalis, adhuc per actum perfectæ Contritionis, qua Homines justificari, Deoque reconciliari docet *Triden. sess. 14. cap. 4.*, fit perfectæ probatio: propterea *Chrysostomus Hom. 28. in priorem ad Cor.*, & *August. Serm. 252. de Tempore ad probationem Eucharistiæ receptioni necessariam solius Pœnitentiæ mentionem faciunt*, non verò Sacramentalis Confessionis; ergo prodigno ad Eucharistiam accessu Confessio Sacramentalis sive in Laicis, sive in Sacerdotibus nequaquam est necessaria.

321. Resp. neg. ant., ad cujus probat. neconseq. Quamvis enim ex *Triden. loc. cit.* perfectæ Contritio justificet, hoc tamen facit cum voto Sacramenti, quo non accedente, dum copia subest Ministri sufficientis, non fit justificatio. Quoniam verò nulla certitudo habetur veræ, & perfectæ Contritionis, qui non vult ad Sacramentum accedere, denotat, se non habere veram Contritionem: hinc gravissimi Theologi, ut *Lugo*, *Suarez*, *Arctinus* no-

ster apud Mastrium Disp. 18. Quæst. 4. art. 2. Theolog. Moral. tenent, etiam si Contritio perfecta innotesceret, Peccatorem adhuc ad Confessionem Sacramentalem teneri. Augustinus verò, & Chrysostomus loquuntur de iis, quæ præcisè internam Pœnitentiam concernunt, non de Sacramentali, quæ postea fieri debere supponunt, utpote notissimam, ejus mentionem expressam facit Chrysostomus Hom. 30. in Genes. *Aug. & Chrysostomus verò alibi nassim*

322. Circa tertiam partem nulla urget specialis difficultas. Quamvis enim Sacerdotes conficientes districto vinculo obstringantur Eucharistiam dignè suscipiendi, ac propterea distinctum quoque peccatum, vel saltem longè gravius committerent indignè accedentes ob dignitatem, qua fulgent, tantique Mysterii excellentiam, hoc quidem facinore fædiùs inquinantur; at Laici minimè propterea ab eodem excusantur, qui tametsi Sacramentum minimè conficiant, ipsum tamen ore indignè, atque conscientia co inquinatâ suscipiunt.

C A P U T IV.

De Pœnitentia Sacramento.

323. **E**X quo à Sede Petri Orientales impiè defecerunt, nullum est absurditatis genus, in quod à falsis Præceptoribus decepti stultè non impeerint. Hinc de Pœnitentia, qua salus lapsis à Christo Domino benignissimè propinata est, errores plures ignavè protulerunt, ipsosque etiam nunc proterva obstinatione tuentur, de quibus in præsentì agendum est.

S E C T I O P R I M A

*An Pœnitentia Christiana sit Novæ Legis
verum Sacramentum?*

324. **P**ER Pœnitentiam Christianam hîc non intelligimus virtutem illam, aut actum voluntatis, quo peccata detestamur, vel quia præcisè Deum summum bonum offendimus, vel Beatitudinis jacturam, ac damnationis æternæ pœnam meruimus; hanc quippe in Veteri quoque Testamento extitisse, Divinis Scripturis pluribus in locis admonemur, ex Trid. sess. 14. cap. 4., sed ultra prædictos actus, quos necessariò Christiana Pœnitentia complectitur, sinceram peccatorum omnium Confessionem legitimè factam Sacerdoti, à quo eorundem, sive quoad reatum culpæ, sive pœnæ æternæ absolutionem plenissimam obtinemus. De hac Quæstio hæc agitur, utrum scilicet revera sit Novæ Legis Sacramentum, à Christo Domino institutum; itaut venia Peccatorum non impetrativè solummodo, sed verè, & propriè à Sacerdotibus Dei vicem gerentibus per modum causæ ministerialis impendatur? Jacobitæ, & Cophtæ, apud Domin. à Trinit. lib. 4. Bibliot. Theol. sec. 9. cap. 1. negativam partem amplectuntur, quam ab Audianis, quorum meminit Theodoretus lib. 4. de Hæret. Fab., & Messalianis à Damascen. relatis lib. de cent. Hæres. didicerunt, atque in iis perseverant, teste Guid. Carmelit. cap. 2. de Jacobitis, & Jacobo de Vitriaco in Histôr. Orient. cap. 76.

ARTICULUS PRIMUS

*Pœnitentia Christiana hætenus explicata
est Nova Legis verum
Sacramentum.*

325. **O** Stenditur ex Scripturis : nam hujusmodi Pœnitentię, qua Sacerdotibus peccata deteguntur, & eorum ab ipsis obtinetur Absolutio, promittitur peccatorum remissio, pœnarum dimissio, atque cum Deo reconciliatio, ut fit mentio Joan. 20. 22. ubi cum insufflasset in Discipulos suos Christus ait : *Accipite Spiritum Sanctum, quorum remiseritis peccata, remittuntur eis, & quorum retinueritis, retenta sunt.* Mat. 18. 18. *Quaecumque alligaveritis super terram, erunt ligata & in Cœlis, & quaecumque solveritis super terram erunt soluta & in Cœlis;* Ibique loqui Christum de omni dimissione, patet ex contextu : rogatus enim Petro, quoties essent peccata dimittenda, respondit Christus v. 22. *Non dico tibi usque septies, sed usque septuagies septies.* Et 2. Cor. 5. 19. cum dixisset Paulus, Mundum Deo per Christum reconciliari, & sibi datum Ministerium reconciliationis per Christum, subdit v. 20. *Pro Christo ergo legatione fungimur, tamquam Deo exhortante per nos :* Igitur per Apostolorum, & eorumdem Successorum, nempe Sacerdotum, ministerium peccata remittuntur, pœnæ ad eorum libitum condonantur, & Peccatores Deo reconciliantur; ergo Pœnitentia, in qua omnia hæc sunt, est verum novæ Legis Sacramentum, cum ista omnia citra infusionem Gratix, ac justificationem minimè contingant.

326. Nec valet cum Adversariis ad dimissionem

tionem declarativam confugere : sensus enim Scripturæ optimè sonat de vera dimissione : in Scripturis enim *Remittere* significat veram dimissionem , ut patet Matth. 9. 3. ubi Christus dixit Paralytico : *Remittuntur tibi peccata tua*. Lucæ 7. 27. cum de Maria Magdalena dixit Salvator : *Remittuntur ei peccata multa , quia dilexit multum* , & v. 28. ipsi dixit Mulieri : *Remittuntur tibi peccata* : tumquia remissio peccatorum in Veteri Testamento per Sacerdotes indulta erat merè declarativa ; ergò dimissio in Novo Testamento est verè relaxativa ; alioquin hæc ab illa minimè distingueretur , quod absurdum est : tumquia Christus potestatem suam Apostolis communicavit dimittendi peccata , cum Joan. 20. 21. dixit : *Sicut misit me Pater , & Ego mitto vos* : Christus autem habuit veram potestatem dimittendi peccata , non tantum declarandi dimissa , quod sane Adversarii negare minimè audebunt , ipsomet Christo refragante Mat. 9. 6. , & Lucæ 5. 24. ; ergò etiam Apostoli , & eorum Successores non solum declarant , peccata esse dimissa , sed verè ipsi dimittunt .

ARTICULUS SECUNDUS

Idipsum ex Patribus ostenditur.

327. **O** Rigen. Hom. 2. in Levit. *Est adhuc ;* inquit , *septima , licet dura , & laboriosa per Pœnitentiam remissio Peccatorum , cum lavat Peccator lacrymis stratum suum , & fiunt ei lacrymæ panes die , ac nocte , cum non erubescit Sacerdoti Domini indicare peccatum , & querere medicinam secundum eum , qui dicit : Dixi pronuntiabo adversum me injustitiam*

meam Domino, & tu remisisti impietatem peccati mei. Cyril. Alexand. lib. 12. in Joan. cap. 56. Qua ratione, inquit, Divinae Naturae Dignitatem, & Potestatem Discipulis suis Salvator largitus est. Quia certo absurdum non est, peccata remitti posse ab illis, qui Spiritum Sanctum in seipsis habent: nam cum ipsi remittunt, aut retinent, Spiritus, qui habitat in eis, per eos remittit, & retinet. Nissen. Epist. Canon. ad Episcop. Mytil. cap. 5. Rectè habuerit, si hodie-
no Die non solum eos, qui ex regeneratione per Lavacri Gratiam transmutati sunt, adducamus, sed etiam qui per Pœnitentiam, & Confessionem à mortuis operibus ad viventem vitam ascendant, ad viventem spem tamquam manu adducamus, à qua per peccatum alienati sunt. Athanas. serm. in illa verba: Profecti in Pagum, qui ex adverso est, ita loquitur: Nos ipsos examinemus, utrum soluta sint nostra vincula, ut in melius proficiamus. Quod si nondum soluta sunt vincula, tradas te ipsum Discipulis Jesu: adsunt enim, qui te solvent pro potestate, quam à Salvatore acceperunt. Quaecumque enim, inquit, ligaveritis super Terram, erunt ligata & in Cœlis, & quæ solveritis in Terra, erunt soluta in & Cœlis, & si quibus remisieritis peccata, remittuntur eis. Et omnium istorum antiquissimus Clemens Romanus Epist. 1. Si fortè in aliqujus cor vel livor, vel infidelitas, vel aliquod malum latenter irrepserit, non erubescat, qui Animæ suæ curam gerit, confiteri hæc huic, qui præest, ut ab ipso per verbum Dei, & consilium salubre curetur, quo possit integra fide, & operibus bonis pœnas æterni ignis effugere; ergò ex doctrina Patrum peccatorum vincula possunt dissolvi, maculæ abstergi, & possessio vitæ æternæ tribui illis, qui Pœnitentiam agunt,
cri-

crimina sua Sacerdotibus aperiendo ; ergò hæc Pœnitentia verum est Novæ Legis Sacramentum , cum omnia hæc absque collatione Gratiæ fieri nequeant .

ARTICULUS TERTIUS

Idipsum Rationibus evincitur.

328. I. **S**ic: ad delendum Originale peccatum , & stolam immortalitatis restituendam institutum est Sacramentum Baptismi in Hominem renovantis ; ergò etiam ad delendum actuale peccatum aliquod Sacramentum institui debuit , qui Gratiâ in Baptismo receptam , amissamque per peccatum restitueret : hoc est Pœnitentiæ Sacramentum ; ergò verè Pœnitentia Christiana Sacramentum est .

329. II. Pœnitentia Novæ Legis à Christo Domino instituta aliquid habere debet ex opere operato , quod non habebat in Veteri Testamento , alioquin ab ea non distingueretur ; ergò Pœnitentia Novæ Legis consistens in actibus internis Contritionis , & externis Confessionis Sacerdotibus confectæ , confert Gratiâ ex opere operato , Deoque reconciliat , & consequenter est verum , & proprium Novæ Legis Sacramentum .

330. III. Christus in Lege Nova se debet Caput Ecclesiæ ostendere , ejusque Authorem , peccata remittendo , Gratiâque largiendo : hoc autem fit in Sacramento Pœnitentiæ per Ministros suos Sacerdotes , cui loco Christi peccata aperiuntur ; ergò illud signum est verum Sacramentum Novæ Legis .

331. IV. Ordo Vitæ Spiritualis postulat , ut Pœnitentia Sacramentum sit verum , & pro-

prium Novæ Legis ! sicut enim datur Baptismus , quo Deo nascimur , Eucharistia , qua pascimur , Confirmatio , qua roboramur , ita dari debet aliud , quo mortui Christo resurgamus ; ergò Pœnitentia est verum , & proprium Novæ Legis Sacramentum .

ARTICULUS QUARTUS

Solvuntur Objectiones .

332. **O** Bji. I. Ex hoc quod Joan. 20. 23. peccatorum remissio , Gratiæque infusio promittantur , non arguitur , Pœnitentiam , quam Catholici commendant , esse Novæ Legis Sacramentum : nam etiam Pœnitentiæ Veteris Testamenti Divinæ Scripturæ veniam pollicentur , & Gratiæ infusionem ostendunt , Ezech. 18. 22. 23. Joel. 2. 13. Isaïæ 1. 18. & alibi passim ; nec tamen dicitur verum Sacramentum . Sic etiam Marci 1. 4. Lucæ 3. 4. Joannes Baptista prædicabat Baptismum Pœnitentiæ in remissionem Peccatorum , quod tamen nequaquam Sacramentum erat , etsi Symbolo externo conficeretur ; ergò ex Scripturis non arguitur , Pœnitentiam , quam Catholici inculcant , esse Novæ Legis Sacramentum .

333. Eo magis quia Apostoli dimittebant peccata eo pacto , quo Christus dimittebat , cum dicatur Joan. 20. 21. priusquam Apostolis potestatem peccata dimittendi tribuerit : *Sicut misit me Pater , & Ego mitto vos* ; igitur etiam verba subsequencia v. 22. 23. *Accipite Spiritum Sanctum : quorum remiseritis peccata , remittuntur eis , & quorum retinueritis , retenta sunt* : ad illa priora verba referuntur : *Sicut misit me Pater , & Ego mitto vos* ; Christus autem ,

tem, dum peccata remittebat, nullum Sacramentum conferebat, sicuti Magdalene non contulit, dum eidem peccata sua remisit, Lucæ 7. 48. Tumquia Pœnitentia Christiana ab Apostolis annuntianda erat etiam Infidelibus; Lucæ 24. 47. hæc autem esse non poterat verum Sacramentum, cujus Infideles erant incapaces: hinc Cyrillus Alexandrinus in verba illa: *Quorum remisistis &c.* asserit, ad Infideles, & Fideles æquè referri; ergò ex Scripturis non deducitur, Pœnitentiam, apud Catholicos fieri consuetam, esse Novæ Legis Sacramentum.

334. Resp. ne. ant., ad cujus probat. neg. conseq.: Contritio enim interna ex corde prodiens humiliato, non erat Symbolum sensibile, cui gratia ex Divina institutione esset annexa, sed merus actus operantis, qui ex Divina Gratia profectus de congruo tantum justificationem merebatur, non quatenus signa externa præberet, quorum nullum determinatè, & in specie ad justificationem exigebatur: absolutio autem Sacerdotalis, cum aliis præcedentibus interni doloris sensibilibus signis externum Symbolum est, cui ex Divina institutione peccatorum remissio, Gratiaque habitualis infusio promittitur, & præbetur; & propterea verum Novæ Legis Sacramentum est, ut optimè ex locis citatis colligitur.

335. Secundum ex semetipso solvitur: vel enim Præcursor Domini Baptisum Pœnitentiæ prædicans in remissionem peccatorum Sacramentum Pœnitentiæ futurum nuntiabat à Christo Domino instituendum; aut simplicem ipsius Pœnitentiæ virtutem eo pacto, quo alii Prophetæ fecerunt, veniam à Deo, si rectè pœnituisent, eisdem pollicendo; si primum di-

catur, favet Catholicis; etsi enim tunc, cum annunciabatur, non erat Sacramentum; attamen tempore suo, nempe post Christi institutionem, futurum dicebatur: si autem secundum asseratur, ut revera Textus Evangelicus innuere videtur, Divinam quippe ultionem ob scelera imminere pronuntiat, adeoque Pœnitentiæ fructibus Divinam iracundiam placari oportere; tunc objectio ad rem non facit, cum illa Pœnitentia, quam Joannes prædicabat, ab ea non differret, quam alii Prophetæ sapissimè inculcabant.

336. Ad Tertium dico, veram esse majorem quantum ad effectum, non quantum ad modum. Apostoli enim verè peccata dimittebant, sicuti dimittebat Christus: at non eodem modo: ille enim utpote potestate pollens Divina, & excellenti, autoritate propriâ peccata dimittebat: Apostoli verò solummodo ministerialiter, & autoritate Christi: quocirca verba illa: *Sicut misit me Pater, & Ego mitto vos*, non significant, eadem prorsus autoritate, qua missus est Christus, mitti quoque Apostolos, cum apertè pateat diversissimam, fuisse: sed hoc pacto, nempe sicuti Christus missus est à Patre veluti Filius suus in Humanitate subsistens pro Mundi salute, ita mitti Apostolos ab eodemmet Christo, veluti Ministros suos, qui propterea ejusdem autoritate, non primaria, sed ministeriali gaudentes, peccata dimitterent, & proindè dixit illis: *Accipite Spiritum Sanctum: quorum remiseritis peccata remittuntur eis, & quorum retinueritis retenta sunt*. Ex quo minimè sequitur, ex eo quia Christus Dominus absque Sacramento peccata dimiserit, idipsum aut factum fuisse ab Apostolis, vel ab eorum fieri Successoribus.

337. Ultimum tandem nullam habet difficultatem : nam Pœnitentiæ Sacramentum Infidelibus prædicandum, non significabat, ab Infidelibus quâ Infidelibus sumi oportere ; sed quod Dogma Sacramenti Pœnitentiæ Infidelibus quoque annuntiaretur, ut conversi ab infidelitate, cum peccassent, eo uterentur, Deo reconciliari cupientes . Intelligi quoque potest per Pœnitentiam, & remissionem peccatorum Baptismus, uti eam sumit Paulus ad Hæb. 6. 4. & consentiunt Patres Oecumen. Theodoret. in Commen. hujus loci, & Ambros. lib. 2. de Pœnit. cap. 2. Baptismus autem ab Infidelibus utique sumendus est, non à Fidelibus jam initiatis : vel si D. Cyril. expositio sustineatur, quam tamen cæteri Patres minimè admittunt, verba citata ex eodem referuntur quidem ad Fideles, & Infideles, sed diversimode : nam Infidelibus peccata remittuntur per regenerationem, utpote non adhuc Ecclesiæ, ac Christo genitis : Fidelibus per absolutionem, eo quia Ecclesiæ, Christi que imperio Baptismate affecti subduntur.

338. Obji. II. Deus solus potest remittere, ac de factò remittit peccata, Lucæ 5. 21. ergò non remittuntur in Sacramento Pœnitentiæ : si enim verè remitterentur, Petrus Act. 8. 22. Simonem Magum ad simplicem Pœnitentiam non remisisset, uti remisit Judæos noviter conversos Act. 2. 38., nec sub incerto veniam fuisset pollicitus, quod tamen falsum est, subditur enim ibi : *Et roga Deum, si fortè remittatur tibi hæc cogitatio cordis tui* ; ergò peccata in Pœnitentia Catholicorum minimè virtute ejusdem remittuntur, adeoque non est Sacramentum.

339. Resp. dist. ant., ut Causa principalis ;

lis; conc. ant., ministerialis, & instrumentalis; ne. ant., & eodem pacto dist. conseq. sicut enim peccata remittere nisi solus Deus potest, ita Gratiā quoque in Anima producere: sicuti ergo per ministerium Sacerdotum in Baptismo peccata per modum regenerationis remittuntur, cur in Pœnitentia remitti non possunt per modum Absolutionis; & hoc pacto Gratia causari? Idcirco autem Petrus Simonem Magum, ut veniam peccati obtineret, ad Pœnitentiam simpliciter remisit, nulla Sacramenti facta mentione; tum quia requirebatur Pœnitentia virtus pro dispositione ad ipsum Sacramentum, sicuti in adultis requiritur ad Baptismum, ex A&loc. cit.: tum quia hortando ad Pœnitentiam, Sacramentum quoque includebat, quod de Pœnitentia Baptismum præcedente nequit intelligi, qui janua Sacramentorum est: nec Petrus de veniæ impetratione, si verè pœnituisset Simon, ullo pacto dubitavit, sed solummodo de pœnæ integræ, quam certè magnam merebatur, condonatione, cum etiam nunc Simoniaci ab Ecclesia gravissimè puniantur.

340. Obji. III. In Sacris Literis non legitur hujus Sacramenti usus, sive in Apostolis, sive in aliis activè, aut passivè: aliunde autem videtur superfluum, cum perfecta Contritio ex seipsa justificet in Lege Evangelica, juxta Trident. sess. 6.; imò gravamen magnum addit: nam ultra Contritionem externè ostensam, requirit quoque criminum suorum revelationem; ut à Sacerdotibus dimittantur: non est autem dicendum, Legem Christi Mosaycā esse duriorē; ergo Pœnitentia Christiana non est Novæ Legis Sacramentum.

341. Resp. posset ad prim. object. part. ne. con.

conseq. cum non omnia Apostolorum, & antiquiorum Christi Discipulorum gesta scripto, sed Traditione habeamus, uti alia Fidei Christianæ, ob eandem rationem, Dogmata credimus: In primitiva autem Ecclesia fuisse usum Pœnitentiæ Sacramenti, docet nos Tertullian. Lib. de Pœniten. cap. 8. ubi Exomologesis, idest Confessionis Sacramentalis, uti rei usitatissimæ mentionem facit. Iren. qui primo post Apostolorum obitum floruit sæculo, Cerdonem Hæresiarcham commemorans. Cyprianus Mart. tertii sæculi Author Doctissimus serm. 5. de Lapsis. Diony. Areop. Apostolorum Discipulus Epist. 8. ubi reprehenditur Oemophilus, quod Sacerdotem quemdam pœnitentem, qui ad Confessarium accesserat, contumeliis, calceque repulerat.

342. Cæterum ant. falsum est: quid enim clarius dici potest, quam illud Act. Apost. 19. 18. *Multiq̃ue credentium veniebant consistentes, & annunciantes actus suos: multi autem ex eis, qui fuerant curiosa sectati, contulerunt libros. & combusserunt coram omnibus.* Hinc Joan. Apost. epist. 1. cap. 1. 9. omnes ad hujusmodi Pœnitentiã hortatur: nam, cum dixisset. v. 8. *Sanguis Jesu Christi emundat nos ab omni peccato,* subdit, *si confiteamur peccata nostra, fidelis est, & justus, ut remittat nobis peccata nostra, & emundet nos ab omni iniquitate.*

343. Ad secundum negatur, Sacramentum Pœnitentiæ superfluere: quamvis enim, Contritio perfecta cum voto Sacramenti justificet etiam in Lege nova; attamen uberiores effectus cum Sacramento conjuncta producit, quam ab ipso disjuncta: nam uberiores tribuit Gratiã. II. Fortiora præbet ad præcavenda in posterum peccata Gratiæ præsidia. III. Major
pars

pars poenae temporalis relaxatur. IV. Janua-
Caeli aperitur, cujus Pœnitentibus ingressus
patet: quæ omnia profecto in Veteri Testamen-
to minimè habebantur: quo circa Pœnitentiæ
Sacramentum etiam in hac hypothefi dici ne-
quit superfluum, & gravatorium.

344. Cæterùm Contritionem perfectam ex
Dei super omnia propter fe dilecti amore pro-
fectam ad ritè Sacramentum Pœnitentiæ reci-
piendum minimè effe necessariam, sed Attritio-
nem ex metu gehennæ, turpitudine peccati,
vitæ æternæ amiffionis pavore, Divinoque au-
xilio præeunte, conceptam fufficere, commu-
nior cenfet fententia, quam haud obfcurè in-
dicat Triden. fefs. 14. cap. 4. aliisque ex locis
Scripturæ, Patrumque colligitur, & doctiffimè
Fraffen noster tom. 4. Scot. Academ. Trac. 1.
Disp. 2. Art. 3. fec. 1. Quæft. 3. concl. 3. propu-
gnat: & propterea patet, quid Pœnitentiæ Sa-
cramentum efficiat: Gratiam quippe tribuit ju-
ftificantem etiam abfque Contritione perfecta,
quam fanè Pœnitentia veteris Legis nequaquam
tribuebat, & Legem Evangelicam non durio-
rem effe Mofaycâ, fed longè fuaviorem, cum
Pœnitentiam habeat ex opere operato abfque
Contritione verè juftificantem, quo remedio
carebat antiqua.

345. Obji. IV. Sacramentum ex Floren. in
Inftroc. Armen. rebus tanquam materiâ, ver-
bis tanquam formâ, utpote compositum arti-
ficiale-morale, conftare debet: Pœnitentia au-
tem non conftat nifi verbis: tumquia res, quam
continet velut materiam, non eft fenfibilis,
nempe Contritio, quæ à Confessione contradi-
ftinguitur, veluti altera materiæ parte; ergo
non eft Sacramentum.

346. Resp. conc. maj., & ne. min. ad pro-
batio-

bationem dico, in Pœnitentia non adesse mera verba, cum præter criminum Confessionem adsint lacrymæ ploratûs, pectoris tunctiones, interni testes doloris: cæterum etiamsi pura adessent verba, non proinde matèria deesset, nempe ipsa peccata dolenti animo expressa, quæ verbis absolutionis, veluti formæ, materiam præbent; & hoc hujus Sacramenti proprium est, quod, cum per modum Judicis fiat, utique per verbum, & Judicis absolutionis, aut damnantis fieri debet, quodquidem omni Forensi Judicio commune videmus in verbis consistente.

347. Qua ratione solvitur quoque, quod subditur in objectione: Contritio enim non fit per Confessionem sensibilis, sed per signa sua propria, nempe fletus, ululatus, pectoris tunctionem, & alia hujusmodi.

348. Obji. Ult. Sacramentum Pœnitentiæ neque physicè, neque moraliter existit, quando dicitur à Catholicis Gratia causari; ergo non est verum Sacramentum. Conseq. patet: nam causa, dum fit effectus, existere debet in eo genere, in quo causat; quod enim non est, nihil causare potest. Ant. autem patet: nam Contritio, Confessio, & Satisfactio successive fiunt, & interdum contingit, multum temporis distare inter unam, & alteram, ut evenit, quando per aliquot dies absolutio differtur, & satisfactio interdum etiam ad menses protrahitur; ergo nec physicè, nec moraliter existunt partes Pœnitentiæ, quando Gratia supponitur conferri; ergo &c.

349. Resp. ne. ant., ad cujus probat. dico, partes omnes Pœnitentiæ moraliter, cum Gratia confertur, existere, licet non physicè: hoc enim petit natura Fori Judicialis, ad cujus normam

nam Pœnitentiæ Sacramentum institutum est; quocirca, etsi aliquot diebus absolutio Sacerdotalis differatur impendi, adhuc moraliter, cum actibus antecedentibus Confessionis, & Contritionis unitur, & compositum efficit morale, quod Gratiæ deinde infusio consequitur cum cæteris donis annexis. Satisfactio quoque existit, dum Gratia confertur; non quidem in executione, quandoquidem ipsamet absoluteone debet esse posterior. ~~aliquando~~ ~~infusio~~ Claves non imponeretur, sed in Pœnitentis acceptatione, quæ profecto absolutionem præcedit, & proinde ejusdem Pœnitentiæ pars dici potest sive integralis, sive essentialis.

ARTICULUS QUINTUS

Quæstia nonnulla resolvuntur.

350. **Q**UÆRES I. Quosnam effectus causet in Anima rectè disposita Pœnitentiæ Sacramentum?

351. Resp. Hæc sequentia citra controversiam causari. I. Gratiæ habitualis infusionem, vel augmentum. II. Peccatorum quoad reatum culpæ dimissionem, & commutationem pœnæ de æterna in temporalem. III. Diminutionem quoque pœnæ temporalis juxta dispositionis antecedentis mensuram. IV. Reviviscentiam meritorum, quæ per læthale peccatum erant mortificata. V. Auxilia ad præcavenda posterum peccata. VI. Jus ad vitam æternam ob merita Christi, quod quidem peccando fuerat amissum. VII. Indomitæ passionum, ac effervescentium Animi motuum compressio-
nem, atque mitigationem: hinc videmus huic Sacramento frequentem, dignamque navantes
ope-

operam, nedum à læthalibus abstinere, verum etiam in graviora rarò labi venialia.

352. *Quæres II. Quantus, & qualis dolor ad Pœnitentiæ fructuosam receptionem requiratur?*

353. *Resp.* Dolorem, non quidem sensitivum, sed rationalem, duplicem esse, intensivum scilicet, & appretiativum. Appretiativus est, qui majus malum censet Dei offensam, quam quodcumque aliud malum, quod libenti animo eligeret, potiùs mori, quam ulteriùs Deum offendere paratus. Intensivus, seu Gradualis est, quo de objectis nobis molestis plus, vel minus amaritudinis sumimus juxta eorum varietatem, ita ut in eo genere major, vel minor datur excessus, qui tamen minimè sufficeret ut talis est, ad præponendum incommodum, quod experimur, quibuscumque aliis malis, nisi talis esset appretiativè, ac in substantia sua.

Dicendum est igitur, requiri quidem ad Pœnitentiæ dolorem appretiativè summum, non tamen gradualiter.

354. Prima pars patet: nam talis dolor ad Pœnitentiæ requiritur, ut quibuscumque Deus præferatur, ita ut voluntas quodcumque aliud malum eligere parata sit, quam peccatum: cum enim Deus sit ultimus finis, & summum Bonum, & propterea super omnia diligendus, ejus jactura per peccatum plus æstimari debet, quam cujuscunque alterius rei ordinis inferioris; adeoque peccatum, hujus damni causa, majorem meretur detestationem appretiativè, quam cujuscunque alterius generis incommodum. Et ita sentiunt communiter Theologi.

355. Se-

355. Secunda quoque pars suadetur : nam ad sufficientem Pœnitentiæ dispositionem sufficit ille dolor , quo fit vera ad Deum conversio , excluditurque penitus voluntas peccandi , ex Triden. sess. 14. cap. 3. Doloꝛe autem summè appretiativo , non tamen intensivè summo , fit vera ad Deum conversio , excluditurque penitus omnis voluntas peccandi : supponitur quippe prælatio detestationis , ac fugæ cujuscunque peccati , quibuscunque incommodis , quæ occurrere possent ; ergò sufficit dolor appretiativè summus , etsi non summus intensivè , uti ad præceptum charitatis servandum non requiri summam intensionem , docet Angelicus Doct. 2.2. quæst. 44. art. 4. & 5. Seraph. Bonavent. 4. distin. 16. art. 2. quæst. 1. Subtilis 3. dist. 27. quæst. unic. Tumquia Ecclesia hujusmodi summum intensivè dolorem minimè exigit profecto difficillimum , & propterea in Maria Magdalena à Deo commendatum : tumquia uti amorem Dei , ita dolorem quoque de peccatis etiam in Viris Sanctis animadvertimus inæqualem , & propterea Joan. 14. 2. dicitur : *In Domo Patris mei mansiones multe sunt* : tumquia peccata inter se in gravitate differunt , nisi velimus cum Joviniano desipere ; ergò dolor etsi appretiativè æqualis , intensivè inæqualis esse potest , juxta diversa eorum turpitudinem , quam propterea Ecclesia diversitate quoque pœnarum , quas ad Sacramentum accedentibus imponit , optimè dignoscit ; igitur dolor ad veram Pœnitentiam requisitus non est necessariò summus intensivè , sed sufficit appretiativè . Legantur Bellar. to. 3. controvers. lib. 2. cap. 11. Brancat. nost. de Pœnit. disp. 7. art. 9. & disput. 8. art. 6. , ubi ex veteribus Scholasticis Thesis nostram firmat.

356. Quæres III. An propositum amplius
non

non peccandi necessariò requiratur, & quidem explicitè, non verò implicitè solummodo, & quatenus virtualiter in contritione præcontinetur?

357. Resp. ad utrumque affirmativè; & quidem prima pars asserti, quam definiunt Floren. in-Instruc. Armen., & Triden. sess. 14. cap. 4. patet; nam intelligi nequit conversio, & nova vita, ac detestatio antiquæ, quæ à Scripturis exiguntur, absque firmissima voluntate non amplius peccandi: in his autem consistit propositum, quod à tempore futuro pendet, Legis implendæ, quod quidem etiam Hæretici Occidentales confitentur Hostes Pœnitentiæ dicentes cum Luthero: *Optima Pœnitentia, nova vita.*

358. Secunda pars asserti, quam plures Theologi tenent à Mastrio nostro cit. tom. 4. Disp. 5. art. 2., evincitur ex Trident. sess. 6. cap. 5. & 4. cap. 14. ubi præter cæteras dispositiones, quæ ibi enumerantur, exigitur novæ vitæ propositum; ergò explicitè requiritur, alioquin frustra adderetur, si sufficeret quatenus præcontentum; sicut frustra poneretur Votum Confessionis suo tempore habendæ, si ejusdem præcontinentia in Contritione vel charitate sufficeret, quod tamen falsum est ex eodem Trident. sess. 14. cap. 4.: & ratio est clara: nam Pœnitentia est odium peccati nedum præteriti, sed etiam futuri: odium autem peccati futuri non potest intelligi absque proposito firmo explicitè non amplius illud committendi. Et sanè ridiculum est, propositum formale, & explicitum ad emendationem magis efficax minimè fuisse præscriptum, benè verò virtuale, & implicitum, tantâ nequaquam profectò pollens virtute.

359. Quæres IV. An ad veram Pœnitentiam requirantur tot distincti dolores, quot sunt peccata, vel sufficiat unus pro omnibus distinctis peccatis?

360. Resp. non esse necessarios tot actus doloris, quot sunt peccata, sed unum sufficere, omnia respicientem. Ratio est, quia hujusmodi necessitas neque ex Sacris Literis, neque ex Conciliis, & Ecclesiæ Doctrina eruitur, neque firmâ ratione fulcitur: Scripturæ enim, cum Pœnitentiæ meminerunt, plures actus minimè præscribunt, sed unum; Psal. enim 105.6. habetur: *Peccavimus cum Patribus nostris, injustè egimus, iniquitatem fecimus*; item Psal. 50. 11. *Averte faciem tuam à peccatis meis, & omnes iniquitates meas dele*. Psal. 24. *Delicta juventutis meæ, & ignorantias meas ne memineris*. Floren. autem loc. cit. dolorem solummodo commemorat peccatorum, minimè verò actus distinctos omnia singillatim respicientes.

361. Ratio autem est, quia motivum odii habendi peccata, quatenus objectum Pœnitentiæ, idem in omnibus est, nempe quia Deo displicent summo bono, æternam Beatitudinem, avellunt, perpetuamque inducunt damnationem; ergò sicuti eodem actu Fidei omnia ejusdem objecta materialia respiciuntur, quia objectum formale in omnibus idem est, nempe Divina veracitas, ita, quia in omnibus peccatis idem est motivum detestationis, actus multiplicari nequaquam debent ad multitudinem Peccatorum. Itaque peccata omnia in particulari ad memoriam quidem revocanda sunt, ut Clavis in Confessione Sacramentali subdantur: pro concipiendo tamen verò de ipsis dolore ad Sacramentum necessario, sufficit in confuso ad memoriam revocare, ipsaque ob motiva superius

rius expressa ex corde detestari, firmumque propositum elicere non amplius eadem committendi.

362. *Quæres Ult. Quid sit Pœnitentia privata, publica, & solemnis, de quibus ita frequenter antiqui Canones sermonem instituunt?*

363. *Resp.* Pœnitentiam privatam eam esse, in qua peccata occulta, & secreta, vel publica secretò Sacerdoti deteguntur, à quo publicæ nequaquam exponuntur notitiæ, nec satisfactio imponitur coram Ecclesia peragenda; vel si publicè, non ita fieri debet, ut ex ea qualitas criminis innotescat. Pœnitentia publica est illa, in qua crimina enormia, & coram aliis patrata apud Ecclesiam publicè aperiuntur, & publica quoque satisfactio peragitur: quo pacto graviores culpæ in Monasteriis strictioris disciplinæ corrigi solent. Pœnitentia solemnis publicitati multa superaddit: nam publica pro quibuscumque publicis criminibus imponebatur; solemnis verò pro gravissimis tantum, & enormioribus criminibus solebat imponi, scandalum in Populum ingerentibus.

364. *Secundò* Pœnitentia publica repeti poterat, solemnis verò unica tantum vice præscribi consueverat, eo quia esset publica confessio non amplius ad priora crimina redeundi, in quæ si relabi Pœnitentem contigisset, aliis pœnis plectebatur, quas recenset Siricius Papa *Epist. 1. cap. 5.* *Tertiò* Pœnitentia publica Sacerdotibus quoque imponi poterat *dist. 81. cap. Presbyter*, non autem solemnis, & propterea eadem affecti ad Clerum erant inhabiles, ex *Innoc. I. Epist. 6.* *Quartò* Pœnitentia solemnis imponi Conjugatis nequaquam poterat sine mutuo consensu, ex *Arelat. II. cap. 22.* cum Pœ-

nitentibus officium conjugale foret interdictum; innuptis verò Matrimonium contrahere permittebatur, ex Tolet. VI. cap. 8. ob carnis fragilitatem. Quinto Pœnitentia solemnns ab Episcopis tantum præscribcbatur, & fieri reconciliatio, & pax Ecclesiæ impertiri: non solemnns verò à Presbyteris quoque tribui consueverat, ex Carthag. III. Can. 31., & 32.

365. Ritus hujusmodi Pœnitentiæ erat. I. Pœnitentes nigra veste, ac cilicio induebantur. II. Caput cinere conspergebant & tondcbantur, præter scēminas, quæ illud velabant; ex Agat. cap. 13.; singulis jejunii diebus ad Ecclesiam veniebant, capita Sacerdotibus submittebant manum imponentibus. III. Diebus Dominicis, & tempore Paschali cæteris Fidelibus in Ecclesia stantibus, ipsi genua flectebant.

366. Hujusmodi Ritus graves pœnæ comitabantur. I. Enim Pœnitentes ab Eucharistia abstinebant, ex Cypriano de Lapsis. II. Ad Clerum promoveri non poterant, ex Siricio epist. 1. III. à Nuptiis præter adolescentes arcebantur, ex Leone Epist. 19. cap. 14. IV. Ad militiam, sæcularem non admittebantur, ex eodem. V. Unctione Infirmorum carebant, ex Innoc. I. ad Decen. cap. 8. nec in Baptismo, aut Confirmatione susceptores esse poterant, ex Parisien. cap. ult. VI. Mortuos sepeliebant, ex Chartag. IV. cap. 81. & à conviviis, balneis etsi invitati abstinentes, jejuniis, & orationibus in cinere, & cilicio vacare jubebantur, ex Tertul. lib. de Pœnit.

367. In Ecclesia quoque diversus erat locus juxta varium Pœnitentium statum plus, vel minus ab Altari remoti, quo proximiores erant Absolutioni, & Classes distinguebantur Flentium, Audientium, Prostratorum, Stantium.

Quæ

Quæ quidem disciplina pluribus sæculis viguit! at in Concilio Nicæno I. temperata est, & sequentibus sæculis adhuc mitior effecta, ne nimius rigor medicinæ exasperaret vulnera Infirmorum, potiusquam sanaret.

SECTIO SECUNDA

Utrum Confessio explicita Peccatorum omnium sit ad Pœnitentiæ Sacramentum necessaria?

368. **J**acobitis Pœnitentiæ Sacramentum non adeo displiceret, si peccata tantum in genere, vel leviora, aut omis-
sis circumstantiis speciem mutantibus, vel nimium aggravantibus, aperire Sacerdotibus oporteret: at nolunt audire, requiri omnium peccatorum, quæcumque post diligens examen memoriæ occurrunt, detestationem apud Sacerdotem esse necessariam. Videndum est an Pœnitentiæ Sacramentum hujusmodi exigit Confessionem?

ARTICULUS PRIMUS

Dicendum est, ad Pœnitentiæ Sacramentum rite conficiendum, omnium prorsus peccatorum, latbalium, quæ memoriæ occurrunt, ac circumstantiarum specie diversarum Confessionem esse necessariam.

369. **P**Rob. breviter ex Scriptura: Christus Dominus non dimittit peccata Homi-
nibus, nisi per Apostolorum, & eorum, qui eisdem succedunt, Sacerdotum ministerium in Pœnitentiæ Sacramento: Matth. 18. 18.
Quaecumque alligaveritis super terram, erunt li-

gata & in Cælis ! & quæcumque solveritis super terram erunt soluta & in Cælis . Et Joan. 20. 22. Accipite Spiritum Sanctum : quorum remiseritis peccata remittuntur eis , & quorum retinueritis retenta sunt : at Sacerdotes , & Successores Apostolorum dimittere nequeunt peccata , nisi præmissa à Reis peccatorum omnium , & circumstantiarum saltem speciem mutantium explicita , distinctaque Confessione ; ergò ad veniam obtinendam in Pœnitentiæ Sacramento Confessio hæc criminum omnium , memoriæ occurrentium , atque circumstantiarum specie mutantium omnino est necessaria . Maj. est certa , cum in Evangeliiis nullum aliud medium assignetur pro remissione peccatorum , præter Apostolicam autoritatem , & propterea Tribunal ipsorum non est arbitrium , sed necessario ab iis , qui veniam cupiunt obtinere , conveniendum , & propterea cum eodem agendum , sicut Deus ipse conveniretur : Min. etiam est perspicua : nullus enim est Judex in creatis , qui de Causæ meritis sibi incognitis ferre judicium possit , justamque dicere sententiam : hinc videmus in Foris externis tot institui criminales inquisitiones , Testium examina , Reorumque vellicationes , ut nimirum Judici Causæ merita plenè innotescant , atque justam inde ferre sententiam possit ; ergò , cum in Foro Pœnitentiali , in quo ministerialiter Sacerdos Judex sedet Dei locum tenens , Causæ merita , idest peccata manifestari nequeant , nisi Peccator ipse revelet , sequitur apertissimè ad salutarem eorum indulgentiam obtinendam omnia ea fateri oportere , cum omnibus circumstantiis , quæ ad illorum sufficientem cognitionem aliquo pacto possunt conducere .

ARTICULUS SECUNDUS

Idipsum ex Patribus ostenditur.

370. **B** Aglius Magn. Quæst. Brevior. Inter.
288. *Necessarium*, inquit, *iis peccata*
aperiri debent, quibus credita est dispensa-
tio Myſteriorum Dei. Siquidem rationem hanc
in Pœnitentia etiam veteri illos cernimus ſecu-
tos fuiſſe, quando in Evangelio ſcriptum eſt,
quod Joanni confitebantur peccata ſua, & in
Actis Apoſtolicis ipſis, à quibus etiam baptiza-
bantur cuncti: Cyril. Jerofol. Chatec. 1. Tem-
pus præſens eſt tempus Confefſionis. Conſitere,
quæ perpetravi ſive verbo, ſive opere, ſive
noctu, ſive interdium. Conſitere tempore accepta-
bili, & in die ſalutis. Niſſen. Peccatricem,
quamdam adhortans: Audacter, inquit, oſten-
de Sacerdoti, quæ ſunt recondita, Animi arca-
na, tamquam occulta vulnera Medico detege;
ipſe & bonoris, & valetudinis tuæ rationem
habebit. Chryſoſt. Hom. 33. in Joan. Vos au-
tem hortor, dilectiſſimi, ut eſi nemo opera noſtra
videat, ſinguli ſuam conſcientiam ingredian-
tur, & Judicem ſibi rationem conſtituant, er-
rata ſua in medium adducant, niſi velint in
die illa horrenda Univerſo Orbi manifeſtè ea pa-
tere: ſanentur jam vulnera, ſumatur Pœniten-
tia medicina. Alias plures authoritates, tum
ex Græcis, tum ex Latinis Patribus hauſtas,
& quidem luculentiffimas, qui videre cupit,
adeat Jodoc. Cocc. tom. 2. Theſaur. Cath.
art. 3. & 4. Bellarm. tom. 3. Controver. lib. 4.
cap. 6. ergo ex Patribus ad Sacramentum Pœ-
nitentiæ omnium Peccatorum Confefſio neces-
faria eſt.

ARTICULUS TERTIUS

Idipsum autoritate Ecclesie evincitur .

371. **L** Aodicenum antiquissimum , anno quippe Christi 320. celebratum sub Silvestro Papa , ut rectè probat Bail Sum. Concil. tom. 2. sæcul. 4. assertum nostrum firmat Can. quippe 2. sic habet : *De his , qui diversis facinoribus peccaverunt , & perseverantes in Oratione , Confessione , & Pœnitentia conversionem à malis habuere perfectam , pro qualitate delicti talibus Pœnitentia tempus impensum propter clementiam , & bonitatem Dei communio concedatur : quibus verbis ostenditur , ad perfectam conversionem , nedum Pœnitentiam , requiri , sed etiam Confessionem explicitam omnium peccatorum , juxta quorum mensuram multa est imponenda .*

372. Synodus Trullensis seu Quini-sexta 227. Episcopis confecta sub Justiniano Juniore , tametsi minimè Oecumenica , magnæ tamen , præcipuè apud Orientales , æstimationis Can. 102. apertè statuit . Primò , Sacerdotes in hoc Sacro Tribunali Judices esse . Secundò , non dari extra illud Peccatori salutem , per quod medicamina apponuntur . Tertiò , recessus omnes , & latibula conscientie ad misericordiam consequendam , aperire oportere . Ex quibus Græci etiam Schismatici semper tenuerunt , ad salubrem Pœnitentie receptionem Confessione explicita Peccatorum omnium opus esse , ut patet ex Nicolao Cabasila in explic. Litur. cap. 29. Anastas. Nicæn. in Quæst. super Script. cap. 64. Sensus ergò Ecclesie Orientalis est , necessariam omnino esse hujusmodi peccatorum

rum omnium coram Sacerdote Confessionem .

373. Florentinum denique , cui Jacobitæ , Armeni , aliæque Orientales Nationes assensum præbuerunt , ex Eugen. IV. Constit. *Cantate Domino* , in Decret. Union. ità se habet : *Quartum Sacramentum est Pœnitentia , cujus quasi materia sunt actus Pœnitentis , qui in tres distinguuntur partes , quarum prima est Cordis Contritio , ad quam pertinet , ut doleat de peccato commisso , cum proposito non peccandi de cætero . Secunda est Oris Confessio , ad quam pertinet , ut Peccator omnia peccata , quorum memoriam habet , suo Sacerdoti confiteatur integraliter . Tertia &c.* Deindè subdit : *Minister hujus Sacramenti est Sacerdos habens auctoritatem absolvendi vel Ordinariam , vel ex Commissionem .* Ex quibus apertè convincitur nedum Sacerdotes esse Judices in hoc Foro constitutos , verum etiam Confessionem Oris , & quidem omnium saltem gravium peccatorum , quibus Peccator gravatur , esse intrinsecè necessariam : dicitur autem Confessio *quasi materia* , non quod revera non sit reipsa talis , sed quia non est physica pars , sed moralis Sacramenti Pœnitentiæ .

ARTICULUS QUARTUS

Adducuntur nonnullæ Rationes .

374. I. **P**eccator , dum male agit , odit lucem , & idèò in reversione ad justitiam lucem quærere debet , qua redarguantur opera ejus mala : hoc autem fit per Confessionem , in qua fit manifestatio veritatis ; ergo &c.

375. II. Sacerdos loco Christi Medicus est

Animarum, & propterea Christus, cum Leprosos sanasset, illis dixit Luc. 17. 14. *Ite, offendite vos Sacerdotibus*, qui ejusdem Ministros in Novo Testamento præfigurabant: Medico autem vulnera omnia, languoresque ab ægro ostenduntur: quod enim ignorat medicina non curat, teste Trident. sess. 14. cap. 5. ergo etiam Sacerdoti omnia peccata.

376. III. Erubescencia, qua quis Homini peccata sua detegit, nedum poena est peccati præteriti (hinc Præsules antiqui publicam Peccatorum Confessionem interdum imponebant, veluti partem satisfactionis Deo debitæ) sed medicina maxima futuri, cujus pavore Homines difficilius in peccata labuntur, eorumque veniam pudore illo, quo suffunduntur, facilius impetrant.

377. IV. Quia tranquillitas magna inducitur conscientiarum: nam peccata Clavibus Ecclesiæ prout oportet, subjiciendo, certitudo moralis inducitur veniæ obtentæ, quæ non obtinetur per actum Contritionis, quo peccata apud Deum reipsa delentur, cum difficillimum sit illum elicere, ac incertissimum, an sicuti oportet, revera elicitus sit; ergo Confessio peccatorum omnium in Sacramento Pœnitentiæ omninò necessaria est.

ARTICULUS QUINTUS

Solvuntur Objecta.

378. **O** Bji. I. Peccata venialia materia sunt Sacramenti Pœnitentiæ, quæ tamen omnia, vel singula non tenentur Peccatores in Sacramentali Confessione aperire: ergo &c. Tum quia dimissio peccatorum, quæ asseritur tri-

tribui, Joan. 20. 22. illa est, quæ promittitur, Matth. 18. 18. cum alius locus assignari non possit, in quo promittatur, & tribuatur: at Matth. 18. 18. non promittitur venia peccatis solum Sacerdoti in secreta Confessione, sponteque revelatis, sed solummodo in Foro externo publicè propositis; ergò ex Joan. 20. 22. non tribuitur potestas remittendi peccata, nisi in Foro externo; & propterea præscribitur corrigenti proximum, & non proficienti, *Dic Ecclesie*, quæ profectò non judicat, nisi de externis.

379. Resp. breviter, neg. consequ. In tantum enim non tenemur venialia in Sacramento detegere, quia non sunt ejusdem necessaria materia; læthalia verò, quia amicitiam cum Deo, quæcumque illa sint, dissolvunt, & Reos faciunt æternæ damnationis, illa omnia, & singula, ut Sacramentum ritè conficiatur, aperire necesse est: si tamen etiam venialium Sacramentalem velimus absolutionem obtinere, singula quoque venialia sunt revelanda, quæ Christus idcirco necessariò Clavibus subijci noluit, quia aliis modis dimitti possunt utpote levia, nec Charitatem graviter lædencia.

380. Quod verò subditur, ad rem non facit; tum quia, etsi Scripturis apertè probari non posset, evincitur tamen Verbo tradito, & autoritate Ecclesiæ, cui quoque obtemperare, & cum ea sentire Jacobitæ etiam, & Armeni, si Christifideles esse velint, ut reipsa profitentur, utique tenentur, & de facto in Florentino professi sunt ejusdem decreta libenti animo amplectentes: tum quia, quamvis in utroque loco sermo fiat de Foro externo, quando peccata publicè corriguntur, & ex illis Ecclesiæ potestas correctiva elicitur, hoc tamen minimè favet Adversariis; nam, etsi asseratur publica

potestas peccata puniendi, quoties publicè Ecclesiæ deferuntur, vel ea dimittendi, si eidem placuerit, non tamen excluditur Apostolica authoritas dimittendi peccata, quæ spontè Apostolis aperiuntur; & propterea dicitur absolutè Mat. 18. 18. *Quaecumque ligaveritis &c.*

381. Si autem Joan. 20. 23. de dimissione Sacramentali fiat sermo, tunc dico, per verba illa, *Quaecumque ligaveritis*, Matth. 18. huiusmodi potestatem promissam, esse datam, Joan. 20. 23. cum ait: *Quorum remiseritis peccata &c.*

382. Nec repugnat eisdem verbis duplicem significari potestatem, si utraque explicetur collata, ut fit Joan. 20. ubi cum Christus dixit Apostolis: *Sicut misit me Pater, & Ego mitto vos*, illis verbis contulit potestatem in Foro externo, significatam per illa Matth. 18. *Quaecumque ligaveritis &c.* Cum verò dixit: *Accipite Spiritum Sanctum: quorum remiseritis peccata &c.* contulit potestatem etiam in Foro interno per illa universalissima quoque verba Matth. 18. significatam: *Quaecumque ligaveritis super Terram erunt ligata & in Caelis: & quaecumque solveritis super Terram, erunt soluta & in Caelis*. Quocirca optimè concluditur, sicut in Foro externo, nisi Reus crimen suum fateatur, aut documentis, vel testibus convincatur, damnari, aut absolvi non potest; ita in Foro interno, nisi Reus ipse confiteatur peccata sua, munus dimittendi, vel remittendi peccata à Successoribus Apostolorum nequaquam posse exerceri, quodquidem illud est; quod Catholici de Confessionis necessitate profitentur; adeoque &c.

383. Obji. II. Ex Patribus, qui videntur Confessionem nequaquam uti necessariam ad-
mit-

mittere ! nam Ambros. lib. 10. in Luc. cap. 22. asserit, quod : *Lacrymæ crimen sine offensione verecundiæ consentitur* . Prosper lib. 2. Vit. contemplat. cap. 7. ait : *Quod si ipsi sibi Judices fuerint , & Ultores lacrymis ex vera cordis compunctione fluentibus , restinguent æterni ignis incendia* . Beda lib. 5. in Luc. ad illud : *Ostendite vos Sacerdotibus* , cum dixisset , Hæreses solummodo , Schismata , & Infidelitatem Sacerdoti detegi oportere , subdit : *Cætera verò vitia per se ipsum interius in Conscientia , & intellectu Dominus sanat , & corrigit* . Ex August. lib. Confess. cap. 3. & Cassian. coll. 20. cap. 8. ; ergò ex Patribus Confessio externa peccatorum saltem omnium ad Pœnitentiæ Sacramentum , minimè est necessaria .

384. Resp. neg. ant. Qui autem adducuntur Patres , cum alibi loculentissimè Catholicam Doctrinam tradiderint , in locis allegatis minimè Sacramentalem Pœnitentiæ Confessionem denegasse intelliguntur ; sed de illa sermonem faciunt , quæ aliquando , deficiente Confessarii copia , cum Voto Sacramenti justificat : vel de illa , quæ necessaria fuit , nondum ad Sacramenti culmen erecta ; vel de satisfactoria post ipsummet Sacramentum peragenda ; vel excludunt publicam Confessionem , quæ cum verecundia coram omnibus interdum in Ecclesia fiebat Primitiva , quæ sequentibus sæculis sublata est .

385. Obji. III. Confessio explicita omnium peccatorum non descendit ex Divina Institutione , sed mere humanâ ; ergò non est ad Sacramentum Pœnitentiæ necessaria . Conseq. patet , cum Sacramentum à solo Deo possit institui , adeoque à solo Deo ea institui , quæ ad Sacramenti necessitatem pertinent ; ant. autem patet :

nam Lateran. IV. cap. *Utriusque Sexus*, videtur introducta hujusmodi Confessio; in Cabilon. enim II. cap. 33. asseritur, quosdam dicere, Deo solummodo confiteri oportere, alios verò Sacerdotibus, utrumque tamen utiliter fieri: Confessionem, quæ fit Sacerdotibus, esse secundum Apostolicam institutionem: Confessionem, quæ fit Deo, purgare peccata; quæ verò fit Sacerdoti, docere qualiter ipsa purgentur peccata. Similia dicit Theodorus Cantuariensis Episcopus cap. Final. de Pœnit. Dist. 1. Seraphicus verò Doct. Bonaventura, qui post Lateran. IV. floruit, 4. Dist. 17. Par. 2. in exposit. Textus Magis. Dub. 1. asserit, cum qui ante Lateran. IV. necessitatem Confessionis negasset, non fuisse Hæreticum; ergo Confessio explicita peccatorum non est de substantia Sacramenti Pœnitentiæ, sed mera humana institutio.

386. Resp. neg. ant., ad cujus probat. neconseq. Lateranense enim IV. cap. *Utriusque Sexus*, non instituit Confessionem, cum ejusdem instituta meminerint Sanctus Leo Mag. Epist. 91. ad Theodor. Forojulien. Episcop., & ipso antiquior Innoc. I. Epist. 2. ad Decen. Cyprian. Mart. adhuc antiquior de Lapsis, & antiquissimus Tertullian. qui secundo sæculo floruit, Lib. de Pœnit.; sed institutam determinato tempore fieri præscripsit.

387. Cabilonense Secundum pro nobis facit, dum asserit, Confessionem, quæ fit Sacerdotibus, esse utilem, sicut illam, quæ fit Deo; nam una ab altera non distinguitur, quidquid alii dixerint: nec asserit hujusmodi Confessionem à sola institutione Apostolica prodire, sed Apostolicam esse institutionem, quod utique verum esse potest, etsi Christum habuerit primarium Authorem, cum Apostoli ea, quæ
Chri-

Christus instituit, etiam Decretis suis roboraverint. Dicitur quoque optimè, Confessione, quæ fit Deo, peccata purgari, quia includit Contritionem cum voto Sacramenti, & onere se Ministro Ecclesiæ sistendi, cum opportunitas accesserit, ex Triden. sess. 14. cap. 4. Confessione verò, quæ fit Sacerdoti, dicitur doceri, quomodo purgentur peccata, non quia ipsa revera non purget; sed quia ultra hoc Pœnitens peccata Sacerdoti aperiens, nedum remedia imposterum præcavendi accipit, sed viam Sacerdoti pandit, satisfactionem imponendi, qua peccata quoad reatum quoque pœnæ purgantur, & idcirco in eodem Cabilonen. cap. 34. præscribitur Sacerdotibus, ut juxta Canones, & qualitatem criminum satisfactiones imponant: quo pacto intelligendus est etiam Theodorus.

388. S. Bonaventura ait, non fuisse Hæreticum, qui ante Lateran. IV. Statutum, hujusmodi sententiam tenuisset, non quia non esset de Fide in se; sed quia non erat adhuc de Fide declaratum. Itaque Sanctus Doctor in hoc solo differt ab aliis, quod ipsi censeant, Dogma hoc esse de Fide explicitè, ipse verò censebat esse de Fide implicitè, & Confessionem ex institutione quidem Apostolica prodiiisse, adstitisse tamen Christi mandatum saltem implicitum, & virtuale, cum Sacramentum Pœnitentiæ à Christo institutum per modum Judicii absque Peccatorum Confessione nullo pacto possit intelligi, & propterea nihil favet Adversariis.

389. Obji. IV. Confessio auricularis omnium prorsus Peccatorum Juri naturali contradicit, eo quia infert apud Confessarium sui ipsius infamiam; ergò sicuti repugnat Juri natura-

turali Proximum infamare etiam in secreto, ita ob eandem rationem non licet infamare seipsum; ergo Confessio hujusmodi repugnat Juri naturali, & Charitati, qua nos ipsos, sicuti etiam Proximum, diligere debemus, adeoque Confessio hujusmodi ad Pœnitentiæ Sacramentum minimè est necessaria; maximè quia in perniciem Proximi redundare posset, cum Confessarius peccata sibi in Confessione detecta, publica posset efficere.

390. Resp. neg. ant., ad cujus probat. dico, Confitentem peccata sua Confessario ad veniam eorum obtinendam non infamare seipsum, cum Pœnitentia corrigat, quod iniquè ab eo gestum est, & coram secretissimo Judice peccatum non exprobrante, sed remittente, ac paterno affectu Reum pœnitentem complectente, crimenque sibi revelatum severissimo silentio custodiente. Et profectò, ut optimè Seraaphicus Bonaventura 4. Dist. 17. art. 1. Quæst. 1. ad ultimum, stulta esset verecundia nolentis ulcus suum purulentum, etsi ex scelere profectum, medico ostendere, ne famam amitteret.

391. Permitto autem, quod sicuti absque legitima Causa famam Proximi prodere non licet, ita neque propriam fas est proscindere, ob præceptum Charitatis erga Proximum, & se ipsum: at sicuti ex motivo publici boni, vel etiam privatæ utilitatis Proximi licitum est ejus peccata revelare, tametsi sub naturali secreto cognita, cur non licebit etiam propria ob utilitates adeo magnas ex revelatione in Sacramento Pœnitentiæ redundantes? Hoc timore in Primitiva Ecclesia minimè Fidelesangebantur, qui mittebant, propria crimina Confessario revelata publicè in Ecclesia detegi, ut hujusmodi confusione peccatorum suorum faciliùs

liùs veniam impetrarent : nec reipsa famam amittebant, sed potius humilitatis, & sanctimonie laudem ab omnibus obtinebant.

392. Ultimum, quod objicitur, ponit timorem, ubi timendum non est. Neque enim metuendum est, Confessarium hostem futurum, qui ex odio peccata sibi in Confessione detecta velit revelare; arctis enim adeo vinculis secreti constringitur, ut ne syllabam quidem sub gravissimis pœnis valeat eorum, quæ sibi in Confessione dicta sunt, in publicum prodere : nec si proderet, ullam apud Judices, & Tribunalia fidem inveniret, ut infra videbimus.

ARTICULUS SEXTUS

Nonnulla Quæstiuncula resolvuntur.

393. **Q**UÆRES I. An Confessio Sacramentalis necessario debeat esse secreta?

394. Resp. Negativè; sed posse fieri publicè, si Pœnitens vellet ad majorem suæ humilitatem. Ratio est, quia in Institutione Sacramenti Joan. 20. 23. solummodo sancitum est, peccata Sacerdotibus aperiri oportere, & ab eisdem absolutionem impendi, si necessarias dispositiones in Confitentibus reperiat: hoc autem fieri potest, sive Confessio publica sit, sive secreta, docente Triden. sess. 14. cap. 5. etsi ob humanam fragilitatem publica nequaquam sit in usu.

395. QUÆRES II. An peccata venialia omnia confiteri necesse sit, & circumstantias notabiliter mortale intra eandem speciem aggravantes?

396. Resp. Quantum ad primam partem negativè cum Triden. sess. 14. cap. 5. : cum enim Dei amicitiam minimè solvant, aliisque modis
pos-

possint expiari, nullam inducunt necessitatem illa confitendi, & propterea, quoniam materia sunt voluntaria Confessionis, omitti omnia possunt, aut unum sine altero aperiri: si tamen Confessioni exponantur, eorum verus dolor requiritur, & propositum emendationis, utpote vera Sacramenti materia.

397. Ad secundam partem Quæsti dico, sufficere circumstantias speciem mutantem aperire, ut clarè habetur ex Triden. sess. 14. cap. 5. sufficienter enim Confessarium instruunt de statu Pœnitentis, ut iudicium ferre possit; per hoc tamen non nego tutum, & utile esse aperire, quoque circumstantias notabiliter aggravantes, ut notat Subtilis Doctor in 4. Dist. 17. n. 20. Quod si Confessarius de consuetudine peccandi Reum interpellat illam fateri debet, juxta Decretum Innoc. XI. Proposit. 65. proscrubentis: *Non tenemur Confessario interroganti fateri peccati alicujus consuetudinem.*

398. Quæres III. An peccatum fictionis, quo quis indispositus ad Baptismum accessit, vel ob complacentiam ante commissi, vel ob aliud commissum in ipsomet actu recipiendi Baptismum, in Confessione sit aperiendum?

399. Resp. affirmativè cum D. August. lib. de Baptis. Parvul. cap. 12. tom. 7. & Scholastici consentiunt. D. Thom. 3. Parte Quæst. 69. art. 10. D. Bonav. 4. Dist. 4. Par. 2. Quæst. 3. Subtilis ibidem Quæst. 5. Summa enim injuria Deo fit, & ipsimet Sacramento, reddendo illud infructuosum: & propterea peccatum expiari non potest, nisi alio Sacramento laborioso, nempe Pœnitentiæ. Si verò ignoretur, an fictio in ipso Sacramento acciderit, vel ante, ne salus æterna discrimini exponatur, Sacramentali Pœnitentiæ Foro fictio hæc est exponenda.

nenda. Ita Brancatus noster de Pœnit. Disp. 12. art. 3.

400. *Quæres IV.* An peccata dubia, & Complices, sine quorum expressione peccati species declarari non potest, sint in Confessione aperienda?

401. *Resp.* dubitantem, se aliquod peccatum commisisse, aut esse veniale, vel mortale, aut illud se fuisse confessum, necne, teneri illud Sacerdoti confiteri: quia, nisi confiteretur, exponeret se periculo invaliditatis Sacramenti, circa cujus valorem, tutiori parti ad hærendum est, juxta declarationem Innoc. XI. in proscript. Propos. Si tamen superveniat certitudo de peccato commisso, hanc circumstantiam in subsequenti Confessione minimè opus est aperire, supposito tamen, quod tota actio peccaminosa manifestata sit Confessario, ut in se deliberatè facta est; cum tunc peccatum Ecclesiæ Clavibus jam fuerit subiectum, & Confessarius munere suo functus, nec peccatum ob majorem certitudinem speciem mutaverit; sicut absolutus ad cautelam à censuris; adveniente certitudine, nequaquam denuò absolvitur.

402. Quantum verò ad Complices attinet, præseindendo à discrimine sigilli fractionis, aut vitæ amittendæ, vel alterius gravis detrimenti, dicendum est, revelari debere. Nam ex Trident. sess. 14. cap. 5. circumstantiæ Judicium Confessarii, speciemque mutantem aperiendæ sunt: circumstantia autem Complicis interdum judicium Confessarii, speciemque peccati variare potest, ut si Sacerdos cum Muliere consanguinea rem haberet, adderet quippè fornicationi incestus, ac sacrilegii malitiam; igitur hæc circumstantia necessario aperienda est: Complex verò sibi debet imputare, quod famam
apud

apud Confessarium amittat? non enim Pœnitens plus famam Proximi, quam suam amare debet; ergo sicut teneor peccatum proprium aperire, etsi apud Confessarium famam amittam; ita teneor etiam prodere crimen Complicis, etsi fama ejus apud Confessarium pereat.

403. *Quæres V.* An mala ex peccato procedunt in Confessione aperienda sint?

404. *Resp.* Quoties hæc prævideantur, aut prævideri debuerint, in Confessione aperiri oportere. Ratio est, quia hujusmodi mala ex prævisione sunt volita, ac proinde peccata, etiamsi minimè sequantur in effectu; si verò reipsa sequantur, & qui peccavit in causa, posset ea mala impedire, exprimi debent in alia Confessione, eo quia fuerunt in causa voluntaria, cum malitiam aliquam addant in executione, quam non habuerunt pure prævisa, sicut opus bonum in executione aliquid addit eidem à voluntate mere concupitum. Ita Suarez de Pœnit. Disp. 12. art. 6.

405. *Quæres VI.* An habens reservata, nec potens ad Superiorem reservantem accedere, dum urget Confessionis necessitas, Sacerdoti non habenti facultatem, nedum non reservata, sed etiam reservata aperire debeat, Superiori verò tantum reservata?

406. *Resp.* Utique omnia aperiri oportere, si Uterque velit audire. Hoc enim Sacramentale postulat Judicium. At consultius esset, à Superiore reservante, auferri reservationem, & Pœnitentem ad Confessarium suum, cui non reservata fuere detecta, pro plena omnium absolutione remitti; hoc enim pacto integritas Sacramentalis minimè violatur, & unicum salvatur Sacramentale Judicium.

S E C T I O T E R T I A

An consuetudo Græcorum Acatholicorum exigendi ab Ordinandis attestationem Confessarii de idoneitate circa mores , ut vigore ejusdem repellantur , vel admittantur , suscipi valcat ?

407. **G**Ræci moderni Acatholici neminem ad Sacros Ordines admittunt, nisi attestatum Confessarii produxerit, initiandum nullo crimine, aut impedimento sibi in Confessione detecto à Sacra Ordinatione retardari: imo Photiani Episcopi oretenus Confessarios interrogant, & ad responsionem affirmativam, vel negativam compellunt, an Ordinandum dignum censeant promoveri, vel indignum. Ita ex Margun., Critop., Malaxo, Aliisque, sectariis Græcis recentioribus refert Nicolaus Papadop. Græcus Catholicus ex modernis doctissimus, in Prænot. Mystag. resp. 6. sec. 8. & 9. etsi asserat, non deesse ex Photianis, qui morem hunc detestentur.

408. Notandum autem est, duobus modis hujusmodi testificationem fieri posse: uno modo positivè; asserendo nimirum, initiandum esse dignum, vel indignum. II. negativè, negando scilicet dare testificationem sive scripto, sive verbo.

409. Notandum est insuper, nedum Latinos, sed etiam Græcos in hoc convenire, ut sigillum Sacramentale rigidè custodiatur, quod quidem ex jure Græco luculenter Papadop. evincit, Græcisque Doctoribus: sed in hoc difficultatem sitam esse, utrum in casu isto particulari liceat, adsitque fractio sigilli?

A R-

ARTICULUS PRIMUS

Dicendum est I. Consuetudinem Græcorum Acatolicorum Antistitum Confessarios interrogandi ut testes de qualitate Ordinandorum, minimè posse sustineri uspotè illicitam.

410. **P** Rob. I. breviter: illicitum est Judici interrogare, ac compellere ad responsionem alieni Fori, qua talis est, subditum; est quippe ejusdem invadere jurisdictionem: Episcopus autem interrogans Confessarium, quâ talis est, de qualitate Ordinandorum, cum negotium agat regiminis, Forique externi, eo pacto, quo de validitate censuræ, de Matrimonii impedimentis, de electionum qualitatibus inquirat, & in quo tunc iudicium agit, compellit ad responsionem subditum alieni Fori, uti firmant Bald. in 2. Archigeron. C. de Episcopi audientia. Felin. in cap. 1. de Except. Mascard. de Probat. Vol. 1. Conc. 377. n. 1. apud Covarru. de Matrim. Part. 2. cap. 8. n. 10; ergo Episcopus interpellans Confessarium, qua talis est, de qualitate Ordinandorum, interrogat subditum alieni Fori, cujus usurpat jurisdictionem; ergo illicitè agit.

411. II. Judex non potest à Teste percunctari, quæ citra peccatum nequit respondere; ista enim correlativa sunt: at Sacerdos nequit de iis respondere, quæ Confessione exceptit, etiam si à publico Magistratu interrogetur, non enim respondere id potest, quod ignorat, uti tradit Harmenopolus Libel. de Test. cap. 7. Extra verò Sacramentum ignorat ea, quæ sibi in Sacris Confessionibus aperta sunt, in quibus non privatam, sed Christi Personam repræsentans,

tans, audivit, ex Paulo 2. Cor. 5. 21. *Christo legatione fungimur, tamquam Deo exhortante per nos*; adeoque extra Sacramentum verè ignorat sibi in eodem revelata, ut optimè Chrysost. de prodit. Judæ, & fatentur Græci, Corefsius Epist. 3. ad Coridal. melet. Patriar. lib. de sac. myst. tit. de Sac. Pœnit., & posse eum asserere, se ignorare, ex D. Thom. supplem. Quæst. 11. art. 1. ad 1. & 3. concludunt Lugo Disput. 27. de Pœnit. Dian. Par. 5. tit. 11.; ergò sicuti Confessarius nullo pacto prodere, ita nec Episcopus interrogare potest de iis, quæ in Confessione audita sunt.

412. III. Evincitur idipsum ex hoc, quod, admittâ hujusmodi Doctrinâ, frustrabitur omnino finis examinis Episcopalis in ordine ad aptos ordinandos, & indignos repellendos: si enim Confessarius detegere potest impedimenta, criminaque ab Ordinibus arcuentia, improbi majori ex parte Ordinibus initiabuntur, qui Dei timore posthabito, crimina illa, & impedimenta minimè revelabunt; probi verò, etsi leves defectus, & maculas habeant, & rarò in læthalia labantur, ne famæ suæ periculum faciant, ad Sacros Ordines admitti minimè postulabunt; ergò frustrabitur finis Episcopalis examinis eo tendentis ut improbi repellantur, & digniores admittantur, vel saltem haud indigni; & idem continget, si Judices Pœnitentiæ in testes adhibeantur criminales: nemo enim facinora sua pandet Confessario, quem, novit esse testem sibi profectò in judicio criminali nociturum.

413. IV. Idipsum ostenditur: Quia illicitè agit Episcopus adhibendo in examine Episcopali testem nihil probantem, cum inanem, & Iudicram efficiat inquisitionem in re tanti momenti

menti necessariam: Confessarius autem, quâ talis, nihil probat, cum non habeat cognitionem distinctam ab illa, quam Reus habet de seipso; ergo nihil testificari potest evidentiam aliqua distincta ab illa ipsiusmet Rei.

414. Nec refert, Confessionem extrajudicialem esse inditium grave delicti probativum, Cap. *In Primis* 2. Quæst. 1. Cap. *Audientiam* de Consuet. l. final. C. *Si à non competente Judice*: poterit ergo probari crimen, vel impedimentum hujusmodi Confessionem copulando cum gravi inditio, ex quibus resultat probatio, ex Passer. Trib. Regul. Quæst. 29. n. 10. ubi alios cumulat.

415. Nam Confessio extrajudicialis, ut grave faciat inditium, & legitimam præsumptionem inducat, debet esse probata per duos testes integros contestes. Glos. in l. final. Verb. *vel Indiciis* l. Famil. Ercis. Clar. quæst. 22. n. 1. Soufa lib. 2. cap. 39. n. 18. Guazzin. Defen. 30. cap. 31. Farinac. Quæst. 37. n. 18. Confessarius autem non est, nisi unus testis, nec integer, cum exceptione laboret Patris spiritualis eo modo, quo Patres carnales contra Liberos repelluntur. L. *Testis idoneus* 9. ff. de Testibus Cap. *si Testes* 3. 4. Epist. 2. & 3., & à nonnullis etiam ad Patrinos Baptismi extenditur, ex Farinac. Quæst. 34.; ergo eadem ratione repelluntur Confessarii, qui sunt Patres spirituales ex ipsismet Græcis Doctoribus, ut Prodromo in explicat. Conon. Pœnit. Taumat. Diplovat. Clarissimo Doctore in Synop. juris Græci tit. de Pœnit. secreto: adeoque nihil probat Confessarii testimonium extra Forum suum exiens; ergo peccat Episcopus Græcus exigens testimonium Confessarii, vel ipsum in testem advocans de vita, & moribus Ordinandorum.

416. Et

416. Et ita non minus doctrina, quam, praxi fenserunt Græci Patriarchæ sanctitate, & eruditione clarissimi. Nicephorus Sanctissimus Præsul apud Diplovat. in calce Synop. Methodius apud Gabrielem Monachum in Sinax. S. Methodii, Ignat. clarissimus, & invictissimus Fidei, jurisque Ecclesiastici Defensor, in Sym. apud Canonar. de 6. Can. init. Can. Pœnit. & apud Gregor. Metoch. in Eethes. Histor. Stephanus Leonis Sapientis Augusti Frater uterinus inter Divos apud Græcos relatus ex Menol. 17. Maji. Fide Catholica clarissimus, ex Baron. ad an. Christi 886. n. 16. apud Psal. Junior. de Sac. myst. cap. 8. ex quibus, intactam Religionem retinentibus, seeretur Sacramentale fuisse veluti Fidei Dogma severissimè custoditum eruitur, & propterea suspicatur Diplovatacius in Sinop. tit. de Pœnit. multa circa materiam hanc congerens Decreta diversis temporibus condita, non verè in Græcæ Ecclesia Orthodoxa natum errorem, sed aliundè ex prava quorundam opinione irrepsisse.

417. Secunda pars, nempe non licere Græcis Episcopis testificationem Confessoriorum à Candidatis Ordinandis de conditionibus ad Sacros Ordines necessariis exigere, iisdem rationibus probatur: tumquia indirectè Confessionis latibula revelantur, dum testificatio ad hoc necessaria nonnullis conceditur, nonnullis negatur: tumquia dictum Confessarii nullam fidem meretur utpote Parentis spiritualis, qui supponitur legis præsumptione favere Candidato, ut optimè advertit Leo Sapiens Augustus, apud Matth. Monach. Schol. 6. Balsamon. Juris Græci interpret celeberrimus, apud Joan. Epist. Citri in Can. Pœnit. 5. Basil. cap. 3. & Alii apud Bessar. epist. 4. ad Gennad.: tumquia

rota firmitas testificationis fundatur in ipsomet Candidato asserente coram Confessario, se nullo impedimento à Sacris Ordinationibus retardari; hoc autem absurdum est, ex Apost. 2. Cor. 10. 18. dicente: *Non qui seipsum commendat, ille probatus est, sed quem Deus commendat.* Et sanè indignissimi omnes ad Sacras Ordinationes accederent, cum omnes Confessario maculas suas ab Altari repellentes utique reticerent, nec umquam paterentur scripto exarari; ergò consuetudo hujusmodi requirendi à Confessariis testificationem pro Ordinandis admittendis sive verbo, sive scripto fiat, utpote Sacramento injuriosa, & ad finem intentum, penitus inutilis, veluti illicita est omnino repellenda.

ARTICULUS SECUNDUS

Solvuntur objectiones contra primam Partem.

418. **O** Bji. I. Gravissimum negotium requirit certissimum, & rigidissimum examen: at promotio Ordinandorum est gravissimum Ecclesiæ negotium: ergò exigit certissimum, & rigidissimum examen: hoc autem fit exigendo à Confessariis testificationem sive verbo, sive scripto de qualitatibus Ordinandorum, & impedimentis ab Ordine arcen-
tibus, quandoquidem coram Deo, qui confitetur, est accusator, & testis sui ipsius, cui propterea citra hæitationem credendum est; ergò hujusmodi testificatio Confessarii sive scripto, sive verbo est ut licita admittenda: tum-
quia majora mala sequuntur ex hujusmodi interrogationis omissione, quam ex fractione sigilli: ex priori enim oritur promotio malo-
rum

rum Ministrorum , quod est publicum Ecclesiæ incommodum : ex revelatione . verò solummodo infamia promovendi , quod est malum privatum , publico minimè præferendum .

419. Resp. ne. min. subsumptum : nam qualitates Ordinandorum , mediâ Confessarij testificatione , verbo , vel scripto exaratâ , indagando , non est certissimum medium ad veritatem inveniendam : tumquia Confessarii strictissimo vinculo ad tegendam confitentium turpitudinem obstringuntur , & amore filii spiritualis ad id magnopere adiguntur : tumquia Doctrinâ hujusmodi in Ecclesia admîssâ , Pœnitentes pudenda sua Confessarios celarent , sola levissima revelantes , cum Sacramenti contumelia , damnoque maximo ipsiusmet Ecclesiæ ; igitur incertissimum esset Confessarii testimonium , & propterea Tribunalia illud repellunt .

420. Idcirco quod subditur levissimum , est : nego quippe assumptum , & ejusdem consequ. : assumptum quidem , quia majora mala & incommoda ex sigilli Sacramentalis fractione , quam ex unius , vel alterius indigni admissione ad Ordines sequuntur ; ex primo enim oriretur , aut neminem , aut paucissimos ad Pœnitentiæ Sacramentum accedere , nec nisi levissima peccata aperiri : ex secundo autem paucos tantum indignos admitti , qui possunt , aliis mediis detegi ; quod quidem privatum incommodum est . Conseq. quoque mala est : nam ob quæcumque incommoda , numquam Deo injuria , ejusque Sacramentis irroganda est , quod fanè contingeret , si revelata in Confessione , Sacramentali prodere liceret , Dei Tribunali unicè reservata .

421. Obji. II. Ex hoc , quod revelatio secreti Sacramentalis arceat Fideles à Pœnitentiæ

tiæ Sacramento suscipiendo, ejusque abominationem inducat, non arguitur in aliquo casu minimè licere; ergò licitum est in aliquo casu; ergo Græci Episcopi benè agunt in examine Ordinandorum Confessarii testimonium exigentes; gravissimâ quippe causâ moventur. Conseq. patet. Prob. ant. ex hoc, quod revelatio secreti naturalis alicui externo arceat Homines à revelandis Amico secretis sub sigillo naturali, non arguitur in aliquibus casibus revelare secretum naturale nequaquam licere; ergò idipsum minimè arguitur in secreto Sacramentali, cum non minus malum sit, reddere odibile secretum naturale, quam Sacramentale: eo magis quia in Scripturis Pœnitentiæ institutivis non apparet obligatio adeo stricta hujusmodi secreti Sacramentalis.

422. Resp. ne. ant., & conseq. probat. Nam malum, quod revelatione secreti naturalis evitatur, nulla alia ratione evitari potest, nec spectat ad superius Tribunal, cum in linea pure naturali versetur, adeoque nec Amicus de secreti sui revelatione in casibus exceptis justè conqueri potest. Quæ autem à Confessario in examine Episcopali Græcorum flagitantur, alio pacto sciri possunt, nec Tribunali purè naturali subduntur, sed supernaturali, cui omninò reservantur: hinc peccata liberrimè tametsi pudenda, & secretissima Confessariis panduntur, & propterea rationabiliter secretorum Sacramentalium, non verò naturalium in casibus quibusdam revelatio esset odibilis.

423. Nec refert, hujusmodi secretum expressè in Scripturis minimè contineri: habetur enim in Verbo Dei tradito, & ex ipsamet Sacramenti institutione deducitur, cum loco Dei

Sa-

Sacerdotes in eo Tribunali Judices sedeant, ad quod peccata, veluti proprium Dei, deferuntur; & propterea ad aliud Tribunal trahi non possunt: quamvis autem in primitiva Ecclesia permitteretur interdum Pœnitentibus in Ambone pro majori sui humiliatione propria scelera revelari, quæ in Confessione aperuerant; numquam tamen licebat Sacerdotibus ipsa publicè exponere, Pœnitentibus invitis: imò sub rigidissimis pœnis erat interdictum, de Pœnit. Dist. 6. cap. 2.

ARTICULUS TERTIUS

Solvuntur Objecta contra secundam Partem.

424. **O** Bji. I. Consuetudo antiquissima habet vim legis, & præscriptionem inducit, ipsismet Latinis fatentibus: at in Ecclesia Græca consuetudo viget antiquissima exigendi testimonium scriptum à Confessariis de qualitatibus Ordinandorum, ex Tarasio novæ Romæ Antistite, vitæ Sanctitate, & Doctrina clarissimo, Iconomachismi everfore, & VII. Synod. adversus eos promotore, epist. ad Chilian. Episcop. Rhimnæ sub Sidenfi Metropolit. apud Leonem Philosophum August. lib. 2. Juris Græci-Rom. tom. 1. Eundem morem, jam obsoletum restauravit Michael III. cognomento Anchialensis Constantinopolitanus Patriarcha, apud Corefsium Epist. 3. ad Coridal.; ergò hujusmodi consuetudo antiquissima habet vim legis; ergò licitè observatur.

425. Resp. majorem intelligi de consuetudine Juri Divino, & Naturali nequaquam contradicente, non verò de ipsis repugnante, veritati, & rationi minimè præferenda, Dist. 8.

Cap. Veritate, Cap. si Consuetudinem; tunc enim numquam præscribit, ut ipsemet docet Photius Græci Schismatis Author in Nomo- can. tit. 1. cap. 3. Balsaman. in cap. 16. Primæ, & Secundæ Synodi.

426. Minor quoque falsa est ex ipsomet loco adducto Tarasii, qui eo loco consuetudinem hujusmodi dicit apertissimè malam esse, perversam, atque anathemate dignam, & propterea tollendam, quæcumque illa sit. Cæterum loquitur Tarasius non de Confessione secreta, & clauiculari, sed de publica illa, & confusibili, quæ in Ecclesia fiebat interdum in primitiva Ecclesia, per Nectarium Constantinopolitanum Antistitem sublata, infamiam inferente, atque ab Ordinibus arcente, ex Innoc. I. epist. 3. Confessarius ergò testabatur, ex hujusmodi Confessione nihil adversus Filium spirituales resultare, quominus ad Sacros Ordines admitteretur: & hoc pacto aliæ similes authoritates, si quæ ex Græca antiquitate adduci possunt, intelligendæ sunt: at nihil ad rem faciunt, cum de Confessione Sacramentali, uti in præsentī apud Græcos in usu est, sermo instituatur.

427. Obji. II. Episcopus, & Confessarius constituunt unum Tribunal Sacramentale, cum Confessarius auctoritatem suam ab Episcopo accipiat; ergò, petente Episcopo, sibi aperiri revelata in Confessione à Candidatis Ordinationum, obtemperare debet, eo modo, quo Delegatus in Foro externo faciens unum cum Delegante Tribunal, potest ei aperire statum Causæ coram se vertentis. Sic etiam ob eandem rationem Confessarius peccata reservata Pœnitentis ipsomet Reservanti licitè revelat pro absolvendi potestate obtinenda, & Interpres

pres crimina confitentis aperit Confessario, ut ab eo eorundem absolutionem obtineat.

428. Resp. ant. esse falsum: quamvis enim Confessarius ab Episcopo, Oves, super quas in Sacramentali Foro jurisdictionem exercet, accipiat, non tamen potestatem ligandi, atque solvendi; hanc enim habet ab ipsomet Christo, cum Sacerdotio initiat. Cæterum ne. conseq. semper enim versamur in eodem, Foro Sacramentali, & propterea Confessarius Præfuli reservanti peccata Pœnitentis revelare potest, & Interpret Confessario aperire, quia idem semper est Forum Sacramentale, eodemque vinculo secreti tam Reservans, quàm Interpret tenentur. Quando autem Episcopus requirit testificationem scriptam pro Ordinandis, id non facit ut Judex Sacramentalis, & in Foro interno, sed veluti judicialis, & in Foro externo; adeoque disparitas latissima est, nec ullo pacto Episcoporum Orientalium abusum justificat.

C A P U T V.

De Unctionis Extrema Sacramento.

S E C T I O P R I M A

An extrema Unctio sit verum novæ Legis Sacramentum?

429. **U**Nctionem Ægrotorum in vitæ discrimine laborantium, extremam appellatam, certisque Ritibus collatam, Novæ Legis esse Sacramentum, Catholica tenet Ecclesia, usuque perpetuo confirmatur. Jacobitzæ, & Cophtæ oppositum mordicus sustinent: quibus Sectarii quoque Occidentales suppetias ferunt

nedum antiqui, ut Albigenſes, Lollardi, Wiclephiſtæ: verum etiam moderni Lutherani, & Calviniſtæ, quos omnes Triden. ſeſs. 14. Can. 2. anathemate proſcribit. Videndum eſt, an fundamento aliquo nitantur?

430. Notandum autem eſt, multas dari in Dei Eccleſia Unctiões. I. Eſt Cathecumenorum ante Baptiſma. II. Baptizatorum in fronte per Episcopos, quæ Confirmatio appellatur. III. Qua Sacerdotum manus, Episcoporum, verò & manus, & caput in ſui Ordinatione perunguntur. IV. Qua Reges Oleo ab Episcopis ſacrantur. V. Quæ in ſacrorum Vaſorum, Altaris, Templique conſecratione fieri ſolet. VI. Qua Fideles ægroti, dum in vitæ discrimine verſantur, Oleo ab Episcopis benediſto perunguntur in aliquibus membris, & propterea Extrema vocitatur. De hac ultima Quæſtio ver- titur, an ſit Novæ Legis Sacramentum?

ARTICULUS PRIMUS

*Unctio in poſtremo hoc ſenſu accepta eſt verum
Novæ Legis Sacramentum.*

431. **O** Stenditur breviter ex Divina Scriptura: nam Jacobi 5. 14. habetur: *Infirmatur quis in vobis? Inducat Presbyteros Eccleſiæ, & orent ſuper eum, ungentes eum Oleo in nomine Domini: & Oratio fidei ſalvabit infirmum, & alleviabit eum Dominus: & ſi in peccatis ſit, remittentur ei:* quibus verbis denotatur ſignum efficax Gratiæ, quæ infunditur in hoc Sacramento: nam per *Ungentes Oleo* innuitur materia, ſicut in Baptiſmo per *ly Baptizantes*, Matth. ult. Per *ly in nomine Domini* indicatur forma ex Divina inſtitutione proſecta,

fecta, sicut eadem de Baptismo innuitur, Math. ult. dum dicitur, *In nomine Patris, & Filii, & Spiritus Sancti*: infusio verò Gratiae, cæterique Extremæ Unctionis effectus illis verbis exprimuntur: *Et alleviabit eum Dominus; & si in peccatis sit, remittentur ei*: sicut Joann. 3. 5. dicitur: *Nisi quis renatus fuerit ex aqua, & Spiritu Sancto, non potest introire in Regnum Dei*. Ministri quoque designantur, dum dicitur: *Inducat Presbyteros Ecclesiae, & orent super eum, ungentes eum*, sicut Matth. ult. postquam Apostolis dictum est: *Docete omnes Gentes*, subditur: *Baptizantes eos in nomine Patris, & Filii, & Spiritus Sancti*; ergò in Unctione Extrema reperitur signum sensibile, Gratiae infusio, ab illo signo ex Divina institutione dependens; adeoque est verum, & proprium Novæ Legis Sacramentum.

432. Nec dici potest, deesse Christi institutionem in loco citato non apparentem; etsi enim explicitè ibi non pateat, habetur tamen implicite, & æquivalenter, dum asseritur ibi, remitti peccata, quod fieri nequit, nisi à solo Deo, & quidem per Gratiae infusionem cum restrictione ad peculiare Ministros, nempe Presbyteros, & materiam determinatam, nempe Oleum, Unctionem, ac preces determinatas, scilicet Orationem fidei, formæ vices gerentes; ergò Symbola ista signa sunt Sacramentalia, non à Jacobo inventa; tantus enim Apostolus huiusmodi flagitium nec cogitasse dicendus est; sed promulgata, insinuata tamen apud Marcum 6. 13. ut optimè Triden. sess. 14. cap. 1. adeoque ad donum sanitatis nequaquam pertinet, quo morbi corporales solummodo tolluntur: Extrema autem Unctio morbos aufert spirituales, nempe peccata, & munera cœlestia.

Gratiæ largitur ; quod non facit donum sanitatis .

433. Ecclesiæ quoque sensus , & usus idipsum docet : nam præter antiquos Patres Chrysost. lib. 3. de Sacerd. Cyril. Alexand. de Orat. in Spirit. lib. 6. August. serm. 215. Innoc. I. Epist. ad Decen. Eugub. Episcop. n. 8. Dist. 99. Cap. *Illud superfluum* . Et Concilia Nicænum Can. 69. ex Arab. transl. Cabilon. II. Can. 48. Mogunt. sub Rabano cap. 26. Meldeise apud Burcard. lib. 4. cap. 75. Florent. Oecumen. cui Nationes Orientales assensum præbuerunt, aperte id diffinivit in Instruc. Armen., inquit enim : *Quintum Sacramentum Extrema Unctio est , cuius materia est Oleum olivæ per Episcopum benedictum . Hoc Sacramentum , nisi infirmis , de cuius morte timetur , dari non debet .*

434. Idipsum Ecclesia Græca , etiam Schismatica sensit , ut ex Euchologia habemus c. 98. ita sonante : *Canon consolationis in Peccatoris Confessione , quod etiam fit in ministranda Extrema Unctione* . Magisque explicat Nicolaus Cabasilas de Liturgia cap. 29. ita scribens : *Peccatorum quoque remissio Pœnitentibus datur per orationem Sacerdotum , & ultimum Olei Sacramentum , quod etiam corporalis morbi medellam , & peccatorum remissionem dat iis , quibus peragitur , ut habet Apostolica traditio : Infirmatur quis in vobis ? Accersat Presbyteros Ecclesiæ , & orent pro ipso , ungentes eum Oleo , & Oratio fidei servabit laborantem* . Similia tradit Jeremias Constantinopolitanus Patriarcha Resp. 1. ad Interrog. Germon. cap. 7. Extremam Unctionem inter septem Sacramenta recensens , quod quidem Græci Venetiis degentes confirmarunt Resp. 12. inter septem Sacramenta Extremam quoque Unctionem numerantes :

Hinc

Hinc Michaellem Augustum Andronici filium, salute jam desperata, Sacram Unctionem sumpſiſſe, narrat Georgius Pachimeres lib. 11. Hiſt. Eccleſiaſt., & de ſimilibus Eccleſiæ monumenta innumera referunt exempla; igitur ex Doctrina, & ſenſu Eccleſiæ Extrema Unctio eſt verum Novæ Legis Sacramentum.

435. Tandem ratio ipſa, & congruitas idipſum ſuadet: nam pro aliis neceſſitatibus cætera Sacramenta ſunt inſtituta, nempe Baptiſmus, ut regeneremur ad Vitam, Confirmatio, ut robaremur ad pugnam, Pœnitentia, ut reſurgamus ad Gloriam, Euchariftia, ut Spiritu nutriamur, Ordo, ut Miniſtri Eccleſiæ inſtituantur, Matrimonium, ut Populus Dei propagetur; ergo etiam medium aliquod, ſeu Sacramentum inſtitui decuit, quo ægritudine laborantes, nedum ejus moleſtias libenti animo ſuſtineamus, ſed viribus quoque in agone mortis muniamur, ut pugnare invictè cum hoſtibus noſtræ ſalutis æternæ poſſimus, & animo lubenti Chriſti vultum morientes inſpicere valeamus; ad hunc autem eſt Extrema Unctio finem inſtituta; ergo ipſa eſt verum Novæ Legis Sacramentum.

ARTICULUS SECUNDUS

Solvuntur Objectiones.

436. **O** Bji. I. Extrema Unctio effectus ſuos non producit ex opere operato, ſed operantis, nempe Sacerdotis, cujus oratione impetrantur: dicitur enim in Textu citato Jacobi: *Inducat Presbyteros Eccleſiæ, & orent ſuper eum, & oratio Fidei ſalvabit infirmum*; ergo Extrema Unctio non eſt Novæ Legis Sacramentum.

K 9

437. Reſp.

437. Resp. nè. ant. Argumenti, & conf. probat. illa enim verba, quæ citantur Jacobi, non significant, orationibus Sacerdotum tamquam ex merito effectum produci, alioquin non magis Presbyteri, quam alii viri Sancti, Sacerdotibus interdum meliores, possent ad orandum accersiri: sed quod verba orationis, quibus utuntur Sacerdotes, rationem habent formæ: dicitur autem, *Oratio Fidei salvabit infirmum*, non quia effectus ex precibus, & merito prodeat Sacerdotis, tamquam Personæ privatz, sed quia Fides significat omnia Charismata Fide nitentia, quæ communicantur unicuique, Rom. 1. 2. 3. *Sicut Deus divisit mensuram Fidei*: vel quia efficacia Sacramentorum in virtute consistit verborum Christi, quæ Fide comprehenduntur, juxta August. Trac. 80. in Joan.: vel quia in suscipiente, ut effectus habeatur, Fides requiritur; vel quia Sacerdos agit nomine Ecclesiæ, cujus Fide infirmus salvatur.

438. Obji. II. Extrema Unctio non producit infallibiliter effectum suum, nempe sanitatem Ægroti, quæ profectò præcipuus videtur hujus Sacramenti effectus; spiritualis enim, nempe remissio peccatorum, ponitur solummodo sub conditione, *Et si in peccatis sit remittentur ei*, nec tamen semper habetur, cum obitus frequenter sequatur, aut saltem valetudo minimè restituitur: neque etiam remissionem peccatorum: nam reatus culpæ per Confessionem Sacramentalem, & Contritionem antecedentem supponitur deletus: reatus verò pœnæ per satisfactionem subsequenter, ad quam Ægrotus tenetur, extinguendus est: ergò Extrema Unctio non est Sacramentum.

439. Resp. neg. ant., ad cujus probat. dico, Sanitatem corporalem esse quidem effectum

Etum hujus Sacramenti, si Ægroto expedierit, non tamen primarium, sed secundarium, eo quia non ad sanitatem absolutè tribuendam, sed alleviandam institutum est, ut faciliùs, & tranquillius ad Deum pergat: primariò verò ad Gratià habitualem augendam, & alia munera Cœlestia tribuenda, quibus munitus ægrotus sistere se Divino Tribunali, si vocatus fuerit minimè formidet. Quantum verò ad peccata utique verum est, læthalia fuisse dimissa per Confessionem Sacramentalem: at hujusmodi Sacramento minuitur reatus pœnæ temporalis, & mortalià quoque dimittuntur per accidens, si obicem non invenerit, & Pœnitentiæ Sacramentum sumi non poterit, juxta doctrinam D. Thom. Supplem. Quæst. 30. art. 1., & Subtil. 4. Dist. 9. Quæst. Unic. 6. *De secundo*, impedimenta quipè tollit Exeuntium, & reliquias peccati. Venialia verò dimittuntur per se, juxta Subtilem 4. Dist. 23. Quæst. Unic. 6. *Primo sic*. Et Sera- phicum ibidem art. 1. Quæst. 1. in Corp.; quo- circa habetur integer effectus Sacramenti in re- ctè disposito, nempe valetudo corporalis, si Animæ expedierit, alleviatio morbi, & angu- stiarum mortis, si ad Deum pergere contingat: dimissio Venialium per se, & Mortalium per accidens, & Gratiæ augmentum.

440. Obji. III. In primitiva Ecclesia non le- gitur usus hujus Sacramenti, sicut cæterorum, vel saltem habetur solummodo, Oleum, quo Infirmi unguuntur, benedictum esse oportere, quod nihil probat, cum innuat solum Ritum eo modo, quo Aqua benedicta esse debet, ut Ba- ptismo deserviat: tumquid in Veteri Testamen- to non leguntur Figuræ Extremæ Unctionis, sicut cæterorum Sacramentorum: hinc nec Chri- stum, nec Apostolos hujusmodi Unctionem ad-

hibuisse legimus in Scripturis ; ergò Extrema Unctio non est Sacramentum, sed merus Ritus .

441. Resp. falsum esse ant. , cum ex Surio tom. 2. , & Bolland. in Act. Sanct. plura legantur exempla ; cæterum cum in primitiva Ecclesia Fidelium persecutio urgeret , & Ministri in Cathacumbis laterent , Apostoli verò curis majoribus premerentur , mirum non est, usum minimè legi adeo frequentem , qui in sæculis posterioribus habetur : quamvis autem apud Patres , & Concilia antiqua Extrema Unctio ità expresse, non legatur , habetur tamen deductivè , cum statutum sit , Oleum Infirmorum ab Episcopis benedici oportere , quod de Oleis ad alios usus sacros ordinatis minimè dicitur .

442. Nec officit, in Veteri Testamento non legi usum hujusmodi Olei Infirmorum ; ut enim optimè D. Thom. Supplem. Quæst. 19. art. 1. ad 2. Extrema Unctio Sacramentum est Exeuntium , Hominem immediatè ad Gloriam disposens ; hujusmodi autem transitus eo tempore haberi nequaquam poterat , Redemptionis pretio nondum soluto . Cæteræ verò curationes , quæ in Scripturis leguntur , Oleo mediante , Unctionem hanc remotè præfigurarunt ; quæ verò Mar. 6. 5. insinuat, proximè , ex Trident. sess. 14. de Extrem. Unct. cap. 1.

443. Obji. IV. Unctio à Valentinianis Hæreticis in Vitæ fine morientibus , ex Iren. lib. 1. cap. 5. à Gentilibus verò defunctis Oleo Aqua mixto perunctis, legitur applicata ; ergò Extrema Unctio non est Sacramentum , quod utique neque ab Hæreticis , nec à Gentilibus in usum adducitur .

444. Resp. ne. cons. Nam idem Ritus, & Elementum apud Paganos mera superstitio esse potest , apud Christianos verum Sacramentum, fine

sine variato : sic ablutio apud Mahumetanos , & Hæbreos fit supersticiosè , apud Christianos sanctissimè , cum ablutio tali Ritu confecta sit verum Baptismi Sacramentum. Ceterum Ethnici non morientes, sed mortuos Oleo Aqua permixto ungebant . Valentiniani in fine vitæ fortasse Sacramentum Extremæ Unctionis ministrare intendebant, cum essent Christiani, neque enim Hæretici in omnibus errant . Cæterum, si dicatur cum Epiphan. Hæres. 30. Valentinianos, qui ab eodem Arcontici appellabantur, statim post mortem, non verò ante ipsam Infirmos perunxisse, tunc non Sacramentum, sed potius Sacrilegium, Ritu sacro abutentes, ministrabant .

SECTIO SECUNDA

Quædam Quæstiuncula dissolvuntur .

445. **Q**Uæres I. Quænam sit materia Extremæ Unctionis ?

446. Resp. Materiam remotam esse Oleum olivæ, Florentina Synodo ita expresse diffiniente in Instruc. Armen., & Triden. sess. 14. de Extrem. Unct. cap. 1. Quæ licet olivæ conditionem non exprimat, quia tamen Oleum absolute statuit esse materiam hujus Sacramenti, intelligenda est de Oleo olivæ, quod est simpliciter, & in communi opinione Oleum, eo modo, quo de Aqua in Baptismo, Pane, & Vino in Eucharistia intelligimus; quo circa Innoc. I. Epist. ad Decen., cum illud Chrisma appellat, non in rigore, sed generali quadam ratione loquitur. Quod quidem Oleum, ut Extremæ Unctionis materia esse possit, ab Episcopo benedici oportet necessitate Sacramenti, ex Concilio

cita-

citatis ibidem, quod quidem perenni traditione accepimus, quidquid in contrarium Cajetanus senserit 3. Par. Quæst. 72. art. 3.

447. Materia proxima est Unctio membrorum, nempe oculorum, aurium, narium, oris, manuum, pedum, & renum, eo quia in membris illis radix est morbi spiritualis, nempe peccati, ex appetitu ortum habentis, qui profectò à sensibus originem trahit: istæ tamen actiones ad integritatem faciunt Sacramenti, non verò ad essentiam: hinc Ecclesiæ particulares, aliæ plures, aliæ pauciores Unctiones faciunt.

448. Quæres II. Quænam sit Forma hujus Sacramenti?

449. Resp. Eam esse, qua utitur Ecclesia Romana, & Florentinum loc. cit. ipsam præscribit, scilicet: *Per istam Sanctam Unctionem, & suam piissimam Misericordiam indulgeat tibi Dominus, quidquid deliquisti.* Et elicitur ex Jacobo cit. *Inducat Presbyteros Ecclesiæ, & orent super eum &c.* Forma verò hæc cur sit deprecativa, non autem enunciativa, sicut in cæteris Sacramentis, est voluntas Christi Institutoris. Addi potest, quia suscipientes Sacramentum viribus propriis destituti, ac Dei Tribunali proximè sistendi, Ecclesiæ præcibus indigent, quæ sunt potissimè ministerio Sacerdotum, secundariò verò cæterorum Fidelium.

450. Quæres III. Quinam sit hujus Sacramenti Minister?

451. Resp. Si de Ordinis potestate sit sermo, Sacerdotem quemlibet esse hujus Sacramenti Ministrum, non Laicum, quicumque ille sit, ex Triden. sess. 14. cap. ult., & docet Innoc. I. Epist. ad Decem. Si verò de autoritate ordinaria loquamur, Parochum esse hujus Sacramenti Ministrum, vel alium Sacerdotem ab ipso

ipso delegatum : hoc enim ad Pastoralem spectat' authoritatem , Filios Ecclesiæ in extremo discrimine , atque agone versantes salutari Oleo ad luctam roborare ; talisque revera Ecclesiæ stylus est , Sacerdotes omnes citra Parochi facultatem explicitam , vel saltem implicitam , excludentis .

452. Quares Ultimo , Quænam dispositio ad dignè recipiendam Extremam Unctionem requiratur ?

453. Resp. Cum Extrema Unctio sit Vivorum Sacramentum , eos qui illud suscipere debent , in Gratia esse oportere : hinc præmitti solent eidem Pœnitentia , & Eucharistia , ut fructuosè suscipiatur ; si tamen Infirmus post ipsa suscepta in peccatum relaberetur , ejusque omnino oblivisceretur inculpabiliter , aut ob aliam causam citra ejus crimen , Sacramenta illa irrita essent , Ægroto alium obicem non ponente , effectus Extremæ Unctionis haberetur , & læthale illud abstergeretur , juxta verba Jacobi : *Et si in peccatis sit , dimittentur ei .*

C A P U T VI.

De Matrimonii Sacramento .

S E C T I O P R I M A

*An Matrimonium consummatum sit
indissolubile ?*

454. **S**upponimus hîc Matrimonium inter Christifideles contractum esse Novæ Legis Sacramentum , quod quidem etiam Sectarii Orientales admittunt : at quoniam in eo multa sunt , nempe Vinculum , Fides , & Bonum prolis , quæ à Theologis bona Matrimo-
nii

nii nuncupantur, Vinculum solummodo, quo unio Christi cum Ecclesia significatur, utpote indissolubile, Sacramenti nomen acquisivit. Hinc oritur præsens difficultas, an hoc Vinculum ita sit indissolubile, ut nullo casu possit solvi, neque ipsiusmet Ecclesiæ autoritate?

455. Notandum est autem, minimè hîc ambigi, quin Matrimonium ratum, non verò consummatum, quoad Vinculum, aut ingressu in Religionem, aut dispensatione Ecclesiæ in casu aliquo gravissimo possit dissolvi: vel Matrimonium consummatum, non quidem quoad Vinculum, sed quoad Thorum, & cohabitationem, aut consensu Conjugum, aut alterutrius ingressu in Religionem, aut in pœnam delicti, vel alias graves causas posse pariter Ecclesiæ autoritate dissolvi: sed difficultas est de Matrimonio consummato, an ejusdem Vinculum possit rescindi? Jacobitæ, & Cophtæ, apud Dominic. à Trin. in Bibliot. sec. 10. c. 23. ex Thoma à Jesu de convers. omn. Gent., Blasio Tertio in sua Syria de Patriarc. Alex., qui eandem sententiam Abyssinis, & Aliis Orientalibus Nationibus adscribit, mordicus tenent, Matrimonii consummati Vinculum in aliquibus casibus posse dissolvi. Videndum nunc est, an hujusmodi sententia possit sustineri?

ARTICULUS PRIMUS

Matrimonium consummatum numquam est dissolubile.

456. **O**stenditur ex Scripturis; nam Mar. 10. 11. 12. habetur: *Quicumque dimiserit Uxorem suam, & aliam duxerit, adulterium committit super eam; etsi Uxor dimiserit*
Vi-

Virum suum, & alii nupserit, mæchatur. Lucæ 16. 18. Omnis qui dimittit Uxorem suam, & alteram ducit, mæchatur, & qui dimissam à Viro ducit, mæchatur. Non mæcharetur autem sive Vir, sive Uxor alteri nubendo, si Matrimonium consummatum esset solubile: nam adulterium non committitur, nisi se miscendo cum Uxore aliena, aut alieno Viro, quæ sanè non esset, si Matrimonium esset solubile; ergo si mæchatur se copulans alteri Viro, aut Uxori, Vinculum Matrimonii est omninò indissolubile.

457. Nec officit, Mat. 5. 31. & 19. 9. excipi casum fornicationis: tumquia saltem in nullo alio casu, præter fornicationem, Matrimonii Vinculum liceret dissolvere, cum tamen ipsi Orientales ob alias etiam leviores causas frequenter dissolvant: tumquia sententiæ Marci, & Lucæ sunt universales, & à Matthæi loco independentes, cum ipsi independenter à Matthæo scripserint. Marcus quidem, ut Romani, quæ Petrus ore docuerat, dogmata in scriptis haberent; Lucas, ut Gentes, quibus Paulus Evangelium annuntiaverat, & cæteris carebant Evangeliiis, doctrinam certam haberent, ne à Pseudoprophetis deciperentur, ut indicat ipse in Evangelii exordio, & ex Ambrosii. Commen. in Lucæ, Hieronymi. de Viris illis. in Lucam, & Eusebii. lib. 3. Hist. cap. 24. colligitur. Tumquia Matthæus de dimissione Uxoris quoad Vinculum in causa fornicationis nequaquam intelligi potest, sed solummodo quoad Thorum, & cohabitationem, alioquin pars fornicaria melioris esset conditionis, quam casta: illa quippe dissolvere Vinculum Conjugii posset, non verò ista, quod omninò absurdum est; ergo Christus in Evangelio etiam
Mat.

Matthæi indissolubilitatem Matrimonii sancivit etiam in casu fornicationis .

458. Idipsum habetur ex Paulo ad Rom. 7. 2. ubi ait : *Nam qua sub Viro est Mulier, vivente Viro, alligata est Legi: si autem mortuus fuerit Vir ejus, soluta est à lege Viri. Igitur vivente Viro, vocabitur adultera, si fuerit cum alio Viro: si autem mortuus fuerit Vir ejus, liberata est à lege Viri, ut non sit adultera si fuerit cum alio Viro.* Et 1. Cor. 7. 36. *Mulier alligata est legi, quanto tempore Vir ejus vivit, quod si dormierit Vir ejus, liberata est, cui vult nubat tantum in Domino.* Quibus locis Apostolus unicam causam assignat dissolutionis Vinculi Matrimonialis, nempe alterutrius ex Conjugibus obitum .

459. At difficultatem omnem tollit eodem capite Paulus: cum enim ad usum Matrimonii hortatus esset Conjuges ad incontinentiam præcavendam, subdit. v. 10. *Iis autem, qui Matrimonio juncti sunt, præcipia non ego, sed Dominus, Uxorem à Viro non discedere: quod si discesserit, manere innuptam, aut Viro suo reconciliari. Et Vir Uxorem non dimittat.* Hæc autem disjunctiva Pauli esset inepta, & falsa, si Matrimonium posset quoad Vinculum dissolvi: nam si Vir adulterasset, non deberet ipsa utpote innocens manere innupta, sed posset transire ad aliud Conjugium: si verò ipsa adulterasset, deberet absolutè Marito suo reconciliari, non autem manere innupta, aut Viro suo reconciliari, commodum quippè ex iniquitate referret, se à Viro separans sibi molesto: nam, etiamsi sit Adultera, pœnamque mereatur, adhuc tamen si Vir ad aliud Conjugium transeat, Matrimonium prius dissolvitur, & ipsa libertatem pristinam acquirit. Hinc August.
hom.

hom. 47. inter 50. optimè ad rem nostram Fideles instruens: *Solius*, inquit, *fornicationis causa licet Uxorem dimittere; sed illa vivente, non licet aliam ducere, & Vobis, Fœminæ, nec illos Viros, à quibus per repudium recesserunt Uxores eorum, Maritos habere conceditur; non licet: adulteria sunt ista, non conjugia; ergò Matrimonium priùs ritè celebratum, etiam in casu fornicationis alterutrius ex Conjugibus, est omnino indissolubile.*

ARTICULUS SECUNDUS

Idipsum ex Ecclesiæ sensu, Patrumque doctrina evincitur.

460. **C**oncilia antiquissima, ut Elibertinum Can. 8., & 9. Milevitanum II. Can. 17. Africanum Can. 69. Forolivien. Can. 10. Tribur. Can. 46. Nanneten. Can. 12. apertè statuunt sub gravissimis pœnis, Conjugem ab altero relinqui non posse, citra gravissimam causam: at si dimittatur, etiam ex causa, innocentem non posse alteri copulari, sed mortem prioris expectari oportere, nec dimissam ab uno Coniuge Mulierem posse sumi ab altero Viro, quod sanè falsum esset, si fornicatio ad dissolvendum Matrimoniale Vinculum sufficeret. Synodus Quini-sexta seu Trullensis apud Græcos, etsi minimè Oecumenica, magnæ tamen existimationis, Cap. 87. graves pœnas præscribit, veluti illicitè agentibus, nempe adulteræ, quæ, relicto proprio Viro, ad alium se converterit, & Viro, qui legitima Uxore relicta, alteri nupserit, veluti adulterii Reo, & cap. 48. *Qui Uxorem aliis desponsatam, vivente adhuc Sponso, ut Uxorem duxerit, iudicio adulterii subjaceat; ergò supponit, nullo casu Matri-*

Matrimonium consummatum posse dissolvi, alioquin accipientes aliam Conjugem adulterium minimè committerent. Florentinum denique, quod ab Orientalibus omnibus spontè susceptum fuit, in Instruc. Armen. §. *Septimum* cum Matrimonium statuisset esse. Novæ Legis Sacramentum, subdit: *Quamvis autem causâ fornicationis liceat thori separationem facere,* (quod in Scripturis exprimitur per *ly dimittere,*) *non tamen aliud Matrimonium contrahere fas est, cum Matrimonii Vinculum legitimè contractum perpetuum sit.*

461. Idipsum expressis verbis affirmant Patres vetustissimi, ut Clem. Alexand. lib. 2. Strom. cap. 12. Orig. Trac. 7. in Matth. Chrysost. hom. 17. in cap. 5. Mat. Basil. epist. 1. ad Auphil. uno agmine fatentur, etsi liceat ob fornicationem separari, neminem tamen ex separatis posse alteri ex quacumque causa conjungi, sed requiri mortem alterius Conjugis: hujusmodi nubentes, etsi in specie videantur legitimè copulati, revera Adulteros esse, eoquia accipiens ab alio dimissam, alienam sibi copulat Uxorem, quod numquam licitum est, sive sit expulsa, sive non.

462. Iisdem fere formulis dimissionem, quoad Vinculum damnantibus, Latini Patres loquuntur, ut Tertullian. lib. 4. in Marcion. cap. 34. Ambros. lib. 8. cap. 16. Lucæ. Hieronym. epist. 47., & commen. in cap. 19. lib. de Nupt., & concupisc. cap. 10. & alibi passim: ergo ex Patribus Matrimonium est penitus indissolubile.

463. Idipsum vetustissimi Romani Pontifices unanimiter senserunt, atque suis Decretis firmarunt, ut Evaristus epist. 2. Innoc. I. Epist. 59. Joan. VIII. Epist. 65. quod quidem
suc-

ſucceſſivè poſteriores uniformi calculo firmarunt, ut Alex. III. de Sponſal. & Matrim. Cap. *ex Patre*, & de Divortiis Cap. *Quaſivi* & Innoc. III. lib. 4. tit. de Divortiis Cap. *Gaudemus*, aliisque in Sacris Canonibus contenti; ergò ex Doctrina, ſenſuque Patrum, & Eccleſiæ Matrimonii conſummati Vinculum eſt omninò indiſſolubile.

ARTICULUS TERTIUS

Idiſſum Rationibus ſuadetur.

464. I. **M**atrimonium in ſuis primordiis indiſſolubile fuit inſtitutum, etſi ob duritiem Judæorum fuerit cum ipſis diſpenſatum, ut habetur Matth. 19. 9. ergò, coruſcante Evangelio, priori integritati fuit reſtitutum, alioquin Lex Evangelica Moſaycâ imperſectior, & laxior diceretur, quod abſurdum eſt.

465. II. Matrimonium ex Apoſt. ad Epheſ. 5. 32. repræſentat conjunctionem Chriſti cum Eccleſia ſua, veluti Sponſa: at huiusmodi conjunctio perpetua eſt, ac numquam diſſolubilis, cum dixerit Chriſtus, cum ea ſe futurum uſque ad conſummationem ſæculi, Matth. ul. 2. ergò Matrimonium etiam eam repræſentans inter Chriſtifideles eſt omninò indiſſolubile.

466. III. Si Vinculum Matrimoniale diſſolveretur ob adulterium, vel alias cauſas; hoc utique contingeret, vel fornicatione ſtatim commiſſa, aut factò divortio, vel per ſecundum Matrimonium: non primum; quia innocens Adulteram pœnitentem retinere poſteſt citra novum contractum: non ſecundum, quia divortium non tollit innocenti juſ in altero
rum

rum Conjugem, eumque repetere potest: non tertium, quia Vir dimittendo non dirimit Matrimonium; ergò nec alter dirimit accipiendo Uxorem alienam: non enim plus juris habet secundus, quam primus, nec ad solvendum Matrimonium plus valere debet consensus superveniens, quam prior utriusque Conjugis, qui primò Matrimonium contraxerunt; ergò si Vir prior Uxorem dimittendo Conjugium non dissolvit, multò minus dissolvit Vir posterior accipiendo.

467. IV. Multa sequerentur incommoda: nam primò fieret proli injuria, quæ cogeretur pro Matre Novercam, pro Patre Vitricium, agnoscere. II. Filiorum educatio negligere-
tur, neuter quippè ex Conjugibus de ipsis curam haberet, quos sciret, ad arbitrium fore dimittendos, ut alienos, & hæreditatem, amissuros. III. Ansa præberetur adulteriis, ac dissidiis: qui enim moribus dissiderent Conjuges, consultò jurgia quærent, & adulteria patrarent, ut molesti Conjugis Matrimonium dissolveretur. IV. Immortales similitudines inter Familias Conjugum nutrentur, egerimè utique laturas, ad priorem Domum Filias reverti ignominiam adulterii notatas, quas non ita facile alteri Viro copularent; quod nunc minimè sequitur: vel enim Conjuges libidinem coercent: vel si labuntur, reconciliantur, ne ignominiam suam prodant: si verò aliis defectibus laborant, sustinent patienter, quos sola morte sciunt posse auferri; ergò Matrimonii Vinculum est prorsus indissolubile. Hinc in Primitiva Ecclesia illud frangere magnum adeo flagitium censebatur, ut Fabiola inter Matronas Romanas nobilissima, cum à Viro suo homine flagitiosissimo alteri nupta discesisset, rigorem
igno-

ignorans Evangelii, publicam egit pœnitentiam sibi à Romano Episcopo impositam, summa Urbis, & Orbis ædificatione, Hieronymo in ejusdem Epitaphio referente.

ARTICULUS QUARTUS

Solvuntur argumenta in oppositum.

468. **O** Bji. I. Ex Scripturis: Christus in causa fornicationis alterutri ex Conjugibus transitum ad alias nuptias permisit: nam Matth. 5. 32. ait: *Omnis, qui dimiserit Uxorem suam, excepta fornicationis causa, facit eam machari, & qui dimissam duxerit, machatur.* Interrogatus à Judæis, an liceat dimittere Uxorem quacumque ex Causa, respondit. Cap 19. 9. *Quicumque dimiserit Uxorem suam, nisi ob fornicationem, & aliam duxerit, machatur, & qui dimissam duxerit, machatur;* ergò Christus Dominus permittit transitum ad alias nuptias in causa fornicationis; ergò Vinculum Matrimoniale non est omninò indissolubile, alioquin exceptio illa, *Nisi* nihil operaretur, & ineptè Christus ad interrogata responderet, quod absurdum est.

469. Resp. neg. ant.; & conseq. probat. Nam loca adducta, quibus dicitur, dimittere Uxorem non posse, nisi ob fornicationem, vel excepta causa fornicationis, intelligi debent de dimissione quoad thorum, & cohabitationem, non verò quoad Vinculum. Nec sequitur propterea, Christum ineptè respondisse, cum utrique quæstioni à Judæis propositæ satisfecerit: primæ quidem, qua quærebatur: utrum liceret, dimittere Uxorem quoad thorum, & cohabitationem, dicendo per primam partem pro-

propositionis , non licere in omni casu , sed solummodo in causa fornicationis : secundæ , qua quærebatur , an posset Uxor dimitti quoad Vinculum , cui respondit per secundam partem propositionis absolutè , non licere , & mæchari , qui dimissam acceperit , ita ut ly *mæchari* bis in ea propositione intelligatur , nempe in dimittente , nisi in causa fornicationis , quia causa est Uxori ut fornicetur , & in sumendo dimissam ab alio adulterium patrante , quandoquidem cum Uxore aliena commiscetur . Quod verò Christus in secunda parte propositionis de illicita dimissione quoad Vinculum intelligat , patet , nam dicentibus Judæis , licuisse repudium Uxoris in Veteri Testamento , reposuit ipse : *Quoniam Moyses ad duritiam cordis vestri permisit vobis dimittere Uxores vestras : ab initio autem non fuit sic ;* ergò abstulit pro Lege nova libellum repudii ; ergò quando dixit Christus : *Quicumque dimiserit Uxorem , nisi ob causam fornicationis ,* intellexit de dimissione quoad thorum , non verò quoad Vinculum . Discipuli profectò ista audientes , ita intellexerunt dicentes : *Si ita est causa Hominis cum Uxore , non expedit nubere :* adeoque secunda pars propositionis : *Et qui dimissam duxerit , adulterat ,* est vera absolutè , non verò comparativè ad exceptionem antecedentem , *Nisi in causa fornicationis .*

470. Quando igitur arguitur : qui dimiserit Uxorem suam , nisi ob fornicationem , vel excepta fornicatione , facit eam mæchari , & qui duxerit , mæchatur ; ergò qui dimiserit Uxorem suam in causa fornicationis , & duxerit aliam , non mæchatur , fallax est consequentia , sed solummodo sequitur hoc : per ly *Nisi* , vel aliam particulam exceptam ; ergò qui dimitt-

mittit Uxorem suam in casu fornicationis, non mæchatur, aut facit eam mæchari; non verò non mæchari, qui aliam duxerit, vel illi, qui dimissæ nupserit; particula enim exceptiva, *Nisi* non refertur ad *ly aliam duxerit*, quæ est posterior, sed ad *ly Quicumque dimiserit*, exceptionem præcedens. Legantur Augustinus lib. de Adul. Conjug. Cap. 9. Basil. in Regul. Moral. Reg. 79. Ambros. in exhort. ad Virgin. Hieronym. in Matth. cap. 19. qui hujusmodi explanationes adducunt. Dicitur autem à Marito non posse Uxorem dimitti, nisi ob fornicationem, non quia divortium ob alias ingentes causas fieri non possit; sed quia fornicatio cum opponatur Fidei matrimoniali, est motivum proprium, & præcipuum hujusmodi dimissionis.

471. Obji. II. Ecclesia non censet esse illegitima conjugia eorum, qui propria Uxore dimissâ, ob adulterium, sterilitatem, mortis machinationes, aut incurabilem infirmitatem, vel mores omnino diffformes, alteri ex Conjugibus intolerabiles, ad alias nuptias transeunt, ex Arelat. I. Can. 10. ex Venerien. Citat. à Gratiano 31. Quæst. 1. Cap. *Si qua Mulier*, ex 32. Quæst. 7. Cap. *Quadam*, ex Gregor. III. Epist. 4. ad Bonif. cit. 32. Quæst. 7. Cap. *Quod proposuisti*, ex Tribur. cap. 4. 41., ex Zachar. Papa relat. 32. Quæst. 7. Cap. *Concubuisti*; ergò Ecclesia censet, Vinculum Matrimoniale in Conjugio consummato non esse omninò indissolubile.

472. Resp. neg. ant., quod minimè probatur ex adductis in oppositum: Arelatense enim primum non loquitur de Matrimonio prout Sacramentum est, sed de ipso secundum Leges civiles, quibus permittitur Maritis ob

Pars II.

L

adul-

adulterium Uxoris ad alias nuptias transire . Concilium itaque hortatur Virum adolescentem , ne utatur facultate imperialis legis ; sed rigorem Evangelicum servet ; non autem asserit , ei licere , vivente Uxore , etiam adulterâ , ad aliam transire , imò expressè interdicit .

473. Canones ex Gratiano desumpti loquuntur de Conjugio post mortem Adulteri , vel Adulteræ , quibus etiam post obitum innocentis vetatur Conjugium , non verò ipsimet innocenti , ex Mogun. cap. 56. & Wormat. cap. 63 .

474. Gregorius III. de impedimento frigiditatis , & impotentiae sermonem facit , post Matrimonium quidem detecto , sed ipsum præcedente , quo legitimè probato , utique dissolvitur utpote nullum , Cap. *Ex Literis* , tit. *De Frigidis , & maleficiatis* .

475. Triburiensis Synodus nihil aliud vult , quam Fœminam sterilem , sterilitate Conjugium antecedente , at nondum cognita , posse , si innotescat , à Viro separari , Virumque ad alias nuptias transire , impedimento dirimente sterilitatis post Matrimonium cognito , quod utique verum est , & ex ipsomet Textu Concilii dignoscitur .

476. Zacharias Papa intendit solummodo , Conjugem innocentem posse post mortem Adulteri aliud Conjugium contrahere , quod nocenti in pœnam delicti denegatur , numquam sive cum Adultera , sive cum alia contrahere permissio .

477. Quibus sensibus si qui Patres subobscurè loquentes Adversariis favere videantur , ut Ambros. Commen. super 1. Cor. 7. qui videtur concedere Viro innocenti , Conjugem adul-

adulterâ, alterum Matrimonium, intelligendi sunt juxta Leges Civiles, non juxta Evangelii rigorem, ut ipsemet Sanctus Doct. lib. 1. de Abraham cap. 4. & lib. 8. in cap. 14. Lucæ expressè docet. Cæterum illa commentaria non sunt Ambrosii, sed Ambrosiastri, uti Viris doctis ex multis inditiis notum est.

478. Eodem pacto dicendum est de Lactantio, lib. 6. Divin. Instit. in specie favente: loquitur enim juxta Civiles Leges, minimè secundum Evangelicas, ut patet ex Contextu, cum asserat, Vinculum Matrimoniale utpotè à Deo profectum numquam dissolvi.

479. Leo autem Magnus Epist. 85. ad Episcop. Africae cap. 1. Sacerdotem quidem, qui, dimissa Uxore, aliam duxerat, ab Ordine removet: at non declaravit secundum Matrimonium irritum, quia neque de hoc fuit interrogatus, nec opus erat in re clarissima, totique Ecclesiae nota, hoc declarari.

480. Obji. Ult. ratione: tumquia repudium Judæis in Lege Veteri, quo Vinculum solvebatur, licitum erat; ergo etiam in Lege Nova licitum est, cum eadem urgeant motiva; alioquin durior esset Lex Evangelica, quam Judaica, quod absurdum est. Tumquia repugnat lumini naturali, innocentem sustinere poenam peccatoris: at iste numquam potest ulteriores nuptias contrahere; ergo innocens potest. Tumquia nemo cogi debet ad Cælibatum, innocens autem cogeretur, cum, alterius Conjugis adulterio non obstante, ad alias nuptias transire non potest, nec alteri Conjugi commisceri. Tumquia omnis contractus rescinditur, non purificata conditione in eo firmata: at Matrimonium fuit contractum cum conditione Fidei servandæ, & ideo inter bona Matrimonii connumeratur;

ergò dissolvitur ; eâdem non servatâ . Tum-
quia in Matrimonio rato non consummato , &
in Matrimoniis antiquæ Legis habetur signifi-
catio conjunctionis Christi cum sua Ecclesia ,
& tamen non est indissolubile , nec erat ante
Christi adventum ; ergò nec modo est .

481. Resp. ad I. : Permittendo , repudium
fuisse in Veteri Lege concessum , dimissa Uxo-
re quoad Vinculum , quod tamen multi apud
Æstium 4. Dist. 33. §. *Nono* , nequaquam ad-
mittunt , & putant , nullam quidem pœnam
impositam , non tamen culpam desisse , neg.
adhuc conseq. cum D. Thom. supplem. 3. part.
Quæst. 67. art. 2. , & Subtili Doct. 4. Dist. 33.
Quæst. 3. §. *Modus conveniens* : Nam novum Te-
stamentum longè uberiores gratiam tribuit ,
quam antiquum , & verum Sacramentum est ,
vires tribuens ad onera Matrimonii sustinenda ,
& propterea jugum Legis Novæ non gravius ,
sed longè suavius est : hinc videmus , juxta Pauli
monitum , à Viris Uxores diligere , sicut Chri-
stus dilexit Ecclesiam , & tradidit semetipsum
pro ea . Ad Ephes. 5. 25.

482. Ad II. conc. maj. neg. min. innocens
enim , nocente mortuo , potest ad alias nuptias
transire , quod Adultero denegatur , qui pari-
ter dimitti potest ab innocente , non tamen è
contra .

483. Ad III. , neg. min. Cum nemo coga-
tur ad Matrimonium contrahendum : at ipso
contracto , non posse ad aliud Conjugium tran-
sire , provenit , non ex præcepto Cælibatus , sed
ex ipsamet natura Matrimonii Christiani indis-
solubilitatem requirentis ; quare , sicut ob unius
Conjugis absentiam , vel ægritudinem , tenetur
alter servare Castitatem , quin mandatum Cæ-
libatus urgeat ; ita stante dimissione quoad Tho-
rum ,

rum, & cohabitationem, non dicitur cogi ad Cælibatum, negato cum altéra congressu, Legge Matrimonii ita exigente.

484. Ad IV. dico, ant. esse verum de contractibus naturalibus, non verò Sacramentalibus, quorum essentia stat in ipsomet contractu de presenti, ex quo Vinculum oritur indissolubile: & ideo, etiamsi Fides non servetur, adhuc Vinculum à Deo impositum minimè dissolvitur.

485. Ad V. dico, Matrimonia Veteris Testamenti, & in Novo Infidelium, ac rata, & non consummata, non ita perfecte unionem, Christi cum sua Ecclesia, quæ numquam dissolvitur, representare, sicut Matrimonium consummatum inter Fideles, & propterea illa potuerunt, & nunc possunt dissolvi quoad Vinculum, non autem consummatum. Neque huiusmodi significatio est vera ratio, quam in mera Christi institutione fundamus, sed congruentia quædam.

S E C T I O S E C U N D A

Quædam Quæstiuncula enodantur.

486. **Q**Uæres I. Ob quæ motiva fieri possit Divortium?

487. Resp. Si motivum speciale, & proprium Matrimonii spectemus, & secundum respectatum, esse Fornicationem, quo nomine comprehenditur quoque Adulterium, etsi ab illa distinguatur. Hoc habemus Cap. *Significasti*, de Divor. & ex Triden. sess. 14. Can. 17. in quo pares sunt Maritus, & Uxor, cum eadem injuria in utroque sive activè, sive passivè

inveniatur, & docent Magister 4. Dist. 35., & D. Thoma super eundem Quæst. Unica art. 4. D. Bonav. 4. 3. Durand. Quæst. 1. art. 1. Aliique, quos cumulat Sanchez tom. 2. de Matrim. lib. 9. Disp. 4. Si verò de aliis motivis universalioribus sit sermo, plura sunt.

488. I. Infidelitas sive partialis, ut Hæresis; sive totalis, ut Apostasia. Tumquia cultus disparitas iis, qui una caro esse debent, est magnopere incongrua. Tumquia ex nimia familiaritate imminet proximum periculum subversionis, cap. de Divor., & firmat Sotus 4. Dist. 39. Quæst. 4. nisi resipiscat, Cap. 3. de Conversi. Conjug., aut per Ecclesiæ sententiam sit damnatus, Cap. Final. de Hæret. in 6.

489. II. est, cum unum ex Conjugibus alteri causa peccati, & ruius spiritualis est, ex Matth. 18. 8. 9. Navar in sum. cap. 1.

490. III. est, Sævities alterutrius ex Conjugibus, ita ut citra vitæ periculum non possit alteri cohabitare, Cap. Lite de Restit. Spoliat. Jus enim naturale dictat, discrimen mortis evitari oportere, nec Conjux innocens unquam cogitur pristina re assumere societatem, nisi sub cautione de non offendendo, quod propriè Viro competit, non Mulieri, etiamsi ipsa sævitie motivum adulterando præbuerit, cap. de Benedict. 31. Quæst. 1. Si tamen per sententiam Judicis ob incurabilem alterutrius ex Conjugibus sævitiam perpetuum Divortium concedatur, tunc innocens ad Religionem migrare potest, vel Sacros Ordines respectivè suscipere; quandoquidem jure petendi, ac reddendi debitum sublato, impedimentum ingressus sublatum est.

491. Quæres II. An detur casus, quo minimè Divortium liceat?

492. Resp. Affirmativè, & septem à Canonibus

nonistis assignantur, quibus illicitum est, nec conceditur, si Divortium petatur.

493. I. Quando uterque Conjux adulterium commisit, Cap. *Significasti*, de Divortiis Cap. Final. de Adulter. Cum enim unusquisque ex ipsis peccaverit, justum est, æquali pœna, & compensatione mulctari.

494. II. Quando Vir Uxorem prostituit, Capite *Discretionem*, de eo qui cognovit *Con-sanguineam*, sive coacta Uxor alteri misceatur, sive consentiens: vel quando unus Conjux adulterii alterius est conscius, nec tamen prohibet; cum posset; amittit enim jus innocentiae, & injuriarium, *Scienti*, enim, & *consentienti non fit injuria*, neque dolus, de Reg. Juris in 6. reg. 27.

495. III. Quando unus Conjux existimat probabiliter, alterum obiisse, & tamen vivit, alteri autem nubit; tunc enim sicut adulterium est materiale, ita nullam pœnam incurrit, Cap. *Cum per bellicam* 34. Quæst. 2. secus si dubitaret, nec debitam diligentiam adhiberet.

496. IV. Si Mulier fuerit violenter oppressa; quo casu, cum desit formale adulterium, non meretur pœnam Divortii, Cap. *Proposito* 32. Quæst. 5. Si tamen ob timorem solummodo licet gravissimum se violari permetteret, sicuti verè coram Deo peccaret, ita nec evaderet Divortii pœnam, ex D. Bonav. 4. Dist. 35. in exposit. Lit. n. 2. Anton. 3. Par. tit. cap. 21. Henriquez lib. 11. de Matrim. cap. 17.

497. V. Si uni ex Conjugibus aliquis ita commisceatur, ut credatur verus Conjux: tunc enim, sicut abest culpa, ita & pœna non debetur, Cap. *In Lettum* 54. quæst. 1.; bona autem fides Conjugis juramento probatur, & ex

aliis circumstantiis eruitur, ex Hostien. *serm. de Divor. n. 8. cap. 3.*

498. VI. Quoties Infidelis repudiat Uxorem, non potest Mulier Divortium postulare, eo quia, licet in se illa conjunctio Infidelis cum secunda Uxore sit adultera, cum Christus omnem dispensationem abstulerit *Marth. 19. 9.*, & ad primævam unitatem Matrimonium reduxerit: attamen, cum Infideles censeant constanter, fieri posse hujusmodi repudium, in eorum opinione congressus ille legitimus est, & proinde, quoniam injuria nulla fit repudiata, cum à vinculo priori soluta censeatur, nullus Divortio petendo locus superest, ut expressè habemus *Cap. Gaudemus de Divor.*

499. Ultimò, quoties Conjux innocens adulterium Reo condonat aut explicitè, aut implicitè ad Thorum, & cohabitationem admittendo, ex 32. quæst. 1. cap. *Non erit Turpis*. Si tamen Adulter in idem crimen recidat, tunc Divortio puniri potest, & Reus remanet in eodem statu, ac si primum non patraisset adulterium, ex *Gloss. in cap. Plerumque. Covarruvias 4. Decret. 2. par. cap. 6. Archidiac. cap. 132. quæst. 6.*

500. Quæres III. Utrum, si adulterium unius ex Conjugibus sit publicum, alterius Conjugis occultum, vel unum dubium, alterum verò certum, possit peti Divortium?

501. Resp. Reum occultum, & certum, non posse petere Divortium; nam licet hujusmodi adulteria probari minimè possint, revera tamen existunt, ac proinde cum Adulter occultus jus suum apud Deum reipsa amiserit, Adulter manifestus, apud Judicem instare nequit, sicut nec certus de proprio, adversus dubium de alieno; ita resolvit S. Bonav. cit. 4.

Dist.

Dist. 35. in exposit. Lit. n. 1. art. 1. quæst. 1. in corpor.; reconciliatione itaque opus est in mutuo scelere, quando crimen æquè innotescit, ante Judicis sententiam, ex Gloss. in Cap. *Veniens* de Conver. Conjug.

502. Quæres IV. Utrum ad Divortium petendum sufficiant actus impudici, vel crimina carnalia alterius speciei, ut sodomia, bestialitas &c. vel adulterium ex una parte, bestialitas, aut aliud hujusmodi ex altera sufficiant ad compensationem?

503. Resp. Quantum ad primam partem, actibus solummodo impudicis non induci Divortium, aut dotis amissionem, ad quæ consummatum adulterium requiritur; odia enim restringenda sunt, non amplianda, ex comm. DD. cons. quos cumulat Sanchez lib. 10. de Divor. Disp. 4.

504. Quantum verò ad secundam partem dico, concubitu consummato sodomitico, aut cum bekiis, induci causam justam Divortii petendi, eo quia Caro reipsa dividitur, quæ tota Conjugi debetur; quæ divisio non sequitur in mollitie, uti docet D. Antonin. 3. Part. cap. 2. Silvester Verb. *Divortium* quæst. 7. & Alii.

505. Hinc sequitur, Maritum cum puero se commiscentem, Uxorem verò cum alio Viro copulantem teneri ad reconciliationem, cum neutri petere Divortium utpote Reo liceat. Si tamen unum ex Conjugibus correxisse se, alterum verò etsi admonitum, &, data cautione, in adulterio perseverare contingat; tunc Conjugem correctum posse ab incorrigibili recedere, veluti in priorem statum restitutum, ex D. Bonav. loc. cit. Navar. lib. 4. consil. tit. de Divor. consil. 3. Silves. de Matrim. quæst. 6.

506. *Quæres V. An Conjux innocens teneatur dimittere Conjugem nocentem, quem certo scit adulterasse, quamvis probare non possit, & quidem propria autoritate?*

507. *Resp. Ab innocenti debere à thoro dimitti nocentem, ne cum ipso in crimine participare videatur, non tamen quoad cohabitationem si probare non possit; Divortium enim est publica pœna, quæ nequit infligi ob crimen occultum; si verò publicum sit adulterium, potest quidem, si pœniteat, Nocens Innocenti reconciliari, non tamen puniri, si perseveraret, ex propria autoritate, sed requiritur Ecclesiæ sententia, ex Chartag. V. & Nicolao I. Causa 33. quæst. 2., & usu ipso Ecclesiæ comprobatur.*



TRACTATUS VIII.

De Reliquis Orientalium
erroribus.

1. **Q**Uoniam in decursu Controversiarum Orientalium nonnullæ sunt Quæstiones, quæ disparatæ videntur, nec ad ullum Tractatum commodè reducibiles, placuit in hoc ultimo omnes istas in unum congerere, atque de his hoc in loco singillatim disputare.

CAPUT PRIMUM

An Perjurium quandoque sit licitum?

2. **P**erjurium apud Theologos in rigorosa significatione sumptum importat Juramentum, seu Divini Nominis invocationem in re, quam pejerans novit, aut saltem putat esse falsam, & eam affirmat; aut in re, quam novit, aut putat esse veram, & eam negat, uti docet D. Thom. 2. 2. quæst. 98. art. 1. in corpor. & ad primum; etsi aliis modis possit delinqui, vel illicita, vel citra necessitatem, & atque prudentiam pollicendo, vel promissa non implendo.

3. Cophtæ vel reipsa, vel prout ipsis imputatur, Perjurium etiam in strictissima significatione licitum existimant, Priscillianistarum, ac Gnosticorum doctrinâ imbuti, quorum erat effatum: *Jura, perjura, secretum prodere noli*. Et propterea in Bracharensi I., Lucensi in Hispania, & à Leone Magno. damnati Epist. ad Turibium.

S E C T I O P R I M A

Dicendum est, Perjurium in quocumque sensu, maxime verò, cum Deus in testem agnita falsitatis adducitur, acceptum, numquam esse licitum.

4. **E**Ruitur ex Scripturis: nam dicitur Levit. 19. 12. *Non perjurabis in Nomine meo, nec pollues nomen Domini Dei.* Et Zachar. 5. 3. *Hæc est maledictio, quæ egreditur super faciem omnis terræ, quia omnis fur, sicut ibi scriptum est, judicabitur, & omnis jurans ex hoc similiter judicabitur: educam illud, dicit Dominus Exercituum, & veniet ad domum furis, & ad domum jurantis in nomine meo mendaciter, & commorabitur in medio domus ejus, & consumet eam, & ligna ejus, & lapides ejus.* Similia habentur num. 30. 3. Deuter. 5. 11. Exod. 20. 7. Ecclesiast. 23. 9. & propterea ibi fit hortatio ad omnes, ut à juramentis abstineant, ne incidant in perjuriam: quod in Evangelio quoque confirmatur; nam Math. 5. 33. ait Christus: *Iterum audistis, quia dictum est antiquis: non perjurabis: reddes autem Domino juramenta tua: Ego autem dico vobis, non jurare omnino, quibus verbis ostenditur nedum perjurium illicitum esse, sed Juramentum quoque, nisi magnâ cautelâ, & circumspectione, minimè adhibendum; non quia in se malum sit, cum à Sanctis Viris, necessitate cogente, legatur adhibitum, sed ne Dei Majestas contemptui exponatur.* Hinc August. serm. 28. de Verb. Apost. *Falsa juratio exitiosa est: vera juratio periculosa est: nulla secuta est;* ergò ex Scripturis Perjurium illicitum est.

5. Id-

5. Idipsum ex Ecclesiæ Decretis habetur gravissimis poenis, quibus Homicidæ, Fornicarii, Adulteri, cæterique graviter criminosi plectuntur, Perjuria nedum voluntaria, verum etiam coacta mulctantis, Cap. *Predicandum* 22. quæst. 1. Cap. *Qui compulsus*, quæst. 5. Cap. *Quicumque* 6. quæst. 1., & Cap. *Si quis Perjuraverit* 22. quæst. 5. ad Perjurium impellentes Communionis privatione usque ad mortem, & aliisque poenis feriuntur: hinc August. serm. 111. de Sanct. ad Perjurium cogentes, & impellentes Homicidis peiores appellat, Animas interrimendo; ergo ex sensu Ecclesiæ Perjurium est omnino illicitum.

6. Ratio quoque suffragatur: nam ex Divo Thom. 2.2. quæst. 98. art. 2., & 3. Doct. Scraph. 3. dist. 39. quæst. 2. & Subtil. eadem dist. quæst. unic. 6. *In ista questione*, magna Deo fit contumelia ipsum invocando in testem falsitatis: innuitur enim, ab illo ipsam, vel non cognosci, vel agnitam approbari: tumquiam mendacium, utpote intrinsecè malum, veritati oppositum, numquam licet; ergo neque Perjurium, in quo illud includitur: tumquia juri naturali contradicit, cum destruat humanam societatem in mutua fide consistentem: ex una enim parte asserenti præstari fides deberet in confirmationem dicti sui Deum summè veracem adducendi; hinc Testi nisi jurato minimè creditur, Can. 3. quæst. 9. Cap. *Hortamur* de Testibus, Cap. *Nuper*; ex alia verò nulli credere liceret; sive enim pejeraret, sive verum diceret, semper licitè ageret; stultum est enim, ut ait August. lib. cont. mend. *Credere illi, cui licet mentiri*; ergo sicuti mendacium numquam est licitum; ita multo minus Perjurium licitum erit.

S E C T I O S E C U N D A

Solvuntur Argumenta.

7. **O** Bji. I. In pejerando benè agitur, colitur enim Deus, cujus invocatur auctoritas; ergò pejerando non peccatur. Nec refert, juramentum pejerantis cadere supra mendacium; hoc enim Divini Nominis invocatio- nem in se bonam non tollit; ergò non maculatur actus ille in se bonus ob mendacium: *Utile*, enim, *per inutile non vitiatur*, de Reg. Juris in 6, sicut Eleemosyna, cui tantisper vanæ gloriæ miscetur, non tollitur, quin sit bona.

8. Resp. ne. ant., & conseq. probat. Deus enim in Perjurio colitur inordinatè & cum ipsius injuria, quasi esset Testis falsitatis. Nec ad rem facit regula citata Juris: ut enim optimè notat Gloss. intelligitur de utili ab inutili separabili, ac distincto: Perjurium autem est à mendacio inseparabile, adeoque invocatio Divini Nominis cadens super mendacium peccaminosa est, etsi sit in se bona: ex quo paritas quoque de Eleemosyna dissolvitur.

9. Obji. II. Perjurium utpote mendacium continens afficit solummodo intellectum, non voluntatem, opponitur quippe veritati, quæ intellectum respicit, non bonitati, voluntatem afficienti; ergò peccaminosum non est, cum malitia moralis non in intellectu, sed in voluntate resideat.

10. Resp. ne. ant., ad cujus probat. dico, Perjurium utpote voluntarium non solum opponi veritati speculativæ, sed practicæ, quæ consistit in conformitate objecti, prout mente concipitur, & locutionis, cum interna rei
per-

perceptionē: hæc autem in genere moris ver-
satur; ac proindē opponitur Perjurium non
solum veritati, sed etiam bonitati, cum peje-
rans Proximum decipere intendat, & propte-
rea Deum vocat in testem; igitur deformita-
tem moralem gravem continet adversus Verita-
tem, Charitatem, & Religionem, & propterea
peccat.

11. Obji. III. Non omne Perjurium con-
tinet Dei contemptum, ut patet in juramento
coacto, & jocosō, necnon in promissorio: qui
enim jurat illicita, vel minūs bona, vel nimis
difficilia, non servando, non peccat; ergō non
omne Perjurium continet Dei contemptum;
adeoque neque peccatum est.

12. Resp. ne. ant. saltem æquivalenter, &
virtualiter: Ad probat. dico, in juramento
coacto adesse Dei contemptum, cum Creaturæ
timor Dei pavori præferatur in testem falsitatis
adducti: sic etiam in jocosō, quasi Deus le-
vissimus sit testis, cujus etiam jocando testimo-
nium possit afferri; imō gravius propterea cæ-
teris videtur. Quod si lapsu linguæ id fiat, si
tamen advertatur, falsum jurari, adhuc pec-
catum minimē vitatur: debuisset enim adver-
tere, & cavere, ut optimē D. Thom. art. 3.
ad secundum ejusdem 2. 2. Quantum verō ad ju-
ramentum promissorium in actu jurandi, qui il-
licita, aut difficilia, seu impossibilia, vel mi-
nūs bona, Divini Nominis invocatione, pol-
licitus est, utique Deum graviter offendit, eum
irridens; advertere enim debuisset, quid in re
adeō formidabili erat factururus: cæterum, cum
promissa impleri non possint, atque quod me-
lius est, exequi debeat, ut recte D. Thom.
art. 2. ad 2. non peccat minimē implendo, aut
melius operando, nisi progressu temporis res
quæ

quæ videbatur impossibilis, aut illicita, possibilis, ac honesta evadat.

13. Quæres, an Perjurium cadens super mendacium leve sit læthale peccatum?

14. Resp. affirmativè cum D. Bonav. quæst. 3. Lib. & disp. cit. S. Thom. cit. art. 3. & Doct. Subtil. 3. dist. 39. quæst. unic. Quam opinionem Innoc. XI. damnatione Propos. 24. inter 65. proscriptas confirmavit: *Vocare Deum in testem mendacii levis non est tanta irreverentia, propter quam velit, aut possit damnare Hominem.* Ratio autem est, quia, licet mendacium sit leve, deordinatio tamen Perjurii gravis est; contemptum quippe, & irreverentiam continet enormem, quasi Deus sit mendacii approbator; & irreverentia eo major est, quo mendacium est minus, major quippe Dei est contemptus, ejus mensurâ cætera quoque crescunt peccata.

15. Nec valet paritas de furto: hujus enim malitia divisibilis est juxta damnum, quod Proximo infertur, & motivum, quo infertur: malitia verò Perjurii indivisibilis est, consistens in irreverentia, qua Deus vocatur in testem falsitatis, quasi ipsam approbet: hæc autem in omni perjurio reperitur, sive mendacium grave sit, sive leve.

C A P U T II.

An Fornicatio simplex sit læthale peccatum?

16. **G**Ræcis Schismaticis à Nostro Alphonso de Castro impingitur, censeri ab ipsis, simplicem fornicationem non esse læthale peccatum. Nec perperam adscripsisse, deducitur ex Innoc. IV. Constit. *sub Catholica*, ubi
inter

inter Græcorum errores, hic quoque recensetur. Videndum est, an aliquo fundamento sulciantur?

SECTIO PRIMA

Dicendum est, Fornicationem simplicem peccatum esse lethale.

17. **E**X Scripturis evincitur! nam 1. Cor. 6. 9. inter eos, qui numquam Regnum Dei possidebunt, quales sunt Idololatæ, masculorum Concubitores, Adulteri, Molles, Avari, Ebriosi, Maledici, Raptores, ponuntur Fornicarii: id ipsum ad Gal. 5. 19. 20. 21., ubi inter opera carnis, immunditiam, impudicitiam, & alia plura gravissima crimina, ponitur fornicatio à Regno Dei excludens; talia autem peccata sunt lethalia; ergò etiam fornicatio.

18. Item Fornicarii ponunt ultimam finem in carnis voluptate, ex eodem Paulo 1. Cor. 6. 16. inquit enim: *Qui adhaeret meretrici, unum corpus efficitur*, sicut qui adhaeret Domino, unus spiritus est; ergò grave peccatum dici debet fornicatio: hoc autem adeò verum est, ut usus ipse Matrimonii ob meram voluptatem, ut ex D. August. de Bono Conjug. cap. 10. Scholastici firmanant cum D. Thom. 4. dist. 31. quæst. 2. art. 2. culpa non careat, saltem veniali.

19. Id ipsum confirmat Apostolus ad Coloss. 3. 5. 6. ubi inter cætera crimina, ob quæ venit ira Dei in Filios diffidentiae, ponit fornicationem; quæ omnia hucusque recensita, habentur quoque Jerem. 5. 8. Osee 5. 4. Deuter. 22. 21. Ecclesiast. 19. 3. ubi vel pœna gravissima infligitur, vel ira Dei imminens demonstratur.

stratur, vel turpitude, ac flagitium magnum innuitur; ergò ex Divinis Scripturis fornicatio est læthale peccatum.

20. Ex Sacris Canonibus idem habetur, qui pœnis gravissimis Fornicarios plectunt: Clerici quidem ab officio decidunt 1. quæst. 7. Cap. *Si quis omnem*: interdicuntur ingressu Ecclesiæ, Dist. 81. Cap. *Si qui sunt*: eorum missa non audienda, Dist. 32. Cap. *Nullus*: accusare, & denunciare prohibentur, Cap. *Cum dilectus* de Accusat.: flagellandi, in carcere detinendi, diuturno Panis, & Aquæ jejunio macerandi ex Ratisbon. sub Zacharia Pontifice; Laici excommunicationi subduntur, nisi pellicem dimiserint, ex Turonen. IV. cap. 10. Triburien. I. cap. 49.

21. Si autem post pœnitentiam ad vomitum redierint, Eucharistiâ usque ad mortem privantur, ex Siric. Papa epist. 1. cap. 5. relat. 3. quæst. 1. Cap. *De his verbis*: Clerici omnibus Beneficiis spoliantur, atque ad illa fiunt inhabiles, ex Lateran. V. sess. 9.; ergò ex sensu Ecclesiæ fornicatio est læthale peccatum, quod quidem apertè decedit Innoc. IV. Constit. *sub Catholica*.

22. Nec deest ratio, quam adducit Divus Thom. 2.2. quæst. 153. art. 5., & Doct. Subtil. 4. dist. 26. quæst. unic. 9. *Sequitur*. Quia nimis rectæ rationi fornicatio adversatur, cum ad prolis procreationem minimè ordinetur, sed ad metam delectationem, nec modo à Deo instituto, quod sanè inordinatum est: tum quia bonum prolis evertit; ex fornicatione enim procreati non habent certos Parentes, præsertim Patrem, à quo religiosè, & honestè valeant educari: tum quia utilitati familiæ opponitur, in qua nulla datur subordinatio,
ne-

nèque Parentum ad Filios; nèque è contra, cum nesciretur, quinam essent Parentes: tumquia bonum Civitatis tolleretur, cum nulla daretur determinata sanguinis propinquitas; adeoque nulla inter Cives amicitia insurgeret, & conjunctio, ob quam etiam Conjugium institutum est: tumquia delectatione sensibili ex fornicatione prodeunte, ac per se unicè intenta, adeo obtunditur acies rationis, ut ad spiritualia percipienda animus ineptus efficiatur, ac sensui subjiciatur: hinc pravi illi effectus prodeunt, quos Gregor. Mag. lib. 31. moral. & S. Thom. 2. 2. quaest. 152. art. 5. enumerant, nempe cæcitas mentis, inconsideratio, præcipitatio, inconstantia, amor inordinatus sui, tædium Dei, horror futuri sæculi, alique, quos Patres, & Scripturæ passim enumerant; ergò fornicatio simplex tot malorum Parens, est læthale peccatum.

S E C T I O S E C U N D A

Solvuntur Argumenta in oppositum.

23. **O** Bji. I. Fornicatio Proli minimè nocet, cum æque Filii à Parentibus solutis, quam à Conjugatis educari queant: Patres enim Veteris Testamenti plures habebant Uxores, & tamen Prolem optimè educabant: neque etiam Fœminæ, quæ corruptionem patitur, nocet: *Volenti enim, & consentienti non sit injuria, neque dolus*, de Regul. Juris in 6. reg. 37. ergò fornicatio non est illicita.

24. Resp. Fornicationem esse illicitam, quia Divinâ Lege vetita est, & intrinsecam continet deordinationem. Caterum falsum est,
Pro.

Proli minimè nocere, cum ejus cèrtitudinè rollat, & congruam educationem: quod verò interdum Filii benè educantur, accidentale est: Patres verò Veteris Testamenti idcirco Filios optimè educabant, quia Mulieres eorum non erant vagæ, & incertæ, sed veræ Uxores, optimè scientes, quinam essent eorum Filii, & in eadem domo manentes. Quamvis autem fornicariæ Mulieres consentiant, adhuc fit eisdem injuria, dum pudicitia, quam custodire tenentur, ipsis eripitur, & Filiis educatio, atque legitima hæreditas auferuntur.

25. *Obji. II.* Acies rationis hebetatur, & cætera quoque mala sequuntur ex concubitu maritali, sicut ex fornicario, & fit una caro Uxoris cum Marito, sicut Mulieris violatæ cum suo Fornicatore; & tamen congressus maritalis licitus est; ergo etiam fornicarius.

26. *Resp. ne. ant.* quamvis enim congressu maritali acies rationis obtundatur, & ideo Apostolus vult, interdum intermitteri, ut vacetur orationi? attamen non ita absorbetur, ut sit in congressu fornicario, in quo ponitur ultimus finis in oblectatione, quod non contingit in legitimo Conjugio, qui pro fine habet Proles procreationem, licet comitem habeat delectationem: & quia Novæ Legis Sacramentum est, habet annexa auxilia, quibus concubitus citra Dei offensam fiat, & ipsamet delectatio coercetur, ac minuitur incommodis Conjugii.

27. *Obji. III.* Deus præcepit fornicationem *Osee* 1. 2. Neque dici potest in hoc fuisse cum eo dispensatum, cum asseratur intrinsecè mala: si autem esset peccatum læthale, non fuisset permissa, multo autem minus imperata; nec ipsam Leges Civiles impunitam relin-

que-

querent, sicut in aliis criminibus minimè faciunt.

28. Resp. ne. ant. Osee enim Prophetæ non fuit imperatum, ut sumeret meretricem, cum qua in meretricio manente fornicariè concumberet; sed sumeret meretricem in Uxorem, qua significabatur Populus Hæbraicus à vero Deo per Idololatriam recedens: nec opus est typum in omnibus suo prototipo assimilari, alioquin non esset typus, sed prototypus. Filii verò inde nati dicuntur filii fornicationis, non quia ex fornicatione procederent; sed quia ex Muliere orti essent, quæ ante legitimum conubium fuerat fornicata. Ità Cornel. Comment. in 12. Prophet. ad hunc locum. Leges verò Civiles, idcirco fornicationem nequaquam speciali supplicio plectunt, quia tranquillitatem publicam temporalem pro scopo habent, quæ privatâ fornicatione minimè turbatur; privantes tamen filios ex fornicatione genitos paternâ hæreditate, satis denotant, fornicationem ab ipsis minimè approbatam. Leges verò Canonice pro fine primario æternam scælicitatem habentes, eam veluti læthale crimen condemnant, ac pœnis gravibus afficiunt.

C A P U T III.

*An Imagines sculpi licitè possint;
sicut pingi?*


29. **G**Ræci Heterodoxi reliquias quasdam incensi olim Iconomachismi retinent: etsi enim Sacras Imagines pictas Christi Domini, & Sanctorum venerentur, sculptas tamen execrantur veluti Idola Gentium, apud Christianum Lupum in Schol. ad Can. 7. Concil. in Di-

Difert. de VII. Syn. Quæst. 3. Videndum est ,
an Doctrina hæc valeat sustineri ?

30. Notandum autem , ab Iconomachis
sacras omnes Imagines fuisse sublatas , solis
prophanis relictis , quibus nullum bellum in-
dixerunt , Leone Isauro , ac Constantino Co-
pronimo heresim hanc promoventibus , ex Theo-
ph. Annal. ad An. 740. & Sancto Stephano Ju-
nior. in actis suis , apud Baron. ad An. Christi
714. His positis .

SECTIONO PRIM A

*Dicendum est , Imagines Sacras , etiam
sculptas , licitas esse .*

31.  Stenditur ex Scripturis: nam Exod. 25.
formam præscribens 18. 19. Deus Ta-
bernaculi construendi jubet fieri duos Cherubim
aureos produtiles , seque inter illos locuturum
pollicetur. 2. Paralip. 3. id ipsum fecit Salomon;
quem fuisse prosperatum ob i. signe opus Tem-
pli , & eorum , quæ fabrefacta in eo fuerant ,
narratur cap. 6. , & locum illum fuisse à Deo
electum , ut Populum audiret .

32. II. Num. 21. 9. narratur , à Deo Ser-
pentis ænei constructionem fuisse imperatam ,
ut conspicientes illum Populi à morsibus Ser-
pentium sanarentur , qui figura erat Christi in
Cruce pendentis : ergo sicut typus erat licitus ,
utpote à Deo imperatus , cur non licebit etiam
archetypum non merâ picturâ , sed alio imagi-
nis genere figurare ?

33. III. Ezechiel. 41. 18. In visione osten-
ditur Prophetæ figura Templi reædificandi , in
quo Cherubim , & palmarum imagines non pi-
ctæ , sed cælaturâ fabrefactæ apparebant ; igitur ,

tur, si in Scripturis non reprehenduntur, sed potius commendantur Imagines, non pictæ, sed alterius generis; igitur sunt licitæ.

SECTIO SECUNDA

Ostenditur ex Doctrina, & usu Ecclesie.

34. **N**icæna II. Synodus, in qua ex professo hæresis Iconomachorum profligata est, & errores funditus excussi, in Decreto Fidei statuit, ex omni materia fieri posse Sacras Imagines. Idipsum in Synodo Constantinopolitana post Theophili Imperatoris Iconomachi obitum à Sancto Methodio Patriarcha collecta, sancitum est, teste Theophane Orat. in Sanc. Nicephor. ac Joan. Curopol. apud Baron. An. Christi 873., & Nicæni II. Decreta confirmata, & Triden. sess. 25. §. 3. Hoc idem ratum habuit.

35. Ecclesiæ quoque Traditio antiquissima ostendit: scribit en. Euseb. lib. 7. Hist. cap. 14. Cæsareæ Philippi à Muliere illa, quam Christus fluxu Sanguinis absolvit Matth. 9. 22. Æneam statuam eidem Christo erectam fuisse, atque innumera ab ipsa in Populos beneficia manasse; in Sacris Vasis effigiem Christi fuisse sculptam, super humeros ovem bajulantis, narrat Tertul. Lib. de Pud. cap. 7. atque in iisdem figuram Agni fuisse pariter sculptam cum hac Epigrapha: *Ecce Agnus Dei*, narrat Baron. ad An. Christi 692. n. 44. De Constantino Magno refert Anastas. Bibliot. in Vita S. Silvestri, post Baptismum acceptum in Basilica Later. Agnum posuisse ex auro purissimo conflatum, ad cuius dexteram Christi, ad lævam Sancti Joannis Baptistæ argenteam statuam posuisse. Similes

les statuas num. duodecim Valentinianum Augustum Juniores in Templo Sancti Petri collocasse, suadente Sixto Papa III., scribit idem Anastasius. Zonaras in Vita Michaelis Balbi Augusti asserit, Sabatium Leonis Armeni Imagines persequentis Satellitem, ad statuam Sancti Gregorii Nazianzeni, cum mutus evasisset, fanitatem accepisse. Multa alia dici possent, quæ brevitatis causâ omittuntur; ergo ex Traditione, & usu Ecclesiæ antiquæ, Imagines sculptæ sunt licitæ.

36. Imò ipsimet Iconomachi hanc veritatem nescientes firmarunt, dum Imagines Sacris vasis, & utensilibus, ac vestibus insculptas voluere immotas, ex Pseudo-Synodo Constantinopolitana jussu Constantini Copronymi collecta, & constat ex act. 6. Synodi Nicenæ Secundæ; igitur ex ipsorummet Iconoclastarum confessione Imagines sculptæ in Ecclesia Catholica erant in usu, veluti licitæ.

SECTIO TERTIA

Ostenditur Ratione.

37. **I** Mago, quâ exemplar repræsentatur, non ideo talis est, quia aurea, vel argentea, picta, vel sculpta, sed quia Prototypum exprimit; hoc autem facit sive sculpta, sive picta, ut in prophanis Imaginibus animadvertimus: hinc deturpantes Principum statuas morte mulantur, veluti majestatis Rei, ut optimè Constantino Copronymo Sanctus Stephanus Junior exprobrat, ex Theophane, in Constant. Copron. Tum quia ipsimet Iconomachi Crucem Domini, & Sacra Lispana venerabantur, ex Can. 170. ejusdem Pseudo-Synodi, & ex actis San-

Sancti Stephani Junioris; ergò imagines quoque sculptæ coli possunt. Tumquia Nicæna II. Synodus damnat Iconoclastas, quod assererent, imagines esse Idola Gentium: hæc autem reprehensio magis cadit super Imagines sculptas, quam pictas, sicut Idola potius erant statutz, quam picturæ. Tumquia, ideò præter alias rationes admittuntur Imagines Sacræ pictæ, quia nimirum memorias eorum repræsentant, quos colimus, & veneramur, nosque ad eorum virtutes imitandas, & sanctimoniam aquirendam impellunt, & nostræ Religionis mysteria expriment, atque ad mentem revocant, ut Greg. II. Epist. ad Leonem Isauricum Iconoclastam, & Greg. Mag. ad Serenum Episcopum Massiliensem lib. 7. Epist. 111. & ad Secundinum Epist. 154. scitè animadvertunt: Imagines autem sculptæ idem præstant, ac pictæ; imò longè melius id præstant, cum pictæ externam tantum effigiem, sculptæ totius corporis habitudinem repræsentent; ergò sicuti licitus est, & laudabilis usus Imaginum pictarum, ita & sculptarum commendandus est.

SECTIO QUARTA

Solvuntur Objectiones.

38. **O** Bji. I. Imagines sculptæ Divino Præcepto interdiciuntur Exod. 20. 4. *Non facies tibi sculptile, neque omnem similitudinem, quæ est in Cælo desuper, & quæ in Terra deorsum, neque eorum, quæ sunt in aquis sub Terra.* Quod Præceptum videtur distinctum ab eo de non colendis Diis alienis: nam v. 4. dicitur: *Non facies tibi sculptile, & v. 23. Non facietis Deos argenteos, nec Deos aureos facietis vobis;* ergò Præceptum de non colendis sculptilibus ut

Pars II. M Diis

Diis est distinctum ab illo de ipsis non extruendis ob alios fines; ergo non licent Imagines sculptæ.

39. Resp. neg. ant., loquendo de Imaginibus sculptis, ut contradistinguuntur à pictis: ad cuius probat. neg. conseq. Illa enim loca Scripturæ adducta loquuntur de iis Imaginibus, quæ veluti Dii coluntur, non de illis, quæ Prototypa solummodo representant eo modo, quo loquimur de Imaginibus pictis: dicitur enim ibi: *Non adorabis ea, neque coles: Ego sum Dominus Deus tuus, fortis, & zelotes*: Alioquin Deus Arcam, Propitiatorium, Candelabra, aliaque sculptibilia vetuisset, quæ tamen utpotè ad Dei Cultum ordinata magnam habebant venerationem, ut optimè Adrian. I. Epist. ad August. recit. Act. 3. Nicæn. II.

40. Nec duo sunt Præcepta, nempe de non adorandis, ac de non efficiendis sculptilibus, sed unum dumtaxat: intantum enim vetantur sculptibilia, ne scilicet honore Divino colantur, vel ad Idololatriam provocent: semoto isto fine, sicut licent Imagines pictæ, ita licent sculptæ, cum eadem sit ratio.

41. Aliam responsionem dat Damascenus, nempe nullas Imagines Sanctorum in Veteri Testamento fuisse admittas, quia tunc ad Cœlum nemo admittebatur, pretio Redemptionis non adhuc soluto; adeoque sicut Sancti, utpote adhuc captivi, non poterant invocari, ita nec efformari eorum Imagines; at hoc verificatur de omnibus Imaginibus sive pictis, sive sculptis.

42. Obji. II. Nicænum II. in Decreto Fidei solas Imagines pictas commemorat, quibus imperat cultum religiosum impendi. Idipsum facit octava Synodus cap. 3. Utraque enim solum-

lummodo de pictis exemplum adducit , non de sculptis ; ergo sculptas non admiserunt ; si enim admisissent , recensuissent , ut Iconoclastis opponerentur ; utraque detestantibus .

43. Resp. Falsum esse ant. nam Nicænum II. in Decreto Fidei admittit expresse omnes Imagines ex quacumque materia conficiantur : Concilia enim non materiam , sed formam Iconum respiciebant in representando consistentem : cæterum , etsi omitteret sculptas , non tamen excludit : exemplum verò profert de pictis ; quia magis sunt obviæ ; ac propterea majori ab Hæreticis odio habebantur . Idipsum de octava Synodo dicendum est , vestigia septimæ sequenti : cæterum sicuti Sectarii omnes Icones oderunt etiam sculptos ; hinc Leo Isaurus Iconomachus Imperator Gregorio II. minitatus est , se omnes statuas in Templo S. Petri Romæ existentes everfurum , ex Epist. ejusdem ad præfatum Augustum : ita Catholici , ut eisdem e regione opponerentur , omnes admiserunt , eadem in omnibus ratione militante . Legantur acta Synodi VII. act. 4. , & 6. & lucidissime veritas apparebit .

44. Obji. III. Sanctus Germanus Constantinopolitanus Patriarcha , Sacrarum Imaginum non minus sanguine , quam scriptis propugnator , in litteris ad Thomam Honoriadis Provinciæ Metropolitam datis , quæ statuam commendabat à Muliere à Christo sanata erectam , reposuit : *Non hoc diximus nos , ut statuas aneas facere studeamus* ; ergo apud D. Germanum Imagines non pictæ illicitæ censebantur .

45. Resp. neg. conseq. solummodo enim sequitur , eum usui sculptas non censuisse ita accommodatas , sicut pictas . L. rationem reddit Anastasius Bibliothecarius in VII. Synod. præ-

fat. quia, cum Græci Sacris Imaginibus Altare cælatum teneant, ne sacra omnibus sint obvia, hoc pacto magis obtinetur Imaginibus pictis, quam sculptis.

46. Obji. IV. Imagines sculptæ idololatriæ incentivum, & scandalum inducunt: ab Ethnicis quippe sunt desumptæ, qui Tempia Imaginibus sculptis implebant, Deosque appellabant: hinc 4. Reg. 18. 4. à Rege Ezechia Serpens æneus, qui salutem olim Israelitis contulerat, & inde scandalum ingesserat, auferri jussit, & ex hoc motivum Iconoclastæ Imagines evertendi sumpserunt; ergò Imagines sculptæ sunt illicitæ, non pictæ.

47. Resp. ad argumentum hoc, quod etiam ab Adversariis de Imaginibus pictis solvendum est, ne. ant. nullum enim ex Imaginibus sculptis Fideles scandalum patiuntur, aut incentivum ad Idololatriam, cum optimè noverint, illas esse Imagines, non Prototypa: quod si interdum aliquos simplices in hoc falli contingat, Episcopis severè injunctum est à Synodis Moguntina cap. 4. Mecliniensi cap. 7. Triden. sess. 25. de Invoc. Sanct. ut abusus, si qui irreperint, tollant, & introducendis occurrant. Ethnici autem ideò Statuas potius Deorum suorum in Templis ponebant; non quia plus sculptilibus, quam pictis deferrent Imaginibus; sed quia sculpta simulacra plus Deos suos exprimerent; vel faciliùs Dii crederentur. Ezechias autem Serpentem æneum fregit, quia Israelitæ incensum ei, velut Numini adolebant: quod sane Catholici erga Imagines à Prototypo præscindentes minimè faciunt: quod si ex abusu interdum contingat, per accidens est, & cura incumbit Episcopis omnibus incommodis providendi: neque dogmata ex
iis,

is, quæ per accidens contingunt, metienda sunt.

48. Porro Iconomachi ansam quidem ex Imaginum abusibus errandi sumpserunt, non tamen verum motivum: Leo enim Isaurus Iconoclastiæ Antesignanus à duobus Hebræis incantatoribus, sub spe obtinendi Imperii, ad Imagines tollendas fuit inductus, ex Cedreno lib. 3. Hist. Leoni verò Armeno eidem errori penes extincto restituendo duo Iconoclastæ, nempe Sabbatinus magia, Manicheorum familiaritate, morum sceditate infamis, ac Theodorus Mellissenus Fidei Orthodoxæ simulator, amittendi Imperii metu incusso, Authores fuisse, ex Cedreno Compen. in Leone Armeno: at hæc abusu ostentatio perpetua est hostium Ecclesiæ cantilena.

49. Obji. ult. Ecclesia primitiva respuit Imagines sculptas: habemus enim ex Elio Lampridio in Alexandro Severo cap. 43. scribente, Cæsarem illum, urpote Christianis propensum, sicut & Adrianum Templâ Christo absque simulacris erexisse, ut iisdem morem gereret; ergò in Primitiva Ecclesia Imagines sculptæ nequaquam admittebantur.

50. Conf. nam Sanctus Augustinus in Psal. 113. inter opera manuum hominum, quæ ipse in Gentilibus reprehendit, vasa sacra collocat; ergò multò magis collocavit Imagines sculptas, quæ similitudinem longè expressiorem gerunt simulacrorum Gentilium. Eo magis quia Epist. 49. & in Psal. 113. ait, non posse absque Idololatria in Templis poni statuas fusas, aut sculptas, quin signum Idololatriæ appareat; ergò censet Augustinus, Imagines sculptas esse illicitas.

51. Resp. ne. ant. Id verò, quod adducitur

tur ex Lampridio, nihil evincit: solummodo enim probat, eo tempore in Templis, seu Oratoriis Christianorum nullas Imagines sive sculptas, sive pictas adfuisse: id verò factum est, ne ludibrio Infidelium, grassante persecutione, exponerentur: eo magis quia Gentiles censebant, Imagines Sanctorum putari Deos à Christianis; igitur Alexander Imperator eos sibi conciliaturus, absque simulacris eorum Temppla fieri iussit, à quibus sciebat eos abhorreret, veluti falsis Numinibus, & ideò quia metuebat, multos fieri Christianos, vetuit imposte- rum fieri Temppla simulacris nudata, ne ingre- dientes assuescerent moribus Christianorum, simulacra veluti Numina, vel eorum Imagines acerrimè detestantium.

52. Cæterum in primitiva Ecclesia Ima- gines sculptas, sicut & pictas fuisse, superius ostensum est in corpore Quæstionis, & optime notat Adrianus I. in lit. dogmat. ad Constant. & Iren. act. 3. Synod. Nicæn. II. relatis.

53. Quantum verò ad Augustinum attinet, ipse tenuit Catholicam Doctrinam, ut patet ex lib. 3. de Trinit. cap. 10. & lib. 2. de Doct. Chris. cap. 25. Itaque quando vasa aurea, & argentea reprehendit veluti opera manuum hominum, aut de vasis Imaginem Divinitatis corpoream continentibus non ea forma, qua sæpius apparuit, sed secundum se spectata intelligendus est, cum Deus revera non sit corporeus; vel quia simulacra illa ob figuratio- nem membrorum vivere censentur, & ideò ob errorem tunc grassantem, non verò secundum se, minimè adhibenda.

54. Eodem pacto dicendum est ad id, quod subditur: intantum ab Augustino censerì illi- citas Imagines sculptas, quatenus putantur se-
cun-

cundum se vivere, & propterea, ut Numina adorari: cum autem Catholici non putent, Imagines vivere, sed repræsentare tantum Divos cum Christo regnantes, uti erant, cum viverent, non sequitur, eas ab Augustino reprehendi.

C A P U T IV.

An sint admittenda Traditiones?

55. **V**erbum Dei dividitur in scriptum, & traditum. Primum est, quod in Sacris Voluminibus Deus exaratum voluit, sive in Novo, sive in Veteri Testamento. Traditum verò est, quod continet Veritates, quæ à Deo quidem, vel Christo revelante prodierunt, scripto tamen nequaquam immediatè fuerunt traditæ, sed voce tantummodo significatæ, aut immediatè per se, aut per Apostolos, qui eas à Christo acceperunt, vel Divino spiritu perfusi cælitus hauserunt, & Posteris verbo communicarunt, non scripto, quas quidem Divina Fide credere compellimur, sicuti eas, quæ scripto nobis fuerunt expositæ. Quæ à Deo, vel Christo venerunt, *Divinæ*, quæ ab Apostolis prodierunt, *Apostolicæ* appellantur.

56. Dantur quoque aliæ, quæ Ecclesiasticæ nuncupantur, à Viris Apostolicis, & antiquissimis Ecclesiæ Præsulibus originem ducentes: at istæ magnam quidem venerationem, non tamen Divinam Fidem merentur, neque de his in præsentī Quæstio agitur.

57. Æthiopes, Dominico à Trinitate in Bibliot. Theol. lib. 4. sec. 9. cap. 1. referente, Traditiones Divinas respuunt, solo Dei Verbo scripto contenti. Errorem hunc à veteribus Hæ-

reticis acceperunt, unanimi consensu Traditiones respuentibus, ut Valentinianis, & Marcionitis, apud Irenæ. lib. 3. cap. 2. Donatistis, & Pelagianis, ex August. de Nat., & Grat. cap. 19 ac de Unit. Eccles. cap. 19. Arianis, teste Hilar. cont. Constan. Eunomianis, ex Basil. de Spiritu Sancto cap. 27. sit tamen

SECTIO PRIMA

Dicendum est cum Catholica Christi Ecclesia, Verbum Dei traditum necessario admitti oportere, cui eadem Fides Divina adbibenda est, sicut scripto.

Ostenditur ex Scripturis.

58. **C**hristus Dominus non omnia revelata scriptis expressit: nam Act. 1. 3. habetur: *Christus per dies quadraginta apparens eis, nempe Apostolis post Resurrectionem, & loquens de Regno Dei, eos docuit, & instruxit, nec tamen, quæ docuit in scriptis apparent: cum verò ad Patrem ascensurus esset eis omnia aperuit, juxta promissa Joan. 16. 12. Adhuc multa habeo vobis dicere, sed non potestis portare modo; igitur multa dantur à Christo revelata, quæ scriptis non sunt expressa. Sicut ergò dantur multa facta Christi non scripta, juxta Joan. ult. 25. ita dantur quoque multa dicta ab eo, non tamen scripta.*

59. Apostolos quoque non omnia scripsisse, quæ à Christo, vel Divino Spiritu acceperunt, juxta promissiones Joan. 14. 28. *Paraclitus autem Spiritus Sanctus, quem mittet Pater in nomine meo, ille vos docebit omnia, & suggeret vobis omnia, quæcumque dixerò vobis. Et 2. Joan. 12. habetur, ubi cum multa de vitan-*
dis

dis Hæreticis, de servandis mandatis, de Charitate, quæ utique à Spiritu Sancto acceperat, differuisset, subdit: *Plura habens vobis scribere, nolui per chartam, & atramentum; spero enim futurum apud vos, & os ad os loqui; ergo non omnia, quæ acceperat, scripsit,*

60. Paulus quoque Apostolus profitetur, se non omnia, quæ à Christo hauserat, scripsisse, ait enim in 1. ad Cor. 11. 2. *Laudo vos Fratres, quod per omnia mei imitatores estis, & sicut tradidi vobis, Præcepta mea tenetis.* & eadem Epist. v. 23. cum multa, quæ acceperat, non scripto, sed voce referat prodiisse: *Ego enim accepi à Domino, quod & tradidi vobis:* nempe Sacramenti Eucharistici institutionem; subdit v. 34. *Cetera cum venero, disponam,* cum tamen quid disposuerit, minimè in scriptis habeamus; ergo voce disposita reliquit, fide credenda.

61. At clarissime 2. ad Thessalonic. 2. 14. se expressit Apostolus, dum ait: *Itaque Fratres, state, & tenete Traditiones, quas didicistis sive per Sermonem, sive per Epistolam nostram.* Hinc Chrysost. in hunc locum de Apostolis loquens: *Hinc patet, quod non omnia per Epistolas tradiderunt: sed multa etiam sine literis; eadem verò fide digna sunt, tam illa, quam ista:* Et propterea Paulus 2. ad Tim. 2. 1. scribit: *Tu ergo Fili mi &c. quæ audisti à me per multos Testes, hac commenda Fidelibus hominibus, qui idonei erunt & alios docere.*

62. Et profectò Christus Dominus nunquam præcepit, Doctrinam suam literis tradi, cordibus potius insculpendam, juxta vaticinium Jerem. 31. 33. *Dabo Legem meam in visceribus eorum, & in corde eorum scribam eam, & eris in Deum, & ipsi erunt mihi in Populum;*

adeoque Traditione potius, quam scripto ad Posterios traducendam, quin Christi Doctrina Legibus humanis esset inferior, quas traditione novimus custoditas. De Romanis docet Ulpian. lib. 7. ff. de Justit. & Jure; de Lacedemoniis tradit Plutarcus in Licurgo, hancque optimam esse Reipublicæ administrandæ rationem, docet Philosophus lib. 3. Politic. cap. 11. firmatque Jus Civile leg. *Diuturna* ff. de Legibus, & Jus Canonicum Dist. 1. Cap. *Consuetudo*.

SECTIO SECUNDA

Idipsum ostenditur ex Patribus.

63. **A** Thanasius de Incarnat. Verbi adversus Paulum Samosat. *Qui ea, inquit, qua ultra vires sunt, indagat, in præcipitio versatur: qui verò Traditionibus inheret, extra periculum est: & super Epist. 2. ad Thessalonice.* explicans verba illa Apostoli: *Tenete Traditiones,* ait: *Hoc sanè perspicuum est, pleraque Paulum sine scriptis, sermone dumtaxat, hoc est viva voce, non Epistolis solum his tradidisse; non enim secus illa, atque hæc fide sunt digna. Itaque & Ecclesiæ Traditionem dignam existimamus, cui præstanda sit fides, ut si quid ab ea sit traditum, nihil ultra perquiras.* Epiphani. Hæret. 61. *Oportet & Traditione uti; non enim omnia à Divina Scriptura accipi possunt: quapropter aliqua in Scripturis, aliqua in Traditione Sancti Apostoli tradiderunt, ut dicit Apostolus: sicut tradidi vobis: & alibi: sic doceo, sic tradidi Ecclesiis, sic continetis, nisi frustra credidistis.* Chrysostom. Hom. 4. super 2. ad Thessal. loquens de Apostolis, ait: *Perspicuum est, quod non omnia tradiderunt per Epistolam, sed*

sed multa etiam sine scriptis, & ea quoque sunt fide digna. Quamobrem Ecclesie quoque Traditionem censeamus fide dignam: est Traditio, nihil quæras amplius. Hoc pacto quoque loquuntur Clem. Alex. lib. 7. Strom. Basil. Mag. de Spir. Sanc. cap. 27. ubi ex professio necessitatem Traditionum evincit. Diony. Areop. de Eccles. Jerar. cap. 1. ; ergo si juxta hos Patres, & innumeros alios, qui possunt adduci, tam ex Græcis, quam ex Latinis, Traditiones eandem fidem merentur, quam Verbum Dei scriptum, nec ultra ipsas aliud quærendum, cum Apostoli, non omnia, quæ docuerunt, scripserint, necessario Verbum Dei traditum admitendum est à scripto distinctum, cui tamen eandem prorsus fides adhibenda est. Cui fundamento innixa Nicæna Secunda Synodus in Decreto Fidei cultum Sacrarum Imaginum ab Iconomachis oppugnatum stabilivit, atque solenni Diffinitione firmavit. Easdem Traditiones Tridentina Synodus expresse agnovit veluti Verbum Dei in Decr. de Can. Scripturis sess. 4., quæ ex ipsius Christi ore ab Apostolis acceptæ, aut ab ipsis Apostolis, Spiritu Sancto dictantes quasi per manus traditæ ad nos usque pervenerunt.

S E C T I O T E R T I A

Idipsum rationibus evincitur.

64. I. **Q**uia Ecclesia Dei sine Verbo Dei revelato stare non potest, & nihilominus usque ad Moysen, à quo Verbum scriptum sumpsit exordium, optimè permanfit, & Viris Sanctissimis floruit; ergo Verbum Dei traditum datur distinctum à verbo-scripto.

65. II. Ecclesia Christi, coruscante Evangelio, stetit absque ullo Verbo scripto Legis Novæ aliquot annis, cum profectò, antequam Evangelia in scriptum redigerentur, Ecclesia Fidelibus florebat, qui salvi fiebant, cum tamen solum Verbum traditum, non verò scriptum vigeret; ergò Verbum traditum necessariò est admittendum, ut à scripto distinguitur.

66. III. Omnes Scripturæ tam Veteris, quam Novi Testamenti successivè, ac data opportunitate, & capta occasione, diversis temporibus fuerunt editæ: profectò enim nemo adhuc ita desipuit, ut omnes dixerit simul editas Scripturas, ut evincit Baron. Tom. 1. Annal. & Cornel. à Lapid. in Præfat. ad singulos Libros, ubi ostendit, quando, & qua occasione quisque fuerit conscriptus, & ex ipsamet Librorum inspectione apparet, cum tamen semper viguerit Verbum Dei, quo Fidelium mentes in rectè credendo, atque agendo dirigerentur: ergò Verbum Dei traditum, distinctum à scripto, necessarium fuit, ut rectè credere, atque agere possent; adeoque Verbum scriptum non est unica regula credendi, atque agendi.

67. IV. Fide Divina credendum est, dari aliquos Libros verè Divinos, alioquin non constaret nobis, dari Verbum Dei scriptum. Insuper quænam sit ista Divina Scriptura, alioquin frustra crederemus dari Verbum Dei scriptum, si, quòdnam sit, ignoraremus. Denique scire oportet, an Libri illi, quos manibus terimus, ii sint incorrupti, qui ex Authore Canonico prodierunt, & non potiùs alicujus impostoris: hæc autem omnia sciri non possunt, nisi Verbum Dei traditum facem præbeat infallibilem; ergò Verbum traditum necessariò admittendum est.

68. Non quidem primum ! nam licet Scripturæ se Divinas appellent , credere tamen non teneor esse Divinas , nisi alio Verbo Dei infallibili docear, illas esse Divinas ; nam etiam scripta Mahumetis, & aliorum Pseudo-prophetarum se à Deo prodiisse jactitant . Aliundè verò Libri Sacræ Scripturæ præsertim Historiales ratione styli , elocutionis , & modi loquendi humanum quid spirare videntur : narrant quippe illa , quæ à cæteris Historicis exhibentur ; quod ergò à Spiritu Dei prodierint , aliunde probandum est .

69. Non secundum : nam certè ex Scriptura non habetur , Librum primum , & secundum Machabæorum , & Esdræ , non autem tertium , & quartum esse Canonicos ; Evangelium Marci , & Matthæi esse Dei Verbum , non verò Thomæ , & Barnabæ , & Aliorum Apostolorum , de quibus Gelasius in Synod. Rom. ; ergò quod Libri , qui nunc censentur Divini , non verò alii revera tales sint , non habetur ex Verbo scripto , sed tradito .

70. Non tertium : nam certè in Sacris Literis non habetur , Evangelium Joannis , quo utitur Ecclesia , esse illum ipsum Librum , quem Joannes conscripsit ; ergò novimus sola Traditione . Et profectò si ab Abbyssinis quæramus , quo fundamento Libros *Manda* , & *Abetilis* , uti Divinos adeò solliciti custodiant , quorum tamen in Scripturis nullum extat vestigium : responderent utique, id fieri ab ipsis , quia ita à suis majoribus acceperunt , & sic deinceps usque ad primam originem ascendendo .

71. V. Scriptura Divina ob multiplicem , quem continet sensum , & modum loquendi , variasque phrasas , & emblemata , multisque aliis de causis , in pluribus locis obscurissima est , 2. Petr. 3. 16. hinc diversæ adeò , ac interdum

exoticæ nedum Hæreticorum, verum etiam Catholicorum prodierunt interpretationes. Quod igitur sensus alicujus loci Divinæ Scripturæ sit hic, & non ille à Spiritu Sancto intentus, & tali pacto Sacer Textus interpretandus, non ex ipsa Scriptura venatur, sed ex Traditione. Hinc Concilium Magnum Nicænum ad intelligendas Sacras Literas, quibus Ariani abutebantur, & firmandam Catholicam veritatem, præsertim illum Joan. 10. 30. *Ego, & Pater unum sumus*, Traditione usum est, ex Theodoret. lib. 1. Hist. cap. 8. Idipsum præstitit Ephesinum I. pro unitate Filii Personæ in duplici natura subsistentis, adversus Nestorianos tuenda, ex Vincen. Lirin. commonit. Par. 2. cap. 2., ac subsequencia Concilia imitata sunt.

72. VI. Multa dantur Dogmata, quæ explicitè in Scripturis non inveniuntur, & tamen Fide Divina creduntur, ut V. G. numerus Sacramentorum, materia, forma, usus: Baptismus ab Hæreticis collatum esse validum: Pascha celebrandum die Dominico, non alio: Beatam Mariam Virginem, Deiparam, post Partum intactam permanisse, multaque alia dogmata, de quibus Basilius Magnus de Spiritu Sancto. cap. 27. ergò datur Verbum Dei traditum, quomysteria ista novimus, Fide Divina credenda.

73. Ult. Vel universa Scriptura, nullis exclusis Codicibus, est simpliciter necessaria, veluti unicum Verbum Dei sive in credibilibus, sive in agibilibus, vel singuli Codices distributivè, aut disjunctivè sunt necessarij: Non primum; priusquam enim primi Codices ederentur, Ecclesia multis annorum centuriis floruit immaculata: imo Synagoga Traditione potius, quam Libris editis utebatur, neque Sacri Codices usque ad tempora Abdiæ fuerant in unum

corpus redacti ; & nonnulla , ut remedium Legis Naturæ pro Fœminis , in Scriptura minimè continebantur ; hinc semper inculcatur Traditio majorum, Exodi 13.8. 14. Job.8.8. Psal.34.2. Ecclesiast. 8. 11. In Novo verò Testamento Apostolis Evangelii diffusio non per Scripturam, sed per Prædicationem injungitur, Mar. 16. 15. *Euntes in Mundum universum Prædicæ Evangelium omni Creaturæ.*

74. Neque etiam dici potest secundum : nempe Libros Scripturæ necessarios esse distributivè , aut disjunctivè : tumquia plura Volumina Sacra perierunt : Ex Veteri quidem Testamento Libri Samuel , Natan Prophetæ , Gad videntis , Quinque millia Carmina , & pleræque Parabolæ Salomonis , ex 1. Paralipom. ult.29. 2. Paralip.9. 29. 3. Reg.4. 32. Ex novo autem Epist. Pauli ad Laodicen. , cujus meminit ad Coloss. ult.16. , & aliam ad Cor. , de qua 1. Cor. 5. 9. fit mentio , haud dubium est periisse . Tumquia singuli Libri Scripturæ continent aliquid , quod in aliis non reperitur ; ergò singuli non sunt sufficientes , alioquin superfluerent alii ; cum igitur Divina Scriptura non omnia revelata saltem explicitè contineat , quæ tamen Divina sunt fide credenda , necessario Verbum Dei non scriptum admittendum est, per continuam Pastorum sibi invicem legitimè succedentium traditionem , ad nos perductum ; ut optimè Vincentius Lirinensis in Commonit. cap. 32. Ecclesia nequaquam nova inducit dogmata , sed firmat antiqua . Hinc à Patribus antiquis Doctrinæ , neque in Scriptura , neque apud Veteres inventæ , suspectæ habebantur , & propterea ad Traditionem confugiebant , ut optime Hieronymus adversus Luciferianos respondit .

SECTIO QUARTA

Adversariorum argumenta solvuntur.

75. **O** Bji. I. Divina Scriptura continet omnia, nedum necessaria, sed etiam utilia, & ad perfectionem adipiscendam, ad Rom. 15. 4. *Quaecumque scripta sunt, ad nostram Doctrinam scripta sunt, ut per patientiam, & consolationem Scripturarum, spem habeamus.* Joan. 15. 15. Salvator loquens Apostolis, ait: *Vos autem dixi Amicos, quia omnia quaecumque audivi à Patre meo, nota feci vobis.* Item Joan. 20. 31. *Hac autem scripta sunt, ut credatis, quia Jesus est Christus Filius Dei, & ut credentes vitam habeatis in Nomine ejus.* 3. ad Timot. 3. 16. *Omnis Scriptura Divinitus revelata utilis est ad docendum, ad arguendum, ad corrigendum, ad erudiendum in justitia, ut perfectus sit Homo Dei, ad omne opus bonum instructus; ergò non datur Verbum Dei traditum, utpote superfluum.*

76. Resp. ne. ant. si de continentia explicata, expressa, & formali sit sermo: utenim probavimus in corpore Quaestionis, multa sunt utilia, imò etiam necessaria ad salutem, quæ sola novimus Traditione; ut V. G. numerum Sacramentorum, Virginitatem B. Mariæ post partum, & alia: imò existentiam ipsius Scripturæ, ipsius rectum sensum, numerum Sacrorum Librorum, & legitimam eorum interpretationem sola novimus Traditione. Nec loci adducti quidquam evincunt. Fatemur enim Divinam Scripturam esse utilem ad Fidem, Spem, & Charitatem nutriendam, ad docendum, ad erudiendum Populum, ad bonos mores effor-

man-

mādos; at Traditionem nequaquam tollit, cum utilitas unius alterius utilitatem nequaquam excludat: nec dicunt Scripturæ illæ, solam Scripturam esse utilem, sed loquuntur indefinitè; imò tametsi diceretur, eas non esse necessarias, adhuc tamen minimè excluderentur, cum multa existant utilia quidem, non tamen necessaria. Dici quoque potest, Scripturas allatas loqui de præcipuis Fidei mysteriis, sine quorum Fide explicita salus nequit obtineri, non tamen de objectis omnibus credilibus, quæ credi quidem debent Fide Divina, quoties innotescant; si tamen ignorentur, perniciem æternam Animæ nequaquam inducunt.

77. *Obji. II.* Christus Dominus minimè agnovit Traditiones, quandoquidem, ut se Messiam probaret, unicè ad Scripturam Judæos provocavit, Joan. 5. 39. dum ait: *Scrutamini Scripturas, quia vos putatis in ipsis vitam æternam habere, & illæ sunt, quæ testimonium perhibent de me*: imò eas reprehendit Matth. 15. 6. dum alloquens Judæos ait: *Irritum fecistis mandatum Dei propter Traditiones vestras*. Hinc 1. Petri 1. 18. adversus eas ita scribitur: *Redempti estis de vana vestra conversatione paternæ Traditionis*; ergo non dantur Traditiones.

78. *Resp. ne. ant.*, ad cujus probat. neg. conseq. Idcirco enim Christus Judæos ad Scripturam remisit, ut ad Hominem convinceret, qui, spretis miraculis adeò evidentibus, ab eo in probationem doctrinæ suæ patratæ, quæ dicebant in virtute Belzebug Principe Dæmoniorum effici, spretâ quoque Joannis Baptistæ autoritate, Christum Messiam verum pronuntiantis, unicè Scripturis inhærebant dicentes,
Joan.

Joan. 9. 28. *Nos Moysi Discipuli sumus. Nos scimus, quia Moysi locutus est Deus; hunc autem nescimus unde sit.*

79. Porro Traditiones, quas Christus reprehendit Matth. 15. 9. non sunt illæ, de quibus loquimur in præsentī, sed privatæ Judæorum inani superstitione perfusæ, ob quarum observantiam Dei mandata negligebant; vult ergo Christus, mandatum Dei sive scriptum, sive traditum privatis Traditionibus humanis præferri oportere, quod utique verissimum est: ac hoc nihil ad nos, cum Traditiones, quas inculcamus, humanæ non sint, nec privatæ, sed Divinæ, & publicæ.

80. Obji. III. Verbo Dei scripto nihil potest addi, vel detrahi, Deuter. 4. 2. & 12. 31. & Apocal. 22. 18. 19.; adderetur autem, si daretur Verbum Dei traditum; ergo Verbum Dei traditum non est Verbum Dei, adeoque non dantur Traditiones.

81. Resp. hoc Argumento concludi oppositum; nam Verbo tradito nulla fieri potest additio, vel detractio, juxta Paulum ad Galat. 1. 8. *Licet nos, aut Angelus de Cælo evangelizet vobis, præterquam quod evangelizavimus vobis, anathema sit;* ergo Verbum traditum est verum Dei Verbum.

82. Resp. nihilominus directè, ant. esse verum de additione, vel detractioe corruptiva, & ab Authore non habente auctoritatem edendi Verbum Dei, non verò de additione alterius generis ab ipsomet Deo Omnipotente profecta: alioquin Deus nova aliis Scripturis, præter citatas in argumento, mysteria revelare non potuisset, nec posset in præsentī, cum profectio non omnia revelabilia fuerint adhuc Ecclesiæ à Deo patefacta, quod absurdum est;

est; sicut ergo potuit revelare Verbo scripto, cur non potuit tradito? Deliria sunt hæc, non argumenta.

83. *Obji. IV.* Patres in solo Verbo scripto Divinam collocant auctoritatem; ergo non dantur Traditiones. *Prob. ant.* Nam aliqui eorum asserunt, in Verbo scripto omnia contineri, atque ad Doctrinæ plenitudinem sufficere, ut *Iren. lib. 3. cap. 1. Athanas. lib. cont. Idola Cyril. Alexand. Hom. 9. in Epist. ad Timoth. Ambros. serm. 20. in Psal. 218.*

84. Alii asserunt, ad Scripturas provocari oportere, iis uti, nihilque loqui absque Scripturis, easque adversus Sectarios, cum quibus dimicamus, jactari, veluti sagittas, opus esse, quibus configuntur. Ita *Origen. Hom. 7. in Jerem. Chrysost. Hom. in Psal. 95. Hieronym. in cap. 13. Matth. August. Cont. Maxim. Arian. & super Psal. 57.*

85. Alii nihil acceptandum affirmant in Scripturis minimè contentum, ut *Theophil. lib. 2. Paschal. Augustin. de Peccator. merit. & remis. cap. 36. lib. 3. cont. lit. Petil. lib. de Bono Viduit. cap. 1. Cyprian. ad Pompejum; ergo ex Patribus solum Verbum scriptum admittendum est, non verò traditum.*

86. *Resp. ne. ant.* Patres enim omnes etiam in adversum citati unanimi consensu adeò perspicuè Traditiones admittunt, ut nullus de ipsis ambigendi locus appareat. Ad probationem igitur dico, Patres asserentes, in Verbo scripto contineri omnia, atque ad plenitudinem Doctrinæ sufficere, intelligendos esse; vel quoad principalia dogmata, quæ ad Vitam æternam aquirendam scitu sunt necessaria, & ad mores componendos requisita. Vel quia revera continentur, saltem implicite, ac designatur, unde
acci-

accipi debeant, nempe à Pastoribus, quibus dictum est Joan. 14. 16. *Et ego rogabo Patrem, & alium Paracletum dabit vobis, ut maneat vobiscum in æternum, Spiritum veritatis: vel per Traditiones per manus acceptas, dicente Apostolo: Tenete Traditiones.*

87. Illi autem, qui docent, in concertatione cum Hæreticis utendum esse Scripturis, utique verum est, cum Sectarii Traditiones respuant, Scripturas allegari ad probationem dogmatum oportere, etiam nos affirmamus; at non dicunt Patres illi, deficientibus Scripturis, Traditiones adduci non posse, si revera suppetant.

88. Illi denique Patres, qui videntur asserere, nihil quod in Sacris Literis apertè non continetur, esse recipiendum, cum grano salis sunt intelligendi, ne sibi contradicere asserantur; volunt igitur solummodo, in obscuris Quæstionibus, ubi deest Verbum traditum, ad scriptum recurri oportere; nec cuiquam facile credendum, qui loca expressa Scripturæ non adducit, ut audacia compefcantur ingenia, quæ novitatis cupida pro dogmatibus ingenii proprii fætus simplicibus venditant. Quocirca cum Patres omnes Verbum Dei traditum constantissimè propugnaverint, optimè scientes per hoc Catholicos ab Hæreticis distingui, ut optimè Tertul. de Car. Chris. cap. 2. si qui autem obscure locuti, sunt in bonum sensum trahendi, ne à seipsis dissideant, clarissimè pro Traditione differrentibus.

89. Obji. Ult. Pluribus rationibus in unum conglobatis. I. Unicum est Verbum Dei, sicuti unica est Ecclesia, veluti Testamentum nobis à Deo relictum ultimæ suæ voluntatis; ergò cum Verbum scriptum sit Dèi Verbum, traditum
non

non erit tale. II. Verbum Dei certum, & incorruptum ad nos pervenire debuit: Verbum autem traditum non est tale, cum Homines, per quos ad nos pervenit, oblivioni, deceptioni, ac temeritati fuerint subiecti. III. Quia transfusio Doctrinæ, media Traditione, ansam præbet sceleratis Hominibus commentitia dogmata fingendi, ac simplicibus imponendi, uti Sanctus Cyprianus fuit deceptus circa Hæreticos rebaptizandos. IV. Quia asserere existentiam Verbi Dei ex pura Traditione, falsi dogmatis suspencionem ingerit: veritas enim publicam lucem in scriptis non erubescit: hinc Hæreticorum mos est, dogmata sua non scripto, sed verbo tradere, ut convinci nequeant, uti de Basilidianis, & Corpocratianis narrat Iren. lib. 1. cap. 23, & 24. V. Admissis Traditionibus, Concilia Ecclesiæ essent superflua, cum sensus Scripturæ ex ipsismet Traditionibus pateret, sicuti essent superflua, si Scripturæ sensus esset clarissimus. VI. Superflueret magisterium Spiritus Sancti in Ecclesia, eo quia per Traditionem omnes obscuritates, & ambiguitates tollerentur; ergo cum omnia ista sint absurda, concludendum est, non dari Traditiones.

90. Resp. Ad ultimum plures objectiones complectens. Quantum ad primam

91. Resp. neg. conseq. Nam etiam Verbum traditum est perfectissimum Dei Verbum, sicuti unica est Ecclesia, per quam Dei Verbum & scripto, & Traditione ad nos pervenit: quod quidem etiam Testamentum esse potest, cum ultima voluntas Testatoris & verbo, & scripto possit ostendi.

92. Ad II. dico, eadem Dei Providentiâ, qua incorruptum ad nos Dei Verbum scriptum per-

pervenit, traditum quoque pervenire posse, periculis omnibus in objectione tactis minimè obstantibus, cum illæ difficultates etiam Dei Verbum scriptum æque afficiant.

93. Ad III. dico, nullum urgere periculum, Traditione verè Divinâ, vel Apostolicâ falsum aliquod dogma intrudendi, cum per legitimam Episcoporum successionem ab ipsomet ore Domini, vel Apostolorum prodiisse convinci debeat, ut optimè Iren. lib. 2. 3., & 4. quare, si Pastores legitimi audiantur, qui originem Doctrinæ usque ad Christum deducunt, numquam errori locus patebit, uti monet scitè Tertul. de Præscrip. cap. 20., & 21.: nec major urget ratio, cur falsæ Scripturæ interdum obtrudantur, intrudi autem nequeant falsæ Traditiones, quibus proinde Cyprianus fuit deceptus, quia custodem earum legitimum audire detrectabat, nempe Romanum Pontificem, etsi errori sub progressu temporis vale dixerit.

94. Ad IV. Falsissimum est assumptum: non enim ideò admittuntur Traditiones, quia in publicum dogmata nostra scripto prodire vereantur, uti erant secreta Gnosticorum mysteria, de quibus Epiphan. Hæres. 21. & 27., sed quia, ut nostra humilitas exerceretur, Christo minimè placuit ea scripto commendare: quo pacto Pastores, & Doctores ad instructionem necessariò consulerentur: ob quam rationem voluit Deus etiam Verbum scriptum pluribus in locis obscurissimum. Cæterum Catholica dogmata lucem publicam minimè formidant, quam proinde Sacri Doct. etiam coram Ethnicis Augustis nedum voce, sed scripto liberrimè protulerunt, ac propugnaverunt, ut ex Origenis contra Celsum, Tertul. adversus Gentes, Justinii Martyris ad Antoninum Pium voluminibus,

bus, aliorumque Vicorum Doctissimorum disceptationibus liquidissimè constat, quod sanè Gnostici, alique Tenebriones facere metuebant, ne scelerata ipsorum dogmata Populis innotescerent.

95. Ad V. negatur, admissa Traditione, quæ Verbum Dei sit, Concilia fore supervacanea. Nam etsi multa nobis dogmata per eam innotuerint, non tamen omnia suppetunt, quæ per inspirationem Spiritus Sancti Ecclesiam docentis possunt ministrari, & per eandem Scripturarum, multarum interpretationem haberi. Tum quia Traditiones à multis ignorantur, & in Libris Veterum, & apud Ecclesiam Apostolicam sunt inveniendæ, & inquirendæ: propterea Concilia colliguntur, ut, ipsis investigatis, atque inventis, veritas elucescat. Quia tamen, etiamsi legitimè appareant, habent solummodo rationem, Normæ, non autem Judicis, adeoque etiam circa ipsas oriri Quæstiones possunt. Idcirco Concilia Oecumenica minimè superfluum animati Judicis munere fungentia, qui Controversias ultima decisione resolvit.

96. Ad ultimum neg. quoque sequela. Nam, etsi per Traditionem multa dogmata, multorumque locorum Divinæ Scripturæ interpretationem habuerimus, non tamen omnia, nec omnium: propterea ad infallibile Spiritus Sancti magisterium recurrimus ore Romani Pontificis, vel Synodi ab eo confirmatæ Ecclesiam docentis, uti in Concilio Jerosol. de quo Act. 15. sermo fit, contigit; semper igitur ope Spiritus Sancti Ecclesia in decisionibus suis eget: nam quamvis multa dogmata teneat Traditione accepta, & interpretationem multarum Scripturarum per manus fuerit nacta; adhuc tamen, si auxilio Spiritus Sancti destituatur, errare posset.

set in ferenda sententia, male Traditiones intelligendo, aut Scripturas interpretando, aut male applicando, uti celeberrimas Ecclesias, etiam Apostolicas, præter Romanam, fecisse animadvertimus: ad certitudinem enim Doctrinæ non sufficit certitudo Normæ, sed Judicis requiritur infallibile judicium, Normam citra erroris discrimen ad causæ decisionem applicantis, quod sanè absque Spir. Sancti influxu fieri non potest.

SECTIONO QUINTA

Nonnulla dubia resolvuntur.

97. **Q**Uæritur I. Quibus regulis utendum sit ad dignoscendas Traditiones, utrum Divinæ sint, aut Apostolicæ, vel merè Ecclesiasticæ?

98. Resp. plures esse, quarum prima est. Quando tota Ecclesia Articulum aliquem veluti Fidei dogma amplectitur, quod tamen minimè in sacris legitur Literis; tunc Doctrinam aut à Domino ipso immediatè, vel à Sanctis Apostolis, Divino Spiritu suggerente, aut docente, prodiisse censendum est, cum nihil de Fide sit, nisi quod à Deo mediatè, vel immediatè revelatum est. Hujus generis sunt Librorum Canonorum numerus, multorumque Textuum earundem Sacrarum Literarum genuina interpretatio, descensus Christi ad Inferos, Pascha semper die Dominica celebrandum, & alia, quæ in Sacris deinde Conciliis definita sunt.

99. Secunda est. Quidquid ab Ecclesia institui non potuit, sed à solo Deo, nec tamen illius ullum in Scriptura est vestigium, à Dominica, vel Apostolica dicendum est Traditione acceptum, cujusmodi sunt materia, & forma
Ordi-

Ordinis , Confirmationis , & Extremæ Unctio-
nis , Baptisma Parvulorum , validitas Baptismi
ab Hæreticis collati ; quæ cum semper ab exor-
dio Ecclesiæ usque ad nos inconcussè retenta
sint , nec ab Ecclesia institui potuerint , neces-
sario à Christo , aut Apostolis de ejusdem man-
dato institui debuerunt , ut observat August.
lib. 10. de Gen. ad Lit.

100. Tertia est . Etsi dentur plura , quæ ab
Ecclesia institui potuerunt : si tamen nullum
Concilium , nullus Pontifex Summus invenia-
tur , à quo fuerint primò instituta , & nihilo-
minus semper retenta , & executioni mandata
fuisse , Divinæ , aut saltem Apostolicæ sunt Tra-
ditioni adscribenda ; ex quibus est Quadragesi-
male Jejunium , cujus meminerunt etiam Patres
antiquissimi , ut Chrysostomus , Basilus , Ori-
genes , Irenæus , Cyrillus Jerosolymitanus ,
Clemens Romanus , veluti rei jam usitatæ , ta-
metsi in posterioribus Conciliis stabilitæ , ex
Gangren. cap. 19. Laodicen. cap. 50. Nicæno I.
cap. 5. & aliis subsequenter . Tales quoque
sunt Ritus nonnulli , qui in Sacramentorum
administratione servantur , ut in Baptismo trina
mersio , salis usus , unctio Chrismatis , abren-
nuntio Satanæ , quorum origo non nisi Aposto-
lis adscribi potest .

101. Quarta denique est . Quotiescumque
Patres omnes , & Ecclesiæ Doctores unanimi
consensu , aut saltem multis asserentibus , aliis
verò minimè discrepantibus , asserunt , dogma
aliquod , aut ritum , vel consuetudinem ex Do-
minica , vel Apostolica Traditione descende-
re , id proculdubio pro tali tenendum est , qua-
les sunt plerique Ritus in Sacramentis admini-
strandis , quos describit Basil. de Spir. Sanct.
cap. 27. , & Tertull. de Coron. Milit. cap. 3. In.

Pars II.

N

Scri-

Scripturis enim jubemur Doctoribus credere , quos Deus, Act. 20. 28., posuit ad instructionem , & directionem nostram , quos omnes errare absurdum est , iis quippè errantibus , Ecclesia quoque errare diceretur . Horum qualitates enumerat Vincentius Lirinensis cont. Hæres. cap. 39. & 40.

102. Quæres II. Cum Pa. res afferant , Traditiones , ab Ecclesiis Episcoporum Successionem habentibus quæri oportere , à quibusnam Ecclesiis quærendæ sint ; cum nulla Ecclesia citra Episcoporum Successionem constare queat , & nihilominus non omnes Ecclesiæ sint fideles Traditionum Custodes ?

103. Resp. Cum omnis vera Doctrina in Lege Nova à Christo prodierit : ipse verò eam Apostolis communicaverit , qui Discipulis suis eamdem tradiderunt in Posteris derivandam , certum est, origine dogmatum inspecta , Ecclesias, quibus Apostoli præfuerunt , consuli oportere , ut pulchrè Tertull. lib. de Præscrip. cap. 36. At , quia quæcumque alia , ex Apostolicis Ecclesiis, præter Romanam , hæreticis novitatibus depravata succubuit , & proinde legitima quoque in iis desit successio Sacerdotum , idcirco ad solam Romanam confugiendum est, in qua , sicuti Fidei depositum à Sanctis Apostolorum Principibus Petro , & Paulo eidem commendatum , inviolatè servatum est , ita etiam legitima remansit Episcoporum successio , quam nedum , posteriorum , sed priorum etiam sæculorum , antiquissimi , & gravissimi Patres agnovere . Irenæus Doctissimus simul Episcopus , & invictissimus Martyr , qui secundo floruit Sæculo , apud Baron. ad an. Christi 179. Romam pro discendis Traditionibus venit , quas in Romana Ecclesia immaculatas existere verbis disertissimis

simis lib.3. cap.3. testatur : & propterea omnino ævo , ortis de Fide dissidiis , aut dubiis ad Religionem pertinentibus , Episcopi etiam præcipui semper Ecclesiam Romanam consulere , ut ex infinitis propemodum responsis Romanorum Pontificum , eorumque Decretalibus Epistolis perspicuè constat .

104. Hoc autem adeo verum est , ut ipsemet Photius moderni Græcorum Schismatis Author , ut hæreticum cæaret animum , de sua Ecclesiæ Constantinopolitanæ disciplina , quam per Traditionem se accepisse dicebat , Nicolao I. Romano Pontifici rationem reddit , ejusdem petens approbationem , Epist. relat. apud Baron. ad an. 861. Præfatus verò Pontifex anno sequenti rescripsit , omnes approbans consuetudines , præter illam , qua Laici ad Episcopatum immediatè elevabantur . Hanc eandem auctoritatem cum Bulgaris ad Fidem Orthodoxam recenter conversis exercuit Nicolaus eorumdem Quæstis per 106. capita accuratissimè respondens . Itaque in re clarissima non est immorandum .

105. Qui uberem Traditionum Cathalogum videre cupit , Martinum Peresium Guadiænsium Antistitem adeat in suo Libro de ipsis luculenter agentem , ex quo Cardinalis de Laurea ex Nostis multa in Tractatum suum de Traditionibus se transfuisse ingenuè fatetur . Tom.1. de Fide Disp.4. art.6.



CAPUT V.

An Canones Apostolici sint Verbum Dei.

106. **Æ**Thiopes, seu Abyssini apud Franciscum Alvaresium in sua Historia, & Dominicum à Trinitate in sua Bibliot. lib. 4. sec. 9. cap. 1. Canones Apostolis adscriptos in Libro quo tam, *Manda, & Abetilis*, nuncupato, atque in octo partes distributo contentos, veluti ab Apostolis, dum Jerosolymis de Gentilium conversione agerent, ac de Symboli editione differrent, collectis, conditos, summa, tamquam legitimum Dei Verbum, veneratione prosequuntur, qui quidem octoginta, quinque Canones Constitutionibus Clementis annectunt. Videndum igitur nunc est, an hujusmodi opinio possit sustineri citra Fidei Orthodoxæ jacturam?

SECTIO PRIMA

Quadam prenotantur.

107. **N**Otandum est I. Magnam inter Viros Doctos olim difficultatem viguisse, utrum verè ab Apostolis Canones eisdem adscripti, eorumdemque circumducti nomine, prodierint, vel potius subsequenter editi sæculis, ab aliquo Impostore eisdem fuerint attributi: mos enim inoleverat præcipuè apud Græcos, de quibus Gregorius Magnus, Leo Magnus, Gelasius, Aliique Romani Pontifices acerbè conqueruntur, non tantum Epistolas, Libros, & Sermones, sed etiam Ecclesiasticos Canones corrumpendi, ac sub alieno nomine falsam venditan-

ditandi, spuriaque miscendi legitimis. Hinc ultra Canonum collectionem in Calcedonenſi diſcuſſam, quam Eccleſiæ Codicem appellamus, aliæ prodire in duo volumina per Chriſtophorum Juſtellum redactæ. Multi proſectò hujusmodi Canones, veluti adulterinos, rejecerunt, pro quibus ſufficiat Gelafius in Concilio Romano 70. Episcoporum à Gratiano relatus, Cap. *Sancta Romana* Diſt. 15., & 16. c. 1. & 2. Quod quidem Decretum numquam à Poſterioribus Pontificibus videtur revocatum. Alii è contra citra exceptionem approbarunt, & revera in Trullen. Synod. Can. 2., in Nicæna II. Can. 1. & Syn. VIII. Can. 1. tamquam legitimi ſupponuntur, eoſque citant Epiphanius Hæres 70. de Audianis agens, Athanaſius in Sinop., Tertullianus cont. Praxeam, & ex Junioribus præ cæteris Turrianus à criminationibus Magdeburgenſium doctiſſimè vindicavit.

108. Notandum eſt II. Duplicem in Apoſtoliſ ſpectari prærogativam poſſe. Prima eſt, qua veluti Organa Spiritus Sancti verba ipſius mediatè, vel immediatè percepta Populis voce revelare, vel ſcripto debebant. Secunda eſt Potestas ſpiritualis, qua veluti Eccleſiæ Præſules, & Paſtores condere Leges, Pœnas præſcribere, Lites exorientes componere de Fide, & Diſciplina, cæteraque omnia, quæ ad Principatum Eccleſiaſticum pertinent, exercere poterant. Scribere Libros Canonicos ad prioris generis poteſtatem pertinet: ſcimus enim, plures Prophetas nulla regiminis authoritate præfulſiſſe, imò viles fuiſſe homines, ac plebejos, eoſ tamen Volumina Divinæ Scripturæ edidiſſe: è contra plures Apoſtoli Eccleſiaſtica præditi poteſtate, quos tamen novimus, nullum Scripturarum Volumen edidiſſe. Hinc diverſa eſt

authoritas Divinæ Scripturæ, ac Ecclesiæ Decretorum: Illa enim se habet per modum inspirationis, ista per modum Prælationis. Scriptores enim Canonici asserunt se loqui, Domino loquente: Præfules autem asserunt, se decernere, Domino dirigente. His præmissis sit

SECTIO SECUNDA

Dicendum est, Canones Apostolorum, etsi Apostolorum fœtus admittantur, non esse Verbum Dei, & Scripturam Canonicam.

109. **O** Stenditur breviter i. sic. Canones isti Apostolici, sive quinquaginta priores, sive posteriores spectemus, in nullo Divinarum Scripturarum Cathalogo continentur: profecto enim in Canone Judæorum inveniri non possunt, cum ad Novum Testamentum pertineant: neque in Canone Novi Testamenti, neque apud Laodicen. cap. 59. aut apud Charthagine. III. cap. 47. aut apud Romanum sub Gelasio, aut in Floren. in Decret. Union., aut Instruc. Armen., vel in Triden. sess. 4. aut ab Innoc. I. ad Exuper. Tolos. Episcop. cap. ult. ullo pacto recensentur; ergo Ecclesia non censet, eos esse inter Sacras Scripturas numerandos.

110. Neque dicatur: Canones illos non includi quidem in Cathalogis Scripturarum, sed neque excludi:

111. Refutatur enim instantia: tumquia Cathalogi illi vim habent Legis, & Regulæ, quibus à falsis vera, & Divina eloquia discernuntur. Tumquia si hoc Argumentum convinceret, Liber Pastoris, Evangelium Barnabæ, & Andreæ Apostolorum, & Alii, qui in
Decre.

Decreto Gelasii proscribuntur, quoniam in Cathalogis Conciliorum, & Pontificum minimè videntur proscripti, Canonici dicerentur, quod tamen falsum est.

112. Ostenditur II. Nam quinam sint Libri Canonici, ab Ecclesiæ Decretis præscindendo, ex ejusdem novimus Traditione: hanc autem ex dictis, ac sententiis Patrum colligimus, qui ab Ecclesiæ primordiis usque ad nostra tem-
 ra floruerunt: ex Libris autem Patrum nullo modo habetur, Canones Apostolicos Divinæ ab iis existimatos authoritatis, cum illos nunquam, ut Divinos citent: vel iis ad dogmata stabilienda, veluti Divinæ authoritatis, utantur; vel, si eos magna dignos censent veneratione, ut Athanas. in Sinop., Canonicis tamen inferiores agnoscunt, quod sanè de verè Divinis nequaquam dici potest. His enim, etsi aliquando aliqui ipsorum in dubio fuerint: ut Libri Esther, Tobie, Sapientie, Ecclesiastici, & aliorum; tamen ad dogmata stabilienda, atque Hæreticos revincendos usi sunt, ut optimè Bellar. lib. 1. de Verb. Dei à cap. 7. usq. ad 20.; ergò cum Canones hujusmodi apud Patres non fuerint Divinæ authoritatis, utique Verbum Dei dici non possunt.

113. Non minori absurditate recipiunt Æthiopes, saltem ut ipsis tribuitur, octo Libros Constitutionum Clementis uti Apostolicos, Canone 84., ex vulgo Apostolicis, fortasse decepti: quæ quidem etsi in sua puritate utiles sint, attamen Apostolicæ non sunt, cum ab ipsismet Apostolis minimè prodiisse noscantur, atque, ut modò eas habemus, multis erroribus, qui Abyssinis adscribuntur, sordescant, & propterea in Synod. Trul. Can. 2. à Cræcis fuerint repulsæ; igitur hujusmodi Constitutiones,

nes, sive secundum se spectatæ, sive ut modò inveniuntur, utpotè corruptæ, perperam ab Abyssinis veluti Apostolicæ recipiuntur, cum à Gelas. in Concil. 70. Episcoporum veluti Apocriphæ fuerint pronunciatæ.

SECTION TERTIA

Solvantur Argumenta.

114. **O** Bji. I. Canones vulgò Apostolicos agnoverunt Oecumenica Concilia, verè ab ipsismet Apostolis prodissè, ex Trull. Can. 1. ex Syn. VII. Can. 1. & VIII. Can. 1., & ex Adrian. I., qui Septimam Synodum confirmavit, asserente, se ratam habere VI. Synodum, cum Canonibus suis: hæc autem VI. Synodus, quæ Canones condidit, non potest esse, nisi Trullensis, cum vera VI. Synodus nullos Canones condiderit, sed solummodo Monothelita. Hæreticos anathemate damnaverit; ergò Canones Apostolici sunt verè Dei Verbum, quoniam ab Apostolis prodierunt, qui fuere quoque Divini Verbi Scriptores.

115. Respon. permitto ant., & neg. consequ. Tumquia non omnes Apostoli Canonicas Scripturas ediderunt. Tumquia Canones editi fuerunt ab Apostolis, non tamquam Canonicis Scriptoribus, sed tamquam Ecclesiæ Prælati, atque Pastoribus. Idcirco à Conciliis præfatis asseritur, se Canones Apostolorum recipere cum Nicænis, Ancyranis, Gangrensis, & Aliis, quos profectò constat non esse Verbum Dei, etsi Dei inspiratione conditos, & totius Mundi reverentia consecratos, ut ait Leo Magnus Epist. 84. eo pacto, quo Leo IV. Epist. ad Episcop. Britan. relat. Dist. 2. cap. 1. de Libel., & Comment. scribit, recipi Canones
Apo-

Apostolorum cum regulis Præfulum Romanorum Sylvestri, Siricii, & Innocentii: *Per quos judicant Episcopi, & Episcopi judicantur, & Clerici*: Hos autem nemo unquam somniavit, aut dixit esse Verbum Dei.

116. Resp. II. ne. aut. ad cujus probat. quantum ad Trullense jam Eruditi noverunt, nec Oecumenicum, nec legitimum fuisse Concilium, & cui Apostolica semper autoritas defuit. Cæterum non dicit Trullense, Canones illos esse Apostolorum, sed tantum nomine editos eorumdem. Quantum verò ad Septimam, & Octavam Synodum, hujusmodi Canones acceptantur in ea opinione, in qua versabantur, quatenus sub nomine Apostolorum solummodo veniebant, non autem censebantur verè Apostolorum: Trullensem enim secutæ sunt eos Canones recipientem sub nomine Apostolorum, non quod revera ab ipsis prodiisse censerentur.

117. Nec movet Adriani I. autoritas: solummodo enim vult, ratam haberi Sextam Synodum cum Canonibus suis, idest regulis credendi, solas quippè credendi regulas edidit, non autem agendi, quales sunt Apostolici Canones: quo pacto intelligenda quoque est Professio Fidei Romanorum Pontificum pollicentium, se Decreta Conciliorum Generalium servaturos, inter quæ Canones quoque vulgò Apostolici continentur.

118. Obji. II. Tertullianus Lib. adversus Praxeam scribit, Canones vulgò Apostolicos esse nobis per manus traditos. Athanas. in Sinop. eos numerat inter Agiographos. Damascen. lib. 4. de Fid. Orthod. ponit eos inter Divinas Scripturas; ergò Canones vulgò Apostolici sunt Verbum Dei.

119. Resp. A Tertulliano non dici, Canones vulgo Apostolicos esse Verbum Dei, sed ad nos Traditione perductos: quod utique verificari potest, etiamsi Dei Verbum minimè dicantur. Athanasius pro nobis facit: dum enim asserit, Canones illos Agiographos esse, utique fatetur, ipsos tempore suo dubiæ authoritatis extitisse: cum autem dubium hoc numquam fuerit sublatum, profecto remanet: adeoque minimè constat, Canones hujusmodi posse in præsentì vocari Verbum Dei. Damascenus Sacras Scripturas eo loco largè intelligit pro omni eo, quod est Ecclesiæ regula, non in rigore: vel si in eo sensu loquatur, deceptus est Can. 2. Synod. Trull., post cujus tempora vixit, Verbum Dei in laxa mimimum significatione sumentis.

120. Obji. III. Canones vulgo Apostolici semper fuerunt in Ecclesia servati, nec ab ulla Synodo, vel Romano Pontifice fuere inventi; referuntur quippe ex Dionysio Exiguo in Exord. Collec. Canon., quos è Græcos in Latinum, Stephano Salonitano Episcopo rogante, apud Cassiod. de Divin. Lect. cap. 23., transtulerat, à Clemente veluti ab Apostolis conditi; ergò ex Apostolica Traditione prodeunt, cum ex August. de Baptis. cap. 24. quod semper servatum est, nec ab ullo Concilio, aut Romano Pontifice legitur statutum, ex Apostolica censeatur Traditione descendere; ergò ab Apostolis fuere hujusmodi Canones conditi; ergò sunt Verbum Dei.

121. Resp. ultimum conseq. esse malam! Verbum enim Dei qua tale est, ut ab Ecclesiæ secernitur Decretis, debet esse per inspirationem, non autem per prælationem, & publici magisterii authoritatem conditum: alioquin

quin etiam Pontificum, & Synodorum Generalium Decreta Verbum Dei dicerentur, quod nemo dixerit: Canones autem vulgo Apostolicos hoc posteriori modo esse constructos, ex hoc conjicio, quia nimirum eos Apostolis Jerosolymę, juxta Abyssinorum sententiam, ob varia Ecclesiastica negotia, præcipue ob editionem Symboli, ac eorumdem per varias Provincias ad disseminandum Evangelium distributionem anno Christi 44. juxta supputationem Baronii, & 2. Claudii Imperatoris, in unum adunati conciliariter ediderint, & innui videtur A&. 16. 4. si ergo conciliariter Canones sub nomine Decretorum ab Apostolis fuere conditi, non utique ab ipsis veluti Canonicis Scriptoribus prodierunt, sed veluti Ecclesię Prælati, adeoque dici nequeunt in rigida significatione Verbum Dei.

122. Cæterum ad ant. dici potest, ignorari à quonam Pontifice, vel Synodo fuerint editi hujusmodi Canones; non tamen inde Apostolicos esse: si enim positivè sciretur ab Apostolis prodierint, nemo illos respuere ausus fuisset, cujus oppositum docet loco citato Dionysius Exiguus, subdit enim: *Quibus quamplurimi quidem consensum non præbuere facilem, & tamen postea quadam constituta Pontificum ex ipsis Canonibus assumpta videntur:* cum ergo magna de ipsis semper fuerit dubitatio, an ex Apostolis revera prodierint, asserere nequaquam possumus, eos esse Verbum Dei traditum, dubia existente Traditione.

123. Quæres: quanam igitur autoritate gaudent in Ecclesia hujusmodi Canones, & Constitutiones Clementis?

124. Resp. Canones priores quinquaginta, quoniam juxta Epiphanium loc. cit. in iis:

Omnis regularis ordo habetur, & nihil à Fide adulteratum, neque à Confessione, neque ab Ecclesiastica gubernatione, & regula, magna dignos esse veneratione. Quamvis enim nec inter Canonicos computentur Libros, nec omnino exploratè constet, Apostolicos esse; vetustissimos tamen fateri compellimur, usuque Ecclesiæ roboratos, atque firmatos.

125. Clementis autem Constitutiones nonnulla quidem continent Ecclesiasticis sanctionibus, Fideique Catholicæ adversa, ac proinde à Gelasio in Concilio 70. Episcoporum, ut Apocriphæ respuuntur. Quia tamen multa utilia complectuntur, & antiquissimas esse, utpote ab Epiphanio, & Athanasio agnitas, certissimum est, & apertè deducitur ex Synodo Trullensi cap. 2. ubi licet respuantur, innuitur tamen antiquitas, cum in usu apud Græcos fuisse asserantur, utique non sunt contemnendæ, aut rejiciendæ, sed debita cautione lustrandæ, uti de Libris Recognitionum ejusdem Clementis censet Bellarminus de Scriptoris Ecclesiasticis in Clemente: & si purgatæ inveniri possent, easque Clementis esse verè constaret, eandem authoritatem, quam cæteris Summorum Pontificum Decretalibus, quotquot Catholici sumus, tribuimus, profectò exigèrent.

C A P U T VI.

Utrum Concilium Epbesinum I. legitimum sit, & Oecumenicum?

126. **H**Ujusmodi Synodi celebrandæ causa fuit Nestorius, qui, cum è Monacho Antiocheni Constantinopolitanum Patriarcha-

chatum, Theodosio Juniore Augusto promoven-
te, Joanneque Præsule Antiocheno impellente,
occupasset, hæresim, quam in solitudine con-
ceperat, propalavit. Vix enim Solium patriar-
chale Regiæ Urbis ascendit, cum extemplo
Mariam Virginem nequaquam esse Deiparam,
sed Hominem purum peperisse, Anastasio Presby-
tero, concione ad Populum habita, eructante,
nedum minimè restitit, sed palpando approba-
vit, & obstinatè defendit. Cum verò monitus
opportunè à Cyrillo Alexandrino, atque à Cæ-
lestino Romano Pontifice resipiscere noluis-
set, sed potius errorem mordicè tueretur,
nec ipsi Propugnatores deessent, ac proinde in
maximo periculo Ecclesia Dei versaretur, hoc
proinde Concilium Ephesi in Asia, consen-
tiente Romano Pontifice Cælestino I., à Theo-
dosio Juniore Augusto collectum est, in quo
Præside Cyrillo Alexandrino nomine Cælesti-
ni, cum Arcadio, & Projecto Episcopis, &
Philippo Romano Presbytero Apostolicæ Se-
dis Legatus, Nestorius veluti Hæreticus fuit
damnatus, ac Patriarchatu, & Sacerdotio nu-
datus, veritas Catholica de Unitate phy-
sica unius Personæ in Christo, quam Nestorius
impiè denegabat, stabilita, ac Beatam Mariam
semper Virginem veram Dei Genitricem fuis-
se, sancitum est. Hæc omnia luculenter, &
ampliori stylo describit Historiæ Ecclesiasticæ
Parens Baron. ab anno Christi 428. usque ad
an. 433. Hanc porro Synodum Nestorii Sequa-
ces, qui adhuc in Oriente degunt, hæresim-
que sequuntur, veluti illegitimam, nec Oecu-
menicam, detestantur, atque proscindunt. Vi-
dendum est, an fundamento aliquo nitantur?

S E C T I O P R I M A

Dicendum est Synodum banc Ephesinam esse legitimam, & Oecumenicam.

127. **E** Vincitur breviter, quia in Ephesino I. conditiones omnes ad Oecumenicum, & legitimum Concilium requisitæ inveniuntur. I. Enim ad legitimam, & Oecumenicam Synodum requiritur, quod à suprema, & Ecclesiastica Romani Pontificis aut horitate colligatur, aut imperantis, aut saltem consentientis, ex antiquo, & Apostolico Canone ita præscribente, apud Athanas. Apol. 2., Socratem lib. 2. cap. 13., Sozomen. lib. 3. cap. 9., Niceph. lib. 9. cap. 5., Ephesinum autem I. auctoritate Romani Pontificis fuisse collectum, habemus ex Synod. VI. in orat. Prosfphonet. Aët. 18., & Gelasio in Synod. Rom. I.: ipsumque Imperatorem Theodosium Juniorem, hujusmodi Synodum postulasse, probat. Baron. ad an. Christi 430., missioque Legatorum Arcadii, Projecti, & Philippi, qui eidem præsiderent, satis apertè demonstrat.

128. II. Conditio est, ut omnes Episcopi ex Universo Orbe ad Synodum vocentur; hujusmodi autem convocationem Ephesinæ I. Synodo minimè defuisse, patet ex Actis Concilii, ex quibus constat, quantum ad Ecclesiam Orientalem, omnes ejusdem Patriarchas, & Metropolitans fuisse accitos; ex actis enim liquet, Nestorium Constantinopolitanum, Cyrillum Alexandrinum, & Joannem Antiochenum Patriarcham Synodo adstitisse, Præsulesque Orientales ex omnibus Provinciis accessisse numero plusquam ducentos, ex Epist. Synod. ejusdem Con-

Concilii ad Imperat. , & in alia ad eundem , quæ habetur Par. 2. Aët. 5. , & in Epist. Synod. ad Cæles. Rom. Pontif. Occidentales verò, etsi personaliter minimè accesserint , saltem omnes , accessere tamen consensu , & legatione . Afri Patres , misso Bessula Chartaginensi Archidiacono Doctrinæ splendore præstantissimo , qui nomine Ecclesiæ Africanæ Synodo assisteret , & Præsulum , ob temporis angustiam , viarum impedimenta , Wandalicamque persecutionem , absentiam excusaret , ut Epist. Capreoli Chartaginensis Archiepiscopi , ac totius Africæ Primatis perspicuè testantur . Extat autem Aët. 3. Par. 2. Concil. Ephesin. ubi narratur , à Capreolo Divalem Theodosii Augusti . qua D. Augustinus novissimè defunctus ad Synodum vocabatur , apertam fuisse .

129. Cælestinus quoque Romanus Pontifex , præter Legatos à se missos , ut Synodo præficerent , Occidentalium Concilium coegit , & Nestorium damnavit , decisionem Ephesinorum Patrum prævit , & formam damnationis præscripsit , ex relat. Synod. ad Imperat. Reliqui verò Patres Occidentales Orientalibus assensu copulati sunt , ex Epist. ejusdem Synodi Ephes. ad eundem Imperat. Aët. 3.

130. Nec sanè aliæ Synodi , ut Calcedonen. , Constantinop. I. , cæteræque subsequentes alia ratione Oecumenicæ dici poterunt , nisi quia vel Occidentales Orientalibus , vel è contra Orientales Occidentalibus assensum præbuerunt .

131. III. Conditio est , ut Synodo suprema Ecclesiæ autoritas præsideat , qua dici possit , non sæcularem potestatem , sed Christum ipsum per Ministros suos præsedisse , & ipsos nomine ejusdem eandem direxisse , juxta illud :

Ubi

Ubi sunt duo , vel tres congregati in nomine meo , ibi sum in medio eorum , Mat. 18. 20. Hac autem conditione Ephesinum I. nequaquam caruit , cum Cælestinus I. Romanus Pontifex per Legatos suos , nempe S. Cyrillum Alexandrinum Patriarcham , & Arcadium , Projectum , & Philip um eidem Synodo præfederit , ex epist. ejusdem Cælestini ad præfat. Cyril. extante , inter acta Concilii , ex Liberat. in Breviar. cap. 5. , ex Prospero contra Collat. cap. 4. , ex Photio in Homo can. tit. 9. , ex Marcellin. in Cronic. , ex Synod. Floren. sess. 5. , ex ipsamet Synod. Ephes. in relat. ad Imperat. act. 3. & epist. Cælest. ad Synod. act. 1.

132. IV. Conditio est , ut dogmata controversa , causæque criminales juxta Divinas Scripturas , Traditiones Apostolicas , Patrum dicta , Jurisque regulas respective discutiantur : hæc autem omnia in Synodo Ephesina I. ad unguem servata sunt . Nam quantum ad ipsum dogma , exactissimo criterio discussum est . Primò enim Symbolum Apostolorum , quo Nestorius tuebatur errorem suum , expensum est cap. 3. & inventum à Doctrina ejusdem omninò dissonum ; & Doctrina Cyrilli , quam Nestorius respuit , omninò Symbolo uniformis . Deinde cum universalis Ecclesiæ sensus pro dogmatibus dignoscendis sit , juxta magnum Augustinum , certissima regula , de Baptis. cap. 24. : Epistola Cælestini I. Romani Pontificis cum Synodo sua , & Capreoli Chartaginensis Archiepiscopi , ac totius Africæ Primatis cum sua Synodo lustrata fuit , quibus omnibus Nestoriana Doctrina repugnare visa est , utpote nova , & absurda . Patres quoque antiqui consulti sunt , ex quorum Traditione eruitur veritas , & novitas hæretica liquidò apparet .

Pro-

Producti idcirco in medium fuere Patres celeberriores, ut Athanasius, Julius I. Romanus Pontifex, Theophilus Alexandrinus, Cyprianus Chartaginensis, Ambrosius Mediolanensis, Gregorius Nazianzenus, & Nissenus, Basilus Magnus, Atticus Constantinopolitanus, Anphilochius Atheniensis uno ore unicam in Christo Personam, eundemque verum Deum, & hominem conclamantes, Mariamque scilicet Virginem non modo Christiparam, sed Deiparam asserentes, seque intelligere hujusmodi veritates, sicut in Symbolo Nicæno continentur, & propterea Patrum dicta, Flaviano Philippensium Episcopo instante, nedum, relata, sed actis ipsis inserta fuere.

133. Exactissimum quoque de Nestorii hæresi criminale judicium absque ulla labe iniquitatis habitum est. Primò enim charitative à D. Cyrillo Alexandrino, ejusque Synodo, deinde à Cælestino Romano Pontifice fuit monitus, ex Epist. *Comperi*, & alia, *Cum Salvator*, ex altera, *Post impium*, quæ omnes inter acta Concilii Ephesi. habentur. Deinde vocatur in Synodo ad judicium, ut se ab objectis criminibus expurget, missa Episcoporum plurium honorificenti Legatione, & quidem non bis, sed ter, juxta Ecclesiæ stylum: at ipse venire contempsit: deinde blasphemiae ab eo prolatae adversus Christum, & Beatissimam Virginem, nempe ipsum Deum non esse, utpotè post bimetre, vel trimestre in lucem editum, nec Mariam esse Deiparam, cum ex homine, Deus nasci non possit, ex ipsiusmet Nestorii confessione ultronea in epist. Cælestini Papæ ad eundem Nestorium: *Post Prophanum*, & Ephesi lecta est act. 1., adducuntur. Idipsum probatur ex ejusdem Concionibus, Exegesibus, & Com-

& Commentariis in publicum productis, eisdem errores continentibus, ut ex ipsomet sententiæ adversum Nestorium prolatae tenore perspicitur. Cap. 4. act. 1. perpenditur Epistola Nestorii ad Cyrillum, & cap. 8. ejusdem act. 1. ex Libro quodam Nestorii multi quaterniones examinantur, erroribusque, atque blasphemis horrificis adversus Christum, & Mariam referti, & Ecclesiæ Catholicæ Doctrinæ adversi inveniuntur. Tandem evidentissima ex Testibus de visu, & auditu immediato, pertinacis, ac hæresum Nestorii cap. 6. act. 1. adducitur probatio, productis sex Testibus omni exceptione majoribus, nempe Episcopis, & quidam Nestorii aliundè amicissimis, qui de obstinatione, atque hæresibus, etsi lugentes, deponunt jurejurando coacti, missique à Cyrillo, ut Epistolas Synodi Alexandrinæ, atque Cælestini Romani Pontificis eidem Hæresiarchæ traderent: ista autem omnia sufficere abundè ad condemnationem, exploratum est.

134. Quantum enim ad contumaciam atque tinet, Nolens in judicio se sistere, Judicemque contemnens, habetur pro confesso, ut lite non contestata Cap. *Accedens*, & deponi potest Cap. *Veritatis*, ibidem: isteque communis est omnium Tribunalium stylus, maxime in Judicio Ecclesiastico, in quo, juxta præscriptum Christi Matth. 18. 17., post trinam monitionem Canonicam, qui obedire negligit, habetur tamquam Ethnicus, & Publicanus.

135. Confessio quoque ejusdem extrajudicialis, nedum in Epistola ad Cyril. Alexand. verum etiam ad Cælest. I. Rom. Pontif. quem Supremum Judicem agnovit, in quibus opiniones istas hæreticas Nestorius tenere profitebatur, & tueri, gravissimum inditium est:

pro-

propria enim Confessio, præsertim coram supremo Principe, qualis erat Cælestinus, condemnationem inducit, Cap. *Cum sit grave de Exces. Prælat.*, & docet Diplovatac. in Synop. tit. de Probat. Felin. in Cap. 1. de excep. & Alii plures apud Sgro par. 5. cap. 7.

136. Alia quoque Hæreticæ pravitatis probatio ex scriptis, & commentariis suis cap. 8. par. 2. Concil. Ephes. desumitur, in quibus hæresis præfata manifestè continetur, adeoque criminis obiecti præbet evidens Argumentum eo modo, quo Juris-Consulti de Scriptura perduellionis tractatum comprehendente sermonem faciunt, asserentes, quod, nisi negetur à Reo esse suam, crimen obiectum convincit. Ita Felin., & Anan. in cap. *Cum in Ecclesiis Caren.* part. 3. tit. 4. Soufa lib. 2. cap. 22. Nestorius autem numquam negavit, ea scripta esse sua, imò errores in eis contentos palam confessus est, & acerrimè defendit.

137. Denique nulla datur probatio concludentior, quam per Testes omni exceptione majores: sex autem Episcopi, & quidem amicissimi Nestorii testantur de auditu proprio immediato, hæreses præfatas à Nestorio fuisse prolatas, ut superius visum est; ergò convictus est Nestorius de hæresi revera prolata, & professa.

138. Neque dicatur, constare quidem de errore, non tamen de pertinacia in illo, quandoquidem neque legitur in Cælestinum Romanum Pontificem insurrexisse, neque ex actis evincitur Cælestini, & Cyrilli Alexandrini Sedis Apostolicæ in causa hac Legati cum Synodo sua, Epistolam fuisse ab eo lustratam; quorum utrumque, ut de pertinacia constaret, requiri videbatur.

139. Hoc

139. Hoc enim ex actis redarguitur, ex quibus habetur, à quatuor Episcopis Epistolas hujusmodi Nestorium accepisse: ex quo præsumptio vehemens oritur, illas quoque legisse, nisi evidenter oppositum ostendatur: quod sanè fieri nequaquam potest, cum post Epistolarum acceptionem in pejora legatur prolapsus; igitur apertissimam ostendit Nestorius pertinaciam, nolens Romano Pontifici charitative finiri, & judicialiter præcipienti obtemperare; ergò legitimè à Concilio processum est, ipsum ut Hæreticum damnante, veluti antiquarum hæresum renovatorem.

140. Ultima denique conditio est, ut Synodus Oecumenica à Supremo Ecclesiæ Pastore rata habeatur, & confirmetur, ut hoc pacto Christi ipsius oraculo in terris munita censeatur: hæc autem huic Synodo minimè defuit: nedum enim à Cælestino I., & Systo III. quorum Epistolæ part. 3. Ephes. VI. habentur, veluti à Sancto Spiritu directæ commendatur, verum etiam à Systo III. speciali Decreto confirmata est, & propterea illi eandem fidem, sicut Evangeliiis ipsis, uti Nicæno I., Constantinopolitano I., Chalcedonensi habendam esse, Gregorius Magnus asseruit.

SECTIONE SECUNDA

Solvuntur Objectiones.

141. **O** Bji. I. Ephesinum I. Concilium, non Ecclesiastica autoritate, sed Imperatoria collectum fuit: neque in eo potestas Ecclesiastica sedit, sed Cæsarea; ergò non fuit legitimum Concilium. Conseq. patet. Prob. ant. quantum ad primam partem: in
Edi-

Edictis enim , quibus Patres fuere convocati , nihil aliud habetur , quam Cæsaris mandatum , quo jubentur Patriarchæ , & Metropolitæ , cum Episcopis , qui sibi vili essent , ad Synodum accedere , & ipsimet accedentes profitentur , se mandatis Cæsareis obtemperare ; nulla Romani Pontificis facta mentione ; ergò Synodus autoritate Ecclesiæ non fuit collecta .

142. Secunda quoque pars liquet : nam in ipsomet Concilio habetur , à Cæsareis Legatis locum , & tempus fuisse præscriptum : Divalis Theodosii Augusti ante acta omnia legitur , ut patet act. 1. 2. Cum Imperator pravam de Synodo concepisset opinionem , acta veræ , & falsæ Synodi ab eodem rescinduntur . III. Cum Imperator fraudulentæ Hæreticorum fuisset admonitus , septem ex utraque parte ad se Episcopos pro informatione accersit . IV. Cum falsa informatione audisset Augustus , à Cyrillo Alexandrino Patriarcha , & Memnone Ephesinorum Episcopo tyrannidem exerceri , eos jubet carceri mancipari . V. Patres Ephesini petunt ab Augusto , Synodum , ejusque dogmata ab iis stabilita ejusdem confirmatione firmari , atque roborari , ut patet ex relat. ad Imperat. ; ergò verè Laica potestas Concilio præfedit , ipsumque veluti Caput direxit ; adeoque &c.

143. Resp. ne. ant. ad cujus probat. quantum ad primam partem attinet , quoniam Cælestinus Pontifex in sua ad Synodum Epistola eam veluti legitimum Dei Sacerdotum cætum commendat , neque Patres de violentia Laicali numquam conquesti sunt , dicendum est , collectionem Synodi executivè quidem ab Imperatore , at mandativè , vel saltem consensivè ex imperio Romani Pontificis fuisse convocatam.

Id

Id autem contigebat, eo quia, cum Synodi Oecumenicæ in Urbe Imperiali, ac sumptibus Augustorum fieri consueverant, æquum erat, ut ab iis Episcopi, & quidem eo numero, qui Augusto placuisset, vocarentur. Cæterum omnes invitabantur, nec quisquam repellebatur; & de facto etiam ex iis, qui Romano Imperio minimè subdebantur, venerunt, ut ex ipso met Concilii Cathalogo apparet, qui profectò mandato Augusti minimè obstringebantur, sed solummodo Romani Pontificis.

144. Secunda quoque pars nequaquam ex objectis evincitur: quod enim Divalis Augusti prius lecta fuerit, quam Romani Pontificis, id accidit, quia Legati ejusdem Ephesum pervenerunt, Concilio jam inchoato, & Nestorio condemnato, ex Aët. 3., & 4. Aët. autem 1. Epistola quidem Cælestini lecta est, non tamen ad Synodum directa, sed ad Nestorium ipsum.

145. Quod locum, tempus, & ordinem Synodi Imperatores præscripserint, præsentiam non arguit, sed defensionem, ut nimirum omnia pacatè, ordinatè, citraque seditionem ullam procederent, quod faciliùs Augusti præsentis imperio fiebat, quam Pontificis longissimè absentis; & quidem hoc, autoritate ab ipso met Romano Pontifice accepta, contigebat, quin ullo pacto se Imperatores in dogmatum decisione, aut aliorum negotiorum tractatione immiscerent, ut sæpiùs ipse met Theodosius prætestatus est.

146. Acta Synodi sive veræ, sive falsæ fuisse ab Augusto suspensa, vel irrita declarata, donec notitiam utriusque perfectam obrinisset, & causam diligentius actitari præceperit, præsentiam non arguit, cum ad dogma ipsum discussum minimè referatur, sed ad ordinem, & re-

stitu-

ætitudinem discussionis; à falsis enim relationibus audierat, omnia in Synodo præpotentia Cyrilli Alex., non verò legitimo examine fuisse confecta. Hanc verò Theodosii mentem fuisse, patet ex districtis, quas Candidiano Comiti Par. 1. Concil. Ephes. cap. 35. locum sui in Synodo retinenti præscripserat Commissionibus; ne scilicet in Quæstionibus, & Controversiis, quæ circa Fidei dogmata incidunt, ullo pacto se ingereret, & reddidit rationem, quia nimirum: *Nefas est, qui Sanctissimorum Episcoporum Cathalogo adscriptus non est, illum Ecclesiasticis negotiis, & consultationibus se immiscere.* Idipsum in Divali ad Synodum repetit.

147. Eodem pacto ad tertiam instantiam, reponendum est, Episcopos illos ex utraque parte à Theodosio vocatos fuisse, non ut de dogmate sententiam ferret, an rectè judicassent; sed an rectè in judicio processissent, remota tyrannide, seditione, & tumultu, quod sanè ad politicum pertinet Principem Concilii protectorem, ac vindicem.

148. Quod verò Cyrillus Alexandrinus, & Memnon Ephesus in carcerem fuerint detrusi, nihil hujusmodi violentiæ Ephesinæ Synodi validitati adversantur: tum quia cum ejusdem, quoad substantiam celebratione, nempe Nestorii, ejusque Doctrinæ damnatione posteriores fuerint, ejus vigorem nequaquam evertunt: tum quia Candidiani, Irenæi, aliorumque Nestorii fautorum actiones iniquissimæ Ecclesiasticæ Potestatis usurpationem reipsa continebant, & propterea Theodosius eas condemnavit, atque rescidit, & Comites illos Ecclesiæ contemptores acri animadversione mulctavit.

149. Ad ultimum dico, confirmationem Theodosii à Patribus expetitam fuisse executivam.

vam , quatenus , pœnis corporalibus impoſitis , refractarios ad obediendum Synodo compelleret , ut Conſtantine quoque Magnus ſe cum Synodo I. Nicœna geſſit , & ſubſequentes egere erga Generalia Concilia Auguſti Principes ; non verò authoritatem , qua deciſionibus à Synodo emanatis ultimum robur adiicitur ; & pondus validitatis adhibetur , itaut de eo nefas ſit amplius dubitare ; hoc enim poſteriori ſenſu minime illam Patres Ephēſini à Theodoſio petierunt , Aſt. 1. de Depoſ. Neſtorii , bene vero in priori : neque enim verè juridicum calculum Doctrinæ ab iſtis definitæ ipſemet appoſuit .

150. Obji. II. Concilium hoc præcipitanter nimium ob meras Cyrilli Alexandrini Neſtorio inſenſi ſimultates negotia Sacra peregit , & Neſtorium oppreſſit ; ergò illegitimum eſt . Conſeq. patet , prob. ant. , quantum ad primam partem de nimia celeritate , patet ; nam examen , & condemnatio Neſtorii una actione , ac die confectum eſt , cum adhuc Legati Apoſtolici Romani , & Joannes Antiochenus Patriarcha nondum acceſſiſſent , ex Liberat. Diacon. Breviar. cap. 3. , & ex Epiſt. Ibæ Epiſcop. Edeſſ. ad Marium Perſam : Synodi verò hujus , non Religionis zelo , ſed privatis ſimultatibus agitados Epiſcopos proceſſiſſe , patet ex Liberat. Breviar. cap. 5. inquit enim : *Joanne remorante , Quæſtionem movebant præſentes Epiſcopi de Beata Virgine Dei Genitrice . Cyrillus autem deſecrationes quaſdam Librorum Neſtorii faciebat , cum perturbare volens , erat enim , ut dicitur , ejus inimicus .* Similia dicuntur cap. 6. ubi narrata excommunicatione , quam Joannes Antiochenus adverſus Cyrillum , & Memnonem vibraverat , ſubdit ; *Igitur Cyrillus cum Memnone volentes ſe ulciſci , Joannem damnaverunt ,*

*derunt, & omnes, qui cum eo convenerant, & multa alia pari fastu, utrique Ephesi per-
tulerunt: Isidorus Pelusiota Vir celeberrimus, &
& gravissimus, ac Cyrilli Alexandrini amicis-
simus, Epist. 31. monet eum, dici de ipso, pri-
vatas injurias sub obtentu Religionis vindica-
ri, imitarique Theophilum Avunculum suum
Chrysostomo insensum, dum Nestorium inse-
quebatur ejusdem Sedis Antistitem, & Epist. 370.
hortatur, *Ut quiescat à contentione, nec ultio-
nem propriam injuriarum, quæ à mortalibus ho-
minibus debetur, exigat à viventi Ecclesia, &
æternam discordiam sub prætectu pietatis adi-
ficiet.**

151. Nestorium quoque oppressum fuisse, patet apertissime, cum brevissimo tempore fuerit causa expedita, adeoque defensiones suas texere nequaquam permissus: tumquia Nestorius minimè negavit ad Concilium accedere, sed tenuit accedere ad Synodum non adhuc plenam, ex Epist. ejusdem ad Imperat. Par. 2. Act. 1. Concil. Ephes., cum Joannes Antiochenus Patriarcha, ejusque suffraganei nondum accessissent, qui propterea se non expectatos conquesti sunt; ergò Concilium nec rectè processit, neque ordinate; nec Divino Spiritu egit impellente, ac dirigente: Nestorius verò contumax nequaquam fuit, utpote non auditus; ergò oppressus.

152. Resp. neg. ant., ad cujus probat. quantum ad primam partem attinet, nempe nimiam celeritatem, & præcipationem, dico, verum quidem esse, unica die, vel biduo Actionem unicam, qua Nestorius damnatus est, fuisse completam: at nego, hanc fuisse nimiam celeritatem, ac causæ præcipientiam: nam, quantum ad factum ipsum attinet, apud

omnes notorium erat, cum publicè Constantinopoli, imò Ephesi ipse Nestorius, ejusque Discipuli opiniones suas proderent, & ideò tot scandala, Populique, & Cleri clamores adversus eum eruperant: idcirco longiori nequaquam examine indigebat. Doctrina verò in antiquis Hæreticis erat jam condemnata: nec mirum est, unica die in causa fuisse conclusum, cum ante adventum aliorum Episcoporum, præcipue Joannis Antiocheni Patriarchæ, qui consulto accessum differebat, Nestorium juvaturus, omnia Hæresiarchæ scripta perpenſa sunt: Patrum authoritates adductæ: Synodi Romana, & Ægyptiaca lustratæ, & vota Episcoporum vocalium audita, nihilque ad exactam cribrationem causæ omisſum; cætera verò Concilii negotia Fidem minimè tangentia, sed Ecclesiasticam tantummodo Politicam, ad sessiones posteriores relegata, ut brevitati consuleretur, cum Episcopi ob aeris intemperiem, aliasque causas ab iis adductas ibidem diutius consistere non possent, & dimitti postularent: hæ autem causæ in cæteris Conciliis nequaquam militabant, & propterea male ab ipsis ad Ephesinum hoc arguitur.

153. Quantum verò ad secundam partem, quod dicitur, nempè Synodum ex privata similitate processisse, non zelo Catholicæ Religionis, insulsum omninò videtur: si enim Episcopi circiter ducenti, qui ex Orbe Universo convenerant, spectentur, quamnam cum Nestorio similitatem habere poterant, nuper ad Solum Regiæ Urbis erecto, quemque fortasse, nisi ex nomine, ante cognoverant? Neque hæc Cælestino Romano Pontifici obijci poterat, quem Nestorius ipse, veluti Supremum Ecclesiæ Principem agnoverat literis ad eum datis; qui-

quique ipsi paulò ante de adepta Patriarchæ dignitate fuerat gratulatus, & veluti Catholicum Præsulem commendaverat, cujus Epistolæ in Actis Concilii extant.

154. Ob eandem rationem nulla quoque Cyrilli Alexandrini à Nestorio ante motam de Doctrina litem apparet inimicitia: quod enim ipse Theophili Alexandrini Chrysostomo, cujus Cathedram Nestorius obtinuerat, infesti Nepos, & Successor extiterit, quid evincit simultatis Cyrilli cum Nestorio Chrysostomi Successore minimè immediato? Ex zelo igitur solummodò Fidei Orthodoxæ dissentio illa ortum duxit: Cyrillus enim eum Regiæ Urbis Episcopatu ornatum magnis laudibus commendavit, literis ad Theodosium Augustum datis, ex Baron. loc. cit.: audita verò ipsius hæresi, amantissimè, & charitativè eum, ut ab errore recederet, admonuit: cum verò in sententia immobilis permaneret, Fidei discrimen animadvertens, hæresim illam ad Romanum detulit Pontificem: in Synodo sua Alexandrina proscidit, & jubente Cælestino, Synodi Ephesinæ præsidentiam assumens, cum cæteris Patribus impietatem Nestorianam prostravit.

155. Liberatum verò, Isidorum Pelusiotam, Socratem, & Alios malè tunc de Cyrillo, imò de ipsamet Sancta Synodo sensisse, nequaquam inficior, vulgi dicacitate, atque Hæreticorum oblocutionibus abreptos, quod omnibus Oecumenicis Conciliis novimus commune: omnia tamen hæc nubila, veritate coruscante, progressu temporis dissipata sunt, Cyrillo, ac Synodo gloriæ culmen adeptis, Nestorio autem, & Affectis in extremum ignominiae prolapso.

156. Nestorium quoque in Ephesino op-

pressum, apertissima calumnia est, ac perpetua damnatorum Hæreticorum cantilena. Nestorius etiam ut Patriarcha Ephesum venit; vocatus juridicè fuit, & quidem ter invitatus honorificenter, ut causam suam coram Synodo diceret; renuit superbissimè se eidem sistere; imò nec invitantium Episcoporum voces audire: unica autem die ipsius causa fuit absoluta, quia ante pluribus diebus discussa, atque in re notissima examine adeò diutino nequaquam indigens.

157. Nec tenebatur Synodus ulteriùs expectare, cum Joannes Antiochenus significasset, se tempore præfixo venire non posse, adeoque dici non poterat contemptus, & Synodus absque ipso irrita voluntariè absente; ergò Nestorius renuens accedere fuit contumax legitimæ Synodo, adeoque justè damnatus.

158. Objicies III. Ecclesia Decisiones de Fide Ephesini primi minimè censuit infallibilis autoritatis; ergò non est legitima Synodus, cujus Decreta infallibilem habere certitudinem debent, juxta Oraculum Christi Matth. 18. 20. *Ubi sunt duo, vel tres congregati in nomine meo, ibi sum in medio eorum*. Antec. autem perspicuum est: nam definitio Ephesini de Unitate Personæ in Christo Anathematismis Cyrilli Alexandrini innititur in Epistola Synodi Alexandrinæ contentis, cum nullum aliud speciale Decretum Synodi Ephesinæ habeamus; Anathematismos autem illos Ecclesia minimè censuit infallibilis autoritatis; eos quippe nedum ante, sed etiam post Ephesinam Synodum multi gravissimi Viri reprobarunt veluti Apollinaris, & Eunomii scabie fætentes, ut Theodoretus Epist. ad Rufum Thessalon. Episcop. , Ibas Edesenus Epistolâ ad Marim. Per-

Perſam, Maximianus Neſtorii in Sede Conſtan-
tinopolitana Succellor, apud Liberat. in Breviar.
cap. 5., Joan. Antiochenæ Eccleſiæ Presbyter,
apud Gennad. Maſſil. Cathal. cap. 88., Acacius
Berreenſis Epiſcop. Epiſt. ad Domnum Antio-
chen. Patr. datis. Imò Cyrillus ipſe Alexan-
drinus, cum pax inter ipſum, juffu Theodoſii Ju-
nioris Auguſti, & Epiſcopos Orientales Joanni
Patriarchæ Antiocheno ſubjectos, tractarerur,
nedum formulæ Fidei eidem per Paulum Emiſ-
ſenum Antifitem oblatæ ſubſcripſit, ſed Ana-
thematiſmos quoque revocavit, ex Facundo Her-
mianenſi Epiſcopo lib. 8. cap. 5., & Iba Edeſſe-
no Præſule ad Marim Perſam; ergò Anathema-
tiſmi Cyrilli infallibili authoritate non gau-
dent, eos quippe Orientales Epiſcopi Joanni
Antiocheno Patriarchæ ſubjecti rejecerunt, ve-
luti hæreticos; & ob hanc rationem Synodum
quoque Ephelinam repellebant eoſdem appro-
bantem; ergò neque Ephelina Synodus iis
innixa; ergò non eſt Legitima Synodus.

159. Reſp. nego ant., ad cujus probat.
maj. negari poſſet: quamquam enim in Actis,
quæ habemus Synodi Ephelinæ, deſit Fidei De-
cretum, non tamen Anathematifmi fuerunt
vera Ephelini decifio, quæ Scripturis, Patri-
bus, & Traditionibus Apoſtolicis nitebatur:
damnatio verò Neſtorii in Actis Concilii erat
fundata.

160. Cæterum falſa eſt minor, cujus pro-
batio nihil evincit: tumquia, etſi concedere-
tur, nonnullos Viros Doctos Anathematifmis
etiam poſt Ephelini celebrationem fuiſſe ad-
verſos, nihil inde contra Cyrillum evinceretur;
cum particulares illæ Perſonæ de Anathematif-
morum puritate ancipites, aut vulgi opinione,
rumoribusque abreptæ, vel privato aliquo af-

fectu præoccupatę, vel rerum, uti reipsa evenerant, ignorare cespitarint, uti Viris quoque Sanctissimis, atque Doctissimis identidem novimus contigisse: tum quia Theodoretus, & Ibas ex Schismatica Joannis Antiocheni Patriarchę factione fuerunt, ac Nestorii labis suspecti, quam suspicionem in Chalcedonenſi Synodo purgare debuerunt, Nestorii doctrina, personaque damnatis: scripta verò adversus Anathematismos, & Epistola ad Marim Perſam in V. Syn. fuere proſcripta, & Anathematismi Cyrilli in integrum reſtituti, veluti puram Orthodoxę Fidei Doctrinam continentes. Gennadius, & Maximianus utpote Chryſoſtomi in Sede Conſtantinopolitana Succeſſores rumore vulgi abrepti, & odio Theophili Chryſoſtomo parum æqui non adhuc fortasse pacato incenſi, non ita benè de Cyrillo ſenſerunt; atque in hoc humana paſſi ſunt, & facile propterea à Nestorianis falſa informatione circumventi. De Episcopis Joanni Antiocheno Patriarchę ſubjectis nulla ratio eſt habenda, utpote aperte factioſis, turbulentis, & ſeditioſis, ut eos ipſamet Sancta Synodus in relat. ad Imperat. appellat. Act. 5. qui tamen, inita cum Cyrillo pace, dogmatibus Ephęſini, & conſequenter Anathematismis quoque, quoad ſubſtantiam aſſenſum præbuerunt, Nestorii damnationem, hæreſisque ipſius proſcriptionem, ex Liberat. cap. 8. Breviar., approbantes.

161. Porro falſiſſimum eſt, à Cyrillo capitula ſua, ſeu Anathematismos fuiſſe revocatos: id enim ſemper efficere conſtantiffimè negavit, ex ejuſdem ad Acatium Melitinę, & Donatum Nicopoleos Episcopum datis Epistolis: quare Facundus Hermianenſis Episcopus aſſerens, aut deceptus eſt, aut de explicatione, non revocatio-

catione intelligendus , ut scribit Liberat. Bre-
viar. cap. 9.

162. Cyrillum autem Formulæ Fidei à Joanne Antiocheno , Orientalibusque Episcopis porrectæ , veram Dominicæ Incarnationis Doctrinam in Ephesino stabilitam continenti , ut ipse ad Acatium Melitenensem Episcopum scribit , subscripsisse , non resipiscentiam arguit Actorum , sed miram humilitatem , mansuetudinemque Sancti Præfulis commendat , qui , cum esset sedis Superioris Antistes , non erubuit videri minor , animo Fratres lucrandi , subscribendo Formulæ Fidei ab inferiori Præsule , quasi hæresis suspectus esset , exhibitæ , & Libros suos , præter Anathematismos , præfatorum Præfulum tradendo examini , ex Theodoret. Epist. 83. & Epist. Cyrilli ejusdem ad Gennad.

163. Ob eundem finem Fratres lucrandi , à Joanne Antiocheno , ejusque Episcopis minime exegit Cyrillus , ut Anathematismis suis subscriberent eisdem suspectis . Satis illi fuit , damnari ab illis Nestorium cum dogmatibus suis , & condemnationem approbari , & assumptionem Maximiani ad Regiæ Urbis Sacrum , Thronum , ut legitimam ratam haberi ; quod etiam à Chalcedonensi Synodo præstitum est , compellente quidem Ibam , & Theodoretum , ut Nestorio , & dogmatibus suis Anathema dicerent , non tamen , ut Anathematismis Cyrilli subscriberent , quod neque Cyrillus ipse ab Orientalibus exegerat .

164. Ex hucusque dictis satis aperte constat , à Sectariis Orientalibus Nestorii discipulis Ephesinam Primam Synodum immeritò respui , tamquam illegitimam ; ipsi quippè nihil , quod ad Canonicum , Oecumenicum &c. Concilium requiritur , defuit ; hinc summam apud

omnes, demptis Schismaticis, aliisque paucis parum instructis, venerationem adeptæ est, cujus Majestatem, Sanctitatem, Humilitatem in antiqua Ecclesiæ Doctrina constantissimè servanda, Vincentius Lirinensis eo tempore non minùs vita, quam eruditione illustris, Par. 2. Commonit. cap. 2. admiratur.

165. Hujusmodi privilegia Ephesinæ Primæ Synodi posteriora Oecumenica Concilia agnoverunt, Doctrinam in ea traditam veluti cælitùs revelatam amplectentia; imò tantum abest, eam Synodum apud Posterios viluisse, ut amplio remper aquisierit dignitatem, ac majori semper in pretio fuerit; & propterea Cultus Beatissimæ semper Virginis Mariæ, quam Nestoriani Dei Matrem indignabantur asserere, incrementum, ac robur acceperit, ipsamet Pulcheriâ Augustâ, quæ Sacrosanctam Synodum apud Fratrem suum Theodosium à calumniis hominum iniquorum validè propugnauerat, Ecclesiam ad Deiparæ honorem, in Blachetnis nuncupatam, magnificentissimè construente, ex Niceph. lib. 15. Hist. cap. 2.; cujus imitatione processu temporis multæ Sacræ Ædes in honorem Deiparæ dicatæ sunt, atque in dies ædificantur; eadem Beatissima Virgo semper Dei Genitrix devotissimè appellatur, Salutationi Angelicæ in execrationem Nestorianæ impietatis additâ particulâ: *Sancta Maria Mater Dei*, apud Baron. ad an. Christi 433. ex Cedreno, & Evagrio.

166. Hinc patet, quam stolidè simul & impudenter Orientales Sectarii Ducem suum Nestorium ab Universali Ecclesia damnatum, atque ab Ephesina Prima Synodo solemnî sententia extra cætum Fidelium, ut Hæreticum, pertinacem expulsam, in albo Sanctorum recenscant.

feant , ac doleant injusſè à Patribus Ephēſinis condemnatum . Ante enim Synodum Ephēſinam Romanus Pontifex præmiſſa Occidentaliſum Synodo , ejus Doctrinam uti peſtilentem , hæreticamque proſcripſerat : Orientalis verò , Eccleſia ut Lupum , non Episcopum , Deiparæ , Chriſtique inimicum , novitatis hæreticæ artificem , hæreſumque antiquarum renovatorem proclamavit . Patres verò Ephēſini , examine Doctrinæ , errorisque inſtituto , rigidèque , ac diligentiffimè præſtito , reum ipſum invenerunt . Deſenſiones obtulit Sancta Synodus eum honorifica advocans Legatione , ut criminationes , ſicut ipſa magnopere optabat , excuteret , aut veniam poſtularer , clementiffimè obtinendam . Accedere detrectavit , ſuperbè Synodum contempſit , ac in errore pertinaciſſimè maluit ſordere . Quod igitur eum Synodus , ut hæreticum proclamare , tametſi lacrymis perfuſa , fuerit coacta , non Synodo adſcribendum eſt legitimè agenti , ſed obſtinationi Neſtorii judicium ſuum perverſum inſallibili Eccleſiæ ſenſui tumidiſſimè præferenti .

167. Solemnem hanc Neſtorii damnationem Univerſa in ſequentibus Conciliis Eccleſia ſecuta eſt , quam Principes Sæculi ſanctionibus ſuis confirmarunt , Neſtorium in Oaſim relegantes , ejus verò ſcripta , uti peſtifera proſcribentes . Extant adhuc ediſta Theodoſii Junioris , Valentiniani Tertii , ac Marciani Auguſtorum , quibus *Portenſa ſuperſtitionis Auſtor* ab iisdem appellatus Neſtorius ſeveriſſimè coerceatur , cujus dogmata proſcindit quoque Juſtinianus I. lib. I. cap. de ſumm. Trin. & Fid. Cathol.

168. Nonnulli putant , Neſtorium ad cor rediſſe , ex hoc , quod raptus in exilium pro-

tulerit, ex Liberat. Breviar. Cap.6. *Sacra Virgo dicatur Deipara, & ea, quæ fecerunt tristitiam, conquiescant.* At alii hujusmodi pœnitentiam Antiochi fuisse existimant, cum usque ad finem in hæresi permanserit, ita ut lingua, corporeque toto vermibus consumpto, blasphemus animam emisit in verba hæc sacrilega erumpendo: *Hactenus nobis persuasum non est, Mariam esse Dei Genitricem, ita in Theodosio minore, Cedreno referente.*

C A P U T VII.

*Utrum Chalcedonense Concilium legitimum sit,
& Occumenicum?*

169. **E** Utyches Constantinopoli ejusdam Archimandrita, seu Abbas Monasterii, Nestoriani erroris hostis insensissimus, ut ab eodem longius abesset, dogma novum excogitavit, quo assererat, in Christo Domino ante quidem adunationem duas integras fuisse Naturas: ipsâ tamen positâ, aut Naturam Divinam in humanam, aut humanam in Divinam fuisse conversam, aut utrasque mixtione ita fuisse confusas, ut ex ipsis una Christi Incarnata Natura emergeret. Errorem hunc Incarnationis mysterium destruentem Flavianus Constantinopolitanus Antistes, & privatis monitis, & publica correctione, Synodoque Episcoporum cœtu collecto, viribus omnibus abscindere nixus est: incassum tamen; Eutyches quippe sententiam suam, etsi à Synodo damnatam, & à Leone Romano Pontifice, ad quem appellaverat, reprehensam, nedum revocare contempsit, sed in apertam adversus Dei Ecclesiam perduellionem corruit. Homini
hujus

hujusmodi turbulento suppetias tulit Dioscorus Alexandrinus Patriarcha, non minus sceleribus, quam iisdem hæresibus infamis, qui adversus Leonem Magnum Romanum Pontificem Excommunicationis fulmen, quo eum ob narrata motiva feriverat, repellere insigni temeritate ausus fuit. Ut errores Eutychis, & proprios sustineret, Synodum à decepto Grisaphii Eunuchi fraudibus Juniore Theodosio Augusto Oecumenicam Ephesi celebrandam obtinuit; in qua Legati Apostolici Leonis Magni nequaquam præsidere permisi, Epistolâ ejusdem ad Flavianum, & dogmatis decisivâ minimè perlectâ, Flavianus Constantinopolitanus Episcopus injuriis, ac vulneribus affectus, ac interemptus, hæresis Eutychiana proclamata est, Episcopis ad subscribendum violenter metu catenarum, carcerum, necisque, abjectissimè compulsis, ac defensoribus veritatis in vincula coniectis. Rebus in pejora prolabantibus, ac Dioscoro Synodi Præsidente tyrannidem adepto, Religio in Oriente Orthodoxa summum periculum sustinebat. Ad hoc sollicitè tollendum, Marcianus Augustus, qui Theodosio II. defuncto successerat, non minus pietate, ac zelo Fidei recte, quam militari gloria clarissimus, animum unicè intendit, atque inde origo Synodi Chalcedonensis desumpta est, ut nimirum Ecclesiæ vulnera hujusmodi seditionibus, atque contentionibus inflicta sanarentur, ipsique pax pristina redderetur. Leonis igitur Primi Romani Pontificis autoritate, ac Marciani Augusti, simul cum Augusta Pulcheria opem, atque protectionem maximam impendentis, Synodus hæc Nicææ primùm in Bitinia, deinde Chalcedone prope Constantinopolim collecta est, ubi a sexcentis, & triginta Patribus, Legatis Apostolicis

Paschasino Lilibæi, Lucentio Asculi-Episcopo Præfidentibus, Dioscorus Alexandrinus Patriarcha Dignitate, ac Sacerdotio nudatur; Catholica Fides optimè explicatur, ac stabilitur; prava germina Eutychianæ, ac Nestorianæ hæresis excinduntur; attentata in prædatoria Ephesina II Synodo annullantur; ac pristino nitori Orthodoxa Religio restituitur. Nunc ergò inquitur, an hujusmodi Synodus legitima sit, & Oecumenica, necne? Discipuli enim Eutychis, & Dioscori, qui nunc in Ægypto, & Æthiopia versantur, præter alios errores, quibus inquinantur, Synodum hanc execrantur, veluti Synagogam malignantium, ac Nestorianorum Coetum, & Dioscorum Alexandrinum, uti Sanctum venerantur: Sanctum verò Leonem Magnum, qui eum condemnavit, diris proscindunt.

SECTIONO PRIM A .

Synodus Chalcedonenfis Oecumenica, & legitima Synodus dicenda est.

170. **O**stenditur breviter: Omnes enim habet conditiones ad Universalem, & legitimam Synodum requisitas.

171. I. Enim juxta Regulam antiquissimam ex Marcello I. Epist. ad Episcop. Antioch. Provin. & innuit VI. Synodus Act. 18. Serm. Proiphon. Oecumenicum Concilium autoritate Ecclesiastica Primæ Sedis colligendum est: optimè enim Athanas. ad solit. Vit. agentes: *Quando umquam judicium Ecclesiæ ab Imperatore auctoritatem habuit?* Synodus autem Chalcedonenfis autoritate Leonis Magni Romani Pontificis coacta est, ex Gelas. I. ad Episcop. Dar-

Dardan., & Episcoporum Secundæ Mesiæ ad Leonem Augustum; imò ex ipsomet Marciano Augusto Epist. ad Leonem I., qua ipsum rogat, ut Synodum convocandam præcipiat, utpote *Principatum in Episcopatu Divinæ Fidei possidens, eoque Authore, Pax fiat inter Fidei Catholicæ Episcopos*; &, si noluerit in Persona accedere, locum, & quæ tractari censuerit, præscribat; ergò authoritas Ecclesiastica convocativa Synodo Chalcedonensi nequaquam defuit.

172. II. Est, Ecclesiæ supremam Potestatem, nempe Romanum Pontificem Concilio præsidere, ut jure dici possit, Christum Cætui illi in nomine suo congregato per Vicarium suum præfuisse, non sæcularem Potestatem, quæ à Sacerdotibus mysteria Religionis discere debet, non eam docere, ut optimè Osius Cordubæ Episcopus ad Constantium Augustum: hac autem minimè caruisse Chalcedonensem Synodum, patet: nam Legati Apostolici Leonis Papæ Romani, nemine discrepante, munus hoc, nempe Paschasinus Lilibæi, & Lucentius Asculi Episcopus, & Bonifacius, ac Basiliius Ecclesiæ Romanæ Presbyteri exercuerunt, quorum meminit Leo Epist. ad Imperat. etsi hujus Basilii in actis nulla mentio appareat, aut mortui, aut revocati. Hujusmodi Sedis Apostolicæ Legati Primi sedent, loquuntur, subscribunt, Marcianus verò, qui per semetipsum in Synodo voluit adesse, post Episcopos omnes, qui act. 6. ait: *Nos ad Fidem confirmandam, non ad aliquam potentiam exercendam, exemplo Religiosi Principis Constantini, Synodo interesse volumus, ne vel ulterius Populi pravis suasionibus separentur.*

173. III. Est, Omnes Episcopos ex Uni-

verso Orbe convocari ad Synodum, itaut nullus legitimus Præsul excludatur, quin mediatur, vel immediatur accedere jubeatur. Ad Synodum autem Chalcedonensem omnes hoc pacto fuere convocati: nam, si de Orientalibus fiat sermo, sufficit Tractorias Marciani Augusti inspicere, quibus Antistites omnes Imperio Romano subiecti ad Synodum fuere accersiti: si verò de Occidentalibus loquamur, ad Synodum nonnulli venire, ab Imperatore minime invitati, ut Eustatius inter Saracenos Episcopus, Aurelius Adrumetinus in Africa, Resticianus alter in Africa Præsul; ex quo evincitur, non imperio Augusti, sed Romani Pontificis autoritate Præsules ex Universo Orbe ad Synodum illam accessisse.

174. Cæteri Orientales, qui non leguntur in persona Chalcedonense Concilium vidisse, consensu tamen, & adhæsione adfuerunt, præmissa Synodo, in qua dogmata controversa discussa sunt. Quo pacto Synodus Constantinopolitana I. Oecumenica dicitur, etsi nullus in ea Occidentalis adfuerit, eo quia Damasus Papa cum sua Occidentali Synodo cum Orientalibus in dogmate fuerit copulatus.

175. Attamen Chalcedonensis Synodus Patrum numero fuit celeberrima: juxta enim communio rem calculum, ex Nicephoro Calixto lib. 15. Hist. cap. 26., sexcenti triginta Antistites Cætum illum venerabilem ex omni Natione, quæ sub Cælo est, decorarunt.

176. Quatuor quoque Orientales Patriarchæ, nempe Anatolius Constantinopolitanus, Dioscorus Alexandrinus, Maximus Antiochenus, & Juvenalis Jerosolymitanus huic Synodo splendorem addiderunt, itaut in hujusmodi Cætu majestas Ecclesiæ quam maximè corusca-

ret.

ret. Itaque Concilio huic quantum ad convectionem, & numerum Episcoporum nihil defuit.

177. IV. Causas criminales, & dogmaticas, ob quarum decisionem Synodus fuit collecta, diligentissima discussione cribrari, utique Synodo competit Chalcedonenſi. Tria Synodo huic cogendæ motivum præbuerunt, nempe damnatio Dioscori, qui adversus Sedem Apostolicam insurrexerat, Synodi Ephesi-næ II. præſidentiam ſibi arrogando, & excommunicationem adversus Romanum Pontificem Leonem Magnum temerè jaculando, aliorumque gravium criminum fuerat accusatus: restitutio Flaviani Constantinopolitani Patriarchæ, à quo Eutyches depositionis sententiam revocaverat, in Synodo præſatæ damnati, atque interfecti: & hæſiſis Eutychiana duplicitem naturæ integræ in Christo Domino pertinaciter denegans, virusque ſuum in Eccleſia Orientali miram in modum ubique diffundens. Tria autem hæc diligenti examine fuere diſcuſſa.

178. Quantum enim ad primum, nempe Dioscori depositionem, atque damnationem, rectius procedi non potuit: nam audita criminum accusatione per Eusebium Dorilæi Episcopum, & alios, nempe Theodorum, Ischirionem, Athanasium porrecta, quod Dioscorus Eutychis opinionem teneret: quod homicidium commiſſiſſet: quod adversus Sanctam Trinitatem blaſphemaviſſet: quod fuerit incendiarius, impudicus, eleemoſynarum rapitor: quod adversus Romanum Pontificem Excommunicationis fulmen jactaviſſet: quod Episcopos in Epheso II. violenter ad ſubſcribendum ſententiæ Eutychianæ compulſiſſet: quod Synodo Oecumenicæ, excluſis Apoſtolicis Legatis, præ-

præfedisſet. Quæ omnia Teſtes probare ſe vel-
le parati erant; vocatus in iudicium accede-
dere contempſit, ac venire ſub inanibus præ-
textibus, aut quavis alia ratione ſe purgare
detrectavit.

179. Quantum verò ad ſecundum, nempe
damnationem Flaviani, quam Eufebius Dorilæi
Epifcopus injuſtiſſimam proclamabat, dili-
gentiſſimè Patres cauſam verſarunt: nam lecta
ſunt acta Conſtantinopolitani I., Ephefini I.,
nonnulla Nicæni I., ac Epiftole Cyrilli Ale-
xandrini ad Neſtorium, & Joannem Antio-
chenum I. de Partu Mariæ, Chriſtique Incar-
natione, ex quibus habetur, Chriſtum reve-
ra ex duabus naturis conſtare perfectis, nequa-
quam in unum coeuntibus, quod eſt Catholi-
cum dogma; ergò ex probationibus hujusmodi
certò conſtabat, malè, & injuſtè Flavianum,
quod iſta docuerit, & oppoſitum in Eutyche
reprehenderit, & propterea ipſum, quod in
ſenſu proprio obſtinatè perſiſteret, excommu-
nicatione mulctaverit, damnatum, & reſtitu-
tum Eutychem.

180. Hinc injuſtitia damnationis Flaviani,
& Eufebii Dorilæi cum eodem ſentientis adeò
mentibus omnium illuxit, ut ipſimet Judices,
& Proceres ſæculares, qui de mandato Impe-
ratoris ad protectionem Synodo aſſiſtebant,
eam agnoverint, ut patet act. 1.

181. Tertium Caput, nempe hæreſis ipſa
Eutychis, & Dioſcori, exactiſſimè verſatum
eſt. Act. enim 2. Nicæni I., & Conſtantino-
politani I. Symbola lecta ſunt, nec non duæ
Epiftole Cyrilli Alexandrini ad Neſtorium,
quæ in prælim. Ephefin. I. reperiuntur. Plu-
ra quoque loca Sanctorum Patrum ibidem le-
cta ſunt, Nazianzeni, Ambroſii, Chryſoſto-
mi.

mi, Cyrilli Alexandrini, & aliorum per Beronicianum Sacri Consistorii Secretarium. Epistola quoque Leonis Magni ad Flavianum, quæ totius Synodi regula fuit, lustrata est: cum, verò nonnulli Episcopi cespitarent, ad eos illuminandos, aliqui ex Doctoribus electi fuere, præcæteris Theodoretus Doctissimus Præsul. Lectæ quoque fuerunt Epistolæ pacificatoræ Cyrilli Alexandrini ad Joannem Antiochenum, ac pro ventilandis Fidei Quæstionibus, & confusione evitanda nonnulli Patres selecti fuere, pluribusque habitis consultationibus, & inter Patres collationibus, & perpensis Decretis Ephesini I., ac Epistolâ Leonis Magni ad Flavianum, Decretum Fidei editum est; ergò nihil omisere Patres examinis, aut naturæ consultationis dogmatum, quæ in controversiam Hæretici deduxerant; adeoque quantum adhuc nihil Chalcedonensi Synodo deest.

182. Tandem idipsum ad hominem ostendo. Synodus Ephesina I. juxta Adversarios legitimum, & Oecumenicum Concilium censetur; ergò etiam Chalcedonensis. Prob. conscq. nam quidquid in Ephesino decisum est adversus Nestorii impietatem, illud idem fuit in Chalcedonensi stabilitum: nec minùs in Chalcedonensi Nestorius, quam in Ephesino Eutyches jugulatus fuit: sicut enim Chalcedonense in Decreto Fidei adversus Nestorium declarat, Dominum Jesum Christum eundem esse Deum verum, & Hominem verum in duabus naturis, quæ in Personam unam, & substantiam concurrunt, subsistentem, non veluti in duas Personas divisum, sed unum, & eundem Filium Unigenitum Deum Verbum Dominum Nostrum Jesum Christum existere: ita Ephesinum
ad.

adversus Eutychem in Fidei Decreto asserit, non idcirco Christum dici unum, quod Dei Natura conversa, vel immutata facta sit Caro, nec quod in totum Hominem ex Anima, & Corpore conflatum transformata sit: sed quia Verbum Carnem animatam Anima rationali sibi copulaverit, & proinde factus Homo, Filius quoque Hominis diceretur; ergo sicut à Chalcedonensi Nestorius, ita ab Ephesino Eutyches palam damnationem retulit, asserta non minùs Unitate suppositi, quam diversitate Naturarum in eodem subsistentium; adeoque, sicuti admittitur ab Adversariis Ephesinum, ita Chalcedonense quoque admittendum est.

183. Hinc Synodi subsequentes Oecumenicæ etiam Orientales, nedum Ephesinam I., verum etiam Chalcedonensem uti Generales, & Oecumenicos Ecclesiæ Convētiūs receperunt, atque commendarunt; quæ profectò ab Adversariis minimè respuuntur, imo summa recipiuntur veneratione, quibus, uti quatuor Evangeliiis, Fidem haberi oportere, dixit Gregorius Magnus.

SECTIONO SECUNDA

Solvuntur Argumenta.

184. **O** Bji. I. Synodus Chalcedonensis apertè Nestorianis favit; ergo illegitima est. Conseq. patet. Prob. ant. Nam act. 1. ad Synodum recepit, act. 8. declaravit, causâ discussâ, Theodoretum Orthodoxum, qui tamen Nestorianæ labis erat gravissimè suspectus: tumquia Anathematismos Cyrilli adversus Nestorium in Ephesino I., & in subsequentibus Conciliis approbatos, acerbè impugnaverat: tum-

tumquā Joanni Antiocheno Nestorii publico fautori se conjunxerat: aët. autem 10. in integrum restituit Ibam Edessenum Episcopum, ob blasphemias adversus Christum prolatas inquisitum, ob quas in Concilio Tyri, & Berythi fuerat in judicium vocatus, & ob Epistolam ad Marim Persam, in qua commendatur Theodorus Mopsuestenus, apertus Nestorii assertor, & fautor: Nestorius excusatur veluti precipitanter in Ephesino I. damnatus, & phrasēs adhibentur Nestorium aperte fæcentes.

185. Nec dici potest, scripta illa Theodoretī, & Ibæ fuisse innoxia detecta: nam Synodus Quinta, examine instituto, ea hæretica invenit, atque declaravit, Can. 12. & 13. ad eaque damnanda Synodum Quintam Justinianus I. Augustus collegerat.

186. Imò Capitula illa fuisse à Chalcedonensi, approbata opinio adeò invaluit, ut multi propterea Viri gravissimi Quintæ-Synodo contradixerint, tam Orientales, quam Occidentales; ergò Chalcedonense Nestorianis, sive Doctrinam, sive Personas spectemus, favit; ergò &c.

187. Resp. ne. ant., ad cujus probat. quantum ad Theodoretum attinet, Virum doctrina, zeloque Episcopali clarissimum, dico, dedisse quidem motivum ob rationes in argumento allatas labem Nestorianam de illo suspicandi: at maculas omnes, nedum apud Leonem Magnum, cujus deindè jussu Episcopatuī fuit restitutus aët. 1. Chalced., sed etiam apud Concilium ipsum, cui Leo causam eandem iterum tractandam reliquerat, absterxit, emissa Fidei professione, Doctrina, Personaque Nestorii condemnata aët. 8.

188. Idipsum de Iba dicendum est: ipse enim

enim ob blasphemias quidem obiectas in Synodo Berythenſi, ac Tyrienſi examen ſubjicit rigidiſſimum: at, præmiſſa Fidei profeſſione, ejuratoque Neſtorio, abſolutionem impetravit, quia revera innocentia ejusdem ex ipſomet Proceſſu emeſſit, ipſomet Photio Epilcopo Concilii Præſide teſtante. Quantum verò ad Epiſtolam ad Marim Perſam, quoniam negavit apertè ſuam eſſe; nec potuit ab Accuſatoribus convinci, ita nec damnari debuit. Itaque quoque apud Chalcedonenſe immunis Ibas evaſit: nam judicio inſtaurato, Teſtibusque auditis, & Synodi Berythenſis, & Tyrienſis actis relatis, atque diſcuſſis, nullam quoad Perſonam retulit damnationem, Neſtorio cum dogmatibus ſuis expreſſè anathematizato.

189. Porro ſcripta Theodoreticontra Anathematifmos Cyrilli, & Epiſtola Ibæ ad Marim Perſam apud Chalcedonenſe, neque expreſſè damnata, neque recepta fuere, ſed in priſtino ſtatu relicta, cum hæreſi, quæ ſupponebatur in eis contenta, optimè jam à Concilio fuiſſet proviſum, nedum dogmata Neſtorii, verum etiam ejusdem Perſonam, ut hæreticam proſcribendo, & Doctrinam Incarnationis Dominicæ juxta ſenſum Cyrilli in Anathematifmis expreſſum declarando.

190. Ex his patet, Synodum Chalcedonenſem; neque cum Neſtorio docuiſſe, cujus dogma proſcripſit, neque Neſtorianis favoriſſe, adeo ut Theodoretum, & Ibam hujusmodi labis ſuſpectos, nedum ad dogma, ſed etiam ad Perſonam Neſtorii ejurandam compulerit. Hæc quoad Perſonas dicta ſint.

191. Quantum verò ad ſcripta dici quoque non poteſt Neſtorianis favoriſſe: quamvis enim expreſſè ſcripta Theodoreticontra Ana-

the-

thematismos Cyrilli, & Epistolam Ibæ nequaquam damnaverit, fecit tamen æquivalenter utrumque, ad Nestorii Doctrinam, & Personam execrandam compellendo: tumquia uterque Decreta Ephesini I. suscipiebat: tumquia quantum ad Anathematismos Cyrillus, cum quo Theodoretus amicitiam iterum revinxerat, hujusmodi proscriptionem minimè postulavit. Nec Patres censuerunt, Doctissimum Episcopum de Ecclesia optimè alioquin meritum, cui jam plenè satisfecerat, hac ignominia afficere.

192. Synodus autem Chalcedonensis consultum nequaquam putavit, scripta Theodoretæ, & Epistolam Ibæ ad Marim Persam speciali erroris nota inurere, ne sopitos tumultus intempestivè excitaret, & Nestorii Fautores, Theodori Mopsuesteni magnæ apud Orientales famæ Episcopi, cujus laudes in Epistola illa exponuntur, damnatione, iterum ad seditiones impelleret.

193. Quod verò scripta Theodoretæ, Epistola Ibæ, ac Persona Theodori à Synodo Quinta damnationem subierint, nullum Chalcedonensi Synodo nocumentum affert, quæ Theodori nullam fecit mentionem: Theodoretæ verò, & Ibæ Personas quidem absolvit, non tamen scripta ullo pacto approbavit, sed in suo esse reliquit: Synodus verò Quinta scripta quidem Theodoretæ, & Ibæ, non tamen Personas censuræ subiecit: adeoque, sicuti nulla inter Chalcedonensem, & Quintam Synodum Antilogia convinci potest, ita nec ullo pacto Synodus Chalcedonensis Nestorio, aut Sequacibus, vel Discipulis ejus favisse dicenda est.

194. Obji. II. Chalcedonense Concilium omnes Episcopos in prædatoria Ephesina II.

Sy-

Synodo lapsos admisit ; ergò illegitimum fuit. Ant. patet act. 1. Conseq. prob. Quia illi Episcopi in Ephesino lapsi , aut Hæretici revera fuerunt , Dioscoro , & Eutychi consentientes , ac Pseudo-synodo subscribentes ; aut saltem externè fidem abnegantes : adeoque depositi juxta Canones Elibertinos , Neocesarienses , & Ancyranos ; ergò inepti ad suffragandum in Chalcedonensi ; ergò Synodus Chalcedonensis , cui hujusmodi Episcopi Judices adstiterunt , illegitima est :

195. Resp. Episcopos in Ephesina prædatoria Synodo lapsos admissos quidem fuisse , sed venia priùs humiliter petita : nec fuisse veros Hæreticos , sed solummodo Fidei externæ abnegatores , quos quidem , cum pœnituissent , & misericordiam impetrassent , Sancta Synodus ad suffragandum admisit : Canones verò adducti de sententia ferenda loquuntur , non de lata , à qua si reipsa incurtissent , fuere , priusquam suffragarentur , absoluti , juxta vetustum cum Episcopis lapsis , & pœnitentibus Ecclesiæ morem , etiam in Septima Synodo cum Iconomachis , & in Octava cum iis , qui Photium fuerant sectati , & resipuerant , servatum ; ac proindè , cum non essent actu depositi , sed tantum depositione digni , cum quibus priusquam suffragarentur , dispensatum est , Synodus Chalcedonensis ex depositis , & hæreticis suffragatoribus minimè dici potest conflata . Quo tamen admissio , adhuc nihil officeret , cum pauci depositi , & excommunicati numerum longè majorem legitimorum nequaquam vitient , uti Synodus Nicæna I. nonnullis Arii Sequacibus , qualis erat Eusebius Nicomediensis , & Alii quidam , compacta , robur suum , atque splendorem nequaquam amisit .

196. Obji.

196. **Obji. III.** Chalcedonense in actionibus suis irregulariter processit, debito ordine nequaquam servato; ergò illegitimum est. Conseq. patet. **Prob. ant. I.** Enim damnationem, Personæ Dioscori, ejusdem Doctrinæ proscriptioni præmisit: Persona enim Act. 4., Doctrina autem Act. 5. & 6. fuit proscripta: hoc autem videtur irregulare; nam prius de perversitate Doctrinæ constare debet, in qua si quis pertinaciter perseveraverit, quoad Personam, quoque damnationem subeat, uti ex Athanas. ad Solitar. eruitur, & in Nicæno I. contigit, à quo Arius, & Sequaces perversam Doctrinam relinquere nolentes, & definitioni Ecclesiæ aquiescere renuentes, excommunicationis à Synodo, à Magno verò Constantino exilii pœnam retulerunt. **II.** Eutyches erroris Author, scandali excitator, & prædatoriæ Synodi artifex nulla multa fuit affectus, neque nominatim excommunicatus; Dioscorus verò ejusdem tantum Fautor, & Executor consiliorum, Sedem Alexandrinam, ac Sacerdotium amisit, exilioque, atque censuris fuit percussus, quod manifestam continere videtur Personarum acceptionem. **III.** Idem Accusatoris, & Judicis munus exercuerunt, nempe Paschasius, & Lucentius Apostolicæ Sedis Legati: Judicis quidem, dum locum Leonis Magni Romani Pontificis in Synodo tenuerunt: Accusatoris verò, dum Act. 1. institerunt, Dioscorum in judicium, uti Reum vocari, non sedere, ut Episcopum: hoc autem ipsimet Judices sæculares, qui nomine Augusti pro Synodi defensione ipsi assidebant, agnoverunt, dicentes Paschasino: *Si Judicis obtines Personam, non ut Accusator debes prosequi*; ergò irregulariter Synodus Chalcedonensis processit.

197. Resp.

197. *Resp. neg. ant.*, ad cuius probat. Quantum ad primum neg. Conseq. quævis enim regulariter loquendo in Synodis Oecumenicis de Fide ante omnia agatur, id tamen accidit, quando unicus cogendæ finis Synodi negotium Fidei fuit, ut in Synodo Nicæna I. contigit, cui Arianus error colligendæ causam unicè ministravit: quando verò motivum ex aliis causis ortum est, nec Synodus pacatè celebrari potest, nisi alia peragantur, tunc etiam ante Fidei causarum discussionem, negotia criminalia ritè tractantur. Chalcedonense autem Concilium Marcianus Augustus nedum ad hæreses exscindendas, verum etiam ad Ecclesiam Orientalem pacandam, Ephesinæ II. Synodi tumultibus, ac seditionibus quassatam, collegit, ut ex ipsius Divalibus enitet: cum verò id fieri ægrè posset, nisi causa Dioscori, secundæ Sedis Patriarchæ, ac potentissimi Præsulis, qui Ephesinas seditiones excitaverat, sibi que præsidentiam ejusdem perperam arrogaverat, ac nova dissidia suscitare poterat, tractaretur; idcirco Legatis Apostolicis postulantibus, iudicium ante omnia de Dioscōro Pontificis auctoritatis contemptore institutum est: at Episcopi in prædatoria Ephesina Synodo lapsi, ac pœnitentes, ut suffragio in Synodo potirentur, reconciliati sunt; qui quidem stylus in Ephesino I. cum Nestorio, in Sexta Synodo cum Monothelitis servatus est, ut acta Conciliaria pacificè celebrarentur.

198. Secunda instantia nihil evincit: idcirco enim Eutyches personalem non retulit sententiam: tumquia absens erat in exilium relegatus: tumquia nullum aliud crimen, præter hæresim, commiserat: tumquia jam à Flaviano Regiæ Urbis Antistite, Synodo sua approban-

te,

te, fuerat anathemate percussus, ac Sacerdotio, officioque nudatus; cum ergo fuerit in damnatione relictus, nova sententia minimè opus erat: tumquia laudando acta Flaviani, qui Eutychem damnaverat, & ea, quæ Ephesi perperam evenerunt, uti invalida revocando, æquivalenter etiam Eutychem ipsum condemnavit: Dioscorus autem aderat Concilio: contumax eidem se noluit sistere vocanti: multorum aliorum criminum, præter hæresim, Reus convincebatur: propterea acriorem meruit damnationem: neque ipsemet de hoc unquam querelam movit adversus Synodum, quasi Personas acceptasset. Cæteri verò Episcopi in Ephesina prædatoria lapsi veniam petentes, & Epistolam Leonis ad Flavianum acceptantes, pœnas quoque omnes evaserunt: quam indulgentiam Dioscorus quoque impetrasset, uti Patres Synodi ad Pulcheriam Augustam scribentes testantur, si scelerum suorum pertæsus veniam postulasset.

199. Ad Tertium dicendum est, eosdem non fuisse Accusatores simul, & Judices: ipsi enim crimina Dioscori Synodo veluti Judici instantes pro punitione minimè detulerunt, sed solummodo mandatum supremum Leonis I. Romani Pontificis, ne Dioscorus in Synodo ut Judex sederet, sed vocaretur ut Reus, exhibuerunt: inquit enim Paschasius I. ejusdem Legatus: *Beatissimi, atque Apostolici Viri Papæ Urbis Romæ, quæ est Caput omnium Ecclesiarum, præcepta habemus præ manibus, quibus præcipere dignatus est ejus Apostolatus, ut Dioscorus Alexandrinus Archiepiscopus non sedeat in Concilio, sed audiendus intromittatur: Cum intromissus fuerit, necesse est, ut illi objiciatur.* Ex quibus patet, crimine notorio usurpa-

tionis Apostolicæ authoritatis existente , Leonem Papam per Legatos suos præcepisse , Dioscorum ut Reum in iudicium vocari : quod Romano Pontifici , uti Supremo Ecclesiæ Principi licere , exploratum est ; igitur Legati Apostolici nequaquam munere Accusatoris fungebantur , sed Executoris solummodo voluntatis Apostolicæ præscribentis in Concilio adversus Dioscorum iudiciale delictorum suorum tractationem : quare cum Iudices sæculares dixerunt : *Si Iudicis obtines Personam , non ut Accusator debes prosequi* , non satis perspexerunt , cuius , & quam Personam Legati Apostolici gererent : cum verò moniti fuissent , statim acquieverunt ; unde instantia hæc parum legalis ruit .

200. Obji. IV. In Synodo Chalcedonensi Magistratus Sæcularis Primatum exercuit ; ergo non minus illegitima est , quam Ephesina II. Conseq. patet : idcirco enim Ephesina II. prædatoria dicitur , quia in ea non Ecclesiæ , sed sæculi Potestas plenam exercuit dominationem . An. au em prob.

201. I. Enim , Act. 1. Eusebius Dorilæi Episcopus in prædatoria Ephesina oppressus , non ad Patres Synodi , sed ad Iudices , & Senatum preces dirigit de Iustitia obtinenda , legique exorat acta Synodi Ephes. II.

202. II. Ipsimet Iudices , & Senatus adversus Dioscorum , & alios Præsules , qui Ephesinæ II. Synodo subscripserant , & sententiam proferunt depositionis , addentes : *Si placuerit Divinissimo , & Piiissimo Domino Nostro* ; Episcopi verò assentiuntur .

203. III. Episcopi Act. 2. à Magistratibus petunt inducias , ut Patrum sententias , & Epistolam Leonis ad Flavianum scrutarentur , atque

que inter se conferrent, & obtinent. Sub fine ejusdem Actionis misericordiam pro damnatis Dioscoro, Juvenali, Talasio, Aliisque, qui prædatoris Synodo consenserant, Episcopis, ac prodit responsio; *Quæ interlocuta sunt effectui mancipentur.*

204. IV. Act. 3. Damnato Dioscoro, Patres ad Augustos Marcianum, & Valentinianum Epistolam mittunt, eorum, quæ acta fuerant, reddentes rationem.

205. V. Episcopi, completis Fidei definitionibus, aliisque Synodi negotiis, Marcianum Augustum Synodo præsentem, ut eos dimitteret, rogant, nec tamen exaudiuntur.

206. VI. Act. 10. Senatus, & Judices de Iba Episcopo Edeffino Concilii sententiam absolutioriam confirmant. Alia similia leguntur in toto ejusdem progressu; ergò sæcularis Potestas ibidem Primatum exercuit; ergò illegitima Synodus est.

207. Resp. ne. ant., ad cujus probat neg. conseq.; omnia enim illa, quæ in Argumento recensentur, nihil aliud, quam protectionem indicant à sæculari Potestate Synodo præstitam, ut ordinatè procederet, ne Dioscori præpotentia, aut aliorum ejusdem Fautorum, uti in Ephesina II. contigerat, violenta irruptione, quin legitimè Decreta sua ederet, præpediretur.

208. Quantum igitur ad Primum: Eusebius Dorilæi Episcopus nihil aliud voluit, quam protectione, & autoritate Augusti Decretum Leonis Magni, ad quem à latrociniali Ephesino appellatione confugerat, & quo in integrum restituebatur, executioni mandari, quod numquam sub Theodosio Juniore fraudibus Grisaphii Eunuchi nimium circumvento potue-

erat obtinere: & Dioscorus Ecclesiæ Rebellis tot criminum Reus judicio Synodali subjiatur eo modo, quo D. Athanasius apud Constantem Augustum coram Sardicensi Synodo acta sua tractari petierat, ex ejusdem Epist. ad Constan., quod sanè non auctoritatem sæcularis Potestatis in Synodum, sed tutelam dumtaxat indicat.

209. Secundum nequaquam obstat: nam Judices & Magistratus sententiam propriè non protulerunt, sed judicium de sententia ferenda, ajunt enim: *Videtur nobis justum, relicta Sanctæ Synodo plenissima potestate; inquit enim: Et à Sancto Concilio secundum regulas, idest Canones, ab Episcopali dignitate fieri alienos.*

• 210. Tertium non habet difficultatem: idcirco enim à sæcularibus Judicibus inducias petierant Episcopi, Patrum auctoritates expensuri, ne scilicet Dioscori, ejusque fautorum calliditate eorum trutina impediretur, uti in prædatoria Ephesina contigit, ubi Leonis Magni Epistola ad Flavianum, in qua Fidei decisiva doctrina continebatur, legi fuit interdicta, ex Chalcedon. Act. 3.: idcirco autem nonnulli Episcopi Dioscoro, & Aliis depositione dignis indulgeri Senatui rogarunt, quia ipse, procuresque sæculares pro Legibus stabant Ecclesiasticis adamussim exequendis ad punitionem Reorum: at hoc protectionem Concilii arguit, non præsentiam.

211. Quartum vix meretur responsionem! idcirco enim ad Imperatores Acta Concilii referri debuerunt, ut scirent, pro quibus brachium executionis, & protectionis exhibere deberent, & qua æquitate Concilium processisset, ut Refractoriorum ausibus occurrerent, non verò passione ulla ducente.

212. Quin-

212. Quintum ex semetipso solvitur. Cum enim Marcianus Imperator, authoritate sibi à Leone Magno tributa, Synodum collegisset, eâdem quoque dissolvi debuit: nec tamen Augustus Episcopos, ut persisterent, coegit, sed rogavit dumtaxat, ut paucis aliis diebus discessum differre vellent, nonnulla à se negotia proponenda expedituri.

213. Ultimum tandem ad rem non facit: Judices enim illi volunt, absolutionem Ibx, post Nestorium ejuratum, in suo robore, quantum ad ipsos attinet, permansuram: quod quidem patrocinium Catholici Principis significat, cupientis Ecclesiæ decreta tueri, non examini subicere: hinc Marcianus, cum nonnulla vellet de Clericis, & Monachis, statui oportere, non ex se decreta condidit, sed à Synodo exquisivit, Act. 6. & Acta latrocinialia Ephesinæ II. confirmantem Theodosii Juniôris Legem adversus Theodoretum latam. rescindens ait: *Iniqua sententia nihil obstat Theodoro, quoniam non possunt Sacerdotes damnari, quos Synodicum ornas super conservanda Religione judicium.*

214. Ex his patet, quam ineptè Jacobitæ, Cophthæque Dioscorum excusare, & qua dementia Sanctum Leonem Magnum Papam criminari nitantur. Quantum enim ad Dioscorum attinet, ejusdem delicta in Ephesina II. Synodo patrata perspicua adeo fuere, ut neque ipse negare ausus fuerit: nec negare profuisset, cum adversus eum tot adessent Testes, quot Episcopi. Alia verò per Clericos Ecclesiæ suæ impacta crimina, & quidem gravissima, nec respuere defensionem, nec faciem quidem Accusatorum, qui probare paratissimi erant, valuit sustinere: hinc ipsimet Magnates sæculares

Synodo assistentes in ejus damnationem conspici-
rarunt.

215. Nec dici potest inauditus: tumqui-
Aet. 1., cum adhuc in iudicium minimè fuisset
vocatus, multa in sui defensionem protulit,
quæ tamen Episcopi Ephesinæ II. facile retude-
runt: tumquia, ut se ab accusationibus tuere-
tur, honorificè accersitus venire contempsit:
quare stultissimè eum tuentur Jacobitæ, Co-
phtæque Ægyptii, majorique dementia eum tot
sceleribus in facie Universalis Ecclesiæ pollut-
um inter sanctos enumerant.

216. Majori improbitate. Sanctum Leonem
Magnum, quod Eutychis dogmata proscripse-
rit, Dioscorique adversus Ecclesiam tumultu-
antis pervicaciam fregerit, aspernantur, quem
tamen ob eminentiam dignitatis, famamque
sanctitatis venerari debuerunt, quem Augu-
stissimi nedum Principes Marcianus, Valenti-
nianus III., & Pulcheria, sed etiam Barbari
Reges Attila, & Genserius summo sunt ho-
nore persecuti, quorum posteriores ejusdem
precibus ab Urbis Romæ obsidione, vel dire-
ptione, sacrorumque profanatione obsequenter
abstinuerunt.

217. Nec Magnus Leo fuit Dioscōro infen-
sus, qui cum eo necessitudinem habuit, ip-
sumque ad Patriarchalem Alexandriæ Sedem
promotum approbavit, magnisque, quod spe-
cietenus Orthodoxæ Religionis zelum exhibe-
ret, laudibus commendavit. Idcirco autem,
adversus eum insurrexit, eo quia Synodum,
inconsulta Sede Apostolica, nedum colligere,
sed ei præsidere, præsumpsit, atque in ipsum
met Romanum Pontificem Petri Successorem
Marci Successor jaculari excommunicationis
fulmen, ausu temerario, atque numquam au-
dito,

dito, præsumperit, ipsismet Episcopis Ægyptiis tanti facinoris horrore correptis, Act. 3. Chalced.: cujus tamen adhuc à Sancta Synodo, & Romano Pontifice veniam obtinuisset, si Pharaonis obstinatione, qua obduratus permanlit, deposita, per dignam pœnitentiam ab Universali Concilio medicinam adscivisset, ut iidem Patres loquuntur, & asserit Leo-Magnus ad Theodoret., & Gelas. ad Episcop. Dardan. Epist. 3. cap. 2.

C A P U T VIII.

An Sexta Synodus sit legitimum, & Oecumenicum Concilium?

218. **H**Æresis Monothelitarum Eutychie infausta propago in Concilio Lateranensi, quod à Martino I. celebratum est, Theodoro Pharanitarum Episcopo adscribitur, qui labe infectus Eutychie, quoniam Chalcedonensem Synodum minimè licebat apertè respuere, duplicem in Christo Naturam, integram, perfectamque definientem, cuniculis occultis, errorem jam extinctum paulatim inducturus, unicam, pietatis prætexit, voluntatem, & operationem sacrilegè in Christo commentus est. Hujusmodi hæreticam sententiam Anastasius Syrorum Patriarcha Vir callidissimus, eademque pice infectus suadere Imperatori Eraclio nititur, sub spe Patriarchatus Antiocheni, dummodo Chalcedonensi adhæreret, ad partes Catholicorum trahere ipsum laboranti. Fraude hac deceptus Imperator hæresim incautè sorbuit, sperans fore, sectas omnes uno Religionis vinculo, ac Fidei confessione copulatum iri, apud Baron. ad An. Christi 628. Proin-

de Sergium Constantinopolitanum Patriarcham, Cyrumque Phasis Episcopum, utrumque erroris patronum, conspirantesque in hujusmodi sententiam inventos, nedum sequitur oscitanter, verum, orta inter Sophronium Jerosolymitanum, & Cyrum Alexandrinum Antistitem hac de re controversia, Judicis Fidei munus assumit, Ecclēsimquē, seu Constitutionem de Fide evulgat, in qua sub specie Nestorianos, atque Eutychianos, ceterosque Hæreticos in ordine retinendi, reipsa tamen animo hæresim, ut experientia compertum est, inducendi, vetabatur, ne vox unius, vel duplicis in Christo voluntatis diceretur.

219. Hujusmodi Ecclēsim, nedum Sergius Constantinopolitanus Antistes, coacta Synodo, & Cyrus Alexandrinus Patriarcha, verum etiam Honorius Romanus Pontifex hac de re à Sergio versutē consultus, pravēque deceptus approbavit, putans exurgentes Nestorianismi, atque Eutychianismi favillas extinguere, etsi à Sophronio Jerosolymitano Patriarcha inuito Fidei pugile fraudis in herba latentis fuisset admonitus.

220. Huic similem edidit Fidei professionem Imperator Constans hæresis Eraclii non minus, quam Imperii hæres infelicissimus, quam sub nomine Typi, nedum Constantinopoli, sed etiam Romæ à Pontifice recipi, ac promulgari contendit.

221. Nec hæresi renascenti fomenta defuere. Cyrus Phasidis Antistes eadem labe inquinatus Ecclesiæ Throno Alexandrinæ insignitus errorem hunc sub ambiguo verborum involuero confirmandum curavit, an Christi 633. editis 9. Can. Act. 13. Sextæ Synodi relatis, in quorum postremo subdolē continebatur. Hunc
ipsum

ipsum veluti omnium Hæreticorum Concilia-
torium à Cyro transmissum avidè Sergius su-
scipit Regiæ Urbis Patriarcha, Fidei puritate,
nequaquam melior, nec minori æstuans cupi-
ditate placendi Augusto.

222. Discrimen Fidei Orthodoxæ Sophro-
nius optimè perspexerat, Monachus doctrina,
sanctitateque celeberrimus. Sergium idcirco,
quem Orthodoxum adhuc putabat, nedum li-
teris admonuit, sed ipsemet oretenus eidem,
dolos Hæreticorum, ac venenum in æquivoca
illa Fidei confessione, quam Cyrus astutè con-
texuerat, latitans, detexit. Sergius verò se-
simulans Orthodoxum nihil periculi, ait, im-
minere, dum Chalcedonensis doctrina integra
servaretur, earum silentio vocum auferri solum-
modo Nestorianis, & Eutychianis fomenta-
novarum seditionum: Fidelibus autem abundè
sufficere, quod Sacra Concilia circumspicè
adèò definiverant.

223. Hac simulatione Sergius astutissimè
nedum Sophronium sese illit, sed ipsummet Ro-
manum Pontificem Honorium, cui, datis li-
teris, eadem idipsum fraude persuasit, ne hu-
jusmodi vocum obtentu nova Ecclesiæ turbatio
ab Hæreticis induceretur. Hoc fucò deceptus
Pontifex, quidquid petebatur à Sergio, indul-
sit, ac utriusque vocis unius, vel duplicis in
Christo voluntatis, & operationis silentium
imperavit.

224. Cyrus tamen Papæ præfati abusus fa-
cilitate, dogma unius voluntatis, & operatio-
nis in Diœcesi sua Patriarchali fœdisfragè disse-
minandum fategit. Quo audito, Sophronius
Jerosolymitanam nuper sedem adeptus, incen-
sus zelo Domus Dei periclitantis, Episcopo-
rum Diœcesis suæ Synodo collecta, dogma ne-

fandum solemnī censurā damnavit, ejusque notitiā ad omnes Patriarchas sollicitē transmissit, quæ extat act. 11. Syn. VI. cruditissima simul, atque robustissima, Romanumque Pontificem perfidiæ Hæreticorum, misso Stephano Dorenſi Episcopo, certiore fecit.

225. Interea verò Sergius, Honorio è vivis, juxta Anastasium, quarto Idus Octobris anno 638. sublato, dogma Monotheliticum audacter Populo proponebat, Augustumque impellit, ut Ecclēſiam suam Edicto firmaret; quodquidem effectum est anno Christi 640.; Exarcoque Imperiali Ravennati mandatum, ut illud quoque Romæ publicum fieri satageret, atque à Pontifice recipi. Severinus tamen eotempore locum tenens Petri Ecclēſiam illam, etſi Cæsareo munitam Edicto, constantissimè respuit, veluti Fidei Orthodoxæ inimicam, quam Sergius, & Cyrus Synodicè collecti amplexi fuerant, eamque, ut Etaclio morem gererent, à Patribus confirmandam curaverant, ex Rom. Concil. sub Martino Secret. 3. *

226. Ecclēſiam hanc Joannes quoque IV. Severini Successor, collecta Episcoporum Synodo, An. 646. proſcripſit, hæresimque Monothelitarum anathemate percussit, Theophane in suis Annal. referente: quam quidem Africani Præſules execrationibus, atque censuris an. 647. in Synodo Bizacena fuerant infectati, D. Maximo Abbate præ cæteris hortante, atque suadente, qui Pyrrhum Monachum è Cathedra Constanti-nopolitana deturbatum, exulemque in Africa pravis opiūionibus imbutum in disputatione convicerat, eidemque pœnitenti à Theodoro Papa, cum Romam accessisset, veniam, Thronumque impetraverat Civitatis Imperialis, ex Anastasio in Theodoro.

227. Cum

227. Cum verò Christi anno 648. extincto Sergio, Pyrrius præfatus Regiæ Urbis, alii autem Monothelitæ præcipuas Orientis Cathedras occupassent, Eraclii defuncti Constans non minus hæresis, quam Regni Successor, de ipsa propaganda statim cogitavit. Ecclēsim suam, quam Typum appellavit, edidit, in qua silentium unius vel duplicis in Christo voluntatis mandabatur exactè servari: Monothelitis interim unam absolutè voluntatem impunè prædicantibus, anno Christi 649., ex literis Sergii Cypri Metropolitæ, Clerique Jerosolym. ad Theodorum Papam.

228. Typum hunc Martinus I., qui Constantinopoli Apocrisarius Theodori fuerat, effectus Pontifex, cum sua Lateranensi Synodo, nedum minimè recepit, verum etiam hæresim Monotheliticam, in eo contentam, cum Authoribus, & Assertoribus suis anathemate percussit, veluti hæreticam, Fidemque Orthodoxam 20. Canonibus exposuit: quam quidem Synodum anno Christi 649. pridie Kalendas Novembris complevit, die 5. Octobris inceptam. Hæc autem animi fortitudo Sanctissimo Pontifici exilium, ac mortem peperit, in Chersonesum relegato, ærumnisque confecto, an. Christi 654. die 16. Septembris, ubi Discipulus ejus Anastasius die 24. Julii obierat, calamitatibus interemptus.

229. Orthodoxæ Religioni apud Orientales fatiscenti Christus adjutor occurrit: nam, occiso in Sicilia Constanti Filius Constantinus Pogonatus, auspice Deo, successit, puritate Fidei, & Religionis zelo clarissimus, qui dissidia Ecclesiæ compositurus Oecumenicam Synodum à Romano Pontifice postulavit, quæ Constantinopoli in Palatio Imperiali, Legatis

Apostolicis ab Agathone Papa missis eidem præfidentibus, anno Christi 680. die 5. Novembris inchoata, anno verò 681. die 18. Septembris completa est, Episcopis centum circiter septuaginta eandem decorantibus. Ibi error Monotheliticus proscriptus, Ecclesiæ verò Doctrina de duplici in Christo voluntate, atque operatione stabilita: opposita sentientes, ut Hæretici fuisse damnati. Hanc Synodum moderni Monothelitæ magnopere execrantur, eam nec legitimam, nec Oecumenicam criminantes. Videndum, an ratione ulla nitantur?

S E C T I O P R I M A

*Synodus VI. est dicenda nedum legitima,
sed Oecumenica.*

230. **E** Am fuisse legitimam, patet I. Quia legitima Potestas convocavit, nempe Ecclesiastica Romani Pontificis, cujus consensu, & autoritate à Constantino Pogonato Augusto collecta est, ipsamet VI. Synodo testante in ferm. Prosphon. & Epist. ejusdem Augusti ad Donum Rom. Pontif., & Georgium Constantinopol. Episcop.: nec autoritate præcisa Augusti Patriarchæ Alexandrinus, & Jerusalemitanus per suos Apocrisarios accedere poterant, cum eo tempore Urbes illæ Saracenorum subderentur imperio.

231. II. Potestas Ecclesiastica Synodo præfedit: Legati enim Apostolici ab Agathone Romano Pontifice missi, & honorificentissimè excepti, primum locum, etiam ante omnes Patriarchas, in Synodo obtinent. Primo quoque in loquendo fruuntur, A&. I. Primi etiam Synodo subscribunt, A&. 18.

232. III.

232. III. Cum hæresis causa sit mere Ecclesiastica, soli Episcopi Doctrinam Monothelitarum discusserunt, soli dogma definierunt, soli adversus Macharium Atiochenum Patriarcham, & cæteros Monothelitas excommunicationis, ac depositionis sententiam protulerunt, Imperatore post omnes Episcopos, & Patres subscribente, non tamen sententiam ferente, uti fecerant Episcopi. Hinc ipse Act. 18, à Patribus flagitavit: *Si cum consensu omnium Venerabilium Episcoporum promulgata est definitio?* Ipsi verò exclamarunt: *Omnes ita credimus;* omnes ergò Episcopi Synodi illius in Fidei, & Ecclesiæ negotiis peragendis, autoritate potiti sunt, eamque Imperator agnovit; ergò quantum ad hoc nullâ Synodus labe inficitur.

233. IV. Doctrina Monothelitarum diligentissimum subiit examen. Nam Act. 1. Ephesinum I. Act. 2., Chalcedonense cum Epistola S. Leonis ad Flavianum, Act. 3. V. Synodus perpensa est, an quidquam contineret Monothelitis propitium, Act. 4. Literæ Agathonis Papæ, Synodique Romanæ Divinis Scripturis, Patrumque sententiis locupletissimæ, quibus dogma Monotheliticum funditus evertitur, lectæ fuerunt, Georgio Constantinopolitano Patriarcha suggerente. Act. 8. adductæ sunt plures Patrum autoritates, Athanas., Nissen., Cyril. Alexand., Ambros., Chrysost., Leonis Magn., Epiphani. & Aliorum. Act. 11. Epistola Magni Sophronii Jerosolymitani Antistitis. Act. 12. Epistola Magni Leonis ad Flavian., qua veluti regula Fidei Chalcedonense usum est, in medium prodiit, aliique Patres adducti, ac maturè perpensi, quibus error Monotheliticus à fundamentis evertitur; ergò ad examen Doctrinæ nihil omisit VI. Synodus, quo veritas eluceret.

234. V. Monothelitæ plenissimè fuerunt auditi. Hinc, ipsis instantibus, Ephesina I. Synodus lecta est. Cum verò ipsi in verbis Epistolæ Cyrilli Alexandrini ad Theodosium vim facerent dicentibus: *Christus Iesus per quem Reges regnant &c. Est ejus enim omnipotens voluntas &c.* Legati Apostolici, aliique Episcopi ostenderunt, ea verba ad voluntatem Christi, qua Deus est præcisè, non verò ad ipsum, quatenus utramque complectitur naturam, referri; nec habuere Hæretici, quid huic reponerent animadversioni: Acta Chalcedonensia, præcipuè Tomus S. Leonis Magni, Act. 2. recitata nocebant Adversariis, non favebant. Tres Codices Act. 5., & 6. producti, atque cum Autographis collati, Act. 7. examinati, ac corrupti, & truncati inventi fuere, simul cum aliis Patribus, & præsertim Athanas. Serm. 2. adversus Apollin. Nazianz. lib. 2. de Filio Dei, & Cyril. Alex. Serm. 12. de interpret. Evang., vel pravè intellecti, itaut, etiam stante corruptione, adversus Hæreticos militarent. Ipsi verò Sectarii Act. 10., loco Sanctorum Patrum pro sustinenda opinione sua, Hæreticos adduxerunt, Themistium, Antimum, Severum, Paulum, Theodorum, & Alios exploratos, atque infames Sectarios. Act. 12. lectæ quoque fuere Epistolæ Sergii Constantinopolitani Patriarchæ ad Honorium Romanum Pontificem, & ejusdem ad Sergium præfatum. Act. 13. Pollicronius Monachus, qui mortuum jactabat posse suscitare in confirmationem doctrinæ suæ, nedum auditus, sed ad experimentum miraculi admissus fuit, quod numquam patrare potuit. Act. 16. auditus quoque fuit insigni benignitate Constantinus Apamæ Presbyter Sanctam Synodum veritatem temeritate incredibili docere,

pro-

professus, ejusque acta discussa. Ex quibus omnibus constat, quanta diligentia, æquitateque in veritate indaganda Sancta hæc Synodus processerit, & quam exactè Leges legitimæ Synodi servaverit; ergò legitima fuit Synodus.

235. Hanc quoque Synodum Oecumenicam fuisse I. docet finis, nempe ut Fidei veritas de duplici in Christo voluntate, & operatione, quas Monothelitæ impetebant, dogma stabiliretur: causæ autem Fidei universales sunt, & ad omnes extenduntur; hinc sæcularis Potestatis tutelam exquirunt, juxta Nicolaum Primum Epist. ad Michaellem. II. ratione convocationis: nam omnes Orientales Episcopi fuisse mediatè, vel immediatè vocati per Divales Imperatoris Constantini Pognati ad Georgium Constantinopolitanum Patriarcham directas, cui imponebatur, nedum Antistites omnes sibi subjectos, verum etiam Macharium Antiochenum Præsulem, ejusque Suffraganeos ad Synodum vocare; cæteros verò respectivè accersere.

236. Quantum autem ad Patriarchas Alexandrinum, & Jerosolymitanum, non Augusti imperio, cui sub ditione Infidelium degentes minime subdebantur, sed immediato Romani Pontificis mandato venire jussi sunt. Quatuor igitur Orientis Patriarchis ad Synodum, accitis, omnes Episcopi saltem mediatè vocati fuisse. Occidentales verò pauci quidem accesserunt, nempe Legati Apostolici cum aliis nonnullis: omnes tamen consensu, quem per Legatos præfatos miserunt, adeoque virtute fuisse convocati, & accesserunt voluntate, Synodo ab Agathone præmissa, centum, & octoginta Præsulibus conflata.

237. Tandem omnes quinque Patriarchæ
Syno-

Synodum hanc decorarunt, duō quidem physica præsentiā, nempe Constantinopolitanus, & Antiochenus; tres verò alii per Legatos, nempe Romanus, Alexandrinus, & Ierosolymitanus, ut ex Actis apparet: quorum defectu Quini-VI. Synodus, & ea, quæ sub Photio celebrata est, numquam Oecumenicæ titulum obtinere potuerunt.

238. Cum ergò VI. hæc Synodus omnes conditiones habeat Oecumenici, & legitimi Concilii, ut hactenus ostensum est, & confirmationis quoque ipsi robur Ecclesiastica suprema autoritas adjecerit, nempe Leo II. Romanus Pontifex Epist. ad Constantinum Augustum, imò ipsemet Agatho, qui eandem coegit, ex Anastas. in collect. Lect., concludendum est, hanc VI. Synodum inter legitima, & Oecumenica Concilia numerari oportere, uti eam Universalis Ecclesia, tam Orientalis, quam Occidentalis hucusque venerata est.

SECTIONE SECUNDA

Solvantur Adversariorum Argumenta.

239. **O** Bji. I. Ad Synodum VI. non omnes Episcopi ex Universo Orbe vocati sunt: nam ex parte Orientalis Ecclesiæ solum illi, suere accersiti, quæ Romano subdebantur Imperio, satis tunc coarctato, non verò ii, qui iugo Infidelium subdebantur, & sub Patriarchis Alexandrino, & Ierosolymitano degebant, quos certè Imperator compellere nequaquam poterat: ex parte verò Orientalium, præter Legatos Apostolicos, pauci alii advenerant: Synodus verò Occidentalium, quæ per consensum Orientali adhærere debebat, Septentrionali-
bus

bus remotissimis videtur caruisse; ergò Synodus VI. non fuit Oecumenica, sed Patriarchalis potius, & Nationalis.

240. Resp. neg. ant., ad cujus prob. dico, quantum ad Episcopos Orientales, Patriarchis Constantinopolitano, & Antiocheno subjectos fuisse omnes vocatos, imperio Patriarcharum mediante; Alexandrinum verò, & Jerosolymitanum de mandato Pontificis invitatos, ut saltem per Legatos accederent. Occidentales verò ad Synodum Romanam ab Agathone collectam, plerique per semetipsos venerunt, & quidem Natione diversi, ut ex subscriptionibus constat: ex Septemtrionalibus autem, quia remotissimis, nonnulli venerunt, aliorum legatione fungentes, ut Felix Arelatensis, Adeodatus Leucensis Episcopus, & Taurinus Diaconus Lugdunensis, ex Act. ipsiusmet Synod. Rom.: totius verò Ecclesiæ Anglicanæ locum tenuit Sanctus Walfridus Eboracensis Archiepiscopus, tunc Romæ commorans, à Theodoro Dorovernensi Archiepiscopo, qui Synodum in Anglia adversus Monothelitas celebraverat, vices suas eidem committente, apud Bedam lib. 4. cap. 17. Cæterum falsum est, ad Synodum Oecumenicam Occidentales non fuisse vocatos, si accedere voluissent, uti ex ipsamet Synodi Romanæ ad Imperat. Epist. constat.

241. Obji. II. Synodus hæc à legitima Potestate non fuit collecta, sed ab Imperatore, ut patet ex ejusdem Divali ad Georgium Constantinopolitanum Antistitem, cui præcipit, ut Episcopos Orientales convocet. Idipsum facit cum Romano Episcopo, quem rogat quidem, ut Legatos mittat, non tamen ab eo petit consensum, imò verè inaperasse, videtur fateri Agatho, cum dicit, se ex mandatis Augusti

gusti Legatos misisse, ejusque clementiam commendat, qui, cum jubere potuisset, hortationis verbis cum eo usus est, Christi humilitatem imitatus, ex ejus lit. ad Imperat., & ipsamet Synodus Aët. I. fatetur, se Augusti auctoritate congregatam; ergo est illegitima Synodus.

242. Resp. neg. ant., Imperator enim potestatem Synodi convocandæ à Romano Pontifice postulavit, misso Epiphanio ejusdem Augusti à secretis, teste Anastasio Bibliothecario in Lib. Pontif.; dum verò in Epist. ad Donum Papam Legatos postulat, qui cum sufficienti auctoritate Synodo præficerent, invitando, & hortando, non autem compellendo, satis indicat ab eo petitam facultatem Synodum convocandi, veluti Supremo Pastorum Pastori, uti eum ipsemet Constantinus Augustus Epist. ad Synod. Roman. appellat.

243. Nec officit, ab Agathone asseri, Legatos ab ipso ex Augusti missos imperio: istæ enim phrasæ, quas etiam Cives inter se humano, ac civili modo agentes adhibere solent, à Romano Pontifice, qui utpote Christi Vicarius humilitatem spirare debet, non factum sæculi, cum potentissimo Imperatore impendi oportebat, ne animum ejusdem nimia Potestatis ostentatione à protectione averteret Ecclesiæ: cæterum Agatho dum ait, se liberrimè, ac libenter annuere Synodo, Legatosque mittere, atque Imperatorem vocat amatissimum Filium, Ecclesiæque Romanæ Protectorem nuncupatur, satis Ecclesiæ supremam ostendit auctoritatem.

244. Obji. III. Potestas sæcularis huic Synodo supremâ præfedit auctoritate; ergo non est legitima Synodus. Conseq. patet: Synodo enim

enim Oecumenicæ non Augustus, sed Petrus præsidere debet, Christi Vices gerens, ex Synodo VII. Act. 6., & Leon. Mag. Epist. 26. Ant. autem patet: nam: Act. 7, dicitur: *Præsidente eodem piissimo, & Christo dilecto Imperatore Constantino in Secretario Sacri Palatii, quod cognominatur Trullus, & ex jussione ejusdem.* Deinde in omnibus Actionibus Synodi hujusmodi Præsidentia apparet: Act. 1. Legati Apostolici rogant Imperatorem, ut Patriarchas Constantinopolitanum, & Antiochenum compellat aperire, undè novitates emerferint, & quibus nixæ fundamentis; ipse verò iisdem præscribit, ut satisfaciant. Act. 2, jubet, à Machario Antiocheno Patriarcha mentem suam aperiri, ac relegi alium Librum Acta Chalcedonensia continentem, Act. 3. imperat, Acta Synodi V. percurri: cum verò in probatione Monothelitæ defecissent, præcipit, alia monumenta proferri. Act. 4. mandat indulgeri precibus Georgii Constantinopolitani Antistitis, qui Actione 3. binas Agathonis Papæ, & Romani Concilii ad Imperatores Epistolas legi postulaverat. Act. 5. & 6. præscribitur, à Monothelitis alia Testimonia exhiberi, ac legi, & Codices exhibitos sigillari, ac deinde, rogantibus Apostolicæ Sedis Legatis, cum originalibus Patriarchis conferri. Act. 7. jubentur iisdem Testimonia proferre, duplicem voluntatem in Christo asserentia. Eadem Actione rogatur Imperator, ut jubeat, nomen Vitaliani Papæ in Dypticis reponi, ab Hæreticis deletum, quod utique factum est. Act. 9. Imperator mandat conferri cum Autographo Librum à Machario, cæterisque Monothelitis oblatum, multaque alia similia in Actis leguntur; ergo Imperialis Potestas, non verò Pontificalis præsentiam supremam in Synodo hac exercuit;

uit; ergo illegitima est, & prophana Synodus.

245. Resp. neg. ant. ad cuius probat. nego
conseq. Omnia enim, quæ in Argumento re-
censentur, non veram præsentiam, sed patro-
cinium solummodo arguunt secularis Potestatis:
cum enim Hæretici supremam Petri authorita-
tem minimè agnoscerent, nec Synodi potesta-
tem formidarent, ac proinde seditionibus, tu-
multibusque excitandis magnoperè propende-
rent, ad eos in Officio continendos opus fuit
Imperiali terrore, cui etiam inviti obtempera-
rent. Hoc autem ex eo perspicuè constat,
quod Imperator nedum post Legatos Apostoli-
cos, & Patriarchas, sed Episcopos, non desi-
niendo, sed consentiendo, subscripserit, Patres
verò Synodi sententiam Fidei, & damnationis
in Hæreticos tulerint. Confirmatio verò acto-
rum, quam ab Augusto Patres flagitant, non
est illa juridica, quæ Fideles ad credendum co-
git: hanc enim Romanus Pontifex Agatho,
& Leo II. præbuerunt, sed executiva, qua
contumaces ad obsequendum compelluntur, ut
in cæteris Conciliis actum est; & hoc quidem
in ipsamet Synodo patuit: cum enim Act. 12.
rogasset Augustus, ut erga Macharium damna-
tum misericordiam Patres exercerent, ipsi libe-
rè negarunt, cum Viro indigno fieri posse:
Augustus autem repulsæ aquievit, authorita-
tem suam læsam minimè conquestus.

246. Obji. IV. Sexta Synodus irregulariter,
nec Juris ordine servato, in Macharii Antioche-
ni, & cæterorum Monothelitarum damnatione
processit; ergo est illegitima. Conseq. patet.
Prob. ant.: nam Macharius Act. 8. veluti Hære-
ticus fuit damnatus, & pallio Patriarchali spo-
liatus, cum tamen Fidei examen, quod sub-
sequentibus Actionibus completum est, non-
dum

dum perfectionem attigisset, & definitio Articuli controversi A&C. solummodo 17. prodiit: hoc autem injustum videtur, & irregulare; cum nemo Hæreticus censetur, qui doctrinæ renuit assentiri minimè adhuc ab Ecclesia decisæ, etsi in se veræ, ac de Fide; alioquin Theologi Hæresis censuram mererentur, nonnulla tenentes, quæ adhuc ab Ecclesia minimè, ut hæretica fuere declarata, & nihilominus ab Aliis uti talia existimantur: in Christo autem, duplicem contineri voluntatem, atque operationem, nondum in Synodo Generali Ecclesia declaraverat: Synodus autem Lateranensis sub Martino I., qua opinio hujusmodi fuit proscripta, Latinorum, non autem totius Ecclesiæ Conventus appellanda est; ergò irregulariter Macharium veluti Hæreticum ante ultimam decisionem VI. Synodus damnavit; eo magis quia Synodum Chalcedonensem, & Tomum Sancti Leonis Macharius recipiebat.

247. Ob eandem rationem reprehensione digna videtur Sexta Synodus, quæ Sergium, Cyrum, Pyrrhum, Theodorumque Pharantem, ut Hæreticos damnavit, qui ante ejusdem celebrationem obierant in Ecclesiæ pace, cum, ipsis viventibus, lis esset adhuc indecisa: ut autem veluti Hæretici proscriberentur, debuisset in Synodo constare juridicè, eos dum viverent, hæresi adhæsisse, quod tamen falsum est: certè enim ex mutuis Epistolis inter Sergium, & Honorium Romanum Pontificem, & Sergii ad Cyrum, minimè liquet; ergò irregulariter processit VI. Synodus.

248. Resp. neg. ant., ad cujus probat. neg. min.: quamvis enim tunc Sacri Concilii definitio minimè adhuc prodiiisset, animum tamen in errore pertinacem ostendit Macharius, ejusdem-

demque Aſſectæ jaſtantes inſolentiſſimè , doctrinam antiquam Eccleſiæ Catholicæ tradere , ac ſuſtinere , unicam in Chriſto voluntatem , & operationem propugnando , quod tamen implere nequaquam poterant , nec potuerunt , alioquin nec Sophronius reclamafſet , nec Joannes IV. Ecclēſim Eraclii damnafſet , nec Theodorus Papa Pyrrhum Regiæ Urbis Antiſtitem proſcripſiſſet , nec Lateranenſis Synodus ſub Martino I. Monothelitas hæreticos declarafſet : tumquia Macharius , ejuſque Sectatores , nedum Patrum ſententias , ſed Synodum V. falſarunt , ut apertè Act. 3. coram Univerſa Synodo , & Auguſto ſuere conviſti : tumquia Synodus VI. Act. 8. , priuſquam Macharius , & Monotheliæ dampnarentur , Agathoni Papæ controverſiam , in literis ad Auguſtum , & Synodum datis definiēti , conſenſum præbuerat , adeoque Eccleſiæ Univerſæ cum Capite ſuo conjunctio apertè conſtabat , etſi non adhuc ſolemniter declarata ; ergo potuit optimè Macharius ſuis cum Diſcipulis Hæreticus declarari , Apoſtolicæ Sedis , quam Synodus ſequēbatur , ſententiæ nolens aquieſcere . Tumquia animum præbebat obſtiniſſimum definitiones quoque Synodi reſpuendi , adeoque in hæreſi obſtmatum : interrogatus enim à Synodo , & Imperatore , an duas voluntates , & operationes in Chriſto confiteretur ? Audaciſſimè reſpondit : *Non dico duas naturales voluntates , aut duas operationes naturales in Incarnationis diſpenſatione D. N. J. Chriſti , nec ſi membratim incidar , & mittar in mare .* Eadem igitur diſpoſitio animi in ſenſu ſuo perſiſtentiſ , quocumque Eccleſiæ Decreto non obſtante , in eo vigeat Act. 8. , quæ perſeveravit etiam Synodo completa : ſed poſt Synodum juſtè fuit ob eandem pertinaciam habi-

habitus ut Hæreticus ; ergo etiam ante ; cum eadem esset animi obduratio ipsius , & Affectionum ejus ; ergo justè damnatus etiam ante Synodi solemnem de Fide sententiam .

249. Nec refert , examen causæ , damnato Machario , Actionibus sequentibus fuisse absolutum . Id enim factum est , ut Rei crimen suum agnoscerent , & Ecclesiæ reconciliarentur , juxta Patrum , & Augusti ipsius desiderium : ut Fides Catholica melius declarareretur : Hæretici ad meliorem frugem redirent : Catholici solidarentur , omnibus sectariorum objectionibus plenissimè dissipatis .

250. Eadem ratione justissimè Sergius , Cyrus , Theodorus Pharanita , Aliique Monothelitæ defuncti suere proscripti : quamvis enim errorem suum ante Lateranense Concilium , & hanc VI. Synodum , in quibus Patres eum respectivè ut Hæreticum declarant , conceperint , ac publicè fuerint professi ; illa tamen sententia communi sensu Fidelium hæresis censebatur , ac propterea contra illam Sophronius Jerosolymitanus Episcopus validè insurrexit , Romani Pontifices Eclesiæ Eraclii , ac Typum Constantis , in quibus error iste continebatur damnarunt , Epistolisque gravissimis Episcopos Orientales , præcipuè Constantinopolitanos monuerunt , & renuentes obtemperare censuris mulctarunt , ut de Pyrrho à Theodoro , & Paulo à Martino I. excommunicatis notum est .

251. Quod verò Sergius , etsi præcipuus Monothelita , sacris vinculis minimè legatur innodatus , id accidit , quia ovina se pelle induens hæresim suam ita scitè calavit , ut nedum Honorium Pontificem , in cujus opinione Sancti , Doctique Præfulis famam compa-
rave-

pauperat, deceperit, verum etiam oculatissimi Sophronii perspicaciam tegerit, ac vigilantiam astute deluserit, Synodi Chalcedonenſis veneratione ostentata.

252. Porro ignorantiam in ſui excuſationem adducere nequeunt Monothelitæ, cum erroris fuerint admoniti, nempe à Romanis Pontificibus, teste Agathone Epist. ad Imperat. Act. 4. Sergius, & Cyrus à D. Sophronio, Pyrrhus à D. Maximo, qui eum publica diſputatione convicit, Paulus Patriarcha, nedum à Legatis Apoſtolicis, ſed ab ipſomet Theodoro Papa charitativis literis correctus. Et proſectò corruptio plurium Scriptorum ſibi minimè faventium, & Synodi V., cujus Act. 16. convicti apparent, ſatis ostendit, eos non tantum errore intellectus, ſed voluntatis pravitate peccaſſe, fuiſſeque in hæreſi pertinaces, adeoque juſtiſſimè uti Hæretici fuere damnati.

253. Obji. Ult. VI. Synodus Honorium Romanum Pontificem ob Epistoſas ad Sergium Patriarcham Conſtantinopolitanum ſcriptas erroris Monothelitici læbe inſperſit, eique anathematis, eſſi deſuncto, vulnus inſlixit Act. 13. & 17. : hoc autem iniquiſſimè factum eſt. Aug enim revera Honorius cum Monothelitis ſenſit, aut non? Si primum dicatur: non debuerit Monothelitæ damnari, doctrinam Romani Pontificis ſecuti, qui cenſetur in Catholica Eccleſia inſallibilis Fidei Magiſter, & regula, ſi ex Cathedra loquitur, uti locutus videtur in literis præſatis ad Sergium: & hoc pacto Macharius ſe ab hæreſi excuſabat Act. 1. Si verò dicatur ſecundum, VI. Synodus iniquiſſimè ſe geſſit, primæ Sedis Antiſitem, & ſupremum Eccleſiæ Paſtorem hæreſis accuſans, ac fulmine Anathematis auſu temerario percutiens.

254. Reſp.

254. Resp. Maj. esse incertissimam, cum Baronius, & Alii multi cum ipso firmissimè teneant validis innixi argumentis, VI. Synodi Acta, quibus hujusmodi error asseritur, fuisse falsata, cum inauditum in Ecclesia Dei sit, Petri Successorem hæresim ex Cathedra docuisse, aut ab inferioribus fuisse censura juridica mulctatum, & propterea Dioscorus à Chalcedonensi ob idem scelus terribilem adeo subjectionem; sibi que VI. Synodus apertè contradixisset, dum Sedem Apostolicam magnificis adeo laudibus commendans ait, ipsam in Fide Petri fundatam, numquam desitutam; & Epistolam approbat Agathonis asserentis, numquam Prædecessores suos in errorem adversus Fidei veritatem incidisse: aliaque scatent falsificationis argumenta, quæ præfati Authores multis quoque conjecturis robustè confirmant, & propterea censent, etiam Acta subsequentium Conciliorum, & Epistolam Sancti Leonis II. idem redolentem eadem labe corruptionis laborare.

255. Min. quoque falsissima est: etsi enim Honorius minime quoad sententiam erraverit, ubi liquidissimè ex ejus literis apparet, in quibus perspicuè doctrina Ecclesiæ de duplici in Christo voluntate, & operatione asseritur: adhuc tamen absque ulla iniquitate potuit à VI. Synodo damnari defunctus. Vel quia revera ipsa in facto ex Bellar. decepta est, literarum ejusdem ad Sergium sensu haud benè intellecto, quod nequaquam Oecumenicæ Synodo repugnat, minimè adhuc à Sede Apostolica confirmatæ, quam confirmationem, quantum ad hujusmodi factum, sive ab Agathone, sive à Leone II., sive à Successoribus numquam legitur impetrasse. Vel quia, tametsi Honorius

Pars II.

Q

rius

rius re ipsa non erraverit, adhuc tamēn nimium politicè se gerendo, neque hæreticum Patriarcham apertè reprehendendo, ansam præbuerit eidem in errore manendi, uti eum Leo II. ad Episcop. Hispan. reprehendit: *Flammam hæretici dogmatis non, ut decuit Apostolicam auctoritatem, incipientem extinxit, sed negligendo confovit*. Quo sensu tantummodo à posterioribus quoque Conciliis ea damnatio confirmata est. Porro in causa hæresis, etiam Romanum Pontificem Oecumenicæ Synodi subire iudicium posse, dixit Adrianus II.: at non dicit, Hæreticum fieri posse, aut Honorium talem extitisse, sed solummodo accusatum: vel si iudicatum, id contigisse Apostolica Sede facultatem concedente, quod sanè ad rem non facit.

C A P U T IX.

An Synodus Oſtava Oecumenica, & Sancta fuerit Synodus?

256. **S**YNODO huic celeberrimæ congregandæ Photius motivum præbuit, Vir ingenio, doctrina, generis claritate, rerum politicarum administratione, officioque Protospatharii clarissimus: at è contra vitiis quoque animi pariter insignis; ambitione nimirum, profundissima, quia nedum prophanis, verum etiam sacris, & quidem supremis honoribus inhiabat: calliditate, atque vassitie penitus infernali, dolis, ac fraudibus agere omnia, consuetus; cujus insidias omninò punicas effugere vix cautissimi valerent: immani sævitie, adversus eos, quos obsequi sibi nequaquam videret, quos omni convitiis, atque pœnarum genere vexare ad interuiccionem usque

con-

confueverat ; animo turbulentissimo , pacisque , atque tranquillitatis impatiente ; ad omnia quidem delicta promptissimo : at pigmento Religionis , vultuque pacato procellas , quas mente revolvebat , operiente .

257. Cum enim , defuncto Methodio Regiæ Urbis Antistite , doctrinaque , ac sanctimonia illustri , qui sacros Icones sub Theophilo Imperatore , eorundem hoste acerbissimo , robustè propugnauerat , atque ob id exilio multatus , plagisque , & vulneribus affectus dura sustinuerat , Ignatius insulas Regiæ Urbis , Augusta Theodora , Filioque Michaelē vocantibus , ipsisque Divinis Oraculis impellentibus , ac Populi universo cætu plaudente , comparasset , Vir natalium splendore , utpote Michaelis Curopolatæ Augusti Filius , ac Nepos Nicephori pariter Augusti , doctrinâ , quam in Monasterio acquisierat , præstanti , morumque integritate , atque sanctimonia insignis , quæ pariter dotes cum ad ipsiusmet Monasterii præfecturam evexerant , initium præbuit Catastrophi funestissimæ .

258. Hujusmodi quippè electio nonnullis iniquitatis Filiis cepit displicere : hanc enim in ipsomet exordio Gregorius Arbesta Syracusanus Antistes , ob crimina sua olim à Benedicto III. multatus , ut illegitimam carpebat invidiæ livore adustus . Progressu temporis adversus eam Bardas quoque Imperatoris Michaelis ex sorore Avunculus , eoquia notam ejus libidinem cum Nuru sua incestè concumbentis Ignatius argueret , ac propterea die solemni Epiphaniæ Sacram Communionem denegasset publicè petenti , utpotè manifesto peccatori , amaro contra eundem animo cepit incedere .

259. Demum Imperator ipse Patriarcham, quod Theodoram Matrem, ac Theclam Sororem, invisas sibi, atque molestas, in sanctimoniales sacrare solemnī Ritu noluiſſet, odio haud mediocri proſequebatur, veluti publicæ inſeſum tranquillitati, ac propterea fervescens iracundia è Throno Patriarchali dejecit: Sororem verò, Matremque relegavit in Aſceterium, ex Anaſt. Bibliot. in Pæfat. VIII. Synodi.

260. Interim expulſo Ignatio, atque cuſtodix, ut ibidem vi tormentorum abdicationem Patriarchatus impetrarent, mancipato, quam tamen, eſſi ſæviſſimè à Cuſtodibus carceris adverſus eum ageretur, impetrare numquam potuerunt, in Templo Dei abominatio deſolationis viſa eſt à ſtantibus in Loco Sancto. Photius enim, Nicetâ, Curopalatâ, Aliiſque referentibus Græcis Hiſtoricis, ex Laico, atque curiali Homine, repente Patriarcha emerſit. Prima enim die juxta ſtylum Eccleſiæ Orientalis Monachus, II. Anagnoſtes, III. Hippodiaeonius, IV. Diaconus, V. Presbyter, VI. tandem Regiæ Urbis Antistes creatus eſt, ac die vigesima quinta Decembris anni Chriſti 857. Nativitate Chriſti ſacratâ pacem Populo annuntiavit, qui nihil pacificum in Eccleſia Dei cogitabat.

261. Adeptam crimine Dignitatem Photius authoritate Apoſtolica munire ſategit, miſſa ad ſinem hunc ab ipſo, ſicuti etiam ab Imperatore ſplendidiffima Legatione. Sedebat tunc in Petri Throno Nicolaus I. celiſtutine animi, Sacerdotali conſtantia, zeloque juſtitix, ac Fidei Orthodoxæ, prudentiaque, ac perſpicacia inſigni præſtantiffimus Pontifex, qui Nuntios quidem audivit, ac literas perpendit, quibus à Photio dicebatur, Patriar-

triarcham Ignatium annorum pondere pressum, morbisque gravatum ultro celsisse Dignitati, se verò, tametsi reluctantem, oneri succumbere debuisse. Rogari autem enixè Pontificem, ut collatam ultro Dignitatem Apostolica auctoritate ratam habere dignaretur, ac mittere Apostolicos Legatos, qui coacta Synodo, Iconoclastiam denuò resurgentem extinguerent, electionem verò suam ad Regiæ Urbis Cathedralam D. Petri calculo solidarent. Attamen iudicium suspendit: Legatos direxit Rodoaldum Portuenssem, ac Zachariam Anagninum Episcopos, qui causam Ignatii, Photiique examini quidem subjicerent, nihil tamen deciderent, sed solummodo ad se visa referrent, ac errorem Iconomachorum iterum damnatione configerent, datis ad Photium, & Augustum Epistolis, quibus electio ejusdem, utpote Lai- ci, à Sacris Canonibus vetita, quousque Legati rediissent, suspendebatur, uti ejusdem Nicolai Epistolæ testantur, tom. 3. Concil. inter Acta VIII. Synodi.

262. Missi reipsa fuere Apostolici Legati, non tamen honorificenter excepti, neque, uti decebat, agniti, nec permisi fungi Legatione: ipsi verò, quà terroribus, quà lenociniis atriti Synodo calculum apposuerunt, in qua Ignatius quoque accitus trecentorum circiter decem, & octo Patrum suffragiis, innocens, & impollutus, imaginariis criminibus eidem impositis, Patriarchatu spoliatur, omnibus adversus eum clamantibus: *Indignus, Indignus.*

263. Ne autem quidquam crudelitati deesset, Hominibus truculentis dilaniandus Ignatius traditur, quem carceri mancipatum, vinculis obrutum, inter marmora jactatum, atque suspensum, verberibus, hastisque contundunt,

ac manu ejusdem abrepta , damnationi suæ violenter subscribere compellunt , ac pejora subjisset , nisi ope divina subtraçus agasonis latens indumento , peregrinationem diutinam suscepisset , innumeras passus calamitates ; ingenti vero terræmotu Urbem concutiente , pavore salutarî Deus ejusdem inimicorum malitiâ , aliquantisper cohibuisset . Ista omnia ex Niceta Passagione desumpta sunt .

264. Interea Legati Apostolici cum Leone Imperiali Oratore Romam reduces cum Actis Synodi Constantinopolitanæ , etiam Epistolam Michaelis Augusti , Photiique deferunt , quibus rogabatur Pontifex , Decreta Constantinopolitana , Photiique electionem rata habere . At Pontifex , cognita fraude Legatorum , & iis , quæ iniquissime adversus Ignatium peracta fuerant , ex Teognosto Abbate , & Aliis , qui Constantinopoli aufugerant , persecutionem vitaturi , optimè perspectis ; habitoque etiam Ignatii , quo à Synodo Constantinopolitana ritè ad Sedem Apostolicam appellaverat , libello , veluti Elias Dei zelo incensus exarsit : coacto quippe pleno Patrum Occidentalium Senatu , Acta Constantinopolitana rescidit , adversus Rodoaldum absentem ultione dilata , Zachariam alterum ex Legatis convictum , ac planè confessum omni Sacerdotali munere nudavit , censuræque subjecit ; Photium verò , & Gregorium Arbestam jussit sub Anathematis pœna Thronum occupatum illicò deferere , nec ullis se sacris in posterum miscere . Initiati verò à Photio gradu suo dispelluntur , atque Ignatius in locum pristinum restituitur .

265. His ex Leone Michaelis Oratore à Photio , Barda , Affecisique ejusdem auditis ,
infre-

infremuere , maximè quia Rex Bulgarorum ad Fidem Orthodoxam è Paganismo conversus ultro se Romanæ Ecclesiæ subjecerat , atque ab ea , ut Regnum suum in sacris dirigeretur , Episcopos postulaverat , quod putabant Græci ad ditionem Urbis Regiæ Patriarchæ pertinere . Michael quidem contumeliosam misit ad Nicolaum Epistolam ; cui alteram apud Baron. ad an. Christi 865. sapientissimam , robustissimam , atque doctissimam Sanctus ille Pontifex per Michaellem ejusdem Oratorem remisit , qua calumniæ omnes ab eodem jactatæ retunduntur , ac validè defenduntur jura Romani Pontificis : Photius verò penè furens iracundia , nedum Sequaces Ignatii sæva persecutione vexavit , verum etiam excommunicationis telum in ipsummet Romanum Pontificem ausu temerario jactitavit , Synodo collecta , cui cum viginti , & unus Antistites adfuissent , mille fingit , ac etiam Sedium Patriarchalium Apocrisarios impiè sententiæ subscribentes . Seipsum Patrem Patrum appellans omni conatu quoscumque posset ab obedientia Romani Pontificis avellebat , ex Act. 2. Syn. VIII. : duasque Religiones inducebat , unam Photii , alteram reliquorum , ex Anastas. in Hist. VIII. Syn. , quasi cum Imperio prophano ab Urbe Roma veteri Novam , quam Constantinus Magnus construxerat , Fides Orthodoxa migrasset : Ecclesiam proinde Romanam , veluti hæreticam traduxit , eo quia jejunaret in Sabbato : assereret , Spiritum Sanctum , nedum à Patre , sed etiam à Filio procedere : quod inhiheret Presbyteris ungere in fronte Baptizatos : quod nuptias damnaret , eas in Sacris Ordinibus constitutis inhibendo : quod aqua loco Chrismatis in Confirmatione conferenda uteretur : quod jejunium

Quadragesimale ovis, ac lacticiis transigeret: quod tempore Paschali super Altare simul cum Corpore Domini Agnus ab ea collocetur, & benedictione sacretur: quod Clerici Latini barbas radant, non ut Græci nutrant: quod Diaconi ad Episcopatum promoveantur ante susceptum Sacerdotium. Quorum quidem aliqua sunt apertè falsissima, ut V. G. aquam in Confirmatione adhiberi: Nuptias interdici inter legitimas Personas: lacticia, ovaque, communiter diebus Quadragesimalibus, saltem citra dispensationem, comedi: Diaconos sacra-ri Episcopos, priusquam Presbyteratum suscipiant: aut Agnos die Paschatis cum Corpore Christi collocari benedicendos. Aliqua verò Fidem Orthodoxam continent, quale dogma est Processio Spiritus Sancti: alia sunt adiaphora, & juxta Ecclesiarum diversitatem variabilia, uti est ratio capillorum, jejunium in Sab-bato. Videatur Christianus Lupus in Schol. Synod. General. Dissertation. de Octava Synod. ubi hujusmodi calumniæ doctissimè confodiuntur.

266. Post hæc Bardas ob nimiam præpotentiam invisus redditur Imperatori Michaeli, à quo dignitatem Cæsaream, atque Curopolatae acceperat, umbræque in corpus elatæ internicioni fomitem ministrarunt. Expeditione igitur adversus Saracenos Cretam adortos instituta, orta nova suspicione, occiditur jussu Michaelis Bardas, ac corpus ipsius infrusta discerpitur, imminentis mortis eidem in visu prænuntiata, ut à persecutione Sancti Viri Ignatii disisteret, auguriis nequaquam ad meliorem eum frugem reducentibus.

267. Bardas extincto, cujus necem Baron. an. Christi 867. die prima Aprilis juxta Curopalata-

latam narrat contigisse, etsi Alii diversè sentiant, ad Imperiale culmen à Michael vino dedito, regiminique ineptissimo Basilius extollitur, Vir Macedo, natalibus quidem abjectus, sed virtute illustris militari, civilique prudentia conspicuus, Sacri Cubiculi Præfectus, quem, diademate Cæsareo imposito, in Ecclesia Sanctæ Sophiæ, quoniam prole carebat, in Filium assumit, & comitem Imperii.

268. Quia verò Michael vitiis suis mittere nuntium renuebat, voluptuosus, uti ante vinolentus, summè crudelis, à novo Augusto identidem, ut se ipsum coerceret, monebatur, atque à rebus noxiis, prout ipsi licuisset, arcebatur, odium in se varinianum Michaelis citissimè convertit, à quo neci profectò fuisset traditus, nisi carnifex ipse occultissimè Basilium monuisset.

269. At insidiæ Basilio paratæ Michaeli ipsi exitium pepererunt. Nocte enim intempesta Conjuratorum Basilii ministerio, nemine Aulicorum obistente, opprimitur, utraque manu obtruncatur, ac visceribus transfixis, solo ejulatu tanto se opponens facinori interficitur, ex Niceta Passagone, Zonara, Gulielmo Bibliothecario, aliisque referentibus Historicis.

270. Hoc pacto Imperium Basilius assecutus, iis statim, quæ Religionem tangebant, utpote Reipublicæ quoque summè proficuis, sollicitè peragendis operam navavit. Inventis quippè Decretis, quibus Photius à Sede Constantinopolitana malè intrusus à Romano Pontifice repellebatur, firmabatur Ignatius, etsi diù à Photio cælata callidissimè fuissent, illicò à Throno expellit Photium, honorificentissimè ex Monasterio, ubi morabatur, advocat Ignatium.

tium , cumque statim in Sede collocat Patriarchali , Niceta referente .

271. Expulsio Photii nova ejusdem , ac Gregorii Arbestæ delicta patefecit : duo enim Volumina , eodem discedente , ac Cænobium adeunte exilii sui locum , inventa sunt , & Augusto tradita , duas Synodos continentia . Una adversus Ignatium septem Actiones continebat , in cujus singulis , appposito titulo , Diaboli , Principii peccati , Filii perditionis , Avaritiæ Simonis Magi , Se extollentis super omne , quod dicitur Deus , Abominationis desolationis , Antichristi notæ fingeantur super Ignatium . Primò raptatum , ac verberibus affectum ; II. Sputis sædatum , ac funibus attractum ; III. De Throno deturbatum ; IV. Vinculis constrictum ; V. Collari furcæ appensum ; VI. Neci adjudicatum ; VII. Raptatum capiteque truncatum . Insuper in eo Volumine duo supra quinquaginta accusationum Capita continebantur merè conficta , locusque patebat ulteriori accusationi .

272. Alter Codex Synodum continebat adversus Nicolaum I. Papam celebratam , in qua ipse irreparabili depositione , atque anathemate plectebatur , milleque ab Episcopis subscripta fingeatur , qui nullibi fuere inventi , nec fortè in rerum Natura extiterunt , etsi viginti , & unus tantummodo reverà adstiterint , ex Anast. Bibliot. in Præfat. Oct. Synod. Horum Voluminum , ut Nicolaus odibilis Orbi Universo redderetur , quatuor edidit exemplaria ; duo ad Ludovicum Occidentis Imperatorem transmitti debebant , horribilibus referta calumniis : unum ob eundem finem iisdem plenum , erimationibus per universam Italiam callidè spargendum ; alterum in Archivio Patriarchali

chali ad perpetuam rei memoriam detinendum .

273. Quoniam verò Ignatius simul & Basilii optinè advertebant , pacem Ecclesiæ Orientali ipsiusque vulneribus egrè posse mederi citra Synodum Oecumenicam , uti altera Synodo Photiana tranquillitas publica fuerat à Viris scelestissimis eversa , uterque Legatum suum Romam misit , qui Synodum à Romano Pontifice pro Ecclesiæ Constantinopolitanæ reparatione postularet . Ignatius quidem Joannem Pergensem Episcopum in calamitatibus fidum Achatem , Augustus Basilium Spatharium , eorum , quæ à Sede Apostolica gererentur , Testem futurum , & Nuncium . Photius quoque , quasi post tot scelera innoxius , Legatum suum mittere ausus est Petrum Sardensem Metropolitam infauscæ memoriæ Virum , sua jura propugnaturum , & Methodium Monachum ; quorum tamen priorem undæ Adriatici absorbuere , posteriorem verò anathemate notatum Roma remisit , test. Anast. in Vit. Adrian. II.

274. Nicolaum I. Romanum Pontificem , ad quem Legatio erat directæ , è vivis ereptum Nuntii præfati invenerunt , Virum profectò fortitudine Sacerdotali , zeloque Justitiæ , ob quem novi Eliæ à Græcis simul & Latinis laudem obtinuit , memorabilem . Ejusdem Successori Adriano II. eximie quoque virtutis , maximè autem insignis erga Christi pauperes magnificentie Pontifici , preces Ignatii Patriarchæ , Basilique Augusti exaratas literis Nuntii præfati exhibuere , quibus rogabatur Pontifex , ea , quæ statuerat Nicolaus , rata habere , simulque peractis ultimam manum imponere , Synodo collecta Generali , qua integra Ecclesiæ Constantinopolitanæ tranquillitas redderetur , negotiaque alia versarentur , publicæ conducentia

utilitati ; simulque de eo , quem obsequenti animo porrigebant , Codice Apostolicum ferre judicium dignaretur , nempe illum , quem superius memoravimus .

275. Precibus Oratorum benignè Adrianus pollicetur annuere . Volumen illud examini Doctissimorum Hominum , utrumque calientium Idioma , subjicit , Episcoporumque Cætum colligit , qui dignam de illo , sicut de cæteris , quæ agenda erant , sententiam ferrent .

276. Triâ in hac Synodo peracta sunt . Primò enim , auditis omnibus Photii sceleribus , Episcoporumque suffragiis , imaginariam Photii , & Michaelis Augusti Synodum adversus Nicolaum Papam confectam , Codicemque ipsius contentivum , omniaque exemplaria , damnavit , flammisque comburi jussit , ut de facto præstitum est , igne inde erumpente neque ingenti pluvia extincto , fetoremque , atque colorem emittente penitus infernalem , apud Anast. in Vit. Adrian. II. Secundò eâdem sententiâ binas Synodos adversus S. Ignatium à Photio , & Michaeli celebratas percellit . Tertiò , Photium à Nicolao damnatum ob nova crimina , quibus se adversus D. Petri Primatum erexit , Excommunicationi iterum subjicit , Laicâ tantum , si resipuerit , & Libellum porrexerit pœnitentiæ , communionem concessâ . Quartò eos , qui Conciliabulo supra expresso consensissent , aut scripssent , si illud anathematizent , Decreta Nicolai recipiant , Communionem Ignatii denuo amplectantur , exemplaria sacrilegæ Synodi comburant , Communionis Ecclesiasticæ indulget esse participes : secus , non . Imperatorem quoque Basilium à calumnia eximit , quasi Conciliabulo consenserit ; eoquia ibi appareat subscriptus . Fideles omnes Orientales

tales anathemate obstringit, qui, post hujus Decreti notitiam, monumenta, exemplaria, aut scripta quæcumque Conventiculum præfatum, tangantia, defendere, retinere, occultare, nec igne combussisse fuerint convicti, nec respondere voluerint, atque Apostolicis hac in re mandatis obtemperare neglexerint. Si autem Clerici fuerint, ultra censuram, vult quoque depositione mulctari. Hæc omnia ex Oct. Syn. Act. 7. summatim collecta sunt.

277. His sanctionibus præmissis, quibus Ignatii Dignitas, & Ecclesiæ Constantinopolitanæ tranquillitas ponebatur in tuto, Summus Pontifex facultatem optatam tribuit Synodi celebrandæ, Legatisque Apostolicis institutis, Donato Episcopo Hosliensi, Marino Diacono, ac Stephano Nepesino Antistite, quibus secretum de modo agendi cum Orientalibus, ac Synodi celebrandæ commonitorium traditum est. simul cum duplici Libello; uno quidem, professionis Fidei, & Ecclesiæ Romanæ subjectionis, Phorii, ejusdemque communionis participum damnationis, cui Episcopi omnes ad Synodum admittendi subscribere tenerentur; qui Act. 1. Oct. Syn. recitatus, & ab omnibus Patribus approbatus est: Altero autem pœnitentiæ, quâ resipiscentes fatebantur errasse, Phorium secuti, Ignatio, & Romano Pontifici abrenunciantes: huic subscribere debebant quicumque cuperent Ecclesiæ denuò sociari, cujus Act. 2. fit mentio.

278. His muniti documentis Legati Apostolici, Nuntii Augusti simul & Ignatii ab Urbe discessere. Cum autem Constantinopolim pervenissent, honorificentissimè à Basilio Augusto, Ignatio Patriarcha, Clero, Populoque universo excepti, anno Christi 869. die 5. Octobris.

bris Fer. 4. Synodo huic Octavæ , nemine ex Patribus , nisi Apostolicæ Sedis Romanæ , nec non Antiochenæ , & Jerosolymitanæ Legatis , ac Patriarcha Ignatio præsentibus , in Ecclesia Sanctæ Sophiæ , magnificentissimè à Justiniano I. constructa , coram Augusto Principe Basilio , sæcularique Magistratu , initium datum est , ac tempore congruo complementum .

279. Nunc autem hujusmodi Synodus examini subjicitur , an legitima , & Oecumenica fuerit ? Photiani quippè illam ut injustam , & tyrannicam traducunt : negant quoque Oecumenicam fuisse , sed ad summum Patriarchalem faciunt : hinc septem tantummodo Oecumenicas Synodos Orientales admittunt , quarum ultimam enumerant Nicænam II. adversus Iconomachos celebratam , ex Præfat. Constan. Hermenopol. ad Can. Epitom. , ex Matth. Blastar. in Collec. Can. , ex Epist. Synod. quam Constantinopolitanus Patriarcha , cæterique Præfules Schismatici nunc quoque post ordinationem suam conscribunt . Catholici autem Græci , Latinique eam ut legitimam , & Oecumenicam sustinent . Videndum est quid revera sit sentiendum ?

S E C T I O P R I M A

Octava Synodus legitima revera fuit .

280. **H**oc autem patet : nam I. Fuit convocata à legitima Potestate , nempe Romani Pontificis Adriani II. , petente Basilio Augusto , ex Epist. ejusdem Adriani ad Imperat. A. 8. 1. II. Eidem quoque præfedit per Legatos ex Niceta Passagone in vita Ignatii . III. Adire per se , vel per Legatos omnes Sedes Patriar-

triarchales, ut ex subscriptionibus patet. IV. Ob gravissima motiva, quæ Adrianum II. impulerant ad eam Basilio Augusto concedendam, fuit adunata; ut nimirum Ignatius legitimus Pastor restitueretur in integrum: sententia excommunicationis, & depositionis à Romanis Pontificibus prolata adversus Photium, ejusque Sequaces executioni mandaretur, Synodi quoque autoritate interposita: ut lapsi ob communicationem cum Photio, qui multi erant, veniam obtinerent, subscribentes Libello, & Epitimum, seu Pœnitentiam postulantes: ut remedia statuerentur, ne denuò perturbationes ob injustam Sedis Patriarchalis occupationem, emergerent, quod utique factum est, editis viginti septem Canonibus, quibus futuris incommodis illius Ecclesiæ in electione Patriarcharum occurritur: ut Hæresis Leonomachorum denuò extingueretur, favillas emittens. Hæc autem omnia legitima sunt motiva Synodi colligendæ; ergo &c.

281. Modus quoque agendi Sanctæ Synodi Rectitudine, Sapientia, Charitateque abundavit. Nam Act. I. admissi sunt Episcopi, qui constantes in veritate steterunt, nec Photio adhæserunt: Judicium autoritas firmata est, adductis testimonialibus suæ Legationis à Legatis Romani Pontificis, & cæterarum Sedium Patriarchalium, quæ aderant: lecta Epist. Adr. II. suæ voluntatis expressiva: lecta est forma Libelli ab eodem Pontifice transmissa, cui Episcopi omnes, qui Catholici esse vellent, & venia indigerent, juxta antiquam Ecclesiæ consuetudinem, subscribere oportebat: reddita quoque ratio fuit, cur Photius absens Romæ fuerit justè damnatus, & Vicarii Sedium Orientalium Photium damnaverint, quin eum alloquerentur præsentem.

282. Act.

282. Aët. 2. pro Episcopis, & aliis lapsis, qui Photio adhæserant, non tamen consecrationem acceperant, statuitur materna clementia Epitimum, ut nimirum ad sinum Ecclesiæ reciperentur: at Justitiæ quoque aliquo pacto, pœnitentiâ impositâ, satisfaceret: à Photio autem consecrati dignitate destituuntur, quia nullam veniam merebantur ex malitia peccantes. Leguntur Epistolæ Nicolai, & Adriani Romanorum Pontificum, quibus infelix status Ecclesiæ Constantinopolitanæ aperitur.

283. Aët. 3. Nonnulli Episcopi invitantur, qui à Photio consecrationem non acceperant, sed ei solummodò adhæserant: vocantur ut Libello subscribant, & in integrum plene restituantur. Ut verò Justitia Libelli, cujus subscriptionem Adrianus II. exigebat, fieret perspicua, lectæ sunt plures Epistolæ Basilii Augusti, & Ignatii Patriarchæ ad Adrianum II., quibus scelera Photii detegebantur, & status illius Ecclesiæ miserimus aperiatur.

284. Aët. 4. Ut æquitati satisfaceret, introducuntur Teophilus, & Zachariæ Episcopi Photiani fundamenta defensionis suæ adducturi, qui fuere à Legatib. Apostolicis convicti, numquam Romæ ut Episcopos fuisse receptos, aut Photium ut legitimum Patriarcham admissum, uti temerè asserabant; & hoc quidem etiam Judicibus sæcularibus evidens apparuit, qui alia eorum mendaciâ detexerunt.

285. Aët. 5. Photius ad Synodum vocatur, ut de se rationem redderet, & tueretur causam suam: accessit invitus, etsi canonicè accersitus: interrogatus, aut tacuit verba illa Ps. 38. 2. pronuntians: *Dixi custodiam vias meas, ut non delinquam in vita mea: posui ori meo custodiam, cum confisteret Peccator adversum me:* aut in spretum

Legat-

Legatorum Apostolicorum, Sediumque Patriarchalium nequaquam cathegoricè respondit, ac terminum ad se defendendum recusavit, etsi Assessores Augusti quoque, ut resipisceret, hortarentur, & terminum nonnullorum dierum assignarent.

286. Act. 6. Vocati Episcopi Photiani, longa dissertatione rationes suas, etsi temeritate insigni producant, ad Canones provocando; quibus satisfacit Metrophanes Smyrnensis Metropolitae. Indulgentiam, si Libello subseriberent, recusarunt, & nihilominus ultiores induciæ ad se defendendum tributæ sunt septem dierum, quæ benignitatem, & rectitudinem ejusdem Synodi indicant.

287. Act. 7. Qua finis causæ Photianæ per definitivam sententiam impositus est, Photium, & ejus Episcopos Sancta Synodus accersivit, qui Libello à Sedium Patriarchalium subsignato, subscribere respuerunt, convicia in Judices, quos recusarunt, jactantes: ac querentes se non auditos, à Senatoribus, jussu Imperatoris, redarguuntur apertè falsitatis, & oblata denuò se defendendi potestate, manent inflexibiles: quocirca, cum adversus Ecclesiam contumaces, & pertinaces se ostenderint, justissimè damnati sunt, & restitudo Sedis Apostolicæ patuit; lectâ Epistolâ Nicolai Papæ ad Clerum Constantinop., qua optimè, quidquid egit in causa hac, justificatur.

288. Postmodum Volumen Photii, in quo imaginaria Synodus adversus Nicolaum Papam, excommunicatio adversus illum lata continebatur, examini subjicitur, quod quidem à Photio prodiisse, præter alia inditia, constabat, quia Domi ejus inventum est, suoque nomine subscriptum velut Præsidis: quod vehementer.

hementem facere præsumptionem adversus Authorem, posseque ex illis ad sententiam damnatoriam deveniri, habetur L. *Sciant Cuncti* C. de Probat. & tradunt DD. Bald. in L. *Si quis adulter*. C. ad Leg. Jul. Abbas in Cap. *Accedens*, num. 6. de Accusat. Felin. in Cap. *Afferre*, num. 6. de Præsumpt. Adeoque in sententia finali damnativa nulla injustitiæ labes inveniri potest, cum Reus adversus antecedentes præsumptiones nequaquam, ut debebat, si potuisset, exceperit. Hinc Anathematismi adversus Photium feruntur, & Sequaces ejus, ibidem recitati.

289. Act. 8. Pro perfecta Schismatis extinctione decrevit Sancta Synodus, comburi Chirographos omnes, quos ab Episcopis, & Clericis Photius, ut suæ devotioni vinciret, exigebat: omnia quoque Volumina adversus Ignatium, & Nicolaum Synodos, Actaque continentia flammis addici.

290. Inventi quoque à Patribus examen prosequentibus fuere falsi Sedium Patriarchalium Vicarii, falsi Metropolitæ, aliique, qui finguntur à Photio Synodis imaginariis interfuisse, qui omnes negarunt, se Synodis illis adstitisse, aut eisdem umquam subscripsisse.

291. Quoniam verò ad exscindendos Iconomachos reviviscentes Synodus VIII. collecta est, Christinus, & alii hujus sceleris Rei, qui penitus convicti, noluerunt resipiscere, sub inani obtentu, non dacti in Scripturis de Imaginibus colendis mandatum, cum detur revera virtualiter, & implicite, Anathemate percussi sunt.

292. Falsi quoque Testes, qui adversus Sanctum Ignatium deposuerant, quasi Thronum Patriarchalem malis artibus occupasset,

ac

ac tyrannicè gubernasset, crimen suum fassi sunt, & Epitimio mulctati, ab ipsomet Ignatio, quem uti legitimum Patriarcham agnoverunt, imponendo.

293. Idipsum coram Patriarchæ Alexandri-
ni Legato, iis, qui Conciliabulo adversus Nicolaum Papam subscripserant, & Personam, falsorum Vicariorum Sedium Patriarchalium egerunt, & tamen viri erant plebei, ac bajuli, præscriptum est: hi quippè ultrò crimen suum fassi, allegantes se ad illud facinus per vim, & metum à Michaelè Augusto, Photioque compulso, Nicolaum ut legitimum, & Sanctum Pontificem agnovete.

294. Act. 10. Viginti septem Canones conditi sunt, ut præteritis, præsentibus, ac futuris incommodis Sancta Synodus medelam ferret. I. Enim præcipit, servari Decteta antiqua Conciliorum. II. Servari Decreta Nicolai I., & Adriani II. circa restitutionem Ignatii, & ejectionem Photii. III. Coli debere Christi, Deiparæ, Sanctorumque omnium Imagines. IV. Declaratur, Photium numquam fuisse Episcopum, ejusque Ordinationes, & Acta invalida. V. Neminem à Senatorio Ordine ad Episcopatum immediatè ascendere, sed gradatim. VI. Dicitur anathema Photio, Libellorum, & Chirographorum imaginariæ Synodi effinctori. VII. Anathematizatos à Sancta Synodo ad Sacras Imagines pingendas, aut Sacras Disciplinas edocendas minimè posse admitti. VIII. Non posse à Patriarchis Chirographos pro sui munimine exigi. IX. Magistros scientiarum non posse à suis Discipulis exigere Chirographos, uti Photius faciebat. X. Neminem ex Clericis posse à suo Episcopo seipsum segregare citra Synodale Decretum. XI. Anathe-

thematizantur docentes, aut sentientes cum Photio, duas in Homine Animas reperiri. XII. Electiones Episcoporum recipi non debere, quas præpotentia Principum extorserit. XIII. Honores Ecclesiæ conferri debere iis, qui in gradibus inferioribus se bene gesserint, & hos quidem extraneis præferendos, & iis, qui sæcularium Domorum curam gerunt. XIV. A sæculari Potestate Episcopis debitum honorem præberi oportere, qui propterea dignitatis suæ decorem jubentur servare. XV. Interdicuntur Emphiteusæ bonorum Ecclesiæ, aut bona ejusdem alienari, aut distrahi. XVI. Vetatur severissimè, ne Sacerdotibus illudatur, illorum functiones illusoriè exercendo, aut exercitium præcipiendo, uti faciebat Michael Imperator. XVII. Metropolitæ, Patriarcha vocante ad se, accedere debere. XVIII. Ecclesias privilegiis suis nudare minimè posse. XIX. Ecclesias à Patriarchis, & Metropolitæ, sub obtentu Visitationis, gravari non debere, nihil penitus ab ipsis exigendo. XX. Nullum Episcopum posse repellere ab Emphiteusi, vel alia possessione eos, qui illas receperunt, absque notitia eorum, qui rebus hujusmodi præsident. XXI. Patriarchas, præcipuè Romanum inhonorari non debere, neque adversus ipsum sententiam dici, sed interrogari, & ab eo solutionem quæstionis accipere, nedum extra, sed etiam in Synodo Oecumenica. XXII. Non debere Principes sæculares se in electione Summorum Sacerdotum ullo modo miscere, sed à Sacerdotum Collegio fieri oportere. XXIII. Episcopos non posse alienarum Ecclesiarum possessiones locare, nec constituere Presbyteros in Ecclesiis sibi minimè subjectis, præter voluntatem Episcopi eorum. XXIV. Prohibentur Metropolitæ ministeria sua infe-

inferioribus Episcopis committere, sed jubentur per se ipsos exercere. XXV. Clerici à Methodio, aut Ignatio consecrati, & qui Photio adhæserunt, nec Sanctæ Synodo parere voluerunt, eidem abrenunciantes, post sententiam Synodi jubentur pro depositis haberi, tametsi convertantur. XXVI. Statuitur ordo appellationis ad Metropolitam, à Metropoli ad Patriarcham à quo solo Metropolita judicentur, non autem à vicinis Metropolitibus, aut Provinciali Synodo. XXVII. Episcopis præter tempora, & loca indulta Pallio uti minimè licere, & à Monachis ad Episcopatum assumptis vestem Monachalem deferendam esse. Hi sunt Canones in Octava Synodo pro Ecclesiæ Constantinopolitanæ reparatione conditi, pœnis præscriptis adversus transgressores, depositionis, excommunicationis, & aliis respectivè inflictis, nisi Rei moniti se correxerint.

295. Ex his omnibus constat, qua rectitudine, gravitate, justitia, charitateque Sancta hæc Synodus processerit, delinquentes quidem multando, contumaces verò severè coercendo. Nec Photius, aut Sequaces ejus ullam habent de Synodo causam conquerendi.

296. I. Quia ipsi eandem Sedem Apostolicam in Judicem elegerunt, & supremum agnoverant Romanum Pontificem, cujus Decreta Synodus exequebatur: nam Photius misit Legatos suos Romam ad Pontifices Nicolaum, & Adrianum II. causam propriam acturos, & Judices à Sancta Sede postulatueros, ut in relatione historica dictum est; ergò repelli non poterat ut Judex Sancta Sedes per Legatos suos in judicio sedens, cum leges quoque civiles statuant. L. *Licet autem ff. de receptione arbitratorum*, electos in Judices nullo pacto respui pos-

posse, nisi manifestè constet de iudicii lati improbitate; & rectè advertit Act. 6. Metrophanes Smyrnenſis Metrópolita, Zachariæ Chalcedonenſis Episcopi diſſolvens argumenta.

297. II. Poſſeſſor legitimus, & pacificus non poteſt ſuo jure privari, controverſia quacumque ſuperveniente, niſi evidentiffimè appareant probationes, ex Innoc. & Abb. in Cap. *Solicite*, de reſtit. ſpoliat. : in dubio autem Lex ſtat pro poſſeſſore, juxta regulam juris in 6. *In dubio prior eſt conditio poſſidentis*. Ignatius autem ante Photii intruſionem pluribus annis Thronum Regiæ Urbis occupabat, ex Nicolao I. Epiſt. ad Michaelē Act. 4. relata: hocque omnibus notorium erat, ut optimè Elias Jerofolymitanus Legatūſ advertēbat act. 6. VIII. Synod. ; ergò non poterat expelli Ignatius, niſi evidentiffima apparerent argumenta ex parte Actoris Photii, quæ tamen numquam fuere adducta, nec poterant adduci.

298. Neque dicatur, ab Ignatio Præfecturam ſpiritualem Conſtantinopolitanæ Eccleſiæ fuiſſe reſignatam: hoc autem patere ex Chirographo, cui ipſemet ſubſcripſit, & Imperatori traditus eſt: aliunde verò crimina ipſi impoſita depoſitionem meruiſſe à Synodo inſlictam; ac proinde potuiſſe Photium legitimè ad Cathedram illam aſſumi, adeoque injuſtè uti occupatorem à Synodo fuiſſe damnatum.

299. Hæc enim infringuntur apertiffimè: nam etſi reipſa Ignatius, aut ſpontè, aut jure damnandus Prælaturam reſignafſet, non propterea Photius legitimè occupafſet, cū indigeret diſpenſatione, Sacris Canonibus Homini Laico, & Curiali aſcenſum ad ſacram Præfecturam immediatum vetantibus, ut optimè Nicolaus Pontifex Epiſt. ad Photium per Leonem

nem à secretis Imperatoris missam prænotavit, & refertur Act. 5. Synod. VIII. ; quam tamen dispensationem numquam obtinuit, alioquin illam exhibuisset.

300. Cæterum falsum est, Ignatium sponte Prælaturam cõssisse: semper enim constantissimè recusavit, asserens, numquam Sponsam à se semel assumptam, quacunque vi cogente, dimissum iri: Chirographus autem fuit extortus, manu ejusdem à carnifice violenter mota, ut patet Act. 6. Synod. VIII., & hoc omnibus notorium erat, referuntque Historici Nicetas, Curopalata, Cedrenus, & Alii: nec sanè tormentis, immanitatibusque opus erat ab Ignatio toleratis, ut suam Dignitatem sustineret, si voluntarie ipsi vale dixisset.

301. Minus subsistit damnatio adversum, Ignatium à Pseudo-Synodo Constantinopolitana edita: tum quia Legati Apostolici, qui eidem præfuerunt, nullam sententiæ pronuntiandæ authoritatem habebant, sed solummodo statum causæ, prout invenissent, Pontifici significandi, ex Epist. Nicolai ad Michaellem: tum quia Testes erant terrore Bardæ, Phôtii, & Michaelis coacti, & hoc quippe notorium erat, & propterea Epitimium acceperunt: Testis autem coactus nihil probat, de Test. Cap. *Sicut nobis*, & Cap. 1. de Test. Confessio verò in Chirographo prædicto expressa, Thronum se Regiæ Urbis pravis artibus occupasse, eoque se indignum, utpote violenter expressa, nullam facit probationem, Cap. *Lotharius* 31. quæst. 2.

302. III. Reus nolens se Judici sistere, ac renuens respondere, veluti contumax damnari potest; Legis enim præsumptione supponitur convictus, qui renuit ad Judicium accedere, jura sua defensurus, l. de ætate 6. *Qui tacuit*
ff. de

ff. de inter Actiones Cap. *Si potest de Confessis* in 6.; maximè in Judicio Ecclesiastico, cujus authoritatis contemptus inducit ab Ecclesia expulsionem, Matth. 18. 17. *Si Ecclesiam non audierit sit tibi sicut Ethnicus, & Publicanus*. Propterea Nestorius ab Ephesino I., Dioscorus à Chalcedonensi irreparabilem damnationem retulerunt, Act. 3. Chalced. & relat. ejusdem Synod. ad Leonem Magnum. Photius autem ita se gessit: nam Act. 5. inquit se invitum trahi ad judicium, ac de multis interrogatus noluit respondere, Judicesque contempsit: denuò interrogatus, ait: *Meæ justificationes non sunt in hoc mundo*; spatiumque rebus suis consulendi recusavit. Act. autem 7. ait: *Vicariis autem* (nempe Apostolicis Legatis, & Sedium Patriarchalium.) *rationem non præbemus*: aitque ulterius ad pœnitentiam invitatus ore Gregorii Syracusani Antistitis ejusdem Discipuli: *Ipsi pœnitentiam agant super quæ deliquerunt*; ergo contumax, & contemptor cum sociis suis fuit Ecclesiæ in Synodo Oecumenica congregatæ.

303. Quod ergo Synodus VIII. cum Photio veluti explorato invasore Sedis alienæ se gesserit, atque uti talem damnaverit, qui nec voluit, nec si voluisset, poterat, quæ pro Ignatio faciebant, evertere, aut infirmare sibi adversantia, nullam Photio, ac Fautoribus ejus injustitiam intulit: juxta enim Leges Ecclesiæ processit, reum plane convictum ordinariæ pœnæ adjiciens, ac Decreta Primæ Sedis, quam ipsimet imploraverant, non tumultuariè, sed synodicè à Patribus agnita exacte adimplens.

S E C T I O S E C U N D A

*Synodus Oſtava verè fuit Oecumenica .
 Paſet hoc , quia ejusdem univerſa-
 litati nihil deeſt .*

304. I. **I**mperator Baſilius Macedo pro turbis
 nibus Eccleſiæ Orientalis pacandis
 hanc Synodum ab Adriano II. Romano Pon-
 tifice poſtulavit , ut colligitur ex Episto-
 la ejus-
 dem Pontificis Act. 1. Synodi lecta : Romani
 autem Pontifices , petentibus Imperatoribus ,
 minimè conſuevere Synodos tantum Nationa-
 les convocare , ad quas Apoſtolicos mitte-
 rent , ut præſiderent , Legatos , ut percurrenti
 Synodos in Oriente celebratas , & ab Augu-
 ſtis imploratas , Nicænam utramque , Con-
 ſtantinopolitanam , Ephelinam I. , & II. , Chal-
 cedonenſem II. , & III. Conſtantinopolitanam ,
 liquido apparebit .

305. II. In omnibus Actionibus non minùs
 à Patribus , quam à Senatoribus Synodus hæc
 Oecumenica nuncupatur , in quam capita om-
 nium Eccleſiarum convenerunt , & uti talem
 ipſam coram Imperatore , qui eam colligen-
 dam ſtuduerat Metrophanes Smyrnenſium Me-
 tropolita Act. 6. commendat . Act. vero 10.
 poſt editos Sacros Canones habetur terminus
 Synodi ab omnibus Patribus approbatus , his
 verbis : *Sancta , Magna , & Universalis Sy-
 nodus , quæ per Divinam voluntatem* : idipſum
 pluries repetitur , & inter cæteras Oecumeni-
 cas , quas pro ſalute Eccleſiæ Auguſti celebra-
 das curarunt , hæc quoque , quæ ponitur nu-
 mero octava , recenſetur ; igitur fuit Oecu-
 menica .

Paſ II.

R

306. III.

306. III. Synodum Oecumenicam fuisse, docet Patrum ex omni Orbe convocatorum amplitudo. Quantum enim ad Occidentales, coacta Synodo, Legatos Apostolicos, qui Sedis Apostolicæ, & Patrum Occidentalium nomine assisterent, mittendo, Cuncti voluntate adstiterunt, eo pacto, quo cæteris Oecumenicis Orientis Synodis dicuntur fuisse præsentibus. Eodem etiam modo Præsules Alexandrinæ, Jerosolymitanæ, & Antiochenæ Diocæsis per Legatos Patriarchales virtute adstiterunt, cum præsentia ipsâ physicâ non possent, assensum definitionibus Synodi præbentes: eoque magis istis præsentibus universalitas Synodi enitet, quia ipsi, utpote Saracenis in politicis subiecti, solo Romani Pontificis imperio, non verò Augusti accedere potuerunt. Ex iis verò, qui Constantinopolitano subdebantur Patriarchæ, omnes quidem acciti sunt: at pauci venerunt, quia pauci à labe Photii erant immunes; igitur ex parte convocationis Synodus hæc est universalis, & Oecumenica.

307. Motiva quoque ipsius celebrandæ ad universalitatem sufficiebant. I. Exinctio hæresis Iconomachorum, quæ denuo pullulabat. II. Condemnatio erroris, quem Photius suscitaverat ad Ignatium vexandum, qui maximam Ecclesiæ perniciem poterat asferre, nempe in Homine duas Animas inveniri. III. Primatus Romani Pontificis, quem Photius evertere conabatur, ad quem stabiliendum Leo Magnus Chalcedonense coegit, à Dioscoro concussum. IV. Restitutio Ignatii legitimi Patriarchæ, expulsio Photii prædonis, & adulteri, uti pro Athanasio vindicando Julius I. Sardicensem Synodum pariter Oecumenicam celebrandam curavit. Quæ omnia sufficiebant ad
Syno-

Synodum Oecumenicam colligendam, maxime stante Pontificis Romani voluntate, à cujus nutu pendet, Synodum esse Oecumenicam, cum ejus simplici beneplacito Synodus V., quæ titulum hunc non merebatur, assensu Vigiliæ Romani Pontificis Justiniano Primo Augusto morem gerentis, evaserit nedum legitima, sed in Oecumenicam quoque transferit.

308. Porro Synodum hanc à Sede Apostolica fuisse confirmatam, nedum Anastasius asserit in ejusdem præfatione, verum etiam elicitur ex hoc, quod in Professione Fidei, quam olim Romani Pontifices emittebant, cujus formula reperitur in calce Tom.3. Concil. Par.2. sec. poster. Edit. Binian. inter Oecumenicas Synodos num. octavo Hæc numeratur: neque potest esse Florentina, ut Abrahamus Cretensis in sua interpretatione eructare ausus est: nam Professio Fidei Synodum hanc Constantinopolitanam, non Florentinam appellat multo tempore posteriorem: neque potest esse illa Photiana, quæ Schismatico illi Sedem Constantinopolitanam restituit: nam Pontifex initiandus in præfata Formula profitetur, se Decreta omnia vellem servare, quæ in Octo Synodis Oecumenicis antecedentibus, & Prædecessorum suorum sanctionibus continentur, quales sunt Decretales Photii, ejusque Sequacium damnativæ, ejusque Patriarchatus everisivæ, à Nicæo I., & Adriano II. editæ. Synodus autem Octava hæc complectitur, hisque præcipuè innititur, virtuteque ipsarum Photius fuit ejectus; ergo hæc non est Synodus à Photio pro sui restitutione coacta.

S E C T I O T E R T I A

*Solvuntur Objectiones contra primam
partem Asserti.*

309. **O** Bji. I. Oſtava hæc Synodus errorem exploratum docuit, hærefim Donatiſtarum ſapientem; ergo eſt illegitima. Conſequ. patet. Prob. ant. nam Canone 4. aſſerit, Photium numquam fuiſſe Epiſcopum; ejus ordinationes irritas omninò aſſerit, & præcipit, Eccleſias ab eo dedicatas iterum conſecrari oportere: hic autem eſt error exploratus, cum Ordinationes, & Baptiſmus etiam ab Hæreticis in forma Eccleſiæ collatus validus ſit. Hinc Clemens Oſtavus Bulla *Sanctiſſimus*, apud Cherub. Tom. 3. præcipit, Orientales etiam Hæreticos, & ab Hæreticis ordinatos, ad Eccleſiam redeuntes abſolvi quidem à cenſuris, & ab irregularitate diſpenſari, non tamen denuò ordinari; ergo erravit Oſtava Synodus, aſſerens, Photium numquam fuiſſe Epiſcopum, & invalidas ejusdem Ordinationes, atque Conſecrationes declarando.

310. Reſp. nèg. ant., ad cujus probat. dico, majorem eſſe veram quoad licitam executionem, non verò quoad ordinis poteſtatem: Photius enim dici poterat poſt condemnationem non eſſe Epiſcopus, neque unquam fuiſſe, quia, tametiſi fuerit ordinatus Epiſcopus, id contigit irregulariter, & Canonibus adverſantibus, adeoque nec licitè poterant ab eo conferri Ordines, nec ab eo recipi, neque recepti exerceri: ob quam rationem Formoſus Papa pronuntiavit, à Photio nihil, niſi damnationem, dari potuiſſe, & quia irreparabilis omninò hæc

nò hæc fuit , nulla refurgendi spè affulgente ,
uti contigit in Clericis degradatis , & solemniter
depositis , propterea dicitur numquam fuisse
Episcopus , & Juris fictione merus Laicus ,
& sola Laica communione , si resipuisset , do-
nandus .

311. Idipsum de Sequacibus quoque Photii
dicendum est : hunc autem esse legitimum sen-
sum Octavæ Synodi , patet : nam Joannes VIII. ,
qui Photium restituit , minimè ei præscripsit
ordinationem denuò recipere , sed solummodo
veniam in Synodo postulare , ex Epist. ejusdem
ad Basil. Tom. 3. Concil. Edit. Binian. extante .
Idipsum Ordinatis à Photio concessit Formosus ,
dummodo , Libellis oblatis , pœnitentiam , &
emendationem pollicerentur , ex Epist. ejusdem
ad Stylian. Cæsareæ Euphatesiæ Antistitem ,
tom. 3. cit. extante . Quod autem Synodus præ-
cepit , Ecclesias à Photio consecratas denuò
dedicari , nihil officit ; cum Consecratio cara-
cterem non imprimat , adeoque uti mera cære-
monia renovari potest , Ecclesia mandante ,
sicuti à Gregotio Magno in quadam Ecclesia
Romæ ab Arianis Episcopis sacrata renovata
est , teste Baron. ad annum Christi 591 .

312. Obji. II. Nemo Judex esse potest , &
Pars in eodem judicio , ex Innoc. III. Cap. *Ex
parte* de Verbo signif. , nec dissentit Jus civile
L. *Et hoc Tiberius* ff. de Hæredit. Instit. : at in
Octava Synodo iidem fuere Judices , & Partes ,
nempe Legati Adriani II. Romani Pontificis ,
de cujus simul , & Nicolai I. judicio in causa
Photii controvertebatur , an rectum fuisset ; er-
gò illegitima fuit Synodus .

313. Resp. Majorem esse falsam in cujus-
cumque generis Principe Supremo , sive Mo-
narca sit , sive Respublica , alioquin daretur

processus in infinitum; neque unquam auditum est, Principem offensum in jus vocari à delinquente, quasi ab eo nequeat veluti par e coerceri.

314. Cæterum min. neg. In Octava enim Synodo Romanus Pontifex non erat Pars, sed Judex solummodo, cujus judicium minimè in controversiam vocabatur, & ab ipsomet Photio ante fuerat agnitum; ipsum quippe imploravit, ut Patriarchatum suum, quem caducum ipsemet agnoscebat, autoritate Petri suprema firmaret; sed Norma unica fuit Ecclesiastici Judicii inter Photium, & Ignatium: idcirco enim Synodum illam Basilius Imperator collegit, ut Decreta Nicolai I., & Adriani II., quæ à Photio, & Michaele Augusto, nedum minimè impleta, sed contempta superbè fuerant, executioni mandarentur. Neque alia ratione Adrianus II. Synodum concessit, ex ejus Epistolis Legatorum directricibus Act. 1., & 7. perlectis. Nec duo tribunalia sunt Pontificis, & Synodi, sed idem; nempè Romanus Pontifex ex semetipso, & idem cum Synodo sententiam ferens.

315. Obji. III. Ignatius in hac Synodo nedum à Legatis Apostolicis, verum etiam à Patribus Synodi, veluti legitimus Patriarcha ad suffragandum fuit admissus, & veluti talis agnitus, & summis amotis, ac venerationis significationibus affectus, adeout Epitimum lapsis tribuendum fuerit ipsi commissum. Photius verò tamquam Reus, & ut Invasor Episcopatus habebatur, & tractabatur: hoc autem videtur injustum, & personarum acceptionem apertissimè sapere, cum de legitimitate Patriarchatus Ignatii controversia verteretur, cumque variorum criminum Photius accusasset; ergò malè, & injustè, ac tyrannicè Synodus processit; ergò illegitima fuit.

316. Resp.

§ 16. Resp. conc. maj. , & neg. min. Quamquam enim Photius litem de Patriarchatus Ignatii validitate movisset , ipsique crimina objecisset , ob quæ repelli debuerat , adhuc tamen Ignatius , cum duodecim circiter annis pacificè in Throno Constantinopolitano Sacro sedisset , nec Dignitatem abdicasset , ejusdem possessione fruebatur , atque in ea detineri debuit , donec oppositum ab Adversario ostenderetur , quod utique in Synodo fieri debebat à Photio Actore : proindeque ipsi Ignatio Legati Apostolici , Patresque Synodi honores debitos tribuebant . At de Photio constabat , illegitimè Thronum invasisse , cum Laicus esset , & præter ordinem Sacris fuisset initiatus ; præsumebatur ergò Invasor , & Lupus , donec oppositum ostendisset , quod utique in Synodo faciendum erat , nec adhuc fecerat ; sicuti adhuc non probaverat , impetrasse dispensationem , Patriarchatum adversis Canonibus obtinendi ; neque crimina Ignatio objecta , & Nicolao quoque Papæ impudenter impacta , vera esse adhuc convicerat , Seque minimè calumniatorem probaverat , aut ab aliis delictis , quæ ipsi imputabantur , ostenderat innoxium , nec sperabatur ab eo posse fieri , adeò improbitas ejus notoria censebatur ; idcirco cum eo veluti Laico , ac Prædone alienæ Sponsæ actum à Patribus est .

§ 17. Obji. IV. Causa Photii minimè fuit examini subiecta : nam præter Libellorum porrectionem , quam Romana Sedes exigebat , ne accusati Schismatici censerentur , & lectionem Nicolai I. Epistolarum , & Adriani II. , nihil aliud Patres videntur præstitisse , eas veluti regulas Judicii faciendi supponentes : hoc autem non est causam examini subijcere , sed supponere judicatam , quod iniquissimum est , &

contra morem præteritorum Conciliorum, à quibus Dioscori, Nestorii, & Aliorum causæ fuerunt discussæ, tametsi autoritas Primæ Sedis tangeretur; ergò hæc Octava iniquè se gessit.

318. Resp. neg. maj. ut ex corpore Quæstionis perspicuum est. Quod verò Nicolai, Adrianique Epistolæ agendorum Regulæ fuerint, mirum non est, cum in cæteris Orientalibus Conciliis idipsum fuerit servatum: hinc Hæretici censerentur eisdem subscribere renuentes, ut in Chalcedonensi apparuit Act.4. ubi Patres clamarunt: *Qui non subscribit Epistola Leonis, Hæreticus est.* Nestorii verò, & Dioscori causam Patres quidem agitarunt, sed Pontifice volente, ac dirigente per Legatos, & instructionem suam ante præmissam.

319. Alio quoque ducti motivo Patres Octavæ Synodi Epistolis præfatis, veluti regula usi sunt: quia nimirum in illis distinctissimè quid in causa Photii actum fuerat; quæ fundamenta pro sui defensione proponebat; quibus monitis à Sede Apostolica præventus, & omnia causæ merita continebantur: nec ea vocare in controversiam poterant, multis, qui testari possent, præsertim Imperatore, ejusque Patriis viventibus, rerum, uti acciderant, optimè consciis.

320. Obji. V. Photius, & ejusdem Sequaces inauditi damnationem retulerunt; ergò Judicium Synodi illegitimum, & iniquum fuit. Conseq. patet: Reus enim audiri in defensionibus debet, vel ipsemet physicè præsens, vel saltem moraliter per Advocatum suum, ipso jure naturali dictante, legesque omnes tam civiles, quam Ecclesiasticæ præscribunt. Ant. autem constat Act.6. in qua Legati Apostolici nec canonicè illum citare, nec audire voluerunt.

runt, utpote ab Ecclesia Romana damnatum, sed permiscere tantum, à Laicis vocari, ut Libellum exhiberet Pœnitentiæ. Ingresso autem Synodum, non fuit dictum, sicut Dioscoro, ut redderet rationem, quare damnati non deberet; sed interrogatus tantummodo fuit, an Decreta Summi Pontificis amplecteretur? Nec aliud Apostolici Legati protulerunt, nisi: *Admone-museum, ut procidat Sanctæ huic Synodo, & inclinet cervicem suam Sanctissimo Patriarchæ Ignatio Pontifici suo ad pœnitentiam, & efficiendum membrum Sanctæ Ecclesiæ, ad se sociandum Sanctæ Christianorum communioni, uti mos est Fidelium Laicorum.*

321. Idipsum cum Sæctatoribus Photii actum est, nam communionis Photii Episcopos, nempe Zachariam, & Theophilum nolebat Synodus audire, exclamans: *Sit portio Theophili, & Zachariæ cum Photio*: Quod quidem adversari Justitiæ, ipsemet Bahanes Patritius agnovit Act.4., & nihilominus nil aliud ipsis, præter lectionem Epistolæ Nicolai I., concessum est, & Act.6. idipsum petentes, nihil aliud, quam rigidam Imperatoris objurgationem, retulerunt; ergò nec Photius, nec ejusdem Affecclæ in suis defensionibus fuerunt auditi; adeoque &c.

322. Resp. neg. ant.; constat enim Photium à Sancta Synodo fuisse accersitum: Act. enim 5. dixerunt Apostolici Legati: *Interrogetur, si desideret venire in Sanctam, & Universalem Synodum hanc?* Ex parte verò Synodi missi sunt, qui flagitarent ab illo; *Vis venire in Sanctam Synodum, an non? Si dixerit, quia nolo, interrogate eum, Quare?* Rogabatur autem professio, ut jura sua propugnaret, quæ si vera extitissent, & inconcussa, Patres utique aliud decrevissent; eoque magis poterat.

quæ pro se faciebant in medium proponere , quia Senatus , & Palatini favebant ipsi , & libentissimè aliquid , quo se purgaret , audissent , ut patet ex vehementi hortatione Patritii Bahanis , qua ipsum urgebat , ut coram Synodo fundamenta sua produceret , seque tueretur , uti Sancta Synodus cupiebat , & propterea citationem secundam transmisit , ut quia sponte venire recusabat , accederet invitus , ut patet Act. 5.

323. Legati quidem Apostolici se in eo audiendo aliquantisper difficiles ostenderunt : non quia vellent eum damnare indefensum , ipsum quippè pluries interrogarunt , an Decreta Patrum , & Romanorum Pontificum , qui eum damnaverant , reciperet : qua interpellatione ipsum profectò urgebant , ut se defenderet , adducendo validas rationes , cur non reciperet ; vel si admitteret , eas sibi minimè ostenderet adversari : sed quia censebant , in re notissima nullum adesse locum defensionis , solumque remanere , ut veniam à Sancta Synodo humiliter postularet : quod ergò aut mutus taceret Photius , aut nihil ad rem adduceret , non defectui Sanctæ Synodi tribuendum est , sed aut obstinationi ejusdem in sensu suo persistentis , aut confusione criminum suorum , quibus nulla subesset legitima excusatio , ut optimè Bahanes Patritius animadvertit , qui Act. 6. *Nos , inquit , tenemus , quia confusione , & metu depressus desipis , nesciens quid dicas .*

324. Quantum ad Socios , & Sectatores Photii attinet , eos nequaquam fuisse auditos , evidenter falsum est , cum Act. 6. Zacharias Chalcedonensis Antistes pro Photio , Seipso , & Sociis fervidissimè declamaverit , cujus argumenta Metrophanes Smyrnenensis Metropolita plenissimè dissolvit. Quia verò Zacharias habere
pro

pro se Canones Apostolorum, & Synodorum jactitabat, invitatus est, ut eos produceret, quod tamen minimè fecit, quia revera non poterat.

325. Et profectò quomodo intelligi potest, Sedem Apostolicam, quæ unum ex Legatis suis prævaricatorem, quia absens erat, damnare noluit, & sententiam adversus Gregorium Arbestam Syracusanum Præsulem latam adhuc sufficienter auditum suspendit, voluisse tunc rigore præcipiti adversus ipsasmet consuetudines suas coram Orbe universo, & Imperatore, contra Photium, ejusque Sequaces inauditos animadvertere, ut ipsemet Nicolaus Epist. ad Clerum Constantinop. Aët. 7. Oct. Syn. lecta notavit? Verum est utique, Episcopos præfatos photianos ab Imperatore flagitasse in Synodo hac, ut ipsis liceret testes adducere, quibus constaret, ipsos, & Photium veluti legitimos Episcopos à Nicolao fuisse admissos: at hæc nimia erat impudentia, cum notorium esset, Legatos à Nicolao non ad approbanda, quæ facta fuerant, sed inspicienda, & inde referenda Pontifici, missos fuisse, & hoc scire ad Pontificem pertinebat, uti Supremum Ecclesiæ Principem; ipso ergo publicis literis testante, Se Photium, & Zachariam, Aliosque ab eo missos minimè ut Episcopos recepisse, quis eadem poterat fidem denegare, cum Supremo Principi testimonium de re propria ferenti, irrefragabiliter sit credendum?

326. Et quidem nemo prudens censuerit, Nicolaum Virum gravissimum, Græcorum quoque laudibus commendatum, adeo pueriliter egisse, ut, si Photium, ejusque Legatos, uti veros Episcopos Romæ publicè suscepisset, oppositum publicis literis ad Augustum, ad Pho-

tium, ad Ignatium, ad Clerum Regiæ Urbis, ad Orbis Episcopos omnes retulisset, & quidam uniformi adeò constantia, ut odium propterea Imperatoris in se converterit?

SECTIO QUARTA

Solvuntur Argumenta contra secundam partem Asserti.

327. **O**Bji. I. In Actis nulla legitur omnium Orbis Episcoporum convocatio, aut indictio, sive à Basilio Augusto, sive ab Adriano Romano Pontifice edita, cum Basilius solum Synodum petierit pro Schismate Ecclesiæ Constantinopolitanæ tollendo, ex Epist. ejusdem ad Adrianum, quod quidem eventu comprobatum est; in exordio enim sui solos Apostolicos Legatos, & Apocrifarios Sedium Patriarchalium, & Ignatium Regiæ Urbis Antistitem habuit præfentes, & Act. 12. fuerunt admissi Episcopi duodecim tantum communionis Ignatii, & in fine solummodo numerum centesimum attigerunt; ergò non fuit Oecumenica.

328. Resp. neg. consequ. Etsi enim expressa non legatur convocatio Patrum omnium universi Orbis, habetur tamen implicita, & virtualis, cum Sedes Patriarchales minimè Legatos misissent, nisi ad Synodum Universalem vocatæ fuissent, ad quam à solo Pontifice, & de ipsius voluntate ab Imperatore poterant accersiri. Quoniam verò hæc Synodus à seipsa, à Patribus, ab Imperatore Oecumenica semper appellatur, censendum est, hanc, & non purè Patriarchalem ab Imperatore fuisse ab Adriano postulatam, & convocatam.

329. Idcirco autem pauci adeò Episcopi in eadem

eadem numerantur, quia nemo ad Synodum admittebatur, nisi qui Libello Româ Constantinopolim transmissio subscriberet: ii autem, qui Libello subscribere renuebant, multissimi erant, Photii communionem polluti, quorum tamen aliqui accesserunt, Libellum porrigentes, numerumque centesimum expleverunt: neque numerus major, vel minor facit Synodum Oecumenicam, sed aliæ rationes, quæ huic Synodo non defuerunt.

330. *Obji. II. Synodus VIII. præcipue pro Ignatio in Patriarchatu firmando, & condemnatione Photii stabilienda, Ecclesiâque Constantinopolitanâ pristinæ tranquillitati restituendâ fuit collecta: hoc autem non est motivum Synodi universalis, cum causâ privata fuerit, peculiaris, non universalis Ecclesiæ: alioquin multæ aliæ Synodi, quæ similia negotia tractarunt, uti fuit Synodus sub Menna, & Hormisda Pontifice, universales dicerentur, quod profecto falsum est; ergo hæc Synodus non fuit Oecumenica, & universalis.*

331. *Resp. conc. maj. & ne. min.: nam, causa privata potest dare motivum Synodo universali, si Ecclesiæ Summo Pastori opportunum videatur, ex cuius arbitrio pendet, Synodum aliquam esse universalem, vel particularem. Profecto multæ Synodi Orientales, & Occidentales, quales videntur illæ, in quibus causa Pelagii, & Cœlestii ventilata est, particulares fuere, tametsi de fide tractarent, summaque negotia evolverent: aliæ verò Oecumenicæ, ut Sardicensis, & V. Synodus, in quibus tamen de Personis, non de Fide præcipue actum est: & Quini-VI. Canones tantum condidit, non Dogmata tractavit, quam tamen Orientales ut Oecumenicam, amplectuntur.*

Potuit ergo Synodus VIII. esse universalis, ut si negotia tantummodo duorum Patriarcharum, agerentur, quæ cum Ecclesiæ tranquillitatem tangerent, materiam Oecumenicæ Synodo præbere potuerunt.

C A P U T X.

Utrum Synodus, qua Photius fuit restitutus, legitima sit, & Oecumenica?

332. **I**gnatio post aliquot annos Cathedræ vindicatæ è vivis erepto, cujus sepulchrum, ob egregias ipsius virtutes, portenta, miraculaque decorarunt, quibus Ecclesia permota Apoteosim illi inter Sanctos largita est, eumque propterea ut talem, non minus Latini, quam Græci venerantur, ambitionis antiquæ Photius nequaquam oblitus inhiare ipsi cœpit, machinasque admove, ut Urbis Regiæ Thronum denuò compararet. Spes eum nequaquam fefellit: Imperator quippe Basilus, quem astutè sibi Bonorum mæiore conciliaverat, intimumque fecerat amicum, induxit, ut obtentu tranquillitatis, & pacis eum à Joanne VIII., qui Adriano II. successerat, ejusdem Ignatii in Cathedra Constantinopolitana Successorem postularet, uti defacto, misso cum munificentissimis muneribus Oratore, Pontificem interpellavit. Angustiis unde quaque Joannes præmebatur: ex una enim parte Saraceni Romana littora infestabant: ex alia verò Almæ Urbis Magnates eum molestissimè vexabant, nec erat qui adjuvaret. Hiscè incommodis, Augusti fretus auxilio quod pollicebatur, putans occurrere, Pontifex annuit precibus Imperatoris. Dirigit proindè Legatum
Pe-

Petrum Cardinalem, qui cum Eugenio Hostiensi, Pauloque Anconitano Episcopo, jam Constantinopolim missis, ob alia motiva legatione functuris, Synodo assistat, Photium ad communionem Ecclesiæ Romanæ admittat, eumque denuo in Throno collocet Patriarchali, apposita conditione, ut in Synodo veniam erratorum, & misericordiam postularet, polliceretur emendationem, neque Se in posterum Provinciarum Bulgaricarum, quas Ecclesia Romana conversione illius Nationis, Nicolao I. regnante, comparaverat, regimini ullo pacto immisceret.

333. Anno igitur Christi 879. apud Baron. tom. 10. Annal. cum Photius Epistolas omnes ad Se, ad Imperatorem, ad Clerum Constantinopolitanum, cæterosque Patriarchas à Joanne datas, astutissimè habitas in potestate sua corrupisset, Synodus hæc omnino infauſta actione prima incepta est, trecentis octoginta tribus Episcopis, ut dicitur, ornata, quos nulla, præter Chalcedonensem, Synodus Orientalis enumeravit. Legitur ibi, Photium bis à Joanne Legatione visitatum, cum duos priores Legatos Apostolicos habeamus, minimè cum ipso ante Synodum communicasse, ex Epist. Joan. tom. 3. Concil. part. ult. cum annotationibus Binii: Joannes Eracleensis Metropolita, Romanam Ecclesiam veluti omnium malorum fontem accusat, Acta Nicolai, & Adriani reprehendit, extollit Joannem, ac finguntur Legati Apostolici in Synodo munera Photio præbere, quod in Epistolis Joannis minimè continetur habuisse in mandatis.

334. Act. 2. 16. Novembris celebrata, leguntur Epistolæ Joannis Papæ ad Imperatorem, & Photium scriptæ, corruptæ tamen, in quibus
bus

bus Photius restituitur, abrais conditionibus, quas Joannes apposuerat. Irritantur Acta Nicolai I., & Adriani II.: extolluntur laudes Photii, quasi Ignatii miserantis. Referuntur Epistolæ Patriarchæ Alexandrini, Antiochiæ, & Jerosolymorum laudes Photii continentes, & condemnationem VIII. Synodi.

335. Act. 3. 18. Novembris Joannis Romani Pontificis ad Ecclesiam Constantinopolitanam, ejusque Episcopos recitata Epistola, carpitur, ut inutilis: Provinciarum Bulgariæ restitutio ad Imperatorem remittitur, & commonitorium Papæ, corruptum tamen, exponitur.

336. Act. 4. 24. Decembris fingitur adventus Legati Patriarchæ Antiocheni, & per literas etiam Jerosolymitani asserentium, Vicarios Patriarchales VIII. Synodi fuisse Sarracenorum Legatos, non Præfulum illorum, & alia similia in VIII. Synodi deprecationem scribuntur. Fingunt quoque Pœnitentes introduci, qui in præfata VIII. Synodo adversus Photium deposuerunt: quinque Canones conduntur veluti à Legatis Romanis prodeuntes. I. Provincias Bulgaricas Romano Pontifici addici. II. Nullum in posterum Laicum ad Patriarchatum Constantinopolitanum extolli. III. Præfulem Regiæ Urbis ex solis Clericis assumi. IV. Synodum adversus Photium celebratam rescindi. V. Respuentes cum Photio communicare anathemate percelli.

337. Act. 5. Die 26. Januarii anni 880. celebrata fingitur Canon quasi consensu Romani Pontificis editus, quo sancitur, excommunicatos à Patriarcha Constantinopolitano Papam Romanum, & e contra censurâ percussos à Pontifice Romano Patriarcham Constantinopoli-

nopolitanum in sui communionem admittere non posse: quo Canone omnimoda inter utrumque Patriarcham statuitur æqualitas.

338. Insuper, Photio postulante, sancitum est, neminem ex Claustris ad Episcopatum venientem, eique valedicentem posse iterum ad Insulas vocari: pœnæ quoque statuuntur adversus sæculares Magistratus quacumque ratione Antistitem vexare audentes.

339. Aët. 6. Die 10. Martii in Æde Imperatoris à Patribus Augustus Confessionem Fidei contra consuetudinem exigit. Lecto Symbolo Constantinopolitano, sancitur, ne quidquam, vel minimum ipsi addatur, oblique Latinos carpendo, qui particulam *Filioque* addiderant. Decretis his Basilius Imperator, & Filii subscribunt, etsi Photium in VIII. Synodo, cuius Decretis pariter una cum Filiis calculum apposuerat, uti Virum improbum, & pestiferum reprobasset.

340. Aët. denique 7. solemni Ritu in Sanctæ Sophiæ Templo completa, Confessio Fidei Aët. 6. approbata legitur, cui omnes Patres assensum præbuerunt, superadditis adversus variantes, aut quoquomodo immutantes, anathematismis.

341. Synodum hanc Græci Schismatici amplectuntur uti legitimam, & Oecumenicam. Marcus Ephesus, Nilus Rodiensium Metropolita, Theodorus Balsamon, & Alii. Videntum est, an ratione nitantur? Catholici verò nedum eam illegitimam, & minimè universalem censent, sed nonnulli Doctissimi, ut Leo Allatius lib. de VIII. Synod. adversus Robertum Ereigtonum Anglum, & Bellar. lib. 1. de Concil. cap. 5. de ipsa, an revera substituerit, vel potius fuerit efficta, vehementer ambigunt.

S E C T I O P R I M A

Synodus, qua Photius fuit reſtitutus, nec legitima eſt, nec Oecumenica.

342. **P**rima pars patet: quia defuit huic Synodo legitima authoritas: quamvis enim Romani Pontificis imperio fuerit collecta, missis propterea, ut præſiderent, Apostolicis Legatis; non tamen ejusdem Sedis, adeoque neque D. Petri Apostolorum Principis, & consequenter nec ipsius Christi influxu ullo fuit profecuta, aut legitimè terminata: nam in ea Sedis Apostolicæ Nuntii nihil apparent operati, quod præſidentiam indicaret; in nulla enim Actione leguntur primi, vel præscribere facienda, vel primi Actis subscribere; sed omnia Photius agebat, ipse semper primus loquebatur, ipse Decreta Patribus proponebat stabilienda, ipse seipsum semper extollebat, adeo ut in additione ad Octavam Synodum legatur: *In hac Pseudo-Synodo Photius ipse, non Legati Romani præſederunt. Imo, coacta Synodo, advenisse illi dicuntur, & à Photio ad Synodum admissi, contra Canones, contraque veterem omnium Generalium Synodorum consuetudinem; ergo Supremus Ecclesiæ Pastor ei Synodo non præſedit; ergò &c.*

343. II. Quia integra Synodi firmitas ex authoritate Sedis Apostolicæ proſluit; adeoque valida nequit esse, nisi conditiones, quas illa præscripserit, ad unguem impleantur: idem quippe Christus Dominus per Vicarium suum, & Synodum colligit, & eam, dum celebratur, dirigit, atque consolidat: at Synodus hæc in Photio restituendo conditiones à Romano Pon-

Pontifice præscriptas minimè implevit; Epistolæ enim incorruptæ, nempe Epist. 79. ad Basil. Augustum, 201. 250. ad ipsum Photium, & commonitorium à Summo Pontifice Legatis traditum jubent, à Photio veniam erratorum, & misericordiam in Synodo postulari, ac promitti emendationem, & Provinciarum Bulgaricarum plenum regimen Romano Pontifici restitui, adeout in ipsis amplius se nullo pacto audeat ingerere sub pœna excommunicationis: istæ autem duæ conditiones minimè leguntur in Synodo impletæ: quantum enim ad primam, profecto non habetur venia à Photio postulata, sed potius, quasi innocens esset, impollutus, & segregatus à peccatoribus, uti legitimus sedit Patriarcha, Epistolis corruptis, quibus loco eorum, quæ in ipsius redundabant, ignominiam, & crimina sua indicabant, laudes, & eucomia, quibus fingitur Joannes VIII. eum commendare, sibi que in authoritate facere æqualem, impudenter substituit, ut patet Act. 1. in qua hujusmodi Epistolæ corruptæ leguntur, à quibus abstulit quoque censurarum, inflictionem, si secus fecisset, & loco earum ponit solummodo juxta Sacros Canones objur-gationem; ergò quantum ad hoc prima conditio à Joanne VIII. præscripta minimè fuit impleta.

344. Secunda quoque conditio, nempe Provinciarum Bulgaricarum restitutio nequaquam in hac Synodo fuit impleta. Patres enim petitioni Summi Pontificis Act. 4. reposuerunt, hujusmodi redditionem minimè ad ipsos pertinere, sed ad Imperatorem, cui Provinciarum divisio incumbit; neque ob finem hunc Synodum fuisse collectam, uti ex Actis Vaticanis, & Columnensibus habetur, apud Baron. ad an.

Chri-

Christi 879. Idem iudicium quoque de commo-
nitorio ferendum, quod à Litteris ipsis genui-
nis fuisse diversum, nulla permittit verifimi-
litudo.

345. III. Synodus hæc tota insudat in-
vertenda Oñtava sub Adriano II., & Basilio
Augusto adversus Photium celebrata, ejus
Decreta revocat, ac detestatur, ut patet Añ. 5.
at nullam authoritatem ad hoc efficiendum,
habuit, cum Joannes VIII. Legatis suis so-
lummmodo authoritatem tribuerit Photium re-
stituendi, non verò Synodum Oñtavam infir-
mandi; ergò &c.

346. Quod verò hujusmodi mandatum in
Litteris ad Photium, & in commonitorio con-
tentum, Añta omnia in Oñtava Synodo, & in
ea, quam Adrianus II. celebravit adversus
eundem, revocandi, in præfatæ Synodi Añtis
appareat, eximiam prodit Photii temeritatem
Añta publica, atque documenta impudenter
adeò coram iis quoque corrumpentis, qui doli,
mali, ac fædistragæ insolentiæ eum poterant
arguere.

347. Nec sanè, præscindendo etiam à vi-
tiatis Epistolis, ullo pacto credendum est, Joan-
nem Antecessorum suorum Nicolai I., & Adria-
ni II., multò autem minus Synodi Oecume-
nicæ, quam, rogante ipsomet Imperatore, po-
stremus iste Pontifex collegerat, Decretis, aut
validitati voluisse derogare, & approbare Pseu-
do-Synodum, privilegia, Primatumque Ro-
mani Pontificis oblique impetentem, quem,
Antecessores omnes Romanæ Ecclesiæ Præsu-
les adeò fervidè semper sustinuerunt: maximè
quia Basilius Imperator irritationem VIII. Sy-
nodi, & Añtorum Nicolai, atque Adriani de-
letionem minimè petebat, sed solummodo eje-
ctum

etum Photium, extincto jam Ignatio, restitui, quem falsò exponebat, à Fidelibus communionis Ignatii, atque Methodii ad Insulas postulari.

348. Propterea nemo ex subsequentibus Pontificibus eam ratam habuit: Joannes enim Octavus, cum ejusdem eventum, & Legatorum suorum prævaricationem audisset, coram Populo, & Clero, ascenso Ambone, sumptisque Evangeliiis, anathema contra Photium solemniter pronunciavit, teste Formoso Papa. Epist. ad Stylian. Cappadociæ Euphatesiæ Archiepiscopum. Ut verò mala, quæ ex Pseudo-Synodo celebrata emerferant, repararet, Marinum Romanæ Ecclesiæ Diaconum, olim ad Synodum VIII. Legatum, Constantinopolim misit virum Sacerdotali constantia insignem. Acta Synodi Photianæ infirmaturum, ex Epist. Steph. VI. ad Basil.: undè tantum abest, Joannem VIII. Photio favisse. Nec quisquam ex subsequentibus Pontificibus, Marino, Adriano III. Stephano VI., aut Aliis quibuscumque inveniri potest, qui Synodum hanc approbaverit.

349. IV. Tandem Synodus hæc ostenditur nulla, & illegitima ex Patribus, qui illi adfuerant, quos Photius jactabat fuisse trecentum, & octoginta tres; aut enim Photii communionem polluti erant, & hi profectò legitimam Synodum componere nequaquam poterant, utpote depositi, atque excommunicati à Synodo Octava irreparabili damnatione; aut Methodii, & Ignatii communionis erant: at hi paucissimi numerantur, neque centenarium numerum excedebant.

350. Si dicatur, excommunicatos, & depositos ex gratia Joannis Octavi fuisse admissos; evani-

evanidum, & ridiculum commentum est: et si enim rogatus ab Imperatore Pontifex, nedum Episcopos, & Clericos, verum etiam Laicos prævaricatores clementer absolverit, eos tamen tali munere donavit, si pœnitentes fuissent, & cuperent absolutionem: at neque Photius, neque Episcopi ipsi adhærentes ullo pacto pœnitentiam ullam ostenderunt: imò superbia adeò enormi tumuerunt, ut hujusmodi Indultum respuerint, & propterea Photius ab Epistola Joannis omne, quod sonabat Jurisdictionem, & Potestatem, abstulit, ut patet ex Epist. corrupt. in tom. 3. Concil. extan.; ergò cum impœnitentes essent, in illis ea ineptitudo erat, quæ ante manebat, nempe depositio, & censura; adeoque &c.

351. II. quoque pars est perspicua: nam, Præsidentem Universalem nequaquam habuit: Legati quippè Apostolici minimè ad præsidendum fuere admissi, sed vix ad suffragium ferendum: Photius autem, qui eo munere functus est, Ecclesiæ Universalis nequaquam Pastor erat; sed admissio, eum legitimum fuisse, Ecclesiæ quidem Constantinopolitanæ, aut Orientali præerat, non Universali; adeoque nec præsidere poterat Synodo Universali.

352. Rursus hujusmodi Synodus à Joanne Octavo, qui eam precibus Basilii Augusti concesserat, minimè eam universalem, sive in literis ad Augustum, sive ad Clerum, sive ad Photium, aut in Commonitorio etiam corrupto appellat; ergò non fuit Universalis, ratio enim Oecumenici in Synodis ultimè in voluntatem Primi Jerarchæ resolvitur, eam tali titulo decorantem.

353. Ulterius: Restitutio Photii Patriarchatum secunda vice adipiscentis Synodum
Oecu-

Oecumenicam minimè requirebat : non enim de ejusdem dignitate , ut in Synodo VIII. contigit , disputandum erat , Ignatio controversiam movente ; sed mere ipsi indulgendum , ut eam , Sede Apostolica largiente , reassumeret , venia in Synodo petita ; ergo sicuti nulla coegbat necessitas , ita nec verisimile videbatur à Sede Apostolica Synodum Oecumenicam ad finem hunc fuisse concessam .

354. Denique ad Canones in eadem conditos Synodo Oecumenica minimè opus erat ; secundus enim præscribens , Episcopos Monachos effectos ad Insulas denuò ascendere non debere , Universalem Synodum non exigebat , cum sufficerent Nationale , aut Patriarchale , aut Romani Pontificis decreta . Tertius verò , qui videtur alicujus considerationis , quo sancitum est , Patriarchas , & Episcopos carceri minimè mancipari , aut verberibus affici , in Oec. Synodo æquivalenter Can. 21. præventus est .

355. Decretum autem de nulla , vel minima particula Symbolo addenda , jam ab Ephesino I. , & Chalcedonensi editum erat . Cætera motiva , nempe tranquillitatis Ecclesiæ , & alia similia ab ipsismet Photianis veluti supervacanea rejiciebantur , ausu temerario addentibus , eam Synodum ad pacandos Ecclesiæ Romanæ turbines , fuisse collectam ; cum numquam auditum sit , operâ Orientalium , Occidentalium tumultus fuisse sedatos , benè verò è contra , ut vel leviter Historiâ imbutus Ecclesiasticâ animadvertet .



SECTIO SECUNDA

*Solvuntur objecta contra primum Assertum
Puncti secundi .*

356. **O** Bji. I. Ob restitutionem Ignatii Synodus Octava collecta fuit, & legitima censetur; ergo etiam illa, quæ restituit Photium, cum uterque fuerit legitimus Patriarcha, uterque dejectus, & uterque restitutus à Sede Apostolica .

357. Resp. neg. consequ. nam ea, quæ pro restitutione Ignatii celebrata est, à legitima nedum Potestate fuit collecta, nempè Adriano II., sed etiam legitime processit, eadem Suprema Petri Potestate dirigente, atque confirmante, legesque sanctissimas pro Fidelium utilitate condente: Photiana verò, etsi sacra Joannis VIII. eam autoritas coegerit, non tamen profecuta est omnia, Photio, ejusque Sectatoribus depositis, atque excommunicatis irregulariter peragentibus, Apostolica majestate, mandatisque contemptis, atque idcirco Petri Apostolorum Principis, nedum calculo minimè approbata, sed positivè rejecta .

358. Obji. II. Unio Ecclesiæ Orientalis scissurâ laceratæ legitimæ Synodo motivum præbere potuit, ut contigit in Octava Synodo, quæ discordias ejusdem composuit ob Schisma Photianorum exortum; ergò potuit etiam præbere motivum alteri legitimæ Synodo pro unitate Ecclesiæ Constantinopolitanæ, aut inducenda, aut conservanda .

359. Resp. Potuisse quidem ob motivum allatum Synodum legitimam celebrari: at malitia Photii, ejusque Sequacium, quæ Roma-
num

num Pontificem fraude deceperant, minimè con-
 rigisse, sed potius oppositum; sedente etiam
 Photio in Throno Patriarchali, quietem, quam
 per Ignatium Ecclesia illa comparaverat, amisit,
 eamque, cum revera Ignatii, Methodiique Se-
 quaces eidem Photio minimè adhærerent, ve-
 luti lupo violenter intruso, non Pastori legiti-
 mè introducto, nequaquam fuit adepta: ipse
 verò non ovibus colligendis, uti cum Joannes
 Octavus sapienter admonebat, sed dispergen-
 dis insigni crudelitate vacabat, Ignatii, Metho-
 diique communionis Participes acerbè perse-
 quendo, ab Ignatio summe devius, qui offen-
 sores suos in spiritu lenitatis paternè comple-
 xus est.

360. *Obji. III.* Synodus hæc Canones edi-
 dit Ecclesiæ utilissimos, ambitionem quippè,
 iis conditis, Pastoratum perquirentium radici-
 tus evellebat, atque summam erga Præsules in-
 ducebat venerationem, & periculis Fidei oc-
 currebat, ejusdem Symboli integritate servata;
 ergò fuit legitima.

361. *Resp. neg. conseq.* Ad hoc enim, ut
 Synodus ritè celebretur, non sufficit Canones
 optimos efformare: hos enim Ariani quoque,
 aliique Hæretici sanctissimos excogitarunt: sed
 requiritur legitima Potestas, ac recta intentio,
 quarum utraque Synodo huic defuit: Potestas
 quidem; nam hæc à Romano Pontifice Legatis
 suis erat tributa, non autem à Photio, qui ve-
 niam erratorum in ea postulare debebat, & ca-
 ducam per ipsos dignitatem firmare; Recta
 intentio; cum ejusdem unicus fuerit scopus Se-
 dem Apostolicam deprimendi, Constantinopo-
 litanam extollendi, Photium declarandi inno-
 xium, reum Ignatium, & Romanos Pontifi-
 ces, qui ejusdem innocentiam propugnarunt.

à recto tramite Justitiæ, Veritatisque declinantes, ac propterea hujusmodi Synodi zelosi Orthodoxi numquam adhæserunt, apertèque adversus Joannem Octavum, qui Photium in statum pristinum restituerat, reclamarunt.

SECTIONE TERTIA.

*Solvuntur objecta contra secundam partem
Asserti Puncti secundi.*

362. **O** Bji. I. Summus Pontifex pro hujusmodi Synodo celebranda, Basilio Augusto, & Photio petentibus, tres Legatos misit, uti miserat Adrianus II. ad Synodum VIII.; ergò sicuti illa censetur Oecumenica, ita & ista censenda est.

363. Resp. neg. conseq. Non enim præcisa Legatorum Sanctæ Sedis missio Synodos facit Oecumenicas; cum in Primitiva Ecclesia, & sæculis subsequentibus pluries ad Synodos quoque Nationales, aut Provinciales Legati Apostolici mitti, ut eisdem præsiderent, consueverint, uti de Olio Synodo Alexandrinæ, Gangrensi, Aliisque Præsidente legimus sub Silvestro I., quas tamen novimus minimè fuisse Oecumenicas; sed voluntas quoque Pontificis, aliæque causæ requiruntur, quæ quidem huic Synodo defuerunt: at non defuerunt in Octava, ut in corpore Questionis ostensum est.

364. Obji. II. Synodum hanc Sedes Patriarchales, præter Romanam, non quidem per se, sed per Legatos decorarunt, ut patet Añ. 2. de Sede Alexandrina, & Jerosolymitana, & Añ. 4. de Sede Antiochena; ergò quantum ad hoc Oecumenica dicenda est. Numeros quoque Patrum magnus fuit, nempe 383.; ergò sicuti
Oña.

Octava Synodus Oecumenica dicitur, etsi ejusdem Patres vix numerum centenarium attigerint; ita hæc multò fortius eundem titulum promeretur, Patrum numero longè florentior, quorum nomina, teste Baron. ad an. Christi 379., A&I. describuntur; ergò hæc quoque Photiana Synodus Universalis, & Oecumenica dici potest.

365. Resp. admit. grat. ant., de quo Gravissimi Doctores magnopere dubitant, suspicantes, hæc omnia fuisse conficta, uti novimus Acta quoque arte veteratoria efficta fuisse Synodi imaginariæ adversus Nicolaum, & Ignatium efformatæ: Nego conseq. Non enim ex his præcisè titulis Synodus aliqua fit Oecumenica, cum Synodum V. nemo facit Oecumenicam, nisi post Apostolicam confirmationem. Itaque nec numerus Patrum, qui semper in Synodis etiam Oecumenicis fuit inæqualis, nec Sedium Patriarchalium suffragium, quo plures Synodi minimè Oecumenicæ præfulserunt, ut Synodus sub Menna, hujusmodi titulum inducit; sed Apostolicæ Sedis voluntas, qua factum est, Synodum Constantinopolitanam Primam, aliundè solummodo Nationalem, evadere Universalem, Damaso I. consentiente cum Occidentalibus suis.

366. Obji. III. Synodus Octava ob restitutionem Ignatii, & Schisma Orientalis Ecclesiæ inde exortum excindendum, collecta, Oecumenicæ titulum meruit; ergò etiam hæc ob eadem motiva eandem prærogativam meretur.

367. Resp. Synodo Octavæ ob alia quoque motiva hujusmodi titulum congruisse, nempe ob extinctionem omnimodam erroris Iconomachorum reviviscentis, ac eradicationem prave opinionis à Photio diffusæ, Animas scilicet

cet plures in Homine existere, quàm, utpotè Ecclesiæ Universalì noxiam, oportuit in Synodo Oecumenica damnari. Caterum etiamsi ob solam Ignatii restitutionem fuisset convocata, poterat adhuc motivum habere sufficiens ad Universalitatem: nam de Ignatio constabat ante apud omnes, eum fuisse legitimum Patriarcham, ob crimina solummodo perperam opposita dejectum: & propterea, ut ejusdem innocentia ab improbis hominibus maculata pristino nitore restitueretur, oportuit Synodum Oecumenicam colligi, tametsi non esset absolutè necessaria. De Photio autem constabat, non intrasse per ostium ad Regiæ Urbis Prælaturam, justèque fuisse depositum: ad ejus ergò restitutionem, quæ mere gratiosa erat futura, atque in ea solummodo Lapsi ad pœnitentiam erant recipiendi, Synodo Oecumenica minimè Pontifici visum est opus esse, sed sufficere Patriarchalem.

SECTIO QUARTA

Ponuntur quedam Corollaria, Græcique hortantur Schismatici, ut ad unitatem Ecclesiæ Catholicæ redeant, sequentes Ignatium, Photium verò respuentes.

368. **E**X hætenus deductis apparet, quàm injustè Græci Heterodoxi Octavam Synodum rejiciant, profectò, sive Decreta spectemus, sive Ignatii restitutionem hominis innocui, sive Photii expulsionem, omni veneratione dignissimam.

369. Liquet quoque, Synodum hanc Photianam malè uti legitimam, atque Oecumenicam recipi, in qua tot iniquitates patratae sunt,
& ba-

& basis æterni Schismatis à vera Dei Ecclesia firmata .

370. Tandem ab ea discere deberent Græci, quem hominem sequantur, lugendæ defectionis Authorem; Virum, quo deteriore Ecclesia Dei numquam experta est, sævitie Dioscorum, Arium fraudolentiâ, tumore Nestorium, artibus mentiendi, fallendique Manichæum superantem; quem plures Summi Pontifices, & Sedes ipsæ Patriarchales Orientis execratæ sunt, quemque novimus in excommunicatione objisse, à qua nescimus, an unquam fuerit absolutus .

371. Pudere Græcos deberet ab Ecclesia Romana desectentes, quam Ignatius Vir Nobilitate, Doctrinâ, Sanctitateque illustrissimus impensè dilexit; quæque è converso illum summa coluit veneratione, cujusque tutelam tot Summi Pontifices immenso labore, indefessa sollicitudine susceperunt; eumque cum Græcis describere in Cathalogo Sanctorum, cujus proinde memoria decimo Kal. Novembris ab utraque Ecclesia festivè celebratur, ejusque Græcis nedum Orthodoxi, ut Manasses, Curopalates, Nicetas Paphlago, verum etiam Schismatici, ut Zonaras, veluti Hominiis Sancti laudes extolunt, quas Viri clarissimi Joannicius Eremita, Michael Syncellus, Metrophanes Smyrnenfis Metropolita, Theognostus Archimandrita, Aliique plures magnopere celebrarunt .

372. Quantum verò ad Schisma pertinet operâ Photii excitatum; Photii quidem secunda depositione, & obitu extinctum est; ejus tamen semina remanserunt, è quibus Schisma denuò furore majori emerfit .

373. Nicolaus Mysticus, Romano Pontifici Sergio, eo quod ad quartas nuptias ob

inopiam liberorum Leonem Sapientem Augustum admisisset, irasci cepit. Alii posteriores Patriarchæ usque ad Michaelē Cærularium à Romanæ quidem Sedis obedientia explicitè nequaquam desciverunt; minori tamen, qua decebat, veneratione sunt prosecuti. Præfatus verò Michael apertum contra Romanum Pontificem, ejusque Ecclesiam bellum movit, datis ad Patriarchas Orientales literis seditiosis, quibus ad defectionem excitabantur: Leonis IX., qui pacis consilia propinabat, Legatos Apostolicos Umbertum Silvæ Candidæ Præsulem, & Federicum Archidiaconum amplissimos Cardinales, Petrumque Amalphitanum Archiepiscopum nedum inurbanè rejecit, sed lapidibus expellendos curavit impio stratagemate, cujus meminit Baron. ad an. Christi 1054.; nec atque profectò fuissent, nisi Constantinus Monomachus obstitisset.

374. Sequentes Pontifices pro Græcorum reductione pariter laborarunt; Gregorius IX. ad Germanum secundum Patriarcham Legatos misit Minoritas, & Prædicatores cum Literis sapientia refertis, quarum meminit Wadding. tom. 3. Annal. Ord. Min. ad an. Christi 1233. at, re infecta, discesserunt: puduit quippè Græcos videri errantes, etsi in Synodo Ninphæ convictos.

375. Eadem molimina Urbanus IV., & Clemens IV. effecerunt; incassum tamen. Gregorius X. Synodum Lugdunensem secundam, Oecumenicam, pro Græcis reducendis collegit, ad quam revera accessere, veritatemque amplexi sunt, Schismate ejurato; modico tamen tempore in sententia steterunt ad vomitum reversi, Joanne Vecco olim Regiæ Urbis Antistite tantam inconstantiam detestante, & in per-
spe-

specta veritate persistente , quam post acerrimas Disputationes ibidem auditas agnoverat.

376. Idipsum in Florentino contigit, Orientali, atque Occidentali Ecclesia, præmissis accuratis Disputationibus, in unum conveniente. Marcus tamen Ephesius hujusmodi fædus paulò post seditioso sermone dissolvit, Græcosque ad pristinam contumaciam revocavit, in qua nunc quoque, paucis demptis, qui Orthodoxæ adhærent Religioni, immoti perseverant.

377. Faxit Deus, ut Fratres nostri Orientales calamitate saltem fracti, qua sævissimo Turcarum Tyranno cervices subjicere compelluntur, addiscant, quod nimia fælicitate seducti dedidicerunt, unam scilicet esse Ecclesiam, cujus Caput visibile à Christo Domino Romanus Pontifex Petri Apostolorum Principis Successor statutus est: hoc enim pacto ex utraque Ecclesia fiet unum Ovile, & unus Pastor.

FINIS SECUNDÆ PARTIS.

INDEX

Tractatum, & Controversiarum, quæ
in hac Secunda Parte Epitomes
Manualis Missionariorum
Orientalium conti-
nentur.

TRACTATUS SEXTUS.

De Sacramentis in Genere.

- C**ap. I. *An Legalium Observantia sit permit-
tenda?* Pag. 5.
Cap. II. *Utrum Sacramenta nova Legis sint
Gratia effectiva, & quidem ex opere ope-
rato?* 22.
Cap. III. *Utrum septem sint Ecclesie Sacramen-
ta, nec plura, nec pauciora?* 38.

TRACTATUS SEPTIMUS.

De Sacramentis in specie.

CAPUT PRIMUM.

De Sacramento Baptismi.

- S**ectio I. *An Parvuli absque Baptismo dece-
dentes per Eucharistiam à Matribus sum-
ptam salvi fiant?* 45.
Sectio II. *An Baptismus possit iterari?* 65.
Sectio III. *An validus, ac licitus sit Baptis-
mus, in quo sicuti termersio, ita ter quoque
Forma repeteretur?* 79.
Se-

- Se&io IV. *An Forma, quâ Latini utuntur in Baptismate conferendo, legitima sit?* 83.
Se&io V. An Baptismus a quolibet ministrari queat? 88.

C A P U T I I.

De Sacramento Confirmationis.

- S** E&io I. *An Chrismatio sit de Baptismi essentia?* 95.
 Se&io II. *In quam actionem consistat Confirmatio, in Un&ione scilicet, vel in Chrismatis Confectione?* 101.
Se&io III. Quinam sit Confirmationis Sacramenti Minister? 109.

C A P U T I I I.

De Augustissimo Eucharistiæ Sacramento.

- S** E&io I. *Utrum Eucharistia in Azymo confici debeat, vel Fermentato?* 116.
 Se&io II. *An Vinum ex Uvis siccis dilutis expressum ad Sacri Calicis Consecrationem sit materia sufficiens?* 139.
Se&io III. Utrum ante Sacri Calicis consecrationem Aqua Vino sit miscenda? 146.
 Se&io IV. *Utrum forma in Eucharistiæ confectione a Gracis adhibita valida sit, & legitima?* 154.
Se&io V. Utrum Christifideles enormibus implicati criminibus verum, dum communicant, Christi Corpus percipiant? 166.
Se&io VI. An liceat tam Laicis, quam Sacerdotibus peccati mortiferi consciis Eucharistiam sumere, Exomolegess. nequaquam præmissâ? 169.

C A.

CAPUT IV.

De Pœnitentiæ Sacramento . 174.

SECTIO I. *An Pœnitentia Christiana sit nova
Legis verum Sacramentum ?* 175.

SECTIO II. *Utrum Confessio explicita peccatorum
omnium sit ad Pœnitentiæ Sacramentum ne-
cessaria ?* 195.

SECTIO III. *An consuetudo Græcorum Acatboli-
corum exigendi ab Ordinandis attestationem
Confessarii de idoneitate circa mores , ut vi-
gore ejusdem repellantur , vel admittantur ,
sustineri valeat ?* 211.

CAPUT V.

De Unctionis Extremæ Sacramento .

SECTIO I. *An Extrema Unctio sit verum nova
Legis Sacramentum ?* 221.

SECTIO II. *Solvuntur quædam Quæstiuncule de
Extrema Unctione .* 229.

CAPUT VI.

De Matrimonii Sacramento .

SECTIO I. *An Matrimonium consummatum sit
indissolubile ?* 231.

SECTIO II. *Enodantur quædam Quæstiuncule de
Matrimonio .* 245.

TRACTATUS OCTAVUS.

De Reliquis Orientalium erroribus .

- C**aput I. *An Perjurium quandoque sit licitum ?* 251.
Cap. II. *An Fornicatio simplex sit lethale peccatum ?* 256.
Cap. III. *An Imagines sculpi licite possint, sicut pingi ?* 261.
Cap. IV. *An sint admittenda Traditiones ?* 271.
Cap. V. *An Canones Apostolici sint Verbum Dei ?* 292.
Cap. VI. *Utrum Concilium Ephesinum I. legitimum sit, & Oecumenicum ?* 301.
Cap. VII. *Utrum Chalcedonense Concilium legitimum sit, & Oecumenicum ?* 322.
Cap. VIII. *An Sexta Synodus sit legitimum, & Oecumenicum Concilium ?* 343.
Cap. IX. *An Synodus octava Oecumenica, & Sancta fuerit Synodus ?* 362.
Cap. X. *Utrum Synodus, qua Photius fuit re-stituta legitima sit, & Oecumenica ?* 398.

